


Pwapwior we e Santus



Satawalese: Pwapwior we e Santus (New Testament)

**Pwapwior we e Santus
Satawalese: Pwapwior we e Santus (New Testament)**

copyright © 2024 Wycliffe Bible Translators, Inc.

Language: (Satawalese)

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-03-11

PDF generated using Haiola and XeLaTeX on 18 Mar 2025 from source files dated 11 Mar 2025

6f137abd-4cdf-5de2-a1d6-1be1650a67b8

Contents

Matthew	1
Mark	65
Luke	105
John	171

Fangkenio We Foatogiaen Matthew

*Rhaepeto Kkewe Aaen Jesus Kristus
(Luke 3.23-38)*

¹ Ikkaan tettaenin rhaepeton Jesus Kristus, iiy erhaep saengi David, iwe nge David erhaep saengi Abraham.

² Nge Abraham semaan Isaac, nge Isaac semaan Jacob, nge Jacob semaan Judah me mwaaen kkewe pwiin.

³ Nge Judah semaan Peres me Zerah (itaen ineer nge Tamar), iwe nge Peres semaan Hezron, nge Hezron semaan Ram.

⁴ Nge Ram semaan Amminadab, nge Amminadab semaan Nahshon, nge Nahshon semaan Salmon.

⁵ Nge Salmon semaan Boaz (itaen inan nge Rahab), nge Boaz semaan Obed (itaen inan nge Ruth), nge Obed semaan Jesse,

⁶ nge Jesse semaan king David.

Nge David semaan Solomon, iwe enaini me wooan niewe pwiuniwaen Uriah,

⁷ nge Solomon semaan Rehoboam, nge Rehoboam semaan Abijah, nge Abijah semaan Asa.

⁸ Nge Asa semaan Jehoshaphat, nge Jehoshaphat semaan Jehoram, nge Jehoram semaan Uzziah.

⁹ Nge Uzziah semaan Jotham, nge Jotham semaan Ahaz, nge Ahaz semaan Hezekiah.

¹⁰ Nge Hezekiah semaan Manasseh, nge Manasseh semaan Amon, nge Amon semaan Josiah.

¹¹ Nge Josiah semaan Jehoiachin me mwaaen kkewe pwiin ikkiwe re asiur nong noan Babylon.

¹² Mwirin aar asiur noa Babylon: Jehoiachin semaan Shealtiel, nge Shealtiel semaan Zerubbabel.

¹³ Zerubbabel semaan Abiud, Abiud semaan Eliakim, nge Eliakim semaan Azor.

¹⁴ Azor semaan Zadok, Zadok semaan Achim, nge Achim semaan Eliud.

¹⁵ Eliud semaan Eleazar, Eleazar semaan Matthan, nge Matthan semaan Jacob.

¹⁶ Jacob semaan Joseph iwe pwiuniwaen Maria, niewe a nainitiw Jesus iwe re faangi pwe Kristus.

¹⁷ Seig me faawu saeren aeremas saengi Abraham ngaeni David, pwan seig me faawu saeren aeremas saengi David ngaeni oaton aar asiur noa noan Babylon, pwan seig me faawu saeren aeremas saengi oaton we re asiur noa Babylon ngaeni wupwutiwen Kristus.

*Wupwutiwen Jesus Kristus
(Luke 2.1-7)*

¹⁸ Ieen wunuunun aaen Jesus Kristus wupwutiw. Maria we inan a kkefoat ngaeni Joseph, nge igiwe resaaen pwiuppwiuniuw mwo nge a pwae pwe niewe a pwoopwo reen kkemenaen Espritu Santus.

¹⁹ Nge Joseph erhai mwaaen wenewen, ese mwerhaen aessaewa Maria me weni mmweer aeremas, iwe a niunniwaennei epwene siusaengi, nge epwe feeori rhag noan mwoanomwoan.

²⁰ Igiwe erhiuwen niunniwaennei wunuunun, erhai naiun Soamwoon angkenus a pwae ngaeni noan aan ttan nge a aengaeni pwe, "Joseph we

tettaenin David, wosoapw mesag oamw wopwe pwiuniwaeni Maria, pwe iiy a pwoopwo reen kkemenaen Espritu Santus.

²¹ Epwene naini erhai aetemwaaen, iwe wopwe aeita ngaeni Jesus,* pwe iga iiy epwe aemenewaar naiun aeremas saengi aar monofit.”

²² A wen oanongaen minikkeei pwe epwe pwaeritae meeta we profeta a aepesa pwe mwaeniaei Soamwoon:

²³ “Erhai aeterhooapwut epwene pwoopwo nge a naini erhai aetemwaaen, repwe aeitae ngaeni Immanuel”, (wewen nge “Deus eno reerh”).

²⁴ Iwe oatowe Joseph a mmasetae, a feeori wunuunun miniwe angkenus we naiun Soamwoon e aepesa ngaeni. Iwe a pwiuniwaeni Maria.

²⁵ Nge Joseph ese maiur ngaeni Maria toori aan nainitiw aetewe naiun. Iwe, Joseph a aeita aetewe pwe Jesus.

2

Rhooan Emwaamw Saengi Faniuwaen Eotiw

¹ Iwe, Jesus a wupwutiw noan Bethlehem we aepinoamwon Judea wene mweoiun *king* Erotes. Ese ssiunaei mwo mwirin, nge aaemweoi mwaen saengi faniuwaen eotiw re metefaaegini wunuunun fiu ra itto Jerusalem.

² Ra aeiineo pwe, “Iya iga eno *king* we aar re Jews ee iwe a supw? Aeiweri taetaen fiu we aeginnen aan ittae me eotiw. Iwe aeiya itto pwe aeipwe aesirowu.”

³ Oatowe *king* Erotes a rongorong iiy kkepas we, a toagun aenneew noa neetipan, pwan oanongeer noa rhooan Jerusalem.

⁴ A faingiir oanongeer soamwoonir patere kkewe, me sinsein anniug kkewe nge a aeiineor aere iya iga Kristus epwe wupwutiw ee.

⁵ Iwe nge ra iura pwe, “Epwe wupwutiw me noan Bethlehem noan Judea. Pwe ieei wunuunun miniwe profeta we e foatogi pwe:

⁶ ‘Een Bethlehem noan faniuwaen Judah,

wosoapw foakkon sessoan me neeiin taeninimwaei Judah,
pwe erhai soamwoon epwe toowow saengiug, epwe nemaeni naeyi re Israel.’”

⁷ Iwe Erotes a faingiir rhooan emwaamw kkewe re ittiw me eotiw pwe repwe sseoiu noan mwoanomwoan. Iwe Erotes a aeiineo firhiir oaton taetaen fiu we.

⁸ Mwirin nge a aefengaer noa Bethlehem nge a aetiwenig ngaeniir pwe, “Oawpwe noa giutta firhiy iiy aetena. Nge aere oawwa weri, oawwa aengaeniaei, pwe ngaang ipwe pwan noa aesirowu.”

⁹ Mwirin aaen *king* we kkepas ngaeniir iwe nge ra noa. Iwe, oatowe re feffaaeraeg noa, ra pwan weri sefaaeniy fiu we reweri mwo me eotiw, nge a gommw noa memmweer a noa iugiu noa me wooan iimw we aetewe eno ee.

¹⁰ Oatowe reweri fiu we nge ra igin kker.

¹¹ Iwe, ra toonong noan iimw we nge ra weri aetewe me Maria iwe inan, iwe ra foatotiw me mmwan nge ra aesirowu. Mwirin ra iseni tiw niffang kkewe aar: *gold, frankincense* me *myrrh* iwe ra fang ngaeni.

¹² Iwe, Deus a kkepas ngaeniir noan aar ttan, pwe resoapw sefaaeniti Erotes, ina minne ra sefaaeniti faniuweer wooan eew noa aan.

Ra Kkewaeg Noa Egypt

* ^{1:21}Jesus wewen nge Soamwoon aemenewa

¹³ Mwiriir rhooan emwaamw kkewe ra noa, nge erhai naiun Soamwoon angkenus a pwae ngaeni Joseph noan aan ttan nge a aengaeni pwe, “Erotes imwu e giutta aetena pwe epwe niyy noa. Rhimwitae wopwe pwigi aetena me niemwu inan nge oawwa kkewaeg noa Egypt. Oawpwe noa no iginaan toori oaton ipwe aengaeniug pwe oawpwene sefaaen.”

¹⁴ Iwe, Joseph a rhimwitae noan rhag pwongin we iwe a pwigi aetewe me niewe inan nge ra kkewaeg noa Egypt.

¹⁵ Ra noa no Egypt toori aaen Erotes mae noa. A wen minneei pwe epwe nnet miniwe profeta a aepesa pwe mwaeniaen Soamwoon, “Iya faingiwow mwaaen na Naeyi saengi Egypt.”

Erotes a Niir Noa Aeten Bethlehem

¹⁶ Oatowe Erotes enoa giuneei noa pwe rhooawe reittiw me eotiwr eo oatupwu, nge a igin soong. Iwe, a akkiuneo pwe repwe niir noa oanongeer aetemwaaen kka a ruwowu raegiir aere wonigaet tiw me faar me noan Bethlehem me niugiu Bethlehem. A feeori minneei, pwe e ayiureoyiura ngaeni oaton taetaen fiu we a giuneei saengiir rhooawe re ittiw me eotiwr.

¹⁷ A wen minneei pwe epwe pwaeritae miniwe profeta Jeremiah e aepesa pwe:

¹⁸ “Aeremas ra rongorong
mweireirei saeng me noan Ramah.
Rachel a saengitiir aetekkewe naiun.
Iwe esa rhipino,
pwe naiun ra maenoa.”

Sefaaen Toor me Egypt

¹⁹ Mwirin aaen Erotes maenoa, erhai naiun Soamwoon angkenus a pwae ngaeni Joseph noan aan ttan me Egypt

²⁰ nge a aengaeni pwe, “Wopwe rhimwitae nge wa pwigi aetena me niemwu inan iwe, oawwa sefaaen noa wooan faniuwaen Israel, pwe rhooawe re niunniwaenrepwe niyy noa aetena nge ra maenoa.”

²¹ Iwe Joseph a rhimwitae, a pwigi aetewe me niewe inan nge ra sefaaenit Israel.

²² Nge oatowe Joseph a rongorong pwe Archelaus a ssiuweniy *king* Erotes we seman me noan Judea, iwe a mesag aan epwe noa igiwe. Noan aan ttan, Deus a pwan aetiwenig ngaeni iwe ina minne a noa wooan faniuwaen Galilee reen

²³ nge a noa no noan aepinoamw we itan Nazareth. Iwe iiei minne epwe pwaeritae minikkiwe profeta kkewe re aepesa, “Epwe ffai pwe iiy re Nazareth.”

3

Aaen John Baptist Fenai

(Mark 1:1-8; Luke 3:1-18; John 1:19-28)

¹ Reen oaton naan nge John Baptist a noa noan eew *desert* me noan Judea iwe a rhaepiy tae aan fenai.

² Iwe, a iura pwe, “Oawpwe toagun saengi monofitimi, pwe Mweoiu Naaeng a arapeto.”

³ Iiy John miniwe profeta Isaiah e aepesa kkepesan iwe eiura pwe, “Erhai a iyaekkepwas me noan *desert*:

‘Oawpwe oamoannatae ennepaen Soamwoon;
oawpwe awenecchera eew aan pwe epwe faaeraeg wooan.’”

⁴ John e memmengaag mengaag effeeor saengi iunaen *camel*, nge pwaanto na aan effeeor saengi ginin maan, nge anan mwongo ina manni neeiin waniwan ina nirhiugiunpweon me *honey*.

⁵ Aeremas ra maegeto reen saengi Jerusalem me oanongaen pwiumeo me noan Judea, pwan saengi oanongaen pwiumeo me niugiu pwupwu we Jordan.

⁶ Ra pwuwafayiuw noa monofitiir, nge John a paptismusaar noan pwupwu we Jordan.

⁷ Igiwe John a weriir towunepeer Pharisees me Sadducees kkewe re itto reen pwe epwe paptismusaar, a aengaenir pwe, “Aaemi sowufaeng! Iyo eaengaenigaemi pwe oawpwe mmwenen kkewaeg saengi aaen Deus ae-gaeregaer iga epwe aefengato?

⁸ Oawssiuweniy wegitaegimi pwe epwe pwaeri noa pwe oawwa toagun saengi monofitimi.

⁹ Oawsoapw niunniuwaennei pwe oawwa taaw saengi aaen Deus ae-gaeregaer reen aaemi aepesa pwe Abraham minne rhaepetomi. Ngaang ipwe aengaenigaemi, pwe Deus emmwenen feeori faai kaan pwe tettaenin Abraham!

¹⁰ Eew soapaen a oamoannatae pwe epwe gopiy tiw waniwan saengi waeran. Oanongaen waniwan kka ese gacch uwaan nge epwe gopogop tiw nge e aekkaerh nong noan aengaet.

¹¹ “Ngaang iya paptismusaegaemi reen rhaan pwe pwaepwaenoan aaemi toagun saengi monofitimi. Iwe nge erhai ina epwe itto me mwiriy epwe paptismusaegaemi reen Espritu Santus me aengaet. Iiy ina etaegias saengiae, nge ese fin mwo nge aaei ipwe pwigi nokkaan.

¹² A kkemwarh aan sepwin pwe epwe aeyimweoiuw fesaennigiy faiun saengi peeon. Iwe, epwe ioni fengaenniy faiun nge a iseni nong noan aan imwaen iseis, nge peeon epwe oatoranong noan aengaet we ese mmwenen gunnoa.”

Paptismusaen Jesus (Mark 1.9-11; Luke 3.21-22)

¹³ Noan oaton naan nge Jesus a itto me Galilee a itto reen pwupwu we Jordan, pwe John epwe paptismusa.

¹⁴ Nge John a menaen epwe ssiuweniy aan niunniuwaen. Iwe, a aengaeni pwe, “Iureoyiureon pwe een wopwe faer paptismusaeyaei, nge meeta een wa faer noa itto reei reen?”

¹⁵ Nge, Jesus a paniuwaeni pwe, “Wopwe nigiti noa mwo ina. Pwe igina nge sipwe tapweei mwo oanongaen meeta tipaen Deus.” Iwe John a tipieew ngaeni.

¹⁶ Igiwe rhag Jesus a moann me paptismus noa, a teeotae me noan rhaan we. Iwe naaeng a sugaeg ngaeni nge a weri Espritu Santus aan ittiw nge eweei rhag erhai *dove* a ittiw soatiw wooan.

¹⁷ Iwe nge eew mangiungiu a ittiw me noan naaeng a aepesa pwe, “Ieei naeyi mwaaen aerhaengerhaeng, iye efin tipaei reen.”

4

Sessoaton Jesus (Mark 1.12-13; Luke 4.1-13)

¹ Iwe Espritu a paeninoa Jesus noan *desert* we pwe epwe noa sessoat me reen Saeten.

² Nge mwirin aaen Jesus aecchigipin noan faaeig raaen me faaeig pwoong, iwe a meyaefi aan pecchai.

³ Iwe, Saetan we a itto reen nge a aengaeni pwe, “Aere een Naiun Deus, wopwe aengaeniir faai kaan pwe repwe ssiuwen ngaeni fenoawa.”

⁴ Nge Jesus a paniuwaeni pwe, “Pwapwior we e Santus e aepesa pwe, ‘Saapw fenoawa rhag minne aeremas repwe menaw reen, pwe re menaw reen oanongaen kkepas kka Deus a aepesa.’”

⁵ Iwe Saetan we a paeninoa Jesus Jerusalem, aepinoamw we e santus, nge a noa aiuwtae pwiuneoi we oarosaen taegias me reen *Temple* we.

⁶ Iwe, a aengaeni pwe, “Aere een Naiun Deus, wa oatoroagotiw me igeei, pwe Pwapwior we e Santus e aepesa pwe, ‘Deus epwe akkiuneeor naiun angkenus repwe aemmwenoag. Repwe ammwarhiug tae noan paiiur pwe pirhemw mwo nge ete woas ngaeni faai.’”

⁷ Jesus a paniuwaeni pwe, “Pwapwior we e Santus epwan aepesa pwe, ‘Wosoapw soatoni Deus na oamw Soamwoon.’”

⁸ Mwirin Saetan we a pwan paenitae Jesus wooan eew rhug igin taegias nge a pwaeri ngaeni mweoiun feoniufan me oanongaen minikkena nning.

⁹ Iwe, a aengaeni Jesus pwe, “Oanongaen minikkeei ipwe ngaenneog, aere wopwe foatotiw me weni mmwaei nge wa oassotupw ngaeniaei.”

¹⁰ Jesus a paniuwaeni pwe, “Siunoa Saetan! Pwe Pwapwior we e Santus e aepesa pwe, ‘Wopwe oassotupw ngaeni Deus na oamw Soamwoon nge iiy rhag wopwe engaang ngaeni.’”

¹¹ Iwe rhag nge Saetan we a siusaengi Jesus, iwe nge angkenus ra itto tipaengi.

*Jesus a Rhaepiy Tae Aan Engaang Noan Galilee
(Mark 1.14-15; Luke 4.14-15)*

¹² Igiwe Jesus a rongorong pwe ra iseni nong John noan kanepwus, iiy a noa Galilee.

¹³ Ese notiw noan Nazareth, pwe a noa no noan Capernaum, eew aepinoamw oaron meoneoiniuniun Galilee noan faniuwaen Zebulun me Naphtali.

¹⁴ A feeori minneen pwe epwe nnet miniwe profeta Isaiah e aepesa pwe,

¹⁵ “Faniuwaen Zebulun me faniuwaen Naphtali

wooan aanna enoa ngaeni eew meoneoiniun,

peiginoan pwupwu we Jordan

me Galilee, faniuweer rhooawe re Gentiles!

¹⁶ Aeremas kkewe reno noan rorhappiung

repwene weri eew seram faeregite,

nge rhooakkema reno noan rorhappiungiun faniuwaen mae

ina eew seram epwene ttinitiw wooar.”

¹⁷ Saengi iiy oatowe nge Jesus a rhaepiy tae aan fenai, “Oawpwe toagun saengi monofitimi, pwe Mweoiu Naaeng a arapeto!”

*Jesus a Faingir Faaman Rhoowan Fita
(Mark 1.16-20; Luke 5.1-11)*

¹⁸ Nipwaen aaen Jesus a faaeraeg ngaerhei meoneoiniuniun Galilee, a weriir riiurhai rhoowan fita nge re pwipwi, Simon (pwan itan Peter) me Andrew iwe pwiin, rewuuug fetaen iig noan iiy meoneoiniun we.

¹⁹ Jesus a aengaeniir pwe, “Oaw itto tapweaei pwe ipwe oasuguuna ngaenigaemi wunuunun aaemi oawpwe fita aeremas.”

²⁰ Oatowe rhag nge ra siusaengi wuug kkewe aar nge ra tapweei noa mwirin.

²¹ Jesus a pwan faaeraeg noa nge a pwan weriir riurhai mwaaen pwipwi, James me John, ikkiwe naiun Zebedee. Reno wooan pwoot we waar reen mwaaen we semeer Zebedee, re aemmwena wow wuug kkewe aar. Iwe nge Jesus a faingiir.

²² Oatowe rhag nge ra siusaengi pwoot we waar me mwaaen we semeer nge re tapweei noa mwirin.

Jesus e Fenai me Aecchipwaar Aeremas

(Luke 6.17-19)

²³ Iwe, Jesus a mwet fetaen wooan oanongaen Galilee, nge e fenai me noan wutteer Jews we nge e fenaiuw Kkepas Mwamwaai we reen Mweoiu Naaeng, me pwan aecchipwaar aeremas kkewe eweriir mesemesaen semwaai.

²⁴ Kkepesaen Jesus a rheeoi noa wooan oanongaen faniuwaen Syria, iwe aeremas ra pweipwog to oanongeer rhooa semwaai reen, rhooakka eweriir mesemesaen semwaai me metaeg, aeremas kka waen aniu, man ngong me aeremas kka re maemerhoar. Iwe, Jesus a aecchipwaar tae oanongeer.

²⁵ Re towunap aeremas kka rettapw mwirin Jesus saengi Galilee me Decapolis, saengi Jerusalem me Judea me faniuw we eno epeig me reen pwupwu we Jordan.

5

Jesus a Fenai me Weei Rhug

¹ Igiwe Jesus a weri pwuwaen aeremas kkewe, iwe a ittae wooan eew rhug a ittae mooat tiw. Rhooan kkayeо kkewe naiun ra itto reen.

² Iwe, Jesus a rhaepetae aan fenai ngaenir:

Oanongonniuwaen Wenepwu

(Luke 6.20-23)

³ “Ra wenepwu rhoоan giunеi pwe ngeoniiur e affayeо; pwe iir repwe mweoiuni Mweoiu Naaeng.

⁴ Ra wenepwu rhoоa nee tip cchoaw nee tipeer, pwe Deus epwe rhipeer.

⁵ Ra wenepwu rhoоa mesoan, pwe iir repwe faniuwaeni feoniufan.

⁶ Ra wenepwu rhoоan mwerhaen feeori minne epwiung me faaen mesaen Deus,

pwe Deus epwe fang ngaenir minikkena retipaeni.

⁷ Ra wenepwu rhoоa ffayeо, pwe Deus epwe pwan ffayeо ngaenir.

⁸ Ra wenepwu rhoоa nimegacch nee tipeer, pwe iir repwe weri Deus.

⁹ Ra wenepwu rhoоan engaengaen oapoas, pwe Deus epwe faingiir pwe iir naiun.

¹⁰ Ra wenepwu rhoоa aewwaeiraes reen aar feeori nee tipaen Deus, pwe iir repwe mweoiuni Mweoiu Naaeng.

¹¹ “Oaw wenepwu aaemi rhoоana re ffeeoretae kkepesaemi, nge re aewwaeiraesigaemi, me aepesa aenneewagaemi pwe aegin ngaang.

¹² Oawkker nge a mwamwaai nee tipaemi, pwe a yor panuwaemi ina eigin faeregite me naaeng. Pwe iiei wunuunun aar pwan aewwaeiraesiir profeta kkewe regommw me mmwaemi.

*Aesiig me Seram**(Mark 9.50; Luke 14.34-35)*

¹³ “Aaemi oawwa taeppen rhag aesiig faaen iteer aeremesaen feoniufan. Pwe aere aesiig esa saaet no, esoapw mmwen sipwe aesaati sefaaeniy. Iwe esa yor no ipitan, epwe aekkaerh wow pwe aeremas repwe pwuri fetaeneei.

¹⁴ “Aaemi seremaen feoniufan. Eew aepinoamw ne eno wooan eew rhug esoapw mmwenen mwoanonoa.

¹⁵ Esooar erhai aeremas ne epwe figi eew oappwun nge a iseni nong faaen eew saepiy, pwe epwe faer iseni tae wooan nenien, pwe epwe aesseremaar rhooan iimw we.

¹⁶ Epwe iiei wunuunun seremaemi aan epwe ttin memmweer aeremas, pwe repwe giuneei aaemi wegitaeg mwamwaai iwe nge re aepingepinga Semaemi me wooai naaeng.

Jesus a Fenaiuw Wunuunun Anniug

¹⁷ “Oawsoapw niunniuaenner pwe iya itto pwe ipwe oamoai noa Anniug kkewe aaen Moses me aar profeta kkewe kkepesaen fenai. Ngaang ise itto pwe ipwe itto oamoai noa, pwe ifaer itto pwe ipwe pwaeritae minna wenewenén.

¹⁸ Enmetaen, ipwe aengaenigaemi, pwe epat mwo aere efai mwo iirh me reen anniug eei nge esoapw aekkaerh noa toori aan toarop noa naaeng me soanop pwan toori aan epwe moann oanongaen meeta.

¹⁹ Iwe, ngaere erhai ese tapwee mwo nge eew anniug mwittig kkeei nge e oasuguuna ngaeniir aaemweoi pwe repwe pwan taeppen iiy, iiy epwe igin sessoan me noan Mweou Naaeng. Ngaere erhai epwe tapwee iiy anniug kkeei nge e oasuguuna ngaeniir aaemweoi pwe repwe pwan taeppen iiy, iiy epwe taegias me noan Mweou Naaeng.

²⁰ Ipwe aengaenigaemi, pwe aaemi oawpwe mmwenen toonong rhag noan Mweou Naaeng iginne aaemi emwamwaai wegitaegimi saengiir sinsein anniug me Pharisees kkewe.

Fenaiuw Wunuunun Soong

²¹ “Oawwa rongorong aar aengaenir aeremesaen mweoiwe pwe, ‘Wosoapw nni menaw aeremas. Iyo enni menaw aeremas epwe toonong noan nenien apwiung.’

²² Nge ngaang ipwene aengaenigaemi: iyo e esoong ngaeni pwiin nge epwe noa noan nenien apwiung, nge iyo e aengaeni pwiin pwe, ‘Een esooar ipitoamw,’ epwe noa noan nenien apwiung na e taegias, nge iyo e aengaeni pwiin pwe, ‘Een wopwurh,’ nge epwe noa noan aengaetaen niferno.

²³ Iwe aere wopwe pwigitae oamw oasoar ngaeni Deus wooan antar, nge a maeng ngaeniug pwe pwiimw echoaw tipan woamw,

²⁴ wa nigit mwo oasoar we oamw weni mmwan antar nge wa sefaaen, pwe oawpwe oamwusomwus fengaen. Mwirin wa sefaeneto pwigitae oasoar we oamw ngaeni Deus.

²⁵ “Aere erhai a mwerhaen pwigiug noa noan nenien apwiung, wopwe mwetekkaein saenet ffin nipwaen iga erhiuwen yor oaton, weni mmwaen iga wopwe toori nenien apwiung. Pwe oatona wopwe toori rhag nenien apwiung, ina nge een wopwene noa reen soaw apwiung we, nge iiy epwene aefengoag noa nee paaiur police, nge iir repwene iseniug nong noan kanepwus.

²⁶ Enmetaen, ipwe aengaenigaemi, pwe iginaan iga wopwe noa no e toori oamw wopwe piungiutiw oanongaen paniuwaen monofitimw.

Fenaiun Oamonofitin Maiur Ngaenir Maan Pwiuppwiniuw

²⁷ “Oawwa rongorong pwe re aepesa pwe, ‘Wosoapw maiur ngaeni pwiniuwaen erhai.’

²⁸ Nge ngaang ipwe aengaenigaemi pwe: aere erhai mwaaen a pipiiy erhai rhooapwut nge a rig nee tipan ngaeni, iiy a fasiun monofit reen aan maiur ngaeni pwiniuwaen erhai me noan nee tipan.

²⁹ Iwe, aere ifirhin mesoamw epaenius nong noan monofit, oannusuwow wa oatoranoa. Efaer gacch igine egiufet ireiren oanongoamw epwe ppiungiunoa, mmwaen igine wunusaen oanongoamw epwe aekkaerhnong noan niferno.

³⁰ Ngaere ifirhin poawumw epaenius nong noan monofit, gopyi noa wa oatoranoa. Efaer gacch igine egiufet ireiren oanongoamw epwe ppiungiunoa, mmwaen igine wunusaen oanongoamw epwe toonong noan niferno.

*Fenaiuw Wunuunun Mweoinoa
(Mat 19.9; Mark 10.11-12; Luke 16.18)*

³¹ “Epwan aepesa pwe, ‘Erhai ne easiuw noa pwiniuwan nge epwe ngaennee i newe erheo pwapwioron mweoinoa.’

³² Nge ngaang ipwe aengaenigaemi: aere erhai mwaaen a mweoi saengi pwiniuwan reen ese tiwegin meeta ppweoniu, nge soapw reen aaen newe maiur ngaeni pwiniuwaen erhai, iwe wonowe minne a monofit pwe a feeori newe epwe oamonofit reen aan pwuppwiuniw sefaaen, nge iiy mwaaen na a pwiniuwaeni, ina iiy a pwan feeori monofit.

Fenaiuw Wunuunun Aekkepan

³³ “Oawwa pwan rongorong aar aengaenir aeremesaen mweoiwe pwe, ‘Wosoapw misimis oamw aekkepan, nge wopwe faer feeori meeta e oamw aekkepan* ngaeni Deus.’

³⁴ Nge ngaang ipwe aengaenigaemi: wosoapw aekkepan rhag. Wosoapw aekkepan faaen itaen naaeng, pwe ina nenien Deus,

³⁵ nge soapw pwan faaen itaen soanop, pwe ina aaen Deus nenien aseoseon pirheen, nge soapw pwan faaen itaen Jerusalem, pwe ina aepinoamwon King we egin taegias.

³⁶ Wosoapw pwan aekkepan mwo nge faaen itaen rhimwemw, pwe wosoapw mmwenen aepwerhepwerha aere oarhonaanoa eyaen aen-nirhimwemw.

³⁷ Wopwe aepesa, ‘Ewaer,’ aere ‘Aapw,’ pwe ese tiwegin minne wonaaen aepesa nge e itto saengi Man Aenneew we.

*Fenaiuw Wunuunun Appaniuwaenin Aenneew
(Luke 6.29-30)*

³⁸ “Oawwa rongorong pwe re aepesa pwe, ‘Aere erhai e aettiwow efai mesoamw nge paniuwaenin wa pwan aettiwow efai mesan, nge aere erhai e aettiwow efoarh ngiimw, nge paniuwaenin wa pwan aettiwow efoarh ngiin.’

³⁹ Nge ngaang ipwe aengaenigaemi: oawsoapw paniuwaeni aaen aeremas aenneew ngaenigaemi. Aere erhai e ppeosepa ne oawusupoamw me wooan peig mwaaenemw, pwan wegeti ngaeni ne oawusupoamw me wooan peig rhooapwutomw.

⁴⁰ Aere erhai e pwigiug noa noan nenien apwiung pwe epwe pwigi mengagiumw mengaag, faer pwan nigiti ngaeni siketa na pwe pwan mengaag-iun.

* ^{5:33} aekkepan: ppwon faaen mesaen Deus ngaere aeremas

⁴¹ Aere erhai sonotaw e akkiuneog pwe wopwe pwigi ngaeni pisaegin noan eew *mile*, faer pwigi ngaeni noan ruwowu *miles*.

⁴² Aere erhai a tingoareog meeta oamw, ngaenueei, ngaere erhai a mwerhaen aeyae mwo meeta pisaegimw, fang ngaeni.

Fenaiuw Wunuunun Aarh Sipwe Aerhaengiir Rhooan Oapwutaegirh (Luke 6.27-28, 32-36)

⁴³ “Oawwa rongorong pwe re aepesa pwe, ‘Oaw aerhaengiir rhooan weni oaromi, nge oaw oapwutaar rhooan oapwutaegaemi.’

⁴⁴ Nge ngaang ipwe aengaenigaemi: oawpwe aerhaengiir rhooan oapwutaegaemi nge oawwa maeipin faaen iteer rhoakkrena re aewwaeiraesigaemi,

⁴⁵ pwe oawpwe no pwe naiun minna Semaemi wooainaaeng. Pwe iya aettina feeorian aenet wooar aeremas aenneew me aeremas gacch, nge a apungiutiw worhow wooar rhoakkrena reffeeor mwamwaai me rhoakkrena reffeeor aenneew.

⁴⁶ Meeta faan Deus epwe fang niffengaemi aere oawaerhaengiir rhag rhooa na re aerhaengigaemi? Pwan rhooan iyoiyon mwo tax nge refreeori minna.

⁴⁷ Aere weni maereyaeremi rhag minne wogaen kekkepas ngaenii, ina nge minna wofeeori nge ese pwan wen saengiir aaemweoi. Pwan re Gentiles mwo nge refreeori taeppen minna.

⁴⁸ Iwe aaemi oawpwe igin menaw gacch pwe oawpwe taeppen rhag gacchiun minna Semaemi wooainaaeng.

6

Fenaiuw Wunuunun Ammwen Ngaeniir Rhooa Affayeo

¹ “Oawpwe aefenniy pwe oawsoapw feeori feoffeeoriun aaemi tiwegin faaen meseer aeremas pwe repwe weri meeta oawwa feeori. Pwe aere oawfeeori taeppen minneen nge oawsoapw pwigi paniuwaemi me reen minna Semaemi wooainaaeng.

² “Iwe aere oawfang ngaeni erhai man affayeo eew aegiaeg, oawsoapw aeni oangonongan minne oawwa feeori, oawte taeppeer rhooa oatupwutupw kka refreeori noan wutteer Jews me pwan wooan ennap. Refreeori minneen pwe aeremas repwe ngonotiir. Ennetae, ipwe aengaenigaemi pwe ra moanon pwigi paniuweer.

³ Ngaere oawwa fang ngaeni erhai man affayeo eew meeta, oawpwe feeori noan mwoanomwoan, pwe rhooan oaromw mwo nge resoapw giuneei wunuunun.

⁴ Ina nge epwe mwoanomwoan meeta oawwa feeori. Nge Semaemi a weri minne oawwa feeori noan mwoanomwoan epwe aesefaaeni ngaenigaemi paniuwaenin.

Fenaiuw Wunuunun Maeipin (Luke 11.2-4)

⁵ “Igine oawpwe maeipin, oawsoapw taeppeer rhooa oatupwutupw kkewe. Re tipaeni repwe gaen iutae nge ra maeipin me noan wutteer Jews me noan oapwugopwugon ennap, pwe aeremas repwe weriir. Ennetae, ipwe aengaenigaemi, pwe ra moann me pwigi paniuweer.

⁶ Ngaere aaemi oawpwe maeipin, oawpwe toonong noan aaemi sengkin, oawwa ttiy noa asam nge oawwa maeipin ngaeni Semaemi ina oawse weri. Iwe, Semaemi epwe weri minikka oawwa feeori noan mwoanomwoan epwe aesefaaeni ngaenigaemi paniuwaenin.

⁷ “Ngaere oaw maeipin, oawsoapw aeyae towunepaen petenaen kkepas kka esooar faan, taeppeer re Gentiles regaen feeori minneei, pwe re maengiy pwe aar deus repwe aiussaening aar maeipin pwe iga eigin faeremworh.

⁸ Oawsoapw taeppeer, pwe Semaemi a fasiun giuneei meeta aaemi mwerhaen weni mmwaen iga aaemi oawpwe tingoar ngaeni.

⁹ Iwe, epwe ieei wunuunun aaemi oawpwe maeipin:
 ‘Semmaem wooainaeng,
 aemwo epwe ssoar minna itoamw ina e santus,
¹⁰ aemwo Mweoiumw epwe war,
 aemwo nee tipoamw epwe no
 wooan feoniufan wunuunun rhag noan naaeng.
¹¹ Ngaennegemaem mwongoi raaeneei aeipwe mwongo igina.
¹² Wopwe saeneti noa aemaem monofit,
 wunuunun pwan aemaem aeiya saenetir noa rhooakkena re monofit
 ngaenigemaem.
¹³ Wosoapw oatonongegemaem noan sessoat,
 nge wopwe aengesagemaem saengi Man Aenneew we.
 [Pwe oamw rhag mweoi me manaman me nning esoapw iug. Amen.]’*

¹⁴ “Aere oawpwe saeneti noa aar aeremas monofit, ina nge Semaemi wooainaeng epwe pwan saeneti noa aaemi monofit.
¹⁵ Nge aere oawsoapw saeneti noa aar aeremas monofit, Semaemi esoapw pwan saeneti noa aaemi monofit.

Fenaiuw Wunuunun Aecchigipin

¹⁶ “Ngaere oawpwe aecchigipin, oawsoapw mas affayeo taeppeer rhooa oatupwtupwkkewe regaen feeori. Ra mas affayeo noa, pwe aeremas repwe giuneei pwe ra aecchigipin. Ennetaan, ipwe aengaenigaemi, pwe ra faer moanon pwigi paniuweer.

¹⁷ Ngaere aaemi oawaecchigipin, oawpwe woraes me kkomwuuw rhimwemi,

¹⁸ pwe aeremas resoapw giuneei pwe oawwa aecchigipin, pwe aaen manna rhag Semaemi ina oawse weri minne egiuneei. Nge Semaemi iwe egiuneei minne oawwa feeori noan mwoanomwoan epwe aeseefaaeni ngaenigaemi paniuwaenin.

Fenaiuw Wunuunun Wenepwuwarh me Wooai Naaeng

(Luke 12.33-34)

¹⁹ “Oawsoapw iseis wiinaemi wooaisoanop, pwe manepwur me iyow repwe fereeii noa, nge rhooa mwoarho repwe fereeii nong nge ra pirifa.

²⁰ Nge oawpwe faer iseis wenepwuwaemi wooainaeng, iga manepwur me iyow resoapw mmwenen fereeii, nge rhooa mwoarho resoapw mmwennen fereeii nong nge ra pirifa.

²¹ Pwe pwunnomi epwe no rhag iga wenepwuwaemi eno ee.

Fenaiuw Wunuunun Seremaen Oanong

(Luke 11.34-36)

²² “Maas eweei rhag oappwunon oanong. Pwe aere mesoamw effat, oanongan noa oanongoamw epwe seram.

²³ Ngaere mesoamw ese ffat, oanongan noa oanongoamw epwe rorhappiung. Pwe aere minna aesseremaen oanongoamw ese seram, nge epwe ifa mwo rorhappiungin minna nee tipaemi!

* ^{6:13} Petenan eei nge e soano noan aekkaew petenan kka e foatofoat noan kkepesaen Greek.

*Fenaiuw Wunuunun Deus me Minikka Pisaegirh
(Luke 16.13; 12.22-31)*

²⁴ “Ese mmwen erhai epwe engaang ngaeniir riiurhai maasta. Ina epwe oapwuta erhai, nge aerhaengi iwe erhai, me ngaere epwe mwamwaai ngaeni erhai, nge a aenneew ngaeni erhai. Ese mmwen oawpwe engaan-gappag ngaeni Deus me senaapiy.

²⁵ “Ina minne ipwe aengaenigaemi, pwe oawsoapw aiunaeng reen mwongo me rhaan pwe oawpwe menaw reen, ngaere mengaagiun oanon-gaemi. Pwe meeta, ese rhaeng rhag menaw me mmwaen mwongo? Nge ese rhaeng noa rhag oanong me mmwaen mengaag?

²⁶ Oaw pipiir man aeniaen: Rese foat faiun waniwan, me giniiy uwaan, pwe repwe seoyeoninong noan soko, nge Semaemi wooainaeng efang rhag aeneer. Pwe meeta, ese temoag noa egius rhaengimi memmweer man aeniaen?

²⁷ Eyor neeimi epwe mmwenen enaenaei noa egius menewan reen aan aiunaeng?[†]

²⁸ “Meeta oawaiunaeng reen mengaag reen? Oawfan ngaeni peeon waniwan wunuunun aar menawtae: rese engaang, nge rese pwan ffeeor mengaagiur.

²⁹ Nge ngaang ipwe aengaenigaemi, pwe igiwe mwo *king* Solomon e menaw iwe erhai man ssow wiinan nge esooar mengaagiun ne enning noa me mmwaen peeon waniwan kaan.

³⁰ Pwe Deus minne aememmengaagiur fetinen neeiin waniwan—fetin kka eyor igma, nge resoapw nonoa naiu, pwe ra figaeg noa newumw. Pwe meeta, Deus esoapw mmwenen aememmengaagiugaemi? Me gaen mwittiginen aaemi niugiuniug!

³¹ “Ieei minne oawsoapw aiunaeng nge aepesa pwe, ‘Meeta sipwe mwongo?’ aere ‘Meeta sipwe iunumi?’ aere ‘Meeta sipwe memmengaag?’

³² (Pwe ikkaan minikka re Gentiles retip mwaramwar reen.) Semaemi wooainaeng e giuneei pwe oawpwe ammweneni oanongaen minikkeei.

³³ Nge oawpwe gommwaen giutta minna Mweoiun Deus me minikkena emwerhaen pwe oawpwe feeori, iwe, iiy epwe ngaennegaemi oanongaen minikkeei.

³⁴ Ieei minne oawsoapw aiunaengiy naiu reen, pwe naiu epwe sipegin feeori aiunaengin. Essoar ipitan sipwe oatomoga noa aiunaengiy noan eraaen me eraaen.

7

*Wunuunun Apwiungiun Aeremas
(Luke 6.37-38, 41-42)*

¹ “Oawsoapw apwiungi aeremas, pwe Deus ete pwan apwiungiugaemi.

² Pwe Deus ina epwe pwan apwiungiugaemi taeppen rhag aaemi apwiungiur aaemweoi, epwe pwan aeyae ngaenigaemi anniug kena oawpwan aeyae ngaeniir aaemweoi.

³ Meeta wa weri peipei na noan mesaen pwiimw, nge wose weri soapwon irae mwu noan mesoamw?

⁴ Epwe ifa wusun oamw wopwe aengaeni pwiimw pwe, ‘Itto ipwe tipwei wow peipei mwu noan mesoamw,’ iga een nge eno eew soapwon irae noan mesoamw?

[†] **6:27** aere: *Eyor erhai me neeimi ne epwe mmwen aenaenaeinoa egius taegiasan oanongan reen aan aiunaeng?*

⁵ Een erhai man oatupwutupw! Wopwe mmwaen tipwei wow soapwon irae mwu noan mesoamw, nge wopwe naaen weri gacchiuw oamw tipwei wow peipei na noan mesaen pwiimw.

⁶ “Oawsoapw ngaennee gonaag minne essoar, pwe rete pwan toagun nge regiugaemi. Oawsapw oatora ngaenir sino aaemi faiun usowus eyor ipitan, pwe iir repwe pwuritiw faaen pirheer.

*Tingoar, Giutta me Apiungiupiung
(Luke 11.9-13)*

⁷ “Oawpwe tittingoar, ina nge epwe yo ngaenigaemi; oawpwe giutta, ina nge oawpwe weri; oawpwe apiungiupiung wooan asam, ina nge epwe sugaeg ngaenigaemi.

⁸ Pwe iyo a tittingoar nge epwe yo ngaeni, nge iyo a giutta epwe weri, nge asam epwe sugaeg ngaeni iyo na e apiungiupiung.

⁹ Iyo neeimi saam epwe ngaennee naiun efai faai igine e tingoar fenoawa?

¹⁰ Ngaere epwe tingoar erhai iig, wopwe mmwenen ngaennee erhai sowufaeng?

¹¹ Iwe, inamwo aaemi aeremas aenneew, nge oawwa giuneei aaemi oawpwe fang ngaenir naimi minikka e mwamwaai. Epwe pwan ifa mwo nepan aaen minna Semaemi wooainaeng ngaenner minikka e mwamwaai rhooakkena re tingoar ngaeni!

¹² “Oawpwe feeori ngaenir aeremas taeppen meeta na aaemi oawmwerhaen pwe repwe feeori ngaenigaemi. Pwe iei oawuton aaen Moses Anniug me aar profeta kkewe kkepesaen fenai.

*Asam we e Rheogit
(Luke 13.24)*

¹³ “Oawtonong noan asam na erheogit! Pwe aesemaen niferno ina erheonap, nge aan na eyan ngaeni nge emererhaeg, nge towunepaen aeremas retaeri.

¹⁴ Nge aesemaen menaw ina erheogit, nge aan na eyan ngaeni nge ewaeiraes, nge fitiman rhag aeremas kka rrhuungi.

*Efoarh Waniwan me Uwaan
(Luke 6.43-44)*

¹⁵ “Oawpwe aefaaennigaemi reer profeta oatupwutupw kkewe, ra itto reemi taeppen rhag *sheep*, nge neetipeer a aeffitaeg ngaeni rhag *wolves* kkewe remwoarho.

¹⁶ Oawpwe giuneer reen meeta kka ra feeori. Aekkaew irae towfanfan resoapw uwaeni uwaen *grape*, nge fetin towfanfan resoapw uwaeni uwaen *fig*.

¹⁷ Efoarh waniwan gacch epwe uwa gacch, nge efoarh waniwan aenneew epwe uwa aenneew.

¹⁸ Efoarh waniwan gacch esoapw mmwenen uwa aenneew, nge efoarh waniwan aenneew esoapw mmwenen uwa gacch.

¹⁹ Nge oanongaen waniwan kka ese gacch uwaan repwe gopogop tiw pwe repwe aekkaerhnong noan aengaet.

²⁰ Iwe ina aaemi oawpwene giuneer profeta oatupwutupw me reen minikka ra feeori.

*Ngaang Ise Giunegaemi
(Luke 13.25-27)*

²¹ “Saapw oanongeerr rhooakka re faingiae pwe ‘Soamwoon, Soamwoon,’ nge repwe toonong noan Mweoiu Naaeng, pwe rhooawe rhag refreeori nee tipaen minna Semaei wooainaeng.

²² Ngaere enoa tooto Raaenin Apwiung, repwe gin ssow rhooa kkomwu repwe aengaeniaei pwe ‘Soamwoon, Soamwoon! Faaen itoamw minne aeiya fenaiuw minna oanoon Deus, faaen itoamw minne aeiya asiur wow towunepeer aniu aenneew, nge pwan faaen itoamw minne aeiya feeori towunepaen kkeman.’

²³ Iwe ngaang ipwene aengaeniir pwe, ‘Ngaang ise giunegaemi. Oawsiu noa me reei, aaemi man aenneew kena.’

Riiurhai Rhooan Kaiu Iimw

²⁴ “Iwe iyo kka re rongorong minikka mwaeniaei nge retapweei, ina nge re taeppen mwaaen reepiy we e aiuwtae imwan wooan porow.

²⁵ Iwe, a piung worhow, nge a pwurutae rhaan nge a igin ngiung aaeng. Nge iiy iimw we ese toaroponoa, pwe iga e kaiutae wooan porow.

²⁶ “Iwe nge iyo kka re rongorong minikka mwaeniaei nge rese tapweei, ina nge ra taeppen erhai mwaaen tipoarorh, e aiuwtae imwan ppuy.

²⁷ Iwe, a piung worhow nge a pwurutae rhaan nge a igin ngiung aaeng. Nge enoa toarop iimw we, nge a ifa mwo nepaen aan ffeir noa!”

Minna Nemaeniaen Jesus

²⁸ Igiwe Jesus a moann aan aepesa minikkaan nge pwuwaen aeremas ra mwaar reen wunuunun aan fenai,

²⁹ pwe ese taeppen sinsein anniug kkewe, pwe iiy e fenai faaen minna nemaenian.

8

Jesus e Aecchipwa Erhai Mwaaen

(Mark 1.40-45; Luke 5.12-16)

¹ Igiwe Jesus a ittiw me wooan rhug we, retowunap aeremas kka retapwetiw mwirin.

² Iwe, erhai mwaaen eweri kaenepaai a itto reen Jesus, a foatotiw me mmwan nge a aengaeni pwe, “Menap, aere womwerhaen, wa aecchipwanoa aaei semwaai.”

³ Jesus e angenoa nge a geotteopa mwaaen we, nge a paniuwaeni pwe, “Ngaang imwerhaen, wone cchipw noa!” Reen rhag oatowe nge a cchipw noa miniwe semwaaiun mwaaen we.

⁴ Iwe Jesus a aengaeni pwe, “Pipiiy, wosoapw aengaeni mwo nge erhai minnei, nge wa faaeraeg uwen noa reen patere pwe epwe weriug. Iwe nge a feeori oasoar we Moses e akkiuneo, pwe epwe pwaeri ngaenir aeremas pwe wa nimegacch noa.”

Jesus a Aecchipwa Erhai Rhooan Engaang Naiun Sonotaw we

(Luke 7.1-10)

⁵ Oatowe Jesus a toonong noan Capernaum, erhai soamwoonin sonotawaen Rome a itto nge a tingoar maaw ngaeni,

⁶ iwe a iura pwe, “Soamwoon, naeyi rhooa engaang a no rhag nee iimw, ese mmwenen mwagiut, nge a pwan igin metaeg.”

⁷ Jesus a aengaeni pwe, “Ipwe noa pwe ipwe noa aecchipwa.”

⁸ Nge soamwoonin sonotaw we a aengaeni pwe, “Soamwoon, ngaang soapw erhai man yor ipitan reen oamw wopwe itto noan imwaei. Nge wopwe aepesa rhag epat kkepas, nge rhooa engaang we naeyi epwe mamaaw tae.

⁹ Ngaang mwo nge pwan ngaang erhai mwaaen ino faaen nemaeniaen erhai e soamwoon saengiae, nge epwan yor sonotaw kka reno faaen nemaeniae. Ipwe aengaeni inaan pwe, ‘Wopwe noa,’ iwe a noa; iya aengaeni inaan

pwe, ‘Wopwe itto,’ iwe a itto; iwe iya aengaeni rhoaan akkiuneo, ‘Feeori minneen,’ iwe a feeori.”

¹⁰ Igiwe Jesus a rongorong kkepas kkeli, a riutae reen nge a aengaenir aeremas kkewe rettawp noa mwirin pwe, “Ennetaaen, ipwe aengaenigaemi, ise giuneei mwo nge erhai me noan Israel epwe iiei wusun aan niugiuniug.

¹¹ Ipwe aengaenigaemi, pwe re towunap aeremas repwe itto saengi eotiw me netow nge repwe mooat oaron Abraham, Isaac me Jacob noan gupwun-nap na noan Mweoiu Naaeng.

¹² Nge rhoowe repwe no noan Mweoiu Naaeng repwe oatorawow noan rorhappiung, iga repwe sessaeng nge akkaarengi me ee.”

¹³ Iwe Jesus a aengaeni soamwoonin sonotaw we pwe, “Sefaaen noa noan imwoamw; meeta wa niugiuniug ngaeni, epwe pwan wen ngaenius.”

Iwe rhag nge rhoaan engaang we naiun a mamaaw tae.

Jesus a Aecchipwa Towunepaen Aeremas

(Mark 1.29-34; Luke 4.38-41)

¹⁴ Iwe, Jesus a noa reen imwaen Peter. A noa giuneei niewe inaen pwiuniuwaen Peter ewon noan gien pwe a igin pwerhikkar ginin.

¹⁵ Jesus a geotteopa rhag paiun, nge esaer noa pwerhin niewe. Mwirin niewe a rhimwitae a ittae engaang ngaeni.

¹⁶ Igiwe a nee oatofaaef noa, aeremas ra pwigiir to reen Jesus pwuwaen aeremas kkewe eyor aniu aenneew wooar. Jesus a assiur wow aniu aenneew reen petenaen mwaenian, nge a aemaemaewaar tae rhoowe re semwaai.

¹⁷ A feeori minneen pwe epwe pwaeritae miniwe profeta we Isaiah a aepesa pwe, “Iiy e arhiuwa aarh semwaai nge aiuferanoa mesemesaen aarh semwaai.”

Rhoaan Mwerhaen Tapweei Mwirin Jesus

(Luke 9.57-62)

¹⁸ Igiwe Jesus a giuneei pwuwaen aeremas kkewe me oaron, a aengaenir rhoaan kkayeо kkewe naiun pwe repwe fatiun noa epeig meoneoiniun we.

¹⁹ Iwe, erhai sinsein anniug a itto reen nge a aengaeni pwe, “Sinsei, ese tiwegin iga wopwe noa ee nge ngaang ipwe tapweog.”

²⁰ Jesus a aengaeni pwe, “Fox eyor ngeteer, man aeniaen eyor feseer, iwe nge mwaaen we Naiun Aeremas esooar eew pwiuneoi ne epwe noa wonotiw aseoseo ee.”

²¹ Nge erhai mwaaen pwan iiy rhoaan kkayeо a aengaeni pwe, “Soamwoon, mmwaen fang mwo ngaang ipwe sefaen noa nipwaeni noa mwaaen na semaei.”

²² Jesus a paniuwaeni pwe, “Itto tapweaei nge wa nigitir rhooa mae repwe sipegini nipwaeni aar mae.”

Jesus a Oapoassaetiw Eew Aaeng Cchoaw

(Mark 4.35-41; Luke 8.22-25)

²³ Jesus a teeotae wooan pwoot we nge rhoaan kkayeо kkewe naiun ra tapweei.

²⁴ Ese mmwaei mwo nge eew mwoor enoa itto noan meoneoiniun we, nge pwoot we a arapakkaan aan epwene mweoiusiutiw. Nge Jesus e maiur.

²⁵ Rhooan kkayeо kkewe ra noa reen, nge ra faingitae. Ra aengaeni pwe, “Soamwoon, aemenewaegemaem pwe sipwene mae!”

²⁶ Jesus a aengaenir pwe, “Meeta oawwa mesag reen? Me gaen mwittiginen aaemi niugiuniug!” Iwe a iutae nge a kkepas sseor ngaeni aaeng me noa pwe repwe poas noa, iwe rhag nge a niuwanoa wooai saaet.

²⁷ Iwe, mwaaen kkewe ra riutae nge ra aepesa pwe, “Meeta taeppen aeremas een? Iye aaeng mwo me noa nge re tapweei mwaenian!”

*Jesus a Aecchipwaar Riiurhai Mwaaen Eyor Aniu Aenneew Wooar
(Mark 5.1-20; Luke 8.26-39)*

²⁸ Igiwe Jesus a toori faniuwaen Gadara eno epeig meoneoiniun we, a itto rhuungiir riiurhai mwaaen retowow me noan paeyi kkewe. Mwaaen kkeei nge ewartae aniu aenneew wooar, nge re igin aemmesag ina minne esooar ne erhiuwen taeri aan een reen.

²⁹ Reen rhag oaton een nge ra aekkepwastae pwe, “Naiun Deus, meeta minne wo tipaeni me remaem? Wa itto pwe wopwe itto aeppaetigimaem mmwaen oaton apwiung?”

³⁰ Eno eew cchon sino re mwommwongo fetaen me peiginoar.

³¹ Iwe aniu aenneew kkewe ra aeffaenipirhe ngaeni Jesus pwe, “Aere wopwe asiugemaem, fangenoa aemaem neeiir sino kenaan.”

³² Jesus a aengaenir pwe, “Oawnoa!” Iwe ra toowow me wooar mwaaen kkewe nge ra noa wartae wooar sino kkewe. Iwe cchon sino kkewe ra fattapw tiw wenepeigin rhug we e ittiw noan meoneoiniun we ittiw moapw noa.

³³ Mwaaen kkewe rhooan ffooanon sino ra fattapw noa ra ittiw nee aepinoamw, iwe ra ittiw fioangei oanongan meeta kkewe a wen ngaenir mwaaen kkewe ewartae aniu aenneew wooar.

³⁴ Iwe oanongeir rhooan aepinoamw we ra noa pwe repwe noa rhuungi Jesus. Nge igiwe ra weri, ra aeffaenipirhe ngaeni pwe epwe siusaengi miniwe faniuweer.

9

*Jesus a Aecchipwa Erhai Mwaaen Maemerhoar
(Mark 2.1-12; Luke 5.17-26)*

¹ Jesus a teeotae wooan pwoot we nge a sefaaeniti miniwe aepinoamwon iwe eno epeig meoneoiniun we.

² Aaemweoi aeremas ra pwigito reen erhai mwaaen e maemerhoar ewon noan epeo giegy. Igiwe Jesus a weri nepaen aar niugiuniug rhooawe, a aengaeni mwaaen we e maemerhoar pwe, “Aetemaegin naeyi! Monofitimw a mwusunoa.”

³ Iwe aaemweoi sinsein anniug kkewe ra niuwaenue pwe, “Mwaaen een e aepesa aenneewa Deus!”

⁴ Nge Jesus a giuneei niunniwaen kkewe aar nge a aengaenir pwe, “Meeta oaw niuwaenue minikkena e aenneew reen?”

⁵ Emererhaeg pwe sipwe aepesa pwe, ‘Monofitimw a mwusunoa,’ aere sipwe aepesa pwe, ‘Iutae wa faaeraeg noa?’

⁶ Iwe, ngaang ipwe pwaeri ngaenigaemi pwe mwaaen we Naiun Aeremas eyor maemaewan wooan soanop pwe epwe oamwusa noa monofit.” Iwe, a aengaeni mwaaen maemerhoar we pwe, “Iutae, pwigi giemw nge wa noa noan imwoamw.”

⁷ Iwe mwaaen we a iutae nge a noa noan imwan.

⁸ Igiwe aeremas ra weri miniwe, ra mesag tae nge ra aepingepinga Deus reen aan ngaenneer aeremas taeppen mamaaw we.

*Jesus a Faingi Matthew
(Mark 2.13-17; Luke 5.27-32)*

⁹ Jesus a siusaengi igiwe nge a weri erhai rhooan iyoiyon tax itan Matthew, emooat noan aan office. Jesus a aengaeni pwe, “Itto tapweaei.”

Iwe Matthew a iutae nge a tapweei noa mwirin.

¹⁰ Igiwe Jesus a mwongo noan imwaen Matthew, nge re towunap rhooan iyoiyon *tax me rhooa monofit* ra itto tapweei Jesus me rhoaan kkayeo kkewe naiun reen *table* we.

¹¹ Oatowe aaemweoi Pharisees kkewe ra giuneei miniwe, ra aeiyegiir rhoaan kkayeo kkewe naiun pwe, “Meeta faan naimi sinsei a mwongo ngaeniir rhoaan iyoiyon *tax me rhooa monofit* kena reen?”

¹² Jesus a rongorong aar kkepas nge a paniuwaenii pwe, “Rhooakka rese semwaai rese noa reer toagota, pwe rhooakka refaer semwaai.

¹³ Oawnoa giutta faaen kkepas een me noan Pwapwior we e Santus: ‘Faayeow minne ngaang i tipaeni, nge saapw maan kkena aar oasoar ngae-niae.’ Ngaang ise itto pwe ipwe faingiir rhooa mwamwaai, pwe faer rhooa monofit.”

Kkepas Aeiineon Aecchigipin
(Mark 2.18-22; Luke 5.33-39)

¹⁴ Iwe rhoaan kkayeo kkewe naiun John Baptist ra itto reen Jesus nge ra aeiineow pwe, “Meeta faan aemaem me Pharisees aeisooaw aecchigipin, nge rhoaan kkayeo kkomwu noawumw rese aecchigipin reen?”

¹⁵ Jesus a paniuwaenii pwe, “Oaw niuwaenai nge epwe aenneew tipeer rhooakkena re itto reen gupwunon appwiuniupai we igiwe *bridegroom* we erhiuwen no reer? Aapw! Nge epwe itto raaenin na repwe pwigi saengiir *bridegroom* we, nge ina oatona repwene aecchigipin noa.

¹⁶ “Esooar erhai epwe aeyae mengaag ffeo aan epwe pinisa tae wooan erheo mengaag maerhiy, pwe mengaag ffeo we epwe fereei noa mengaag maerhiy we, nge miniwe taeringen epwene faer gin temoag noa.

¹⁷ Esooar erhai epwe aenianong *wine* ffeo noan nenien *wine* maerhiy, pwe ina epwe pwoanoa nge *wine* we enipiwow nge nenien *wine* we epwe ffeir noa. Pwe faer *wine* ffeo epwe itinong noan nenien *wine* ffeo, pwe ina nge oanongaen repwe gacch.”

Jesus eAemenewaetae Erhai Aeterhooapwut Nge eAecchipwatae Erhai Rhooapwut

(Mark 5.21-43; Luke 8.40-56)

¹⁸ Igiwe Jesus e aepesa minneen, erhai soamwoonin Jews a itto reen, a foatotiw mmwan nge a aengaeni pwe, “Naeyi aeterhooapwut a maenoa igin, nge wopwe itto rhag iseni tae poawumw wooan, pwe epwe menaw.”

¹⁹ Iwe, Jesus a iutae nge a tapweei noa, nge rhoaan kkayeo kkewe naiun ra pwan tapweei.

²⁰ Eno erhai rhooapwut neeiir eseug aan peitaeg noa noan seig me ruwowu raeg, a itto me niugiusagiuriun Jesus nge a geotteopa soapwon mengaagiun.

²¹ A niuwaenai nong neetipan, “Aere igeotteopa rhag mengaagiun nge ipwe mamaaw tae.”

²² Iwe, Jesus a toagun, a weri niewe nge a aengaeni pwe, “Naeyi, wopwe aetemaegin, oamw niugiuniug minne a aecchipwoag tae.” Reen rhag oatowe nge rhooopwut we a mamaaw tae.

²³ Mwirin Jesus a noa noan imwaen soamwoon we. Nge a weriir rhoaan arhiuwerhiuw kkewe me pwuwa we ra igin saeng,

²⁴ a aengaeniir pwe, “Oawtowow oanongaemi! Aeterhooapwut een nge ese mae, pwe aan rhag maiur!” Iwe ra kekkaei aegini.

²⁵ Nge igiwe aeremas ra toowow niugiun, Jesus a toonong noan sengkin we aaen aeterhooapwut we nge a ammwarhiu tae paiun, iwe a rhimwitae.

²⁶ Iwe, fioangon miniwe a rheeo nge a ammwarhiu tae paiun, iwe a rhimwitae.

Jesus a Aecchipwaar Riiurhai Mwaaen Masparh

²⁷ Oatowe Jesus a siusaengi pwiuneoi we, riiurhai mwaaen masparh ra pwan tapweei noa mwirin. Ra aepwesaegini pwe, “Naiun David, wopwe faayeogemaem!”

²⁸ Iwe, igiwe Jesus a toonong noan iimw we, mwaaen masparh kkewe ra itto reen. Jesus a aeiineor pwe, “Oawniugiuniug pwe ngaang ipwe mmwenen aeffetanoa mesaemi?”

Iir ra paniuwaeni pwe, “Ooa, menap.”

²⁹ Iwe Jesus a geotteopa meseer nge aepesa pwe, “Meeta oawniugiuniug ngaeni, epwe pwan wen ngaenigaemi.”

³⁰ Iwe, a fflatenoa meseer. Nge Jesus a igin ammwir ngaeniar pwe resoapw aengaeni mwo nge erhai miniwe a wen.

³¹ Nge iir ra faer noa arheoiwa noa wunuunun Jesus wooan oanongaen faniuw we.

Jesus a Aecchipwa Erhai Mwaaen Ese Mmwenen Kkepas

³² Igiwe mwaaen kkewe ra noa, aaemweoi aeremas ra pwigito reen Jesus erhai mwaaen ese mmwenen kkepas pwe ewartae aniu aenneew wooan.

³³ Reen rhag oaton we Jesus a oatowowuw aniu aenneew we saengi mwaaen we, nge a mmwenen kkepas. Oanongeer aeremas kkewe ra mwaar reen nge ra aepesa pwe, “Esaaen yor mwo giuneyarh taepen minneei me noan Israel.”

³⁴ Nge Pharisées kkewe ra aepesa pwe, “Soamwoonin aniu aenneew minne efang maemaewan pwe epwe asiur noa aniu aenneew.”

Jesus e Faayeow Ngaeniar Aeremas

³⁵ Jesus a faaeraeg fetaen wooan oanongaen aepinoamw me pwugos kkewe. Efenauiw me noan wutteer Jews, efenauiw Kkepas Mwamwaai we reen Mweoiu Naaeng me pwan aecchipwaar aeremas kkewe eweriir mesemesaen semwaai.

³⁶ Nge igiwe a weriir pwuwaen aeremas kkewe, nge a igin faayeeor, pwe ra no noan affayeo me waeiraes taepen *sheep* kkewe esooar no rhooan neginegiir.

³⁷ Iwe a aengaeniar naiun rhooan kkayeo pwe, “A towunap uwaen menaai, nge re fitiman rhag rhooan gin.

³⁸ Oaw maeipin ngaeni soamwoonin maat we pwe epwe fangenoa rhooan engaang pwe repwe giniiy oanongaen uwaen maat we aan.”

10

Oapostonus Kkewe Seig me Riiurhai

(Mark 3.13-19; Luke 6.12-16)

¹ Jesus a faingi fengaenniar rhooawe seig me riiurhai rhooan kkayeo nge a ngaenner maemaewe pwe repwe asiuw aniu aenneew me aecchipwaar tae aeremas kka eweriir mesemesaen semwaai.

² Ikkaan iteer oapostonus kkewe seig me riiurhai: mmwan nge Simon (pwan itan Peter) me Andrew we pwiin; James we pwiin John, ikkiwe naiun Zebedee;

³ Philip, Bartholomew, Thomas me Matthew iwe rhooan iyoiyon *tax*; James we naiun Alphaeus iwe me Thaddaeus;

⁴ Simon, iwe erhai man menat,* me Judas Iscariot, iwe e fangenoa tinnimaen Jesus.

* **10:4 man menat:** erhai mwaaen e fliow ngaeniar sonotawaen Rome faaen itaan faniuwan.

*Aar Engaang Rhooawe Seig me Riiurhai
(Mark 6.7-13; Luke 9.1-6)*

⁵ Jesus a fangenoa rhooawe seig me riiurhai nge a ammwir ngaeniir pwe, “Oawsoapw noa noan faniuweer re Gentiles aere noan aepinoamwoor re Samaria.

⁶ Nge oawpwe faer noa reer aeremesaen Israel pwe iir minne ra weer sheep kkewe ra mwaenirh noa.

⁷ Oawnoa nge oawwa fenaiuw kkepas een, ‘Mweoiu Naaeng a arapeto!’

⁸ Oawaecchipwaar rhooa semwaai, oawaemenewaar tae manimae, oawaecchipwaar rhooa kaenepaai iwe me oatowowuur aniu aenneew. Oawwa pwigi minneei me reei nge esooar paniawan, nge oawpwene noa fang nge esoapw pwan yor paniawan.

⁹ Nge oawsoapw pweipwog eew taeppen senaapiy noan pwoarsaemi;

¹⁰ oawsoapw pwan pweipwog pwetoaw me ssiuwenin mengaagumi me nokka me yomi. Pwe rhooan engaang ina epwe toowow paniuweer.

¹¹ “Ngaere oawwa toori eew aepinoamw aere pwugos, oawwa pipiyy iyo etipaeni epwe aetiwaegaemi, iwe oawwa noa no reen toori aaemi oawpwene siusaengi pwiuneoi we.

¹² Ngaere oawtonong noan eew iimw, oawwa aengaenir pwe, ‘Oapoas epwe no reemi.’

¹³ Aere aeremesaen iimw we re aetiwaegaemi, nigititiw kkepesaen oapoas we aaemi reer. Nge aere rese aetiwaegaemi, nge oawwa pwigi sefaaeniy kkepesaen oapoas we aaemi.

¹⁴ Iwe, aere rhooan eew aepinoamw me aere eew iimw rese aetiwaegaemi aere aiussaening ngaenigaemi, oaw siusaengi pwiuneoi we nge oawwa iurhiugi noa ppweoniu me wooan pirhemi.

¹⁵ Ennetaan, ipwe aengaenigaemi pwe noan Raaenin Apwiung nge Deus epwe faayeow re Tyre me Sidon memmweer aeremesaen aepinoamw naan.

*Aewwaeiraes Kka Epwe Tooto
(Mark 13.9-13; Luke 21.12-17)*

¹⁶ “Aiussaening, ngaang ipwene aefengaegaemi wow taeppeer sheep reno neeiir cchon wolves. Nge oawpwe aetipaecchemegaemi taeppen sowufaeng nge oawpwan tipipoas taeppeer doves.

¹⁷ Oawpwan aefaennigaemi pwe imwu eyor aeremas kka repwe torofigaemi nge repaenigaemi nong noan nenien apwiung, nge repwe pwan wirhigaemi me noan wutteer Jews.

¹⁸ Pwe reen minne itaei, minne repwene paenigaemi noa mmweer soamwoon me king, pwe oawpwe aengaenir me re Gentiles Kkepas Mwamwaai we.

¹⁹ Iwe aere ra isenigaemi nong noa nenien apwiung, oawsoapw pireiir reen meeta oawpwe aepesa me wunuunun aaemi aepesa, pwe petenaen kkepas kka oawpwe aepesa epwe toorigaemi noan oaton naan.

²⁰ Pwe saapw aaemi minne oawkkepas, pwe Ngeoniun minna Semaemi minne oawwa aepesa mwaenian.

²¹ “Aeremas repwene afangmaei noa pwiir ngaeni maenoa, nge saam repwe pwan feeori taeppen minneen ngaeni naiiur; nge naiiur repwene pwan appaniuwaeni semeer me ineer nge re fangenoa iir pwe repwe noa niir noa.

²² Oanongeir aeremas nge repwe oapwutaegaemi pwe faaen itaei. Nge iyo na e aetemaegin ngaeni minna oarosan nge epwe menaw.

²³ Iwe, aere re aewwaeiraesigaemi me noan eew aepinoamw, siunoa noan ina eew. Ennetaan, ipwe aengaenigaemi, pwe epwe itto mwaaen we Naiun

Aeremas nge aaemi oaw sogoppaen moann reen aaemi engaang wooan oanongaen aepinoamwon Israel.

²⁴ “Esooar erhai aeteei suguun epwe taegias saengi aan sinsei, nge esooar erhai rhooan akkiuneo epwe taegias saengi aan maasta.

²⁵ Ieei minne erhai aeteei suguun epwe kker tipan aan epwe aeffitaeg ngaeni aan sinsei, nge erhai rhooan akkiuneo epwe kker tipan aan epwe aeffitaeg ngaeni aan maasta. Aere ra aeita ngaeni soamwoonin aeinang we pwe Beelzebul, epwe ifa mwo aenneewan aar repwe faingi ngaenir oanongeer rhooan aeinang we.

Iyo Sipwe Mesagiu

(Luke 12.2-7)

²⁶ “Iwe, oawsoapw mesaggiur aeremas. Pwe oanongaen meeta ewop epwene pwae noa, iwe me oanongaen kkepas mwoanomwoan repwene giuneei.

²⁷ Meeta ngaang iya aengaenigaemi noan rorhappiung, oawpwe aepe-satae noan seram. Nge meeta oaw rongorong noan saeningaemi oawpwe aekkepwas aegini noa me wooan wungaen iimw.

²⁸ Oawsoapw mesaggiur rhooamwu regaen niiy noa oanongaemi, pwe ina resoapw mmwenen niiy noa ngeoniumi. Nge oawpwe faer mesagiu Deus, iwe emmwenen niiy noa oanongaemi me ngeoniumi noan niferno.

²⁹ Reen efai rhag checcha nge wa mmwenen chuwaiuw riiurhai nicchok, nge erhai mwo nge ese ppiungiutiw nee ppweon aere Semaemi ese iura.

³⁰ Iwe nge aaemi, oanongaen aennirhimwemi mwo nge Deus e paengi.

³¹ Ina oawsoapw mesag, pwe aaemi ina eyor ipitaemi memmweer towunepeer nicchok!

Pwuwaai me Oasoarhoawuna Kristus

(Luke 12.8-9)

³² “Rhooakka re aepesa pwe iir naeyi me neeiir aeremas, ngaang ipwe pwan feeori ngaenir me weni mmwaen Semaei wooaina naaeng.

³³ Nge iyo kena resaep saengiae me neeiir aeremas, ngaang ipwe pwan saep saengir me weni mmwaen Semaei wooaina naaeng.

Saapw Oapoas pwe Efoarh Saeitan

(Luke 12.51-53; 14.26-27)

³⁴ “Oawsoapw maengiy pwe iya itto pwe ipwe pwigito oapoas wooan soanop. Aapw, ise itto pwe ipwe pwigito oapoas, pwe faer efoarh saeitan.

³⁵ Pwe ngaang itto ipwe feeoriir aetemwaaen repwe aengimaaw ngaenir semeer, me aeterhooapwut repwe aengimaaw ngaenir ineer, pwiuniwaen naiiur repwene aengimaaw ngaenir inaan pwiuniweer;

³⁶ nge rhooan oapwutoag repwe itto saengi rhag rhooan oamw famini.

³⁷ “Rhooakka etemoag aerhaengerhaengin semeer me ineer me mmwaei, ese fin repwe no pwe naeyi rhooan kkayeo. Nge rhooakka etemoag aerhaengerhaengin naiiur me mmwaei, ese pwan fin repwe no pwe naeyi rhooan kkayeo.

³⁸ Iwe, rhooakka rese aiufera aar kurus nge re tapweito mwiriy, nge ese fin repwe no pwe naeyi rhooan kkayeo.

³⁹ Nge rhooakkrena re maengiy repwe kkemwarh wooan meneweir, epwe ppiung saengir, nge rhooakkrena eppiung saengir meneweir pwe faaen itaei nge repwe weri sefaaeniy.

Paniuwaenin

(Mark 9.41)

⁴⁰ “Iyo e aetiwaegaemi, e aetiwaeyaei, nge iyo a aetiwaeyaei, a pwan aetiwa iwe efangeto ngaang.

⁴¹ Iyo a aetiwa erhai profeta pwe iga iiy erhai profeta, epwe yor paniuwaenin me reen minna paniuwaen. Nge iyo a aetiwa erhai aeremas mwamwaai pwe iga iiy erhai aeremas mwamwaai, epwe yor paniuwaenin taeppen erhai aeremas mwamwaai.

⁴² Aere erhai a aiuniu ngaeni erhai man sessoan kka rhoaniuwaei eew kkepaen rhaan patapat pwe iga iiy erhai rhoaniuwaei, ennetaen, ipwe aengaenigaemi, iiy epwe yo ngaeni minna paniuwaenin.”

11

Rhooan Pweipwogin Kkepas Kkewe Naiun John (Luke 7.18-35)

¹ Igiwe Jesus a moannon akkiuneeor rhoaan kkayeо kkewe naiun iwe seig me riiurhai, a noa saengi pwiuneoi we iwe a noa fenai me oaronga fetaenee wooan oanongaen aepinoamw kkewe pwiuneoi we.

² Nge oatowe John Baptist a rongorong me noan imwaen kanepwus wunuunun engaang kkewe Kristus a feeorin, a fangenoa aaemweoi rhoaan kkayeо kkewe naiun reen.

³ Iwe, ra aeiineow Jesus pwe, “Een miniwe re iura pwe epwe itto, aere aeipwe wewweti erhai?”

⁴ Jesus a paniuwaeni pwe, “Oaw sefaaen noa oawwa aengaeni John minne oawwa rongorong me weri:

⁵ rhoaa masparh ra ffatenoa, rhoaa pirhemae ra faaeraeg, rhoaa kaenepaai ra gacch noa, rhoaa saeningapiung ra rongorong, rhoaa mae ra menawtae, nge Kkepas Mwamwaai we a fenai ngaenir rhoaa affayeo.

⁶ Ifa mwo wenepwuweer rhoaa se tip mwaramwar reei!”

⁷ Oatowe rhooawe naiun John ra noa, Jesus a kkepas ngaenir aeremas kkewe reen wunuunun John: “Igiwe oawwa noa reen John noan *desert* we, meeta minne oawniuwaenuei pwe oawpwe noa weri? Efoarh fetin emwoaroro reen aaeng?

⁸ Meeta minne oawnoa pwe oawpwe weri? Erhai mwaaen e memmengaag tae mengaag nning? Aeremas kka e ina wusun mengaagiur nge reno noan imwaen *king!*

⁹ Aengaeniaei, meeta rhag oawnoa pwe oawpwe weri? Erhai profeta? Ooa, ennetaen, oawwa weri erhai e taegias saengi erhai profeta.

¹⁰ Pwe John miniwe Pwapwior we e Santus eiura pwe, ‘Deus a kkepas, ngaang ipwene fangetiw naeyi rhoaan pweipwogin kkepas me weni mmwoamw pwe epwe noa maeneti ennepoamw.’

¹¹ Ennetaen, ipwe aengaenigaemi, pwe John Baptist ina e taegias saengir aeremas towunap kka reno wooan soanop. Iwe nge manna oarosaen git me noan Mweoiu Naaeng ina e taegias saengi John.

¹² Saengi rhag oaton we John Baptist a rhaepetae aan fenai toorito igin a ne miniwe Mweoiu Naaeng a toonong noan waeiraes pwe aeremas aen-neew ra fiow wooan pwe repwe nemaeni.

¹³ Toorito oatowe John a no, oanongeer profeta me Anniug kkewe aaen Moses ra aepesa wunuunun miniwe Mweoiu Naaeng;

¹⁴ nge aere oawwa niugiuw aar fenai, John nge iiy Elijah, iwe ra fasiun aepesa noa pwe epwe itto.

¹⁵ Iyo eyor saeningan, epwe rongorong!

16 “Iwe, meeta ipwe aweweei ngaeniir aeremesaan mweoi e igma? Ra aeffitaeg ngaeniir rhag wonigaet kkewe remooat noan nenien chuuwaii. Eew mwiirh nge re iyaekkepwas ngaeniir aaemweoi,

17 ‘Aemaem aeiya pwan kker ngaenigaemi, nge aaemi oawse maan! Aemaem aeiya arhiwerhiuw, nge aaemi oawse saeng!’

18 Igiwe John a itto, eaecchigipin nge ese pwan iun *wine*, nge aeremas ra aepesa pwe, ‘Iiy eyor aniu aenneew wooan!’

19 Nge igiwe Naiun Aeremas e itto, a mwommwongo nge e iun, nge aeremas ra aepesa pwe, ‘Oaw pipiiy mwaaen een! Iiy erhai mwaaen mwonganap me iun *wine*, nge maereyaereer rhoaan iyoion *tax* me rhooa monofit.’ Iwe nge minna repiaen Deus reepiy a pwae noa pwe ennet reen meeta a feeori.”

Aepinoamw Kkewe Rese Niugiuniug (Luke 10.13-15)

20 Aeremesaan aepinoamw kkewe Jesus a feeori towunepaen kkeman kkewe aan me ee ina rese toagun saengi aar monofit, iwe Jesus a soong ngaeniir.

21 “Ifa mwo aenneewan ngaenigaemi, aaemi rhoaan Chorazin me Bethsaida! Aere kkeman kka refreeori me wooan igeei minne refreeori me wooan Tyre me Sidon, ina nge aeremesaan aepinoamw kenaan a ssiunaei rhag aar memmengaag tutu nge re oamworomwor tae fenang wooar, pwe epwe pwae noa aar toagun saengi monofit!

22 Ipwe aengaenigaemi pwe noan Raaenin Apwiung nge Deus epwe faayeow re Tyre me Sidon me mmwaemi.

23 Nge een Capernaum! Wo tipaeni wopwe tooritae naaeng? Een wopwe ppiungiutiw noan niferno! Aere kkeman kkewe effeelor me reemw epwan ffeeelor me noan Sodom, epwe rhiuwen no rhag igma.

24 Ipwe aengaenigaemi, pwe noan Raaenin Apwiung nge Deus epwe faayeow re Sodom me mmwoamw.”

Oaw Itto Aseoseo Reei (Luke 10.21-22)

25 Reen oatowe nge Jesus a aepesa pwe, “Semaei, Soamwoonin naaeng me soanop, iya ngaenneog oamw aerhigerhig, pwe wa oapanoa minikkeei saengiir rhooa reepiy me metefaaegini, nge wa pwaeri ngaeniir rhooa kkewe reweer wonigaet.

26 Ennet, Semaei, pwe ina minna wo tipaeni epwe wen.”

27 “Semaei a ngaenneaei oanongaen meeta. Essoar erhai ne e giuneei minna Naiun, pwe aeggaen minna Seman rhag, nge esooar erhai e giuneei minna Seman, pwe iiy rhag minna Naiun, iwe me iyo kena minna Naiun a finiir tae pwe epwe pwaeri ngaeniir.

28 “Oaw itto reei oanongaemi rhoakkena oawwa aerhig reen pweipwogin mini cchoaw, pwe ngaang ipwe asseoseogaemi.

29 Oaw pwigi *yoke** e aaei nge oawwa iseni tae woami, nge oawwa kapwiung saengiae, pwe ngaang itip maniuweniuw nge imesoanosan; pwe ina nge aaemi oawpwe meyaefi aseoseo.

30 Pwe yoke e ngaang ipwene fang ngaenigaemi iye emererhaeg, nge minne ipwe iseni tae woami oawpwe aiufera iye eppaen.”

* **11:29 yoke:** eew soapwon irae eno wooan iiuweer riiurhai wakke, pwe e ammwarhiu fengaenniir igmae repwe feeori eew engaang cchoaw.

12

*Kkepas Aeiineon Sabbath
(Mark 2.23-28; Luke 6.1-5)*

¹ Ese ssiunaei weni mwirin aaen Jesus faaeraeg nong noan aekkaew mae-taen *wheat* wooan raaenin Sabbath. Nge rhoaan kkayeo kkewe naiun ra pecchai, iwe ra rhaepetae aar ferhiy iuwoapwon *wheat* kkewe nge ra angi minikkewe faiun.

² Nge igiwe Pharisees kkewe ra weri miniwe, ra aengaeni Jesus pwe, “Pipiyy, ese gacch ngaeni aarh anniug pwe rhoaan kkayeo kkomwu noawumw repwe feeori minna wooan Sabbath!”

³ Jesus a paniwaenir pwe, “Oawse aeraegi mwo miniwe David efeeori noan oaton we iiy me rhooa kkewe naiun ra pecchai?

⁴ A toonong noan imwaen Deus, nge iiy me mwaaen kkewe rhoaniawan ra mwongo fenoawa kkewe ra aeni oasoar ngaeni Deus, inamwo igiwe eaenneew ngaeni anniug pwe repwe mwongo, pwe patere rhag minne emmwen pwe repwe mwongo fenoawa kkewe.

⁵ Aere oawse aeraegi miniwe effoat noan aaen Moses anniug pwe oanon-gaen raaenin Sabbath nge patere kkena noan *Temple* we referei anniugun Sabbath, nge rese monofit?

⁶ Ipwe aengaenigaemi pwe erhai minne eno igeesi e taegias saengi *Temple*.

⁷ Pwapwior we e Santos e iura pwe, ‘Faayeow minne ngaang i tipaeni, nge saapw maan kkena aar oasoar ngaeniaei.’ Aere aaemi oaw giuneei faaen kkepas een, ina nge oawsoapw oamonofitiir aeremas kena rese monofit.

⁸ Pwe mwaaen we Naiun Aeremas minne Soamwoonin Sabbath.”

*Mwaaen we e Maemerhoar Paiun
(Mark 3.1-6; Luke 6.6-11)*

⁹ Iwe, Jesus a noa saengi pwiuneoi we nge a toonong noan wutteer Jews we,

¹⁰ nge eno erhai mwaaen emaemerhoar paiun. Aaemweoi aeremas repwan no igiwe, ra giutta aekkaew rhaepin minikka repwe oaturu Jesus wooan. Iwe ra aeiineow Jesus pwe, “Emwamwaai ngaeni aarh anniug pwe repwe aecchipwa erhai wooan raaenin Sabbath?”

¹¹ Jesus a paniwaenir pwe, “Epwe ifa aere erhai naimi *sheep* a ppi-ungiunong noan eew niipw wooan raaenin Sabbath? Oawsoapw pwigi pwe oawpwe taiuwtae?

¹² Pwe erhai aeremas nge eyor ipitan mmwaen erhai *sheep!* Iwe aarh anniug a saenet aarh sipwe feeori minne emwamwaai wooan raaenin Sabbath.”

¹³ Mwirin Jesus a aengaeni mwaaen we emaemerhoar paiun pwe, “Aeiti-wow poawumw.”

Iwe, a aeitiwow paiun nge a mamaaw noa pwan taeppen rhag ina epai.

¹⁴ Iwe Pharisees kkewe ra siunoa pwiungiuw wunuunun aar repwe niiy noa Jesus.

Deus a Fini Jesus pwe Naiun Rhooan Akkiuneo

¹⁵ Oatowe Jesus a rongorong pwiungiupwiung we aar, a noa saengi pwiuneoi we, nge pwuwaen aeremas ra ttapw noa mwirin. Iwe a aecchipwaar oanongeer rhooa semwaai

¹⁶ nge a aengaenir pwe resoapw fioangei ngaeniir aeremas wunuunun iiy.

¹⁷ A feeori minneen, pwe epwe pwaeritae miniwe Deus a aengaeni profeta Isaiah:

¹⁸ “Ieen naeyi rhoaan akkiuneo iya finitae,

iiy minne i aerhaengi, iya igin kker reen.
 Ngaang ipwene fangetiw aaei Espritu wooan,
 nge iiy epwe arheoiuwa noa wunuunun aaei apwiung ngaeniir oanongaen
 faniuw.
¹⁹ Esoapw aengimaw aere apwas,
 aere kkepas temoag wooan aan.
²⁰ Esoapw gopiy mwo nge efoarh fetin ppwoar,
 me pwan gunuw noa naam na e oamoaruporup.
 Iiy epwe oarhorho ngaeni toori ssiaan aan mmwen ngaeni oapoas na efin
 pwe epwe yo ngaeni oanongaen faeinaengiy.
²¹ Ina nge oanongaen faniuw repwene aeisetip wooan.”

Jesus me Beelzebul
(Mark 3.20-30; Luke 11.14-23)

²² Iwe aaemweoi aeremas ra pwigito reen Jesus erhai mwaaen parh nge
 ese pwan mmwenen kkepas, pwe ewartae aniu aenneew wooan. Jesus a
 aecchipwa mwaaen we, iwe a mmwenen kkepas me fanno.
²³ Pwuwaen aeremas kkewe ra riutae reen miniwe Jesus a feeori nge ra
 aeiineo pwe, “Meeta, epwe ieei mwaaen we naiun David?”
²⁴ Igiwe Pharisees ra rongorong kkepas kkewe, ra aepesa pwe, “Emmwe-
 nen asiur noa aniu aenneew pwe iga rhag Beelzebul we soamwoonin aniu
 aenneew minne efang maemaewan.”
²⁵ Jesus a giuneei aar niunniwaen nge a aengaenir pwe, “Aere eew
 faniuw a ginigin fesaeng me fiow fengaen, faniuw een esoapw ssiunaei.
 Aere rhooan eew aepinoamw aere eew famini repwe ginigin fesaeng me
 fiow fengaen, nge repwe mwetoar fesaeng.
²⁶ Iwe aere rhooan mweoiun Saetan ra fiow fengaen ina nge ra fasiun
 mwetoarotoar, nge minna mweoiun epwe iug noa!
²⁷ Ngaere igine e ieei wunuunun aaei asiur noa, iwe nge eifa wusun aar
 rhooa kkomwu rhoaniwaemi asiur noa aniu aenneew? Rhooa kkomwu
 rhoaniwaemi ra pwaeritae pwe oaw mwaerhei!
²⁸ Aapw, pwe Ngeoniun Deus a ngaenneaei maemaewaei aaei ipwe asiur
 noa aniu aenneew. Ieei minne a pwaeri noa pwe minna Mweoiun Deus a
 faer toorigaemi.
²⁹ “Esooar erhai epwe tongaeni toonong noan imwaen erhai mwaaen
 mamaaw pwe epwe pwigi noa pisaegin; aere epwe mmwaen geoni noa mwo
 mwaaen we, ina nge epwapw mmwenen piraf me noan iimw we.
³⁰ “Erhai ne ese tapweaei, nge iiy rhooa aenneew ngaeniaei, nge erhai ese
 tipaengiae reen ioi, iiy erhai rhooan oammwoatoar.
³¹ Faaen minneeipwe aengaenigaemi: aeremas repwe mmwenen
 oamwusa noa ese tiwegin monofitiir, me pwan kkepas aenneew kka
 reaepesa; nge aere erhai ekkepas aenneew ngaeni Espritu Santus nge
 esoapw mwusunoa.
³² Iyo ekkepas aenneew ngaeni Naiun Aeremas epwe mmwenen
 mwusunoa. Nge iyo ekkepas aenneew ngaeni Espritu Santus esoapw
 mmwenen mwusunoa igma toori nee soapw noan.

Efoarh Waniwan me Uwaan
(Luke 6.43-45)

³³ “Aere eyor waniwan gacch, uwaan repwan gacch, nge aere a yor
 waniwan e aenneew, uwaan repwan aenneew. Pwe sigaen giuneei meeta
 taeppen waniwan we me reen rhag uwaan.

³⁴ Aaemi sowufaeng! Epwe ifa wusun aaemi aepesa min mwamwaai nge aaemi aeremas aenneew. Pwe iga aaw e aepesa meeta kkena esseog noan pwunn.

³⁵ Erhai aeremas gacch epwe oatowowuw mini gacch saengi gacchiun noan tipan, nge erhai aeremas aenneew epwe oatowowuw mini aenneew saengi aenneewaen noan tipan.

³⁶ “Nge ipwe aengaenigaemi, pwe noan Raaenin Apwiung nge aeremas repwe aengaeni oanongaen kkepas kka esooar ipitan ikka re aepesa.

³⁷ Pwe reen oamw kkepas minne Deus epwe apwiungiug reen, epwe pwaeritae aere een minne wo mwamwaai aere wo monofit.”

Tingoaron Kkeman

(Mark 8.11-12; Luke 11.29-32)

³⁸ Iwe aaemweoi sinsein anniug me rhooawe Pharisées ra aengaeni Jesus pwe, “Sinsei, aemaem aei mwerhaen weri oamw feeori eew kkeman.”

³⁹ Nge Jesus a aengaenii pwe, “A ifa mwo aenneewan me aar se niugiuniug aeremesaan mweoi e igma! Oawwa tingoar ngaeniai pwe ipwe feeori eew kkeman? Nge esoapw yor eew kkeman epwe pwae ngaenigaemi me niugiunoan kkeman we aaen profeta Jonah.

⁴⁰ Epwe wunuunun rhag aaen Jonah no aegini eoniuraen me eoniupoong noan upwaen erhai iig faeregit we, ina minne Naiun Aeremas epwe no eoniuraen me eoniupoong noan faeinaengiy.

⁴¹ Noan Raaenin Apwiung re Nineveh repwe iutae nge ra oamonofiti aeremesaan mweoi e igma, pwe iga iir re toagun saengi monofitiir oatowe re rongorong fenai kkewe aaen Jonah; nge ipwe aengaenigaemi pwe erhai e taegias saengi Jonah eno igeei!

⁴² Noan Raaenin Apwiung nge Queen reen Sheba epwe iutae nge a oamonofiti aeremesaan mweoi e igma; pwe iiy a itto saengi faniuwaen taaw noa, pwe epwe itto aiussaening ngaeni aaen king Solomon kkepesaen reepiy; nge ipwe aengaenigaemi, pwe erhai e taegias saengi Solomon eno igeei!

Sefaaenetan Aniu Aenneew

(Luke 11.24-26)

⁴³ “Igine erhai aniu aenneew a toowow me wooan erhai aeremas, nge ina epwene faaeraeg fetaen wooan faniuw paenekka pwe egiut nenien aan aseoseo. Aere esooar eew neniy erhuungi,

⁴⁴ nge ina epwene aengaeni oanongan pwe, ‘Ipwene sefaaen noa reen imwaei iwe i siusaengi.’ Iwe a sefaaen nge a noa rhuungi iimw we pwe a peo, nge a pwan nimegacch noa noan pwe oanongaen aegiaeg nge a wonopaeg noa nenien.

⁴⁵ Iwe epwe noa nge a noa paenii to fiusuman aniu aenneew kena re igin kkaein aar aenneew saengi, nge ra itto no pwiuneoi we. Iwe igiwe a moann oanongan noa, nge wunuunun aeremas we a faer igin aenneew saengi mmwaen miniwe rhaepetaen. Ieei wunuunun minne epwe wen ngaenii aeremas aenneewan mweoi e igma.”

Inaen Jesus me Pwiin

(Mark 3.31-35; Luke 8.19-21)

⁴⁶ Jesus e rhiuwen kekkepas ngaenii aeremas kkewe, nge miniwe inan me rhooawe pwiin ra war. Ra iu niugiun iimw we nge ra tingoar pwe repwe kkepas ngaeni.

⁴⁷ Iwe erhai aeremas kkewe a aengaeni Jesus pwe, “Pipiyy, inoamw me rhooawe pwiimw re iu niugiun nge re mwerhaen kkepas ngaenug.”

⁴⁸ Jesus a paniuwaeni pwe, “Iyo inaei me iyo pwiyy?”

⁴⁹ Iwe a aeitiiti ngaeniir rhooan kkayeo kkewe naiun nge a iura pwe, “Pipiyy! Ikkaan iir inaei me pwiiy!

⁵⁰ Pwe iyo na a feeori neetipaen Semaei wooainaeng, iir pwiiy me mwengeaei me inaei.”

13

Fioangon Awewe Erhai Rhooan Aeperes Faiun Foat (Mark 4.1-9; Luke 8.4-8)

¹ Iwe noan rhag raaenin we Jesus a siusaengi iimw we a noa reen meoneoiniun we, iwe a noa mooat tiw wenepeigin.

² Nge aeremas towunap kkewe ra itto reen, iwe a teeotae wooan efoarh pwoot a ittae mooat wooan. Nge rhooawe ra iu neeppiy.

³ Jesus a fioang awewe ngaeniir towunepaen aegiaeg, iwe a aengaeniir pwe,

“Erhai mwaaen a noa pwe epwe noa aeperes faiun foat.

⁴ Igiwe e aeperes fetaen foat kkewe, nge aekkaefai ra ppiungiutiw wenepeigin aan we, nge man aeniaen ra itto anginoa.

⁵ Aekkaefai ra ppiungiutiw wooan kaenefai, igiwe ese manidueon ppweon ee. Faiun kkewe ra mwetekkaein pwaechetae, pwe igiwe rese no ppweon ttonoa.

⁶ Nge igiwe aenet a ttinitae, nge a aeppwesa noa foat kkewe; pwe igiwe waeran foat kkewe ese nennnoan noa, iwe a mwetekkaein mae noa.

⁷ Aekkaefai ra ppiungiutiw neeiin irae towfanfan. Iwe irae towfanfan kkewe ra menawtae nge ra fittitae wooar iwe ra maenoa.

⁸ Nge aekkaefai ra ppiungiutiw noan ppweon mwamwaii, iwe ra uuwa: aekkaefai ra uwaeni epwiugiuw, aekkaefai woneig, nge aekkaefai eniig.”

⁹ Iwe Jesus a aengaeniir pwe, “Iyo eyor saeningan, epwe rongorong!”

Faaen Aaen Jesus Kkepesaen Fioangon Awewe (Mark 4.10-12; Luke 8.9-10)

¹⁰ Iwe rhooan kkayeo kkewe ra itto reen Jesus nge ra aeiineow pwe, “Meeta wo kkepas noan fioangon awewe iga wo kkepas ngaeniir reen?”

¹¹ Jesus a paniwaeniir pwe, “Deus a fang ngaenigaemi pwe oawpwe giuneei kkepas mwoanomwoanon minna Mweoiu Naaeng, nge ikka aaemweoi ese ngaenneer.

¹² Pwe iyo a yor meeta aan nge repwe pwan fang ngaeni iwe epwene igin ssow noa aan, nge iyo ese yor meeta aan nge repwe pwigi saengi mwo nge iwe egius iwe eyor reen.

¹³ Faaen aaei kkepas ngaeniir noan fioangon awewe, pwe iga re pipiiy noa nge rese weri, nge repwe aiussaening nge rese rongorong, nge rese pwan metaf reen.

¹⁴ Iwe a pwae pwe ennet minikkiwe mwaeniaen profeta Isaiah: ‘Oawpwe aiussaening me aiussaening nge oawsoapw metaf; oawpwe pipiiy me pipiiy nge oawsoapw weri.

¹⁵ Pwe aar niunniwaen rhooakkeei nge a pwurh,
nge ra pineyinoa saeninge, nge ra ammaiur noa meseer.
Ngaere ese iiei wusuur, ina nge meseer epwe weriwer
nge saeninge, epwe rongorong,
epwe metaf noan pwunnoor,
iwe nge repwe toagun ngaeniaei,
nge ngaang ipwe aemaemaewaar tae.’
Iiei minne mwaeniaen Deus.

16 “Nge aaemi oawwa wenepwu! Pwe mesaemi ra weriwer nge saeningaemi ra rongorong.

17 Ennetaen, ipwe aengaenigaemi, pwe towunap profeta me aeremas mwamwaai ra mwerhaen weri meeta kka aaemi oawwa weri, nge iir rese weri. Ra pwan mwerhaen rongorong meeta kka aaemi oawwa rongorong, nge iir rese rongorong.

*Jesus e Aemmetefa Fioangon Awewen Rhooan Foat we
(Mark 4.13-20; Luke 8.11-15)*

18 “Iwe oawaiussaening, pwe oawpwe metaf reen fioangon awewen rhoaan foat we.

19 Rhooa kkewe re rongorong kkepesaen Mweoiu Naaeng, nge rese mete-faaegini, ra taeppen rhag faiun foat kkewe re ppiungiutiw wenepeigin aan we. Iwe Man Aenneew we a itto pwigi saengiir minne a toonong nee tipeer.

20 Nge faiun kkewe re ppiungiutiw wooan kaenefai, ra aeffitaeg ngaeni rhooawe re aetiwa miniwe kkepesaen Deus noan kker reen rhag oaton we ra rongorong.

21 Nge kkepas we ese waaraar me nee tipeer, iwe ese ssiunaei wooar. Nge aere a yor fitigogo me waeiraes faaen itaen miniwe kkepesaen Deus, ra mwetekkaein fangetae.

22 Nge faiun kkewe re ppiungiutiw neeiin irae towfanfan, ra aeffitaeg ngaeniir rhooawe re rongorong kkepesaen Deus, nge aiunaeng reen menaw e igma me mwecheniaen pisaegin feoniufan ra oamoapwu miniwe kkepesaen Deus, pwe esoapw mmwenen uuwa.

23 Nge faiun kkewe re ppiungiutiw wooan ppweon mwamwaai, ra aeffitaeg ngaeniir rhooawe re rongorong miniwe kkepesaen Deus nge ra metaf reen: iwe, ra uuwa, aaemweoi ra uwaeni epwiugiuw, aaemweoi woneig, nge pwan aaemweoi eniig.”

Fioangon Awewen Fatin

24 Jesus a pwan fioangei ngaeniir pwan eew fioangon awewe: “Mweoiu Naaeng a aeffitaeg ngaeni minneen. Erhai mwaaen a aeperes faiun foat gacch noan aan menaa.

25 Noan eew pwongin, igiwe aeremas ra maiur, erhai man aenneew a itto aeperes pwuger mwaaen neeiin maat we, iwe, a noa.

26 Oatowe faiun foat kkewe ra menawtae nge ra uuwa, iwe nge a noa pwae noa pwuger mwaaen kkewe.

27 Mwaaen kkewe naiun rhooan engaang ra itto reen nge ra aengaeni pwe, ‘Menap, saapw faiun foat gacch miniwe wofoat noan menaai we oamw? Nge iya rhag pwuger mwaaen ra noa itto me ee?’

28 A paniuwaenir pwe, ‘Erhai man aenneew a feeori minnei.’ Iwe, rhooawe rhooan engaang ra aeiineow pwe, ‘Womwerhaen aeipwe noa wiytæe pwuger mwaaen kenaan?’

29 Iwe a paniuwaenir pwe, ‘Aapw, pwe aere oawpwe wiytæe pwuger mwaaen kenaan nge emmwen pwe faiun foat kkewe repwe pwan wisaegtae.

30 Oaw nigitir pwe repwe menaw ppagtae toori oaton ee sipwene gin. Iwe nge ngaang ipwe naaen aengaeni rhooan affeeoriun repwe mmwaen wiytæe pwuger mwaaen kkewe, ra geoni fengaenniy nge ra figiir noa. Iwe ra ion fengaenniy faiun foat kkewe nge ra iseniir nong noan aaei imwaen soko.’ ”

*Fioangon Awewen Faiun Mustard
(Mark 4.30-32; Luke 13.18-19)*

³¹ Iwe, Jesus a fioangei ngaenir pwan eew fioangon awewe: “Mweoiu Naaeng a aeffitaeg ngaeni minneen. Erhai mwaaen a pwigi efaifaiun mustard a noa foatogi noan aan menaai.

³² Iiy minne oarosaen mwittigin me neeiir faiun irae, nge igine a menawtae nge iiy minne oarosaen temoag me neeiin irae me noan menaai we. A ssiuwen ngaeni efoarh irae faeregite, pwe man aeniaen repwe itto ffeeor feseer wooan raaen.”

*Fioangon Awewen Yeast
(Luke 13.20-21)*

³³ Iwe, Jesus a fioangei ngaenir pwan eew fioangon awewe: “Mweoiu Naaeng a aeffitaeg ngaeni minneen. Erhai rhooapwut a pwigi egius yeast nge a nofiti fengaenniy me enuuw pwaecchin fenoawa emas toori aan pwo tae fenoawa we.”

*Faaen Aaen Jesus Aeyae Fioangon Awewe
(Mark 4.33-34)*

³⁴ Jesus a aeyae fioangon awewe aan epwe aepesa ngaenir pwuwaen aeremas oanongaen minikkei; esoapw aepesa mwo nge epat aegiaeg ngaenir igine ese aeyae fioangon awewe.

³⁵ A feeori minnei pwe epwe pwaeritae pwe ennet miniwe profeta a aepesa pwe,

“Ngaang ipwe aeyae fioangon awewe iga ipwe kkepas ngaenir.

Ngaang ipwe aepesa ngaenir minikka rese giuneei saengi rhaepetaen feoniufan.”

Jesus a Aemetefaa Fioangon Awewen Fetin we

³⁶ Iwe igiwe Jesus a noa saengi pwuwaen aeremas kkewe nge a toonong noan eew iimw, rhooan kkayeo kkewe naiun ra itto reen nge ra aengaeni pwe, “Wopwe aemetefaa ngaenigemaem meeta faaen fioangon awewen fetin we noan menaai we.”

³⁷ Jesus a paniuwaenir pwe, “Mwaaen we aeperes faiun foat kkewe egacch nge ina iiy Naiun Aeremas;

³⁸ menaai we ina feoniufan; faiun foat kkewe regacch ina aeremesaen Mweoiu Naaeng; nge pwuger mwaaen kkewe, ina iir naiun Man Aenneew we;

³⁹ nge man aenneew we e foatogi pwuger mwaaen kkewe ina Saetan. Nge oaton gin nge ina nee soapwonoan feoniufan, nge rhooan affeeoriun gin we ina iir angkenus.

⁴⁰ Wunuunun pwuger mwaaen kkewe ra ion fengaenniy nge ra figiir tae wooan aengaet, nge ina wunuunun minne epwe wen nee soapwonoan feoniufan.

⁴¹ Miniwe Naiun Aeremas epwene fangenoa naiun angkenus pwe repwe ionir iyo kkewe reno noan Mweoiun iwe repaeni ngaenir monofit, pwan rhooawe refreeori wegitaeg aenneew,

⁴² nge repwe oatoranong noan nenien aengaet, iga repwe sessaeng nge akkaarengi me ee.

⁴³ Iwe rhooa mwamwaai repwene ttin taepen aenet noan Mweoiun Semeer. Iyo eyor saeningan, epwe rongorong!

Fioangon Awewen Pisaeg Kooap

⁴⁴ “Mweoiu Naaeng a pwan weei minneen. Erhai mwaaen enoa rhuungi eew pisaeg kooap egin rhaeng me wooan eew maat. A pwaniuw sefaaen noa nge noan aan kker a noa ameow noa oanongaen minikkena pisaegin, nge a sefaaen noa nge a noa meoni maat we.

Fioangon Awewen Faiun Usowus

⁴⁵ “Mweoiun Naaeng a pwan weei minneen. Erhai mwaaen rhooan chuwaai nge e kiukkiutta fetaen faiun usowus kka nning,

⁴⁶ nge igine a giuneei efai min igin yor ipitan, a noa ameow noa oanongaen pisaegin nge a meoni faiun usowus we.

Fioangon Awewen Wuug

⁴⁷ “Mweoiun Naaeng a pwan weei minneen. Aaemweoi rhooan fita ra aekkaerh wow aar wuug noan meoneoiniun we nge ra niyap mesemesaen iig.

⁴⁸ Oatowe wuug we a sseog reen iig, nge ra iuriunong neeppiy, mwirin ra mooat tiw pwe repwe aemegena fesaenngiy iig kkewe: iig gacch ra iseni nong noan rhiug, nge iig kkewe re aenneew ra oatoranoa.

⁴⁹ Epwe iiei wunuunun nee soapwonoan feoniufan. Angkenus repwene noa aeyimweoiuw fesaenngiy aeremas aenneew saengiir aeremas mwamwaai.

⁵⁰ Repwe oatoranong aeremas aenneew noan nenien aengaet, iya repwe sessaeng nge akkaarengi me ee.”

Minne Effeo me Maerhiy

⁵¹ Jesus a aeiineeor pwe, “Oaw metefaaegini oanongaen minikkaan?”

Ra paniuwaeni pwe, “Ooa.”

⁵² Iwe a aengaenir pwe, “Ina nge faaen minneei ina oanongeer sinsein anniug kka repwe no pwe rhooan kkayeo noan Mweoiun Naaeng ra taeppen rhag soaw iimw we e oatowowuw pisaeg mini ffeo me min maerhiy me noan soko we aan.”

Rhooan Nazareth Rese Aetiwa Jesus

(Mark 6.1-6; Luke 4.16-30)

⁵³ Igiwe Jesus a moann aan fioangei fioangon awewe kkewe, a noa saengi pwiuneoi we

⁵⁴ nge a noa nee pwugusan. A fenai noan wutteer Jews we, nge rhooawe re rongorong ngaeni ra riutae reen. Ra aeiineo, “Iya woneei a pwigi me ee aan tipaecchem me kkeman kka aan?

⁵⁵ Ifa wusun, soapw woneei miniwe naiun taikusang we? Saapw Maria miniwe inan? Me saapw James, Joseph, Simon me Judas nge pwiin?

⁵⁶ Soapw oanongeer mwengayan nge reno igeei? Iya woneei a pwigi oanongaen minikkeei me ee?”

⁵⁷ Iwe resa aetiwa no iiy.

Jesus a aengaenir, “Erhai profeta eyor aesirowun me noan oanongaen pwiuneoi, nge ese yor aesirowun me noan sipegin taeninimwan aere noan imwan.”

⁵⁸ Pwe iga esooar aar niugiuniug, ina minne Jesus ese feeori towunepaen kkeman kkewe aan me igitwe reen.

14

Maenoan John Baptist

(Mark 6.14-29; Luke 9.7-9)

¹ Noan oatowe Eroles iwe soamwoonin Galilee a rongorong wunuunun Jesus.

² A aengaenir rhooan engaang kkewe naiun pwe, “Ieee iiy John Baptist, nge a menaw sefaaen. Ina faaen minne eyor maemaewan pwe epwe feeori kkeman kkeei reen.”

³ Pwe mmwan nge Eroles a akkiuneo pwe repwe torofi John nge ra geoni iwe ra oatoranong noan kanepwus. Eroles a feeori minneei faaen itaen Herodias iwe pwiuniwaen Philip we pwiin.

⁴ Pwe John Baptist a fasiun aepini ngaeni Eroles pwe, “Ese fin ngaenius oamw wopwe pwiuniwaeni Herodias.”

⁵ Eroles emwerhaen pwe epwe niyy noa John, nge emesagiur Jews pwe iga reiseni John pwe erhai profeta.

⁶ Nge raaenin gupwunon wupwutiwen Eroles, nge niewe naiun Herodias epwaai me weni mmweer rhooawe. Nge Eroles igin kker,

⁷ a ppwon ngaeni niewe pwe, “Iya aekkepan, pwe ngaang ipwe ngaenneog ese tiwegin meeta wo tingoar.”

⁸ Miniwe inan a akkiuneow pwe epwe tingoareei Eroles pwe, “Igina rhag nge wopwe ngaenneaei rhimwen John Baptist noan eew saepiy!”

⁹ Iwe rhag nge eaenneew noa tipaen *king* we, nge pwonno igiwe a aekkepan weni mmweer waseona kkewe, a aepesa pwe mwerhaen we aaen rhooapwut we naiun epwe mmwen.

¹⁰ Iwe a akkiuneo pwe repwe noa gopyi noa iiuwaen John me noan kanepwus.

¹¹ Iwe, ra pwigito miniwe rhimwen John noan eew saepiy nge ra ngaenneei aeterhooapwut we, iwe niewe a pwigi noa reen niewe inan.

¹² Rhooan kkayeo kkewe naiun John ra itto pwigi miniwe oanongan nge ra noa paeia noa. Iwe nge ra noa aengaen Jesus.

Jesus e Oamwongoor Nimingeras Aeremas

(Mark 6.30-44; Luke 9.10-17; John 6.1-14)

¹³ Igiwe Jesus a rongorong miniwe kkepesaen John, a tapwee efoarh pwoot saengi igiwe nge a noa ngaeni eew pwiuneoi ne iiy noa rhag. Nge igiwe aeremas ra rongorong miniwe, ra noa saengi aepinoamwoor nge ra tapwee noa mwirin me weni faniuw.

¹⁴ Jesus a teeotiw me wooan pwoot we, nge a giuneei pwuwaen aeremas kkewe, nge a igin faayeeor iwe a aecchipwaar tae rhooawe re semwaai me neeiir.

¹⁵ Noan faefin we nge rhooan kkayeo kkewe naiun ra itto reen nge ra aengaen pwe, “Eigin anniug noa igeui, nge a pwan pwoong. Aefengaar noa aeremas kaan nee aepinoamw pwe repwe noa sipegin chuwaai aeneer mwongo.”

¹⁶ Nge Jesus a aengaenir pwe, “Inamwo me rese noa, aaemi oawpwe ngaenneer meeta repwe mwongo!”

¹⁷ Nge iir ra paniuwaeni pwe, “Minne eyor remaem nge niffai rhag fenoawa me riurhai iig.”

¹⁸ Iwe, Jesus a aengaenir pwe, “Iwe oaw pwigito reei.”

¹⁹ Iwe nge a aepesa ngaenir rhooawe pwe repwe mooat tiw wooan fetin kkewe. Iwe a pwigi fenoawa kkewe niffai me iig kkewe riurhai, a fattae naaeng nge a fang aan maeipinen aerhigerhig Iwe a giniyy fenoawa kkewe nge a ngaenneer rhooan kkayeo kkewe naiun, nge iir ra inetiy ngaenir aeremas kkewe.

²⁰ Oanongeer nge ra maegin mwongo iwe ra faeyemwaai noa. Iwe rhooan kkayeo kkewe ra oawuta seig me ruwowu rhiug reen nuseg kkewe.

²¹ Iwe nepeer mwaen kkewe remwongo nge nimingeras, nge rese paaepae rhooapwut me wonigaet.

Jesus e Faaeraeg Noa Weei Saaet

(Mark 6.45-52; John 6.15-21)

²² Iwe rhag nge Jesus a aepekkaar rhoaan kkayeo kkewe naiun pwe repwe teeotae wooan pwoot we, nge ra gommwonoa epeig meoneoiniun we, nge iiy a aefengaar noa aeremas kkewe.

²³ Mwirin aan aefengaar noa aeremas kkewe, Jesus a ittae wooan rhug we nge iiy rhag, pwe epwe noa maeipin. Igiwe a pwongonoa, a iiy noa rhag igiwe.

²⁴ Reen oateen nge pwoot we a taaw saengi faniuw, a nuponup pwoot we reen tettemoagon noa, nge igiwe repwan maeyi ngaeni aaeng.

²⁵ Enoa nepetaen enuuw me wonowu konoock nee oatosor Jesus a itto reer rhoaan kkayeo kkewe, enoa faaeraegto weeisaaet.

²⁶ Igiwe ra giuneei aan faaeraegto weeisaaet, ra igin mesag. Ra aekkepwas pwe, "Erhai aniu!"

²⁷ Noan rhag oaton een nge Jesus a kkepas ngaeniir pwe, "Oawaemenetaegaemi! Ngaang minneei, oawte mesag!"

²⁸ Iwe Peter a aepesa pwe, "Soamwoon, aere een minna, aengaeniai pwe ipwe faaeraeg wow reemw wooan saaet."

²⁹ Jesus a paniwaeni pwe, "Itto!" Iwe Peter a teeotiwoon me wooan pwoot we nge a faaeraeg noa reen Jesus weeisaaet.

³⁰ Nge igiwe a weri maemaewaen aaeng we, a mesag nge a rhaepetae aan mwotupwutiw. Iwe, a aekkepwas pwe, "Aemenewaeyaei Soamwoon!"

³¹ Iwe rhag nge Jesus a aeiti noa paiun, a ammwarhiu Peter nge a aengaeni pwe, "Me gaen mwittiginen oamw niugiuniug! Meeta wotip mwaramwar reen?"

³² Iwe ra teeotae wooan pwoot we, iwe nge aaeng we a maseoseotiwoon.

³³ Iwe rhoaan kkayeo kkewe reno wooan pwoot we ra aesirowu Jesus nge ra aepesa pwe, "Ennetaen pwe een Naiun Deus!"

Jesus a Aecchipwaar Rhooa Semwaai Noan Gennesaret (Mark 6.53-56)

³⁴ Iwe ra seraeg noa epeig meoneoiniun we nge ra noa itto noan me Gennesaret.

³⁵ Aeremesaen pwiuneoi we reaeginna Jesus iwe ra aepesa noa wooan oanongaen faniuw pwe Jesus a no. Iwe aeremas ra pwigiir to oanongeer rhoaan semwaai reen Jesus.

³⁶ Ra tingoar ngaeni pwe aere uwen aar mwo man semwaai geotteopa soapwon mengaagiun. Iwe oanongeer iyo kkewe re geotteopa ra mamaaw noa.

15

Aar Fenai Rhaepeto Kkewe (Mark 7.1-13)

¹ Iwe aaemweoi Pharisees me sinsein anniug ra itto reen Jesus saengi Jerusalem nge ra aeiineow pwe,

² "Meeta rhoaan kkayeo kkomwu noawumw rese tapwee aar fenai rhaepeto kkewe aarh reen? Rese tapwee wunuunun toatoan pai mmwaen aar repwe mwongo!"

³ Jesus a paniwaeniir pwe, "Iwe ina meeta oawse tapwee aen Deus anniug reen pwe oawwa tapwee ina kкоми?"

⁴ Pwe Deus a aepesa pwe, 'Wopwe aesirowur semoamw me inoamw' iwe me, 'Iyo e oari seman aere inan nge repwe niy noa.'

⁵ Nge aaemi oawwa aengaeniair aeremas pwe aere eyor minne erhai epwe tipaengi ngaeni seman aere inan, nge a iura pwe, 'Ieen aaen Deus,'

⁶ nge ese aenneew igine ese aesirowu no seman. Ieei minne oawwa oatoranoa aaen anniug Deus pwe aaemi oawpwe feeori minna kкоми.

⁷ AAemi rhooa oatupwutupw! A gin weneeti minne we Isaiah efenaiuw pwe wunuunumi!

⁸ 'Deus a aepesa pwe: Aeremas kkeei ra oassoamwooniaei rhag reen aar kkepas,

nge nee tipeer a igin taaw saengiae.

⁹ Esooar ipitaen aar aesirowuwaei, pwe refenaiuw aar aeremas anniug, nge ra feeori pwe aetae gaen aaei anniug!"

*Minikka eAenimaenneewa Aeremas
(Mark 7.14-23)*

¹⁰ Iwe Jesus a faingir to pwuwaen aeremas kkewe nge a aengaenir pwe, "Oaw aiussaening pwe oawpwe metaf!

¹¹ Saapw meeta kka etonong noan ewaemi minne epwe aenimaenneewagaemi, pwe faer meeta kka etowow me noan minne a aenimaenneewagaemi."

¹² Iwe rhooan kkayeо kkewe ra itto reen Jesus nge ra aengaeni pwe, "Wa giuneei pwe ra soong Pharisees kkewe reen meeta we wo aepesa?"

¹³ Jesus a paniuwaenir pwe, "Oanongan waniwan kka miniwe Semaei noan naaeng ese foatogi epwe wihiytae.

¹⁴ Oawsoapw niunniuwaenner iir! Iir ikkomwu rhooa parh nge repaaepae rhooa parh. Ngaere erhai man parh epaeni pwan erhai man parh, nge iir me riiurhai repwe ppiungiunong nee niipw."

¹⁵ Peter a aengaeni pwe, "Wopwe aemmetefa ngaenigemaem meeta faaen kkepas eei."

¹⁶ Jesus a aengaenir pwe, "Oawsaaen metaf noa mwo?

¹⁷ Oawse metaf? Pwe meeta kka a toonong noan ewaemi pwan toonong noan upwaemi, mwirin a toowow me noan oanongaemi.

¹⁸ Nge meeta kka retowow saengi ewaemi rhaep saengi pwunnomi, nge ikkaan minikka e aenimaenneewagaemi.

¹⁹ Pwe saengi noan pwunnomi a toowow niunniuwaen aenneew taeppen, nni menaw, maiur ngaeni pwiuniuwaen erhai, ffeeor aenneew, mwoarho, oatupwutupw me aenneewa noa iteer aaemweoi.

²⁰ Ikkaan minikka e aenimaenneewagaemi. Iwe nge erhai e mwongo nge ese tapweei wunuunun toatoan pai, minneen esoapw aenimaenneewagaemi."

*Aaen Niugiuniug Erhai Rhooapwut
(Mark 7.24-30)*

²¹ Jesus a noa saengi pwiuneoi we nge a noa noan faniuw kkewe oaron aepinoamwon Tyre me Sidon.

²² Erhai rhooapwuton Canaan enonno pwiuneoi we a itto reen, nge a aepwesaegini pwe, "Soamwoon, Naiun David! Faayeowaei! Rhooapwut na naeyi a wartae aniu aenneew wooan nge a igin cchoaw noa."

²³ Nge Jesus ese aengaeni mwo eew petenaen kkepas. Rhooan kkayeо kkewe naiun ra itto reen nge ra tingoar gacch ngaeni pwe, "Aefenganoa nieei! Ettapw fetaen rhag me mwirirh nge eigin soaw oacchorong!"

²⁴ Iwe Jesus a aepesa pwe, "Deus eafengaeyaei to rhag pwe reer re Israel kkewe ra weer sheep kkewe re mwaenirh noa."

²⁵ Iwe rhag nge rhooapwut we a itto foatotiw weni mmwan nge a iura pwe, "Soamwoon, tipaengiae!"

²⁶ Jesus a paniuwaeni pwe, “Ese mwamwaai pwe sipwe pwigi aeneer wonigaet mwongo nge sa oatora ngaenir gonaag.”

²⁷ Iwe niewe a paniuwaeni pwe, “Ennet minna, Soamwoon, nge gonaag mwo nge re angi peipeyin mwongo ppiungiutiw saengi aar maasta *table*.”

²⁸ Iwe Jesus a paniuwaeni niewe pwe, “Een erhai rhooapwut e igin faeregit oamw niugiuniug! Meeta na oamw mwerhaen nge epwe yo ngaeniuug.” Iwe noan rhag oaton we nge rhooapwut we naiun a takketae.

Jesus e Aecchipwaar Rhooa Towunap Kkewe

²⁹ Jesus a noa saengi pwiuneoi we nge a noa faaeraeg ngaerhen meoneoini-uniun Galilee. A ittae wooan eew rhug a ittae mooat tiw.

³⁰ Towunepaen aeremas kkewe ra itto reen, pwigito rhooawe re pirhemae, rhooa parh, rhooa maemerhoar, rhooa se kkepas, me pwan towunepaen aeremas kka re semwaai ra itto iseniir tiw oaron pirheen Jesus; iwe a aecchipwaar tae oanongeer.

³¹ Aeremas ra mwaar reen meeta we ra weri pwe igiwe rhooawe rese kkepas ra kkepas, rhooawe remaemerhoar ra mamaaw noa, rhooawe re pirhemae ra faaeraeg, pwan rhooawe reparh ra weri mmweer. Iwe, ra aepingepinga Deus we naijur re Israel.

Jesus e Oamwongoor Faangeras Aeremas

(Mark 8.1-10)

³² Jesus a faingiir to rhooan kkayeo kkewe naiun nge a aengaenir pwe, “Ngaang iya faayeeor aeremas kaan, pwe ra no reei noan eoniuraen nge esooar meeta minne repwe angi. Ngaang ise mwerhaen aefengaar noa noan aar pecchai, pwe repwe tongaeni niyoarorhrorh iga repwe faaeraeg ngaeni imweer.”

³³ Rhoan kkayeo kkewe ra aeiineow pwe, “Iya me noan pwiuneoi anniug noa eei minne sipwe weriwer mwongo me ee pwe epwe nap ngaenir towunepeer aeremas kaan?”

³⁴ Jesus a aeiineor pwe, “Fitifai fenoawa eyor reemi?”

Ra paniuwaeni pwe, “Fiusufai fenoawa me fitiman iig mwittig.”

³⁵ Iwe Jesus a aepesa ngaenir aeremas kkewe pwe repwe mooat tiw wenippweon.

³⁶ A pwigi fenoawa kkewe fiusufai me iig kkewe nge a fang ngaeni Deus aan aerhigerhig, a giniytiw nge a ngaenneer rhooan kkayeo kkewe, nge rhooan kkayeo ra ngaenir aeremas kkewe.

³⁷ Oanongeer ra mwongo nge ra faeyemwaai. Rhoan kkayeo kkewe ra oawuta fisuuw rhiug reen nusegin mwongo kkewe.

³⁸ Nneogeoiiur mwaaen kkewe remwongo nge faangeras, nge rese paaepaenong rhooapwut me wonigaet.

³⁹ Iwe Jesus a fangoa aeremas kkewe, nge a teeotae wooan pwoot we nge a saei ngaeni miniwe faniuwaen Magadan.

16

Tingoaron Kkeman

(Mark 8.11-13; Luke 12.54-56)

¹ Aaemweoi Pharisees me Sadducees ra itto reen Jesus pwe repwe aegin, iwe ra tingoareei pwe epwe feeori eew kkeman, pwe epwe pwae noa pwe Deus e tipieew ngaeni.

² Nge Jesus a paniuwaenir pwe, “Iga aenet epwe tupwutiw oawwa aepesa, ‘Epwe igin gacch raaen naiu, pwe a ccha noa noan naaeng.’

³ Nge nee oatosor moawugowug oawwa aepesa pwe, ‘Epwe igin piung worhow raaeneei, pwe a ccha me roorh noa noan mann.’ Oawwa mmwenen aepesa wunuunun raaen mwaai me raaen aenneew reen aaemi weri noan mann, nge oawsoapw mmwenen aweweeli minikka aeginnen mweoi kkeei!

⁴ A ifa mwo aenneewan me aar se niugiuniug aeremesaen mweoi e igina! Oawwa tingoar ngaeniaei pwe ipwe feeori eew kkeman. Nge esoapw yor eew kkeman epwe pwae ngaenigaemi me niugiunoan kkeman we kkeme-naen profeta Jonah.”

Iwe nge Jesus a nigitir a noa taaw noa.

Aar Yeast Pharisees me Sadducees

(Mark 8.14-21)

⁵ Igiwe rhooan kkayeo kkewe ra noa epeig meoneoiniun we, ra maniuwegi noa pwe repwe pweipwog fenoawa.

⁶ Jesus a aengaeniir pwe, “Oawataapeonneogiugaemi nge aefaaennigaemi reen yeast we aar Pharisees me Sadducees.”

⁷ Iwe rhooan kkayeo kkewe ra rhaepetae reen kkepas fengaen nee fineer, “A aepesa kkepas eei pwe iga sise pweipwog fenoawa.”

⁸ Jesus a giuneei meeta we ra aepesa, iwe a aeiineor pwe, “Meeta oawwa fioangei nee finaemi aan esooar fenoawa reemi reen? Me gaen mwittiginen aaemi niugiuniug!”

⁹ Meeta, oawsaaen metaf mwo? Oawse maengiy igiwe iginiiy niffai fenoawa wooar rhooawe nimingeras? Fitowu rhiug oawwa oawuta reen minikkewe nusegin mwongo?

¹⁰ Nge oatowe iginiiy fenoawa kkewe fiusufai wooar rhooawe faangeras, fitowu rhiug oaw oawuta reen minikkewe nusegin mwongo?

¹¹ Ifa wusun imwu oawse metaf pwe ise kkepesaen fenoawa ngaenigaemi? Oawpwe aefaaennigaemi reen aar yeast Pharisees me Sadducees!”

¹² Iwe rhooan kkayeo kkewe ra metefaaegini pwe Jesus ese kkepesaen pwe repwe aefaaeniir reen yeast we eno noan fenoawa, pwe saengi aar Pharisees me Sadducees fenai.

Peter e Iura pwe Jesus Ina Kristus

(Mark 8.27-30; Luke 9.18-21)

¹³ Jesus a noa ngaeni pwiuneoi we e arap ngaeni aepinoamwon Caesarea Philippi, igiwe a aeiineor rhooan kkayeo kkewe me ee pwe, “Iyo ee aeremas ra aepesa pwe iiy Naiun Aeremas?”

¹⁴ Ra paniwaeni pwe, “Aaemweoi re iura pwe John Baptist, nge aaemweoi re iura pwe Elijah, nge aaemweoi re iura pwe Jeremiah aere aaemweoi profeta.”

¹⁵ Jesus a aeiineor pwe, “Nge aaemi, oawiura pwe ngaang iyo?”

¹⁶ Simon Peter a paniwaeni pwe, “Een Kristus iwe Naiun Deus iwe e menaw.”

¹⁷ Jesus a paniwaeni pwe, “Wenepwu ngaeniug, Simon naiun John! Pwe kkepas eei ese itto reemw me reer aeremas, pwe Semaei noan naaeng minne e pwaeri ngaeniug.

¹⁸ Iwe ipwe aengaeniug pwe een Peter: een efai faai.* Nge wooan wungaen fai een ipwe aiuwtae aaei keneisia wooan, nge maenoa mwo nge esoapw tongaeni oatoaropa.

¹⁹ Ngaang ipwe ngaenneog kkiaen Mweoiun Naaeng; minne oawwa feoti me feoniufan epwe pwan feofeo me wooan naaeng, nge minne oawwa saenet i me wooan feoniufan epwe pwan saenetaeg me wooan naaeng.”

* **16:18** Wewen Peter me noan kkepesaen Greek nge *faai*.

²⁰ Iwe Jesus a aetiwenig ngaenir rhoaan kkayeо kkewe pwe resoapw aengaeni mwo nge erhai pwe iiy miniwe Kristus.

*Jesus a Aepesa Waeiraesin me Maenoan
(Mark 8.31–9.1; Luke 9.22-27)*

²¹ Saengi rhag oatowe nge Jesus a rhaepetae aan aemmetefa ngaenir rhoaan kkayeо kkewe naiun pwe, “Ipwene noa Jerusalem, nge ipwene noa waeiraes me reer mwaaen kkewe aar, me soamwoonin patere kkewe me rhoaoawe sinsein anniug. Repwe niaeи noa, nge mwirin enuuw raaen nge ipwe menaw sefaaen.”

²² Iwe Peter a wummuwu noa egius nge a noa soong ngaeni pwe, “Soamwoon, esoapw ina minna! Esoapw mmwesen wen ngaeniu minna!”

²³ Nge Jesus a toagun ngaeni Peter nge a aengaeni pwe, “Rhiuw me oaroi, Saetan, een rhoaan pineyiaeи. Pwe oamw niunniwaen ese itto me reen Deus, pwe e itto me reen aeremas.”

²⁴ Iwe Jesus a aengaenir rhoaan kkayeо kkewe naiun pwe, “Aere erhai a mwerhaen tapweaei, epwe aerheei noa niunniwaennen wooan oanongan, a aiufera aan kurus nge tapweeito mwiriy.

²⁵ Pwe iyo emwerhaen ammwarhiu menewan, epwe ppiung saengi; nge iyo eppiung saengi menewan pwonno ngaang, epwe giuneei menaw.

²⁶ Epwe meeta ipitan aaen yo faeinaengiy nniuw noa ngaeni erhai, nge ese yo ngaeni menewan? Essoar ngaere! Esoapw yor meeta erhai epwe tongaeni fangenoa pwe epwe pwigi sefaaeniy menewan.

²⁷ Pwe Naiun Aeremas epwe war noan nning minna Seman me angkenus kkewe naiun. Enoa oatonaan nge a aesefaaeni ngaeni erhai me erhai aeremas wunuunun aan feoffeelor.

²⁸ Ennetaan, ipwe aengaenigaemi pwe eyor aaemweoi aeremas igeei resoapw mae, toori oatona repwe weri Naiun Aeremas epwe wareto pwe King.”

17

*Nniuwen Noan Wunuunun Jesus
(Mark 9.2-13; Luke 9.28-36)*

¹ Iwe mwirin wonowu raaen, Jesus a paenitae Peter me mwaaen pwipwi kkewe riiurhai James me John nge a wummuur tae wooan eew rhug taegias, nge a iir noa rhag ee.

² Igiwe re rhiuwen oawruru Jesus, nge a ssiuwen noa wunuunun: wooan mesan a wee seremaen ttinen aenet, nge mengaagiun a igin pwerheraeg noa.

³ Iwe nge rhoaan kkayeо kkewe eoniurhai ra weri Moses me Elijah pwe re kekkes fengaen me Jesus.

⁴ Iwe, Peter a aengaeni Jesus pwe, “Soamwoon, a igin gacch pwe sino igeei. Aere wotipaeni, ipwe aiuwtae enuuw iimw tampwoning igeei, eew imwoamw, eew imwaen Moses, me eew imwaen Elijah.”

⁵ Igiwe Peter erhiuwen kekkes, eew toapw seram a itto pwaniur noa, nge eew mangiungiu saengi toapw we a aepesa pwe, “Ieei Naeyi mwaaen aerhaengerhaeng, iye efin tipaei reen, oawaiussaening ngaeni!”

⁶ Igiwe rhoaan kkayeо kkewe ra rongorong kkepas kkewe, ra igin mesag, iwe ra tororhap tiw wooan ppweon.

⁷ Iwe Jesus a itto reer nge a geotteopaar nge a aengaenir pwe, “Oawpwetae, oawsoapw mesag!”

⁸ Iwe renoa fattae nge esooar ne re rhiuwen weri pwe a Jesus noa rhag.

⁹ Igiwe ra ittiw me wooan rhug we, Jesus a aetiwenig ngaeniir pwe, “Oaw-soapw aengaeni mwo nge erhai meeta oawwa weri, toori aaen mwaaen we Naiun Aeremas epwe menaw sefaaen me reen maenoa.”

¹⁰ Iwe rhooan kkayeo kkewe ra aeiineow Jesus pwe, “Meeta sinsein anniug ra aepesa pwe Elijah epwe mmwaen itto reen?”

¹¹ Jesus a paniuwaeniir pwe, “Epwe fasiun gommwoto Elijah pwe epwe oamoannatae oanongaen aegiaeg.

¹² Nge ngaang ipwe aengaenigaemi, pwe Elijah a fasiun itto, nge aeremas rese aeginna, pwe refreeori ngaeni minne retipaeni. Epwan ina rhag aar aeppaeti mwaaen we Naiun Aeremas.”

¹³ Iwe rhooan kkayeo kkewe ra metaf pwe Jesus a kkepas ngaeniir reen wunuunun John Baptist.

*Jesus e Aecchipwa Erhai Aetemwaaen Eyor Aniu Aenneew Wooan
(Mark 9.14-29; Luke 9.37-43)*

¹⁴ Igiwe ra sefaaen ngaeniir pwuwaen aeremas kkewe, erhai mwaaen a itto reen Jesus, a foato pwiugiuwti me mmwan

¹⁵ nge a aengaeni pwe, “Soamwoon, faayeow aetemwaaen e naeyi! Egaen ngong nge a igin waeiraes nge a faaen ssow aan ppiungiunong noan aengaet me ne rhaan.

¹⁶ Iya pwigito reer rhooan kkayeo kkewe noawumw, nge iir rese mmwennen aecchipwatae.”

¹⁷ Iwe Jesus a paniuwaeni pwe, “Ifa mwo aaemi se niugiuniug me ruguppin faaen oateei! Epwe ifa ssiunaein aaei ipwe no reemi? Epwe ifa wusun aaei noaneenaei reemi? Oaw pwigito aetena reei!”

¹⁸ Jesus a aerh ngaeni aniu aenneew we, iwe a toowow me reen aet we, nge noan rhag oatowe nge aet we a cchipw tae.

¹⁹ Iwe rhooan kkayeo kkewe ra itto reen Jesus igiwe a iir noa rhag nge ra aeiineow pwe, “Meeta aemaem aeise mmwenen oatowowuw aniu aenneew we reen?”

²⁰ Jesus a paniuwaeniir pwe, “Pwonno iga emwittig aaemi niugiuniug. Ennetaan, ipwe aengaenigaemi, pwe aere aaemi niugiuniug eweei nepaen faiun *mustard* een, emmwen oawpwe aengaeni rhug een pwe, ‘Wopwe mwagiut saengi igeei nge wa noa iginaan!’ nge epwe mwagiut. Emmwen oawpwe feeori ese tiwegin meeta.”

²¹ [Nge maeipin me aecchigipin rhag minne emmwen epwe asiuw wow taeppen een; esooar pwan eew meeta ne emmwen.]*

*Jesus a Pwan Aepesa Wunuunun Aan Maenoa
(Mark 9.30-32; Luke 9.43-45)*

²² Oatowe rhooan kkayeo kkewe ra rhu fengaen me noan Galilee, Jesus a aengaeniir pwe, “Mwaaen we Naiun Aeremas epwene yonong nee paaiur aeremas,

²³ repwe niiy noa, nge mwirin enuuw raaen epwe menaw sefaaen.”

A igin aenneew noa noan tipeer rhooan kkayeo kkewe.

Tax Reen Temple we

²⁴ Igiwe Jesus me rhooan kkayeo kkewe naiun ra toori Capernaum, rhooan iyoion *tax reen Temple* we ra itto reen Peter nge ra aeiineow pwe, “Ifa wusun, sinsei mwu naimi esoapw fang *tax reen Temple* we?”

²⁵ Peter a paniuwaeniir pwe, “Ewaer, epwe fang.”

* **17:21** Petenan eei nge e soano noan aekkaew petenan kka e foatofoat noan kkepesaen Greek.

Oatowe Peter a toonong noan iimw we, Jesus a mmwaen kkepas, "Simon, meeta oamw niunniuwaen? Iyo epwe pey aegini ngaenir *kingaaen* faniuw tax? Naiur aeremas aere waseona?"

²⁶ Peter a paniuwaeni pwe, "Waseona."

Iwe Jesus a aengaeni pwe, "Aere ina, nge aeremesaen faniuw resoapw fang aar *tax*."

²⁷ Nge sise mwerhaen sipwe aenneewa nee tipeer aeremas kaan. Iwe wonoa noan meoneoiniun we wa noa aerheei nong oamw ooa noan. Iwe nge mmwaen iig na wopwe nipaeni, wopwe sugi noa ewan, nge wa pwigi faiun senaapiy ina eno noan e nnaaf ngaeniaei *tax* reen *Temple* me oamw. Pwigi nge wa fang ngaenir pwe aarh *tax*."

18

Iyo e Oarosaen Taegias? (Mark 9.33-37; Luke 9.46-48)

¹ Noan oatowe rhooan kkayeo kkewe ra itto reen Jesus nge ra aeiineow pwe, "Iyo e oarosaen taegias me noan minna Mweoiu Naaeng?"

² Iwe Jesus a faingito erhai wonigaet nge aiuwtae me wenimmweer.

³ Nge a aepesa pwe, "Ennetaan, ipwe aengaenigaemi, aere oawse ssiuwen pwe oawpwe weer rhag wonigaet, oawsoapw mmwenen toonong noan minna Mweoiu Naaeng."

⁴ Iyo na oarosaen taegias me noan minna Mweoiu Naaeng, nge iiy minne e oasossonaetiw pwe epwe aeffitaeg ngaeni wonigaet een.

⁵ Nge iyo e aetiwa erhai wonigaet faaen itaei, iiy epwan aetiwaeyaei.

Meeta Kka e Oamonofitiir Aeremas (Mark 9.42-48; Luke 17.1-2)

⁶ "Aere erhai efeori pwe erhai maan mwittig kaan epwe ppiung noa aan niugiuniug reei, nge efaf gacch pwe epwe geeogeeotae efai fai temoag faaen iiwan nge ra noa oamoapwu noa nee metaw."

⁷ Ifa mwo aenneewaen faeinaengiy iga eyor rhag minikka e affeori pwe epwe ppiung noa aar aeremas niugiuniug! Taepen minikkaan nge repwe fasiun wen, nge ifa mwo aenneewan aeremas na erhaepiy tae minikkei!

⁸ "Aere poawumw aere pirhemw re affeori pwe epwe ppiung noa oamw niugiuniug, wa gopiy noa wa oatoranoa! Egacch oamw wopwe toonong noan menaw na esooar iyaenin wooan oamw pai efoarh me pirhe efoarh, mmwaen oamw wopwe pai riufoarh aere pirhe riufoarh nge ra aerheog nong noan aengaet we esooar iaenin."

⁹ Me ngaere mesoamw a affeori pwe epwe ppiung noa oamw niugiuniug, wopwe oannusuwow wa oatoranoa! Efaer gacch oamw wopwe toonong noan menaw na esooar iyaenin reen oamw maseyefai, mmwaen oamw wopwe maseriuifai nge ra aerheog nong noan aengaetaen nifierno.

Fioangon Sheep we e Mwaenirh Noa (Luke 15.3-7)

¹⁰ "Oaw aefaaenniy pwe oawsoapw aeffaeioapwut mwo nge erhai me neeir aet mwittig kaan. Pwe ipwe aengaenigaemi, pwe angkenusuur aetekkaan repwe wewweri rhag mesaen minna Semaei noan naaeng."

¹¹ [Pwe Naiun Aeremas a itto, pwe epwe aemenewaar rhooawe re mwaenirh noa.]*

* **18:11** Petenan eei nge e soano noan aekkaew petenan kka e foatofoat noan kkepesaen Greek.

¹² “Meeta aaemi niunniuwaen? Aere erhai mwaaen eyor epwiugiuw naiun *sheep*, nge erhai neeiir a mwaenirh noa, iiy epwe nigititiw ikkiwe tiweig me tiweman wooan rhug we pwe epwe noa giutta iwe erhai e mwaenirh noa.

¹³ Ngaere a weri iwe erhai, ennetaen, ipwe aengaenigaemi, iiy epwe igin kker reen iwe erhai mmwaen ikkiwe tiweig me tiweman rese mwaenirh noa.

¹⁴ E aeffitaeg ngaeni rhag iga Semaemi noan naaeng ese mwerhaen pwe erhai mwo me neeiir man mwittig kaan repwe mwaenirh noa.

Iga Erhai Epwe Monofit

¹⁵ “Aere pwimw a monofit ngaeniug, wopwe noa reen pwe wopwe noa pwaeri ngaeni meeta na teren, nge noan mwoanomwoan nepetaemi rhag riiurhai. Ngaere e aiussaening ngaeniug, een wa pwini sefaeniy pwimw.

¹⁶ Ngaere ese aiussaening ngaeniug, wopwe paeni erhai aere riiurhai rhinoamw, ‘pwe oanongaen kkepas nge rhooa na riiurhai aere eonurhai repwe aenneta aere ennet,’ taeppen miniwe effoat noan Pwapwior we e Santus.

¹⁷ Iwe, aere ese mwerhaen aiussaening ngaenir, wopwe pwaeri ngaeni rhoaan keneisia. Aere keneisia mwo nge ese aiussaening ngaeni, iwe ina nge wopwe feeori ngaeni wunuunun minna wopwe feeori ngaeni erhai mane ese niugiuw Deus aere erhai rhoaan iyoion tax.

Feoti me Saeneti

¹⁸ “Ennetaen, ipwe aengaenigaemi: minne oawwa feoti me feoniufan epwe pwan feofeo me wooan naaeng, nge minne oawwa saeneti me wooan feoniufan epwe pwan saenetaeg me wooan naaeng.

¹⁹ “Iwe, ipwe pwan aengaenigaemi pwe: aere riiurhai neeimi wooan feoniufan ra tipieew fengaen wooan aekkaew minne repwe maeipin wooan, epwe toorigaemi mmwenen me reen Semaei wooaina naaeng.

²⁰ Pwe iga riiurhai aere eonurhai ra rhu fengaen pwe faaen itaei, ngaang ipwan no reer.”

Rhoaan Engaang we Ese Faayeow

²¹ Iwe Peter a itto reen Jesus nge aeiineow pwe, “Soamwoon, aere pwiiy a gaen monofit ngaeniaei, faaen fitowu ngaang ipwe saeneti noa aan monofit? Epwe faaen fisuuw?”

²² Nge Jesus a paniuwaeni pwe, “Aapw, saapw faaen fisuuw rhag, pwe faaen fisiig me fisuuw.

²³ Ieei minne Mweoiu Naaeng a aeffitaeg ngaeni. Erhai *king* a mwerhaen pwe naiun rhoaan engaang repwene itto aera monofitiir ngaeni.

²⁴ Oatowe ennaen rhaepetae ne feeori iiy miniwe, nge ra pwigito erhai nge e monofitini fitasenn mwo senaapiy.

²⁵ Iwe iga rhoaan engaang we ese mmwenen aera miniwe monofitin, iwe *king* we a aepesa pwe repwe ameow noa fengaen me pwiuniwan me naiun me oanongaen meeta pisaegiir pwe epwe mmwenen aera minikkewe monofitin.

²⁶ Iwe rhoaan engaang we a foato pwiugiuwti me mmwaen *king* we nge aeffaenipirhe ngaeni pwe, ‘Faayeowaei, pwe wopwe tipenaei ngaeniaei. Ngaang ipwe aera sefaeniy oanongaen monofitiy ngaeniug.’

²⁷ Iwe *king* we a igin faayeow rhoaan engaang we, iwe a saeneti noa aan monofit nge a fang pwe epwene noa.

²⁸ “Mwirin rhoaan engaang we a noa weri erhai rhinan rhoaan engaang e monofit ngaeni fitowu rhag senaapiy. Iwe a torofi mwaaen we, a fiengi

worongan nge a aengaeni pwe, ‘Wopwe aera sefaaen monofitimw ngaeniae.’

²⁹ Iwe rhooan engaang we a aesirowu tiw nge tingoar maaw ngaeni, ‘Wose mwerhaen wopwe faayeow ngaeniaei, ngaang ipwapw pey monofitiy ngaenius!’

³⁰ Nge mwaaen we ese mwerhaen. A aepesa pwe repwe oatoranong noan imwaen kanepwus toori aan epwe pey aegini monofitin.

³¹ Igiwe rhooan engaang kkewe rhinan ra giuneei meeta we a wen, ra igin soong iwe ra noa reen *king* we ra noa aengaeni oanongaen meeta we a wen.

³² Iwe *king* we a faingito rhooan engaang we nge a aengaeni pwe, ‘Een erhai rhooan engaang kkewe reaenneew! Ngaang iya saeneti noa oanongaen oamw monofit ngaeniaei faaen itaen oamw tingoar ngaeniaei.

³³ Meeta wose faayeow ngaeni rhinoamw rhooan engaang reen, taeppen rhag meeta ngaang iya feeori ngaenius?’

³⁴ Noan aaen *king* we igin soong, a fangenoa rhooan engaang we noan kanepwus toori aan epwe pey aegini oanongaen monofit kkewe aan ngaeni.

³⁵ “Epwe ieen taeppen minne Semaei noan naaeng epwe feeori ngaeni erhai me erhai neeimi, aere oawsoapw saeneti noa monofitin pwiami me noan tipaemi.”

19

Jesus a Fenaiuw Wunuunun Mweoinoa

(Mark 10.1-12)

¹ Igiwe Jesus a moann aan aepesa oanongaen minikkeei, nge a siusaengi Galilee pwe noa ngaeni faniuwaen Judea me wenepeiginoan pwupwu we Jordan.

² Pwuwaen aeremas kkewe rettapw noa mwirin, a aecchipwa tae me pwiuneoi we.

³ Aaemweoi Pharisees ra itto reen pwe repwe soatoni, nge ra aeiineow pwe, “Egacch me noan aarh anniug pwe erhai mwaaen epwe mweoi saengi pwiuniwan reen minne rhag e tipaeni?”

⁴ Jesus a panieuwaenii pwe, “Oawse aeraegi miniwe effoat noan Pwapwior we e Santus, pwe saengi rhaepetaen nge Deus a feeoriir aeremas pwe mwaaen me rhooapwut?

⁵ Nge Deus a aepesa pwe, ‘Ieei minne erhai mwaaen epwe nigiti seman me inan nge a noa rhuu ngaeni pwiuniwan, pwe repwene eew rhag.’

⁶ Ina minne iir resoapw rhiuwen riiurhai no, pwe ra erhai rhag. Esooar erhai aeremas ne epwe mweoiti fesaenngiy meeta e Deus a oarhuw fengaeniy.’

⁷ Iwe, rhooawe Pharisees ra aeiineow pwe, “Meeta rhag Moses a feeori anniug we pwe erhai mwaaen epwe mmwenen ngaennee pwiuniwan pwapwioron mweoinoa reen?”

⁸ Jesus a panieuwaenii pwe, “Moses a saeneti pwe aaemi mwaaen oawpwe mweoi saengi pwiuniwaemi faaen itaen aaemi se rongorong ngaeni aan fenai. Nge ese ina wusun saengi rhaepetaen igiwe Deus efeeori feoniufan.

⁹ Nge ngaang ipwe aengaenigaemi: aere erhai mwaaen a mweoi saengi pwiuniwan faaen itaen aekkaew aegiaeg, nge soapw reen aaen nieuwe maiur ngaeni pwiuniwaen erhai, iiy mwaaen we epwan feeori monofit aere a pwiuniwaeni pwan erhai rhooapwut.”

¹⁰ Iwe rhooan kkayeо kkewe naiun ra aengaen pwe, “Aere epwe ieei wusun nepetaen erhai mwaaen me pwiuniwan, epwe faer gacch aarh sisooapw pwiuppiuniuw.”

¹¹ Jesus a aengaenir pwe, “Fenai eei nge ese noa ngaenir oanongeer aeremas, pwe rhooawe rhag Deus a ngaenner.

¹² Pwe etownap faan minne mwaaen rese gaen pwiuppiuniuw reen: aaemweoi rewupwutiw pwe epwe ina wusuur, aaemweoi nge aeremas minne refreeoriir pwe resoapw pwiuppiuniuw, nge pwan aaemweoi rese mwerhaen pwiuppiuniuw pwonno faaen itaen minna Mweoiu Naaeng. Iyo e metefaaegini fenai een ina epwe metaf reen.”

*Jesus a Maeipinaar Wonigaet
(Mark 10.13-16; Luke 18.15-17)*

¹³ Aaemweoi aeremas ra pwigiir to wonigaet reen Jesus, pwe epwe iseni tae paiun wooar nge a maeipinaar, nge rhooan kkayeо kkewe naiun ra soong ngaenir.

¹⁴ Nge Jesus a iura pwe, “Fangeto aetekkena reei, nge oawsoapw aiugiiur, pwe minna Mweoiu Naaeng ina aar aeremas kka reweer wonigaet.”

¹⁵ Iwe a iseni tae paiun wooar, iwe a mwet saengiir.

*Erhai Anian Naiwiis
(Mark 10.17-31; Luke 18.18-30)*

¹⁶ Eew oaton nge erhai mwaaen a itto reen Jesus nge a aeiineow pwe, “Sinsei, meeta min mwamwaai ipwe feeori pwe epwe yo ngaeniaei menaw na esooar iaenin?”

¹⁷ Jesus a paniuwaeni pwe, “Meeta wa faer aeiineowaei minne emwamwaai reen? Erhai rhag minne emwamwaai. Aere womwerhaen weri menaw, tapweei oasoapwosoapw kkeei.”

¹⁸ A aeiineo pwe, “Oasoapwosoapw kkefa?”

Jesus a paniuwaeni pwe, “Wosoapw nni aeremas, wosoapw ffeeor manetemwaai, wosoapw mwoarho, wosoapw oatupwutupw tae kkepas wooan erhai.

¹⁹ Wopwe aesirowu semoamw me inoamw, wopwe aerhaengi rhooan weni oaromw taeppen rhag oamw sipegin aerhaengi oanongoamw.”

²⁰ Iwe anian we a aengaen pwe, “Ngaang iya fasiu tapweei oanongaen oasoapwosoapw kkeei. Erhiwen pwan yor meeta isaaen feeori mwo?”

²¹ Jesus a paniuwaeni pwe, “Aere wa mwerhaen wopwe oanongonniuwaen gin gacch, wa noa ameow noa oanongaen pisaegimw, nge wa fang senaapian ngaenir rhooa affayeо, ina nge epwe yor wiinoamw me wooainaaeng. Iwe nge wa itto tapweaei.”

²² Igiwe anian we a rongorong miniwe, a siunoa noan aan tip aenneew, pwe igiwe iiy erhai man naiwiis.

²³ Iwe Jesus a aengaenir rhooan kkayeо kkewe naiun pwe, “Ennetaeen, ipwe aengaenigaemi: epwe waeiraes pwe aeremas kka re pisaegisaeg repwe toonong noan minna Mweoiu Naaeng.

²⁴ Ipwe aepini sefaaeniy ngaenigaemi, egin mererhaeg aaen erhai *camel* epwe toonong noan ngetaen efoarh oaguwa, me mmwaen aaen erhai mwaaen pisaegisaeg epwe toonong noan minna Mweoiun Deus.”

²⁵ Igiwe rhooan kkayeо kkewe ra rongorong kkepas we, ra igin riutae reen nge ra aeiineow pwe, “Iwe, iyo rhag epwe mmwenen menaw?”

²⁶ Nge Jesus a fan wenewen ngaenir nge a paniuwaenir pwe, “Minnee ese mmwen ngaeni aeremas, nge oanongaen meeta nge emmwenen ngaeni Deus.”

²⁷ Iwe Peter a iura, “Pipiyy, aemaem aeiya siusaengi oanongaen aegiaeg nge aeiya itto tapweog. Iwe meeta aeipwe aeni?”

²⁸ Jesus a aengaenir, “Ennetaen, ipwe aengaenigaemi, pwe oatona mwaaen we Naiun Aeremas epwe mooat wooan nenien mooat na aan ina enning noan mweoi ffeo eei, nge aaemi rhoaniuwaei oawpwe pwan mooat wooan seig me ruwowu nenien mooat pwe oawpwe nemaenir aeinang kkewe seig me ruwowu ikkiwe aaen Israel.

²⁹ Nge iyo esiusaengi imwan, aere pwiin, aere mwengeyan, aere seman, aere inan, aere naiun, aere faniuwan, faaen itaei, epwe pwigi meoniun epwe temoag saengi epwiugiuw, nge epwe pwan pwigi menaw na esooar iaenin.

³⁰ Pwe towunepeer rhooawe re amwirimwir repwene gommw, nge towunepeer rhooawe regommw repwene amwirimwir.

20

Rhooan Engaang Wooan Maetaen Grape

¹ “Minna Mweoiu Naaeng eweei minneen. Eno erhai mwaaen a wugusoronoa epwe noa giut rhooan engaang pwe repwe engaang wooan aan maetaen *grape*.

² A tipieew ngaenir rhooan engaang kkewe pwe paniuweer nge epwe efai faiun *silver* noan eew raaen, iwe a fangenoa pwe repwe noa engaang wooan maetaen *grape* we aan.

³ Enoa tiwowu konook a sefaaen noa reen nenien chuwaii we nge a noa weriir aaemweoi mwaaen reiu fetaen, nge esooar meeta refereeori,

⁴ iwe a aengaenir pwe, ‘Oawpwe pwan noa engaang noan maetaen *grape* na aaei, pwe ipwe ngaennegaemi paniuwaemi iye egacch.’

⁵ Iwe ra noa. Iwe nge enoa seig me ruwowu konook iwe pwan enuuw konook nge a pwan feeori taeppen rhag miniwe a feeori mmwan.

⁶ Enoa aerepa nimowu konook nee oanowas, a pwan noa noan nenien chuwaii we, nge a noa weriir aaemweoi mwaaen repwan iu fetaen igiwe. Iwe, a aeiineeor pwe, ‘Meeta oawwa iu fetaen rhag igeei, nge oawse engaang?’

⁷ Ra paniuwaeni pwe, ‘Esooar erhai ne e mwerhaen aengaengemaem.’ Iwe, a aengaenir pwe, ‘Oawnoa engaang noan maetaen *grape* na aaei.’

⁸ “Nge igiwe a pwoong noa, nge mwaaen we aan maat we a aengaeni soamwooniir rhooan engaang kkewe pwe, ‘Faingiir to rhooan engaang kkewe nge wa pey aeginir, rhaepetae me reer rhooawe re amwirito toori rhooawe regommwoto.’

⁹ Mwaaen kkewe re rhaepetaen aar engaang reen nimowu konook, ra pey aeginir reen efai *silver* nge paniuwaen erhai.

¹⁰ Iwe nge igiwe mwaaen kkewe regommw ra war pwe repwe pwigi paniuweer, ra niuwaenue pwe epwe temoag paniuweer saengiir, nge repwan fang rhag efai *silver* ngaeni erhai me erhai iir.

¹¹ Igiwe ra pwigi paniuweer nge ra rhaepetae aar ngiuniungiuniw wonowe aan maat we.

¹² Ra aepesa pwe, ‘Mwaaen kkewe re amwirito, re engaang noan eew rhawa, nge aemaem aeiya engaang waeiraes faaen aenet noan ffoarhon raaenei, nge wa pwan aeffitaegiy rhag paniuweer ngaeni paniuwaemmaem!’

¹³ Iwe wonowe aan maat we a aengaeni erhai neeiir, ‘Maereyaerei, ngaang ise oatupwug. Een wo tipieew ngaeniaei pwe wopwe engaang noan eew raaen faaen itaen efai *silver*.

¹⁴ Igina pwigi paniuwoamw nge wa noa reen imwoamw. Ngaang itipaeni ipwe pey aegini mwaaen enaaen itto nepaen rhag miniwe ngaang ingaenneog.

¹⁵ Meeta, esooar maemaewaei pwe ipwe feeori meeta tipaei ngaeni naeyi senaapiy? Ngaere wopwai iga ngaang igin mmwoon?”

¹⁶ Iwe Jesus a soapwei noa nge a aepesa pwe, “Ina minne rhooawe re amwirimwir repwene gommw, nge rhooawe regommw repwene amwirimwir.”

Aeinuwaen Aaen Jesus Aepesa Aan Maenoa

(Mark 10.32-34; Luke 18.31-34)

¹⁷ Igiwe Jesus a ittae Jerusalem, a paenir rhooan kkayeo kkewe seig me riiurhai nge a kkepas ngaenir igiwe a iir noa rhag reen aar faaeraeg.

¹⁸ Iwe a aengaenir pwe, “Oawaiussaening. Sipwe ittae Jerusalem, nge aeremas repwene fangenoa miniwe Naiun Aeremas nee paiur soamwoonin patere kkewe me sinsein anniug kkewe. Repwene apwiungiu pwe epwe maenoa,

¹⁹ nge ra fangenoa nee paiur Gentiles, nge repwe aeni aegekkaei, repwe wirhiy nge re kurusuw noa; nge mwirin enuuw raaen epwe menaw sefaaen.”

Aaen Erhai Iin Tingoar

(Mark 10.35-45)

²⁰ Iwe niewe pwiuniwaen Zebedee me mwaaen riiurhai kkewe naiun ra itto reen Jesus, rhooapwut we a foatotiw me mmwan nge a aengaeni tingoar we aan.

²¹ Jesus a aeineow pwe, “Meeta wo tipaeni?”

Rhooapwut we a iura pwe, “Wopwe ppwon ngaeniaei, pwe mwaaen riiurhai kka naeyi repwe mooat peig mwaaenemw me peig rhooapwutomw, iga aere wopwene no pwe een *king*.”

²² Jesus a aengaenir rhooawe riiurhai pwe, “Aaemi oawse giuneei minne oawwa tingoar. Oawmmwenen iun me reen kkepaen aewwaeiraes e ngaang ipwe iunumi?”

Ra paniuwaeni pwe, “Ooa, emmwen ngaenigemaem.”

²³ Jesus a aengaenir pwe, “Ooa, oawpwe mmwenen iun me noan kkap e aaei, nge soapw ngaang minne ipwe finitae iyo epwe mooat peig mwaaeneei me peig rhooapwutoi. Neniy kkeei nge nenieer rhooakkena minna Semaei a fasiun feeori pwe nenieer.”

²⁴ Nge igiwe rhooan kkayeo kkewe seig ra rongorong kkepas kkewe, ra igin soong wooar mwaaen pwipwi kkewe riiurhai.

²⁵ Iwe Jesus a faangiir oanongeer nge a aengaenir pwe, “Aaemi oawgiuneei pwe rhooakka re nemaenir re Gentiles ina eyor maemaeweer wooar, nge soamwoon kena aar minne re nemaeni ppagiur noa.

²⁶ Nge esoapw iiei wunuunun nee finaemi. Pwe iyo a mwerhaen taegias me neeimi, iiy epwe no pwe naimi rhooan engaang ngaenigaemi oanongaemi,

²⁷ nge iyo a mwerhaen epwe gommw me neeimi, iiy epwe *slave* ngaenigaemi.

²⁸ Epwe taeppen rhag Naiun Aeremas iye ese itto pwe aeremas repwe engaang ngaeni, pwe efafit itto pwe epwe engaang ngaenir aeremas me fangenoa menewan faaan iteer towunepaen aeremas.”

Jesus a Aeffetanoa Meseer Riiurhai Mwaaen Parh

(Mark 10.46-52; Luke 18.35-43)

²⁹ Igiwe Jesus me rhooan kkayeo kkewe naiun ra mwet saengi Jericho, eew pwuwaen aeremas ra ttapw to mwirii.

³⁰ Iwe nge riiurhai mwaaen parh remooat wenepeigin aan we ra rongorong pwe Jesus a faaeraeg wooan aan we, iwe ra rhaepetae reen aar iyaekkepwas, “Naiun David, faayeogemaem menap!”

³¹ Nge rhooa towunap we ra soong ngaenir nge ra aengaenir pwe repwe anniug noa. Nge iir ra faer egius mwo nge oatomoga noa aar iyaekkepwas, “Naiun David, faayeogemaem menap!”

³² Jesus a iug noa nge a faingir to. A aeiineor pwe, “Meeta oawwa mwerhaen pwe ipwe feeori ngaenigaemi?”

³³ Ra paniuwaeni pwe, “Menap, aei mwerhaen pwe wopwe aeffetanoa mesaemmaem!”

³⁴ Jesus a igin faayeeor iwe a geotteopa meseer; reen rhag oatowe nge a fflatenoa meseer, iwe ra tapwee noa mwirin Jesus.

21

Toonongan Jesus Noan Jerusalem

(Mark 11.1-11; Luke 19.28-40; John 12.12-19)

¹ Igiwe Jesus me rhooan kkayeo kkewe naiun ra arap ngaeni Jerusalem, ra itto reen Bethphage reen rhugun *Olives*. Iwe nge Jesus a fangenoa riiurhai rhooan kkayeo kkewe

² iwe a aengaenir pwe, “Oawpwe noa noan pwugos mwu mmwaemi, nge oawpwe noa weri erhai *donkey* e feotaeg igmaan fengaen me minna naiun eno oaron. Oawpwe pwaeisiir nge oawwa wummwuur to reei.

³ Nge aere erhai epwe aepesa eew meeta ngaenigaemi, oawpwe aengaeni pwe, ‘Soamwoon emwerhaen waawa’; ina rhag nge epwe fangenoa iir.”

⁴ A wen minneen pwe epwe pwaeri noa miniwe profeta e aepesa:

⁵ “Aengaeni aepinoamwon Zion pwe:

Emwaeri, a itto *king* we noawumw!

Etip sessoan nge e waawa erhai *donkey*,
erhai *donkey* mwittig, naiun erhai *donkey*.”

⁶ Iwe rhooan kkayeo kkewe naiun ra noa feeori meeta miniwe Jesus a aengaenir.

⁷ Ra pwigito *donkey* we me miniwe naiun *donkey* we, ra iseni tae mengaagiur wooar, nge Jesus a teeotae wooan.

⁸ Iwe rhooa towunap we ra mmeraeg noa mengaaggiur wooan aan we, nge aaemweoi ra gopogop tiw paeiniu pwe enenaen wooan aan we.

⁹ Towunepeer aeremas kkewe regommw me mmwaen Jesus, pwan rhooawe re tapweto mwirin ra aekkepwas pwe, “Sipwe aepingepinga Naiun David! Deus epwe aewenepwuwa aeremas na epwe itto faaen itaan Soamwoon! Aepingepinga Deus na oarosaen taegias!”

¹⁰ Igiwe Jesus a toonong noan Jerusalem, oanongaen aepinoamw we ra riu pwurhopwurh fetaen reen. Ra aeiineo pwe, “Iyo mwaaneei?”

¹¹ Aaemweoi aeremas ra paniuwaeni pwe, “Iiy profeta we Jesus saengi Nazareth noan Galilee.”

Jesus a Noa Noan Temple we

(Mark 11.15-19; Luke 19.45-48; John 2.13-22)

¹² Igiwe Jesus a toonong noan *Temple* we, nge a asiiur wow rhooawe re chuwaai me ameomeopisaeg me igiwe. A aerheppa noa *table* kkewe aar rhooan ssiuwen senaapiy me nenien mooat kkewe aar rhooan chuwaai *pigeons*,

¹³ nge a aengaenir pwe, “E foatofoat noan Pwapwior we e Santus pwe Deus a aepesa pwe, ‘*Temple* e aaei epwe ffa i pwe imwaen maeipin,’ nge aaemi oawwa ssiuweniy ngaeni eew nenien wopoor rhooa mwoarho.”

¹⁴ Iwe rhooa kkewe re masparh me rhooa pirhemae ra itto reen Jesus noan *Temple* we, nge a aecchipwaar tae.

¹⁵ Nge soamwoonin patere kkewe me sinsein anniug kkewe ra igin soong reen min amwaraar kkewe Jesus a feeorin, me pwan aar wonigaet kkewe re iyaekkepwas me noan *Temple* we pwe, “Sipwe aepingepinga Naiun David!”

¹⁶ Iwe ra aeiineow Jesus pwe, “Wo rongorong minikka wonigaet kaan ra aepesa?”

Jesus a paniuwaenir pwe, “Ewaer, iya rongorong. Oawsaaen aeraegi mwo miniwe a foat noan Pwapwior we e Santus? ‘Aaemi oawwa oasuguunaar wonigaet me goagoa pwe repwe oassoara itoamw.’”

¹⁷ Iwe Jesus a nigitir me Jerusalem, a noa ngaeni aepinoamwon Bethany. Iwe a noa no aegini epwoong igiwe.

*Jesus a Soong Ngaeni Waniwan we Fig
(Mark 11.12-14, 20-24)*

¹⁸ Igiwe a sefaaeniti aepinoamw we noan soran we, nge Jesus a pecchai.

¹⁹ A weri waniwan we *fig* eno wenepeigin aan we iwe a faaeraeg ngaeni, nge a weri pwe esooar uwaan pwe rheon rhag. Iwe a aengaeni waniwan we pwe, “Esooar faaan eew ne wopwe rhiuwen uwa!” Noan rhag oaton we nge waniwan we a ppwass noa.

²⁰ Igiwe rhooan kkayeo kkewe ra weri miniwe nge ra riutae nge ra iura pwe, “Eifa wusun rhag nge a noa mwetekkaein ppwass noa waniwan *fig* een?”

²¹ Jesus a paniuwaenir pwe, “Ennetaeen, ipwe aengaenigaemi pwe aere oaw niugiuniug, nge oawse tip mwaramwar, oawpwe mmwenen feeori meeta ngaang iya feeori ngaeni waniwan we *fig*. Nge saapw minneen rhag, pwe oawpwe pwan mmwenen aengaeni rhug een pwe, ‘Mwagiut saengi igeeli nge wa noa oatoranoa oanongoamw nee metaw,’ nge epwe mmwen.

²² Aere oaw niugiuniug, nge oawpwe pwigi oanongaen meeta oawtingoar noan aaemi maeipin.”

*Kkepas Aeiineon Nemaeniaen Jesus
(Mark 11.27-33; Luke 20.1-8)*

²³ Igiwe Jesus a sefaaen nong noan *Temple* we, nge a fenai, nge soamwoonir patere kkewe me mwaaen kkewe aar ra itto reen nge ra aeiineow pwe, “Meeta nemaenioamw pwe wopwe feeori minikkei? Iyo a ngaenneog oamw nemenem?”

²⁴ Jesus a paniuwaenir, “Ngaang ipwe aeiineogaemi eew kkepas aeiineo, nge aere oaw paniuwaeni, ngaang ipwe pwan aengaenigaemi iya iga i pwigi aaei nemenem me ee pwe ipwe feeori minikkei.

²⁵ Iya e itto aaen John nemenem pwe epwe baptismus fetaen: saengi Deus aere saengi aeremas?”

Iwe, ra rhaepetae aar aengimaw fengaen wooar, “Meeta sipwe iura? Aere sipwe iura pwe, ‘Saengi Deus,’ nge iiy epwe aeiineogirh pwe, ‘Meeta rhag oawse niugiuniug ngaeni John reen?’

²⁶ Nge aere sipwe iura pwe, ‘Saengi aeremas,’ si mesagiiur aeremas, pwe oanongeer re niugiuniug pwe John nge erhai profeta.”

²⁷ Iwe ra paniuwaeni Jesus pwe, “Aeise giuneei.”

Jesus a aengaeniir, “Iwe ngaang isoapw pwan aengaenigaemi iya iga ipwigi me ee nemaeniaei pwe ipwe feeori minikkeei.

Fioangoor Riiurhai Pwipwi

²⁸ “Igina meeta aaemi niunniuwaen? Eno erhai mwaaen eyor riiurhai naiun mwaaen. A noa reen mwaaen we etugufaeyi nge a aengaeni pwe, ‘Naeyi, wonoa engaang noan maetaen *grape* igina.’

²⁹ Iwe nge iiy a paniuwaeni pwe, ‘Ngaang ise tipaeni ipwe noa.’ Nge mwirin a ssiuwen noa aan niunniuwaen nge a noa.

³⁰ Iwe wonowe semeer a noa reen erhai naiun nge a noa aengaeni taeppen rhag iwe e aengaeni iwe erhai. Nge a paniuwaeni, ‘Ooa menap, ngaang ipwe noa,’ nge ese noa.

³¹ Iwe iyo neeiir rhooa ee riiurhai efteeori miniwe semeer e tipaeni?”

Iwe, ra paniuwaeni, “Iwe e faeregit.”

Iwe Jesus a aengaeniir, “Ennetaan, ipwe aengaenigaemi, pwe rhooawe rhooan iyoiyon *tax* me rhooapwutoi chuwaai kkewe nge repwe toonong noan Mweoiun Deus me mmwaemi.

³² Pwe John Baptist a itto reemi nge a pwaeri ngaenigaemi aan na emwamwaai, nge aaemi oawse niugiuniug reen. Nge rhooawe rhooan iyoiyon *tax* me rhooapwutoi chuwaai kkewe ra niugiuniug reen. Inamwo iga oawwa weri minneen, nge aaemi oawse ssiuweniy aaemi niunniuwaen pwe oawpwe niugiuniug ngaeni.”

Fioangon Awewen Rhooan Aemmwenen Maat we

(Mark 12.1-12; Luke 20.9-19)

³³ Iwe Jesus a iura pwe, “Oaw aiussaening ngaeni pwan eew fioangon awewe. A yor erhai mwaaen efoatogi eew maetaen *grape*, a feeori gurun niugiun, a genengi eew niipw pwe nenien wongowongin uwaen *grape* we nge a aiuwtae eew imwaen poos taegias me noan. Mwirin a ngaenneer aaemweoi rhooan maat pwe repwe aefaaenniy. Iwe rhag nge a saei taaw noa.

³⁴ Nge igiwe a toori oaton gin, a fangenoa naiun rhooan akkiuneo reer rhooan maat kkewe pwe repwe noa pwigito inetin me reen uwaen *grape* kkewe.

³⁵ Iwe nge rhooan maat kkewe ra torofi rhooan akkiuneo kkewe nge ra wirhiy erhai, ra niiy noa erhai nge ra tera iwe erhai.

³⁶ Mwirin nge mwaaen we a pwan fangenoa aaemweoi rhooan akkiuneo re towunap saengi rhooawe mmwan, nge rhooan maat kkewe ra pwan feeori ngaeniir wunuunun meeta kkewe ra feeori ngaeniir rhooawe regommw.

³⁷ Oarasan nge a fangenoa mwaaen we naiun reer, nge a iura pwe, ‘Iniugiuw nge repwe aesirowu mwaaen e naeyi.’

³⁸ Nge igiwe rhooan maat kkewe ra weri miniwe naiun, ra aepesa fengaen-niy nee fineer pwe, ‘Ieen mwaaen we naiun mwaaen we aan maat eei iwe epwe pwugusaeni minnee. Oaw itto sipwe niiy noa, pwe sipwe pwigi minne pwugusaen pwe pwugusarh!’

³⁹ Iwe ra torofi, ra oatorawow me niugiun maat we nge ra niiy noa.”

⁴⁰ Jesus a aeiineor pwe, “Igina, ngaere mwaaen we aan maat we a war, meeta epwe feeori ngaeniir rhooan maat kkewe?”

⁴¹ Ra paniuwaeni pwe, “Epwe niir noa rhooawe re aenneew nge a ngaenneer aaemweoi maat we iyo kka repwe mmwenen fang inetin uwaen *grape* kkewe oaton gin.”

⁴² Iwe, Jesus a aengaeniir, “Oawsaaen pwan aeraegi mwo meeta kkewe Pwapwior we e Santus e aepesa?

‘Fai we rhooan kaiu iimw re aerhee noa,

nge faer ina fai we egin yor ipitan me mmwaen oanongan.
Minneen nge feeoriaen Soamwoon,
a inamwo amwaraeran nningen!'

⁴³ "Iwe, ipwe aengaenigaemi, pwe minna Mweoiun Deus nge repwe pwigi saengigaemi pwe repwe ngaenner aeremas kka epwe mmwen epwe feeori uuwan.

⁴⁴ [Iyo a ppiungiutiw wooan faai een nge epwe mwetoarotoar noa, nge aere faai een epwe ppiungiutiw wooan erhai, epwe aepettatiw.]”*

⁴⁵ Igiwe soamwooniir patere kkewe me Pharisees ra rongorong fioangon awewe kkewe, nge regiuneei pwe e aepesaar,

⁴⁶ iwe ra aegina pwe repwe torofi. Nge remesagiu pwuwaen aeremas kkewe, pwe iir re iseni Jesus pwe erhai profeta.

22

Aeiineon Miniwe Gupwunon Appwiuniupai (Luke 14.15-24)

¹ Iwe, Jesus a pwan kkepas ngaenir aeremas kkewe noan fioangon awewe.

² "Mweoiu Naaeng eweei minneen. Eno erhai *king* e oamoannatae aaen mwaaen we naiun gupwunon appwiuniupai.

³ A fangenoa naiun rhoaan engaang pwe repwe noa faingiir to waseona kkewe repwe itto tapweei gupwun we, nge rese mwerhaen itto.

⁴ Mwirin a pwan fangenoa aaemweoi rhoaan engaang pwe repwe noa aengaenir aeremas pwe: 'Igina, aaei gupwun a moannotae; naeyi wakke me man pwetaei kkewe naiur ra niir noa, iwe oanongan nge a moannotae. Oaw itto tapweei gupwuneen.'

⁵ Nge rhoowe refaingiir rese tepa, iwe ra siunoa: erhai a noa ngaeni aan menaai, nge erhai a noa ngaeni aan nenien chuwaai,

⁶ nge pwan aaemweoi ra torofir rhoaan engaang kkewe, ra wirhiir nge ra niir noa.

⁷ Iwe *king* we a igin soong, iwe a fangenoa sonotaw kkewe pwe repwe noa niir noa rhoowe renni menaw iwe me figinoa aepinoamwoor.

⁸ Iwe a faingiir to rhoaan engaang kkewe naiun nge a aengaenir pwe, 'Aaei gupwunon appwiuniupai a moannotae, nge waseona kkewe i faingiir pwe repwe itto tapweei gupwuneen nge ese fin pwe repwe itto.

⁹ Iwe oawnoa wooan ennap temoag kena pwe oawpwe faingiir to oanongeer aeremas kka oawrhuungiir.'

¹⁰ Iwe rhoaan engaang kkewe ra faaeraeg wow wooan ennap kkewe nge ra faingiir oanongeer aeremas kka rerhuungiir, ese tiwegin aere aeremas gacch aere aeremas aenneew, iwe a sseog noa imwaen gupwun we reer waseona.

¹¹ "Igiwe *king* we a toonong noan iimw we pwe epwe pipiiy rhoaan gupwun kkewe, a weri erhai mwaaen ese memmengaag min mwamwaai to reen appwiuniupai we.

¹² Iwe *king* we a aeiineow pwe, 'Maereyaerei, ifa wusun oamw toonong igiei, nge wose memmengaag min mwamwaai to reen appwiuniupai eei?' Nge mwaaen we ese paniwaeni.

¹³ Iwe *king* we a aengaenir rhoaan engaang kkewe pwe, 'Oaw geoni paiun me pirheen nge oawwa oatorawow noan rorhappiung, iga epwe sessaeng nge akkaarengi me ee.' "

* ^{21:44} Petenan eei nge e soano noan aekkaew petenan kka e foatofaat noan kkepesaen Greek.

¹⁴ Nge Jesus a iura pwe, “Re towunap rhooawe re faingiir, nge fitiman rhag re finiir.”

Kkepas Aeiineon Tax

(Mark 12.13-17; Luke 20.20-26)

¹⁵ Pharisees kkewe ra noa nge ra pwiungiuw fengaenniy pwe repwe aettefaeti reen aar kkepas aeineo.

¹⁶ Ra fangenoa aaemweoi rhoaan kkayeо naiur reen Jesus me aaemweoi rhinaen Erotes. Nge ra aengaeni pwe, “Sinsei, aemaem aeiguneei pwe een wo aepesa minikka ennet. Wa fenaiuw minikka ennet pwe wunuun nee tipaen Deus ngaenir aeremas, nge wose niuwaenaei minikka aeremas ra aeni niunniwaen, nge wose niuwaenaei wunuunun erhai me erhai.

¹⁷ Iwe, aengaenigemaem meeta oamw niunniwaen. Erwamwaai aarh sipwe fang tax ngaeni Soamwoonin Rome, aere aapw?”

¹⁸ Nge Jesus e giuneei aar niunniwaen aenneew, iwe a aengaenir pwe, “Aaemi rhooa oatupwtupw! Meeta oaw mwerhaen pwe oawpwe soatoni-aei reen?

¹⁹ Oawpwaeri ngaeniaei senaapiy mwu oawpwe fang pwe tax!”

Iwe, ra pwigito reen efai senaapiy.

²⁰ Nge Jesus a aeiineor pwe, “Mesaen iyo me itaen iyo een?”

²¹ Ra paniuwaeni pwe, “Soamwoonin Rome.”

Iwe Jesus a aengaenir pwe, “Iwe, oawfang ngaeni Soamwoonin Rome meeta aaen Soamwoonin Rome, nge oawfang ngaeni Deus meeta aaen Deus.”

²² Oatowe re rongorong kkepas we, ra mwaar noa reen, iwe ra siusaengi.

Kkepas Aeiineon Menaw Sefaaen

(Mark 12.18-27; Luke 20.27-40)

²³ Noan raaenin we rhag nge aaemweoi Sadducees ra itto reen Jesus ra iura pwe aeremas resoapw menaw sefaaen me reen mae.

²⁴ Iwe, ra aepesa pwe, “Sinsei, Moses a iura pwe ngaere erhai mwaaen a maenoa nge esooar naiun, ina nge mwaaen we pwiin epwe pwiuniuwaeni rhooopwt we pwe epwe yor naiun pwe epwe ffai pwe naiun mwaaen we a mae.

²⁵ Iwe, eyor fiusuman pwipwi refasiun nonno igeei. Iwe mwaaen we etugufaeyi a pwiuniuwaeni erhai rhooopwt, nge a maenoa nge esooar naiun, iwe a nigiti nieuwe ngaeni wonowe pwiin.

²⁶ Taeppen rhag meeta we ewen ngaeni iwe ariurhaiun me iwe aeini-urhaiun toori oanongeer noa rhooawe fiusuman.

²⁷ Mwirin noan, nge rhooopwt we a maenoa.

²⁸ Iwe, noan raaenin na manimae repwene menaw sefaaen, iyo me neeir rhooawe fiusuman minne pwiuniuwaen rhooopwt we? Igiwe oanongeer nge re pwiuniuwaeni nieuwe.”

²⁹ Nge Jesus a paniuwaenir pwe, “Aaemi oawwa mwaerhei, pwe iga aaemi oawse giuneei oawton Pwapwior we e Santus ngaere minikkena maemae-waen Deus.

³⁰ Pwe oate rhooa mae repwe menaw sefaaen, repwene aeffitaeg ngaenir rhag angkenusun naaeng nge resoapw pwiuppwuniuw no.

³¹ Iwe nge reer manimae iga repwe menaw sefaaen tae: esaaen yor mwo aaemi aeraegi meeta we Deus e aengaenigaemi? Iwe e aepesa pwe,

³² ‘Ngaang aaen Abraham Deus, aaen Isaac Deus me aaen Jacob Deus.’ Iiy aar Deus rhooakka re menaw, nge saapw aar Deus rhooakka remae.”

³³ Igiwe pwuwaen aeremas kkewe ra rongorong kkepas kkewe, ra mwaar noa reen aan fenai.

*Anniug we Oarosaen Taegias
(Mark 12.28-34; Luke 10.25-28)*

³⁴ Oatowe Pharisees ra rongorong noa pwe Sadducees kkewe ra iugiu noa pwe resa giuneei no minne repwe paniuwaeni ngaeni Jesus, iir ra rhu fengaen,

³⁵ nge erhai me neeiir, erhai sinsein anniug, a aegina ne soatoni Jesus reen aan kkepas aeiineo.

³⁶ A aeiineow pwe, “Sinsei, ifa oasoapwosoapw e oarosaen taegias me neeiin oanongaen Anniug?”

³⁷ Jesus a paniuwaeni pwe, “Wopwe aerhaengi Soamwoon na oamw Deus reen oanongaen nee tipoamw, reen oanongaen ngeoniumw pwan reen oanongaen oamw niunniwaen.

³⁸ Iiei minne e oarosaen taegias me yor ipitan me neeiin oanongan oasoapwosoapw.

³⁹ Nge oaruwowwaen oasoapwosoapw epwan taegias nge: ‘Wopwe aerhaengiir rhoaan wenioaromw taeppen rhag oamw sipegin aerhaengi oanongoamw.’

⁴⁰ Oanongaen aaen Moses Anniug me aar profeta kkewe pwapwior nge re oanonganong rhag wooan oasoapwosoapw kka ruwowu.”

*Kkepas Aeiineon Iyo na Kristus
(Mark 12.35-37; Luke 20.41-44)*

⁴¹ Igiwe aaemweoi Pharisees ra rhu fengaen, Jesus a aeiineor pwe,

⁴² “Meeta oaw niuwaenai reen Kristus? Iiy teoteeon iyo?”

Ra paniuwaeni pwe, “Iiy teoteeon David.”

⁴³ Jesus a aeiineor pwe, “Meeta rhag nge Espritu Santus a aemeyaefi ngaeni David aan epwe faingi pwe ‘Soamwoon’? Iwe David a aepesa,

⁴⁴ ‘Soamwoon a aengaeniai Soamwoon pwe:

Mooat tiw peig mwaaeneei

toori aaei ipwe iseniir tiw rhoaan oapwutoag faaen pirhemw.’

⁴⁵ Iwe, ngaere David e faingi ngaeni pwe iiy ‘Soamwoon’, ifa wusun nge Kristus epwe no pwe teoteeon David?”

⁴⁶ Esooar erhai ne emmwenen paniuwaeni kkepas aeiyeg kkewe aaen Jesus, iwe saengi rhag noan raaenin we nge esooar no ne e rhiuwen mwerhaen pwe epwe aeiineow aekkaew kkepas aeiineo.

23

*Jesus a Atapeonneogiur Reer Sinsein Anniug me Pharisees Kkewe
(Mark 12.38-39; Luke 11.43, 46; 20.45-46)*

¹ Iwe Jesus a aengaenir pwuwaen aeremas me rhoaan kkayeо kkewe naiun pwe,

² “Sinsein anniug me Pharisees kkewe minne rhoaan aweweei Anniug kkewe aaen Moses.

³ Iwe oawpwe tapwee nge oawfeeori oanongaen meeta ra aengaenigaemi; nge oawsoapw appiuriu aar wegitaeg, pwe rese pomwoni meeta ra aeni fenai.

⁴ Re geonitae wooan sagiuriur aeremas minikka echoaw nge e waeiraes pwe repwe aiufera, nge rese mwerhaen mwo nge repwe saeregi egatt aiuttiun paiiur pwe repwe tipaengiir reen aiufar.

⁵ Refeeori oanongaen meeta pwe aeremas repwe weriir. Oaw pipiiy minikkena eno wegisin Pwapwior we e Santus wooan ina ra geonitae wooan

rhimweer me paaiur, nge e igin tettemoagon! Oaw pipiiy enaeyin minikkena maetetteren weni ngaerhen mengaagiur!

⁶ Re aerhaengi neniy kkena egacch noa me noan gupwun me pwan neniy kkena nenieer rhooa taegias me noan wutteer Jews,

⁷ repwan aerhaengi aar aeremas repwe aewenimmwaar me aesirowuur me noan imwaen chuwaai, me aar aeremas repwe faangiir pwe ‘Sinsei’.

⁸ Nge aaemi oawsoapw ffai pwe ‘Sinsei’, pwe erhai rhag aaemi Sinsei, nge oanongaemi nge oaw pwipwi.

⁹ Oawsoapw faangi mwo nge erhai me wooan soanopeei pwe ‘Saam’, pwe iga erhai rhag Semaemi eno wooainaeng.

¹⁰ Oawsoapw pwan ffai pwe aaemi ‘Rhooan a Wen’, pwe iga pwan erhai rhag aaemi rhooa a wen imwu iiy Kristus.

¹¹ Iyo e egin taegias noa me neeimi nge iiy epwe no pwe naimi rhooa akkiuneo.

¹² Pwe iyo na e aetaegiasi tae epwe sessoanotiw, nge iyo na epwe oasossonaetiw epwe taegias tae.

*Jesus a Songetiir Rhooa Oatupwutupw
(Mark 12.40; Luke 11.39-42, 44, 52; 20.47)*

¹³ “Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oawttiy noa aesemaen Mweoiu Naaeng saengiir aeremas. Nge aaemi oawse toonong noan, oawse pwan fang ngaeniir mwo nge rhooawe re tipaeni repwe toonong.

¹⁴ [Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oaw oapwurhaar rhooapwut kka a mae pwiuniuweer, nge oawa pwigi saengiir imweer, nge oawa oangonongan ngaeniir aeremas aaemi maeipin enaei. Reen minneei minne Deus epwe fang ngaenigaemi aegaeregaer na oarosaen cchoaw.]*

¹⁵ “Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Aaemi oawa seraeg fetaen nee metaw pwan wooan oanongaen faniuw pwe minni oawpwe wegit tipaen erhai aeremas ngaeni aaemi namanam; nge aere iga emmwen minneen, aaemi oawa feeori pwe iiy epwe faer kkaein noa aaen aegaeregaer me mmwaemi me noan niferno.

¹⁶ “Ifa mwo aenneewan ngaenigaemi, aaemi rhooa afan parh! Oaw aepesa pwe, ‘Aere erhai a aekkepan faaen itaen *Temple* we, miniwe nge esooar ipitan. Nge aere a aekkepan faaen itaen goon we noan *Temple* we, iiy epwene feeori meeta we a aeni ppwon.’

¹⁷ Aaemi masepwurh masparh! Ifa minne e igin yor ipitan, goon aere *Temple* we efeeori goon we pwe epwe pin?

¹⁸ Aaemi oawpwan aepesa pwe, ‘Aere erhai a aekkepan faaen itaen antar we, miniwe nge esooar ipitan. Nge aere a aekkepan faaen itaen niffang kkewe wooan antar we, iiy epwene feeori meeta we a aeni ppwon.’

¹⁹ Masperhaemi! Meeta e igin yor ipitan, niffang we aere antar we efeeori niffang we pwe epwe pin?

²⁰ Iwe, ngaere erhai a aekkepan faaen itaen antar we, a aekkepan faaen itaen antar we me oanongaen niffang kena eno wooan.

²¹ Nge ngaere erhai a aekkepan faaen itaen *Temple*, a aekkepan faaen itaen *Temple* we nge a pwan aekkepan faaen itaen Deus iwe eno noan.

* **23:14** Petenan eei nge e soano noan aekkaew petenan kka e foatofoat noan kkepesaen Greek.

²² Nge ngaere erhai a aekkepan faaen itaen naaeng, ina a aekkepan faaen itaen nenien mooat we aaen Deus me pwan faaen itaen Deus iwe emooat wooan.

²³ “Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oawngaennee! Deus eew ginigin me noan seig reen *mint* me *dill* me *cumin*. Iwe nge oawaerheei noa Anniug kkewe eyor ipitan me reen oasoapwosoapw, taeppen awewe mwamwaai me faayeow me ennet. Ikkeei anniug kka oawpwe pomwoni, nge oawsoapw nigit noa ikkina aekkaew.

²⁴ Aaemi rhooa afan parh! Oawtipwei wow erhai nnoang me noan minimwu iuniumaemi, nge oawwa faer woromi noa erhai *camel*!

²⁵ “Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oawtoafi gacchiuw niugiuu aaemi kkap me saepiy, nge noan a sseog noa reen fitigogo me tipinap.

²⁶ Masperhaemi, aaemi Pharisees! Oawpwe mmwaen toafi gacchiuw noan kkap we pwe ina nge niugiuu epwan nimegacch noa.

²⁷ “Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oawweei rhag taeppen pwerheraegin paeyi kka enning niugiuu, nge noan a sseog noa reen rhiun aeremas me pwotoron manimae.

²⁸ Epwan taeppen rhag aaemi: me niugiuu oawnning faaen meser aeremas, nge noan nge a sseog noa reen oatupwutupw me monofit.

Jesus e Aepesa Aar Aegaeregaer

(Luke 11.47-51)

²⁹ “Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oawfeeori paeyer rhooawe profeta pwe epwe gacch, nge oawwa awweoniuwa faiun paeyer rhooawe rhooa mwamwaai.

³⁰ Oawwa aepesa pwe, ‘Aere aemaem aeimenaw noan oaton we rhaepetomaem rerhiuwen menaw, aemaem aeisoapw tapweer reen niir noa profeta kkewe.’

³¹ Iwe oawwa siegin pwaeritae pwe aaemi teoteor rhooawe reniir noa profeta kkewe!

³² Iwe oawnoa pwan soapwei noa meeta minikkewe aaemi rhaepeto rerhaepiy tae!

³³ Aaemi sowufaeng me naiiur sowufaeng! Epwe ifa wusun aaemi kke-waeg saengi aaemi aegaeregaer noan niferno?

³⁴ Iiei minne ipwe fang wow reemi profeta me soaw tipaecchem me sinsei; aaemi oawpwe niir noa aaemweoi, oaw kurusuur noa aaemweoi, oawpwan wirhiy aaemweoi me noan wutteer Jews nge oawfattapweer noa me reen eew me eew aepinoamw kkena.

³⁵ Iiei minne epwe ittiw woami eew aegaeregaer faaen iteer rhooa kkewe mwamwaai iwe oawniir noa, saengi nni menaw noan mwaaen mwamwaai we Abel toori Zechariah iwe naiun Berechiah, mwaaen we oawniiy noa me nepetaen *Temple* we me antar we.

³⁶ Ennetaan, ipwe aengaenigaemi: aegaeregaerin oanongaen nni menaw kkewe nge epwe tooir aeremesaen mweoi e igina.

Aaen Aerhaengerhaeng Jesus Ngaeni Jerusalem

(Luke 13.34-35)

³⁷ “Jerusalem, Jerusalem! Wa niir noa profeta kkewe nge woteraar rhooa pweipwogin kkepas kkewe Deus efanganeto reemw! A faaen fiteig aaei mwerhaen pwe ipwe ion fengaenniy noawumw aeremas, taeppen maniug

a ioni fengaenniy naiun faaen paiun, nge een wose mwerhaen pwe ipwe feeori!

³⁸ Iwe *Temple* we aaemi ina aeremas repwe siusaengi iwe peonoa.

³⁹ Pwe ipwe aengaenigaemi, pwe saengi igma oawsoapw rhiuwen weriae no toori oawpwe iura pwe, ‘Deus epwe aewenepwuwa aeremas na epwe itto faaen itaen Soamwoon.’”

24

Jesus e Aepesa Toaroponoan Temple we (Mark 13.1-2; Luke 21.5-6)

¹ Igiwe Jesus a siusaengi *Temple* we, rhooan kkayeo kkewe naiun ra itto reen nge ra pwaeri ngaeni iimw kkewe noan *Temple* we.

² Nge Jesus a aengaenii pwe, “Ooa, oawwa weri oanongan minikkaan. Ennetae, ipwe aengaenigaemi: esooar efai faai kaan ne epwe notiw nenien; oanongan noa nge repwene toaropoti.”

Affayeo me Aewwaeiraes (Mark 13.3-13; Luke 21.7-19)

³ Igiwe Jesus a mooat wooan miniwe rhugun *Olives*, rhooan kkayeo kkewe naiun ra itto reen nge iir noa rhag. Ra aeiyeg ngaeni pwe, “Aengaenigemaem ineeta minikkeei epwe wen, me meeta aegin epwe pwaeri noa oamw itto me soapwonoan feoniufan?”

⁴ Jesus a paniuwaenii pwe, “Oawaefaaennigaemi, pwe esoapw yor erhai epwe oatupwugaemi.

⁵ Towunepeer aeremas repwe itto faaen itaei nge re aepesa pwe, ‘Ngaang Kristus! Iwe, repwe oatupwuur noa pwuwaen aeremas.

⁶ Oawpwe rongorong oacchorongan moawun arapeto me kkepesaen moawun taaw noa, nge oawsoapw mesag. Oatokkeei nge minikkeei nge repwe fasiun wen, nge saapw reen a arapeto ne soapwonoan.

⁷ Faniuw me faniuw repwe fiow fengaen, nge mweoi me mweoi repwe pwan moawun fengaen. Epwe yor naengeta me fanemwar oanongaen pwiuneoi.

⁸ Oanongaen minikkaan nge eweei pweoneotaen metaegin erhai rhooapwut iga epwe nainai.

⁹ “Iwe repwe torofigaemi nge refang noa aaemi repwe noa aewwaeirae-sigaemi nge ra nigaemi noa. Oanongeer aeremas repwe oapwutaegaemi pwonno faaen itaei.

¹⁰ Reen oatona nge towunepeer repwene fangetae aar niugiuniug; nge re afangmaei erhai nge re kkoapwut fengaen nee fineer.

¹¹ Iwe towunepeer profeta oatupwutupw repwe itto nge ra oatupwuur noa pwuwaen aeremas.

¹² Pwonno iga a temoag noa feoffeeor aenneew, aerhaengerhaeng we nepetaen aeremas epwene mwittig noa.

¹³ Nge iyo e aetemaegin toori nee soapwonoan nge epwe menaw.

¹⁴ Nge Kkepas Mwamwaai we reen Mweoi Naaeng repwe noa fenaiuw wooan oanongaen faniuw, pwe epwe pwae ngaenii oanongaen aeremas, iwe mwirin epwapw itto nee soapwonoan.

Eew Min Aemmesagsag (Mark 13.14-23; Luke 21.20-24)

¹⁵ “Oawpwe weri eew Min Oarosaen Aemmesagsag, iwe profeta Daniel a kkepas faaen itan. Epwe no noan pwiuneoi we epin.” (Ngaeni rhooan aeraegraeg: metefaaegini minneen!)

¹⁶ “Iwe rhooawe reno Judea repwe fattapwetae weei rhug.

¹⁷ Erhai ne eno wooan wungaen iimw, esoapw teeotiw pweipwog pisaegin me nee iimw.

¹⁸ Nge erhai ne eno noan maat, esoapw sefaaen ngaeni imwan pwe epwe pweipwog mengaagiun.

¹⁹ Epwe ifa mwo aar affayeo rhoapwut pwoopwo me ikka re nayigit noan oaton naan!

²⁰ Oawpwe maeipin ngaeni Deus pwe aaemi siunoa esoapw itto noan oaton patapat aere noan raaenin Sabbath!

²¹ Pwe waeiraesin otonaan ina epwe faer igin kkaein saengi oanongaen waeiraes kka enoa itto reen oatowe supwuton faniuw toorito igin. Nge esoapw rhiuwen yor taeppe epwe rhiuwen itto.

²² Nge Deus a fasiun oamworhomworha nepaen raaen; ngaere ese feeori, nge esooar ne epwe menaw. Nge pwonno faaen iteer rhoawee a finiir tae, Deus a oamworhomworhanoa nepaen raaen.

²³ “Iwe, ngaere erhai e aepesa ngaenigaemi pwe, ‘Pipiyy, ieei iiy Kristus!’ aere ‘Inaan iiy!’ oawsoapw niugiuniug ngaeni.

²⁴ Pwe aaemweoi aeremas repwene oatupwutupw pwe iir Kristus, aere erhai profeta, nge repwene feeori min amwaraar me manaman tettemoag, pwe repwe oatupwu rhoawee Deus a finiir tae aere repwe mmwesen feeori.

²⁵ Oaw rongorong! Ngaang iya fasiun pwaeri ngaenigaemi oanongaen minikkei mmwaen aar repwe wen.

²⁶ “Iwe aere erhai epwe aengaenigaemi pwe, ‘Pipiyy, a no noan *desert!*’, oawsoapw noa iginan. Ngaere re aepesa, ‘Pipiyy, iiy ewop igeel!’, oawsoapw niugiuniug ngaeni.

²⁷ Pwe mwaaen we Naiun Aeremas epwe itto taeppe rhag weriwer iga effiunoa noan naaeng saengi rhag eotiwo netow.

²⁸ “Ese tiwegian igine epwe yor erhai manimae ee, nge witiyas repwe mweoiuto reen.

Itton Mwaaen we Naiun Aeremas

(Mark 13.24-27; Luke 21.25-28)

²⁹ “Mwirin rhag moanno noan aewwaeiraesin noan raaenin kkewe, aenet epwene rorhonoa, meram esoapw rhiuwen ttin, nge fiu repwene ppiunguitiwi me noan naaeng, nge minikkiwe maemaewaen noan naaeng repwene mwagiut saengi nenier.

³⁰ Iwe nge miniwe aeginnen Naiun Aeremas epwe pwae noa me noan naaeng; nge oanongeer aeremesaen faniuw repwe sessaeng aar repwe giuneei miniwe Naiun Aeremas aan itto wooan toapw noan minna maemaewan me nningin ina etemoag.

³¹ Nge epwe fangenoa naiun angkenus reen nngiun ttigin rappwa we, nge repwene ioni fengaenniy rhoawee Deus a finiir saengi faawu pwaeisiisin faeinaengiy, saengi esoapw naaeng toori esoapw.

Fenaiun Waniwan e Fig

(Mark 13.28-31; Luke 21.29-33)

³² “Oawpwe kapwiung saengi waniwan e fig. Oate minikkena raaen ra arawaraw me mechecchoar noa nge a pwiugiuw wow rheon, oawwa giuneei pwe a arapeto neraeg.

³³ Epwan taeppe rhag, igine oawweri minikkei pwe a wen, oawpwene giuneei pwe oatowe ina a arapeto, oamoannatae pwe epwene rhaep.

³⁴ Ennetaen, ipwe aengaenigaemi pwe oanongaen minikkei nge epwe wen weni mmwaen iga aeremesaen igin repwe maenoa.

³⁵ Naaeng me soanop repwe soapwonoa, nge aaei kkepas esoapw soapwonoa.

*Esooar ne e Giuneei Raaenin Aere Awa
(Mark 13.32-37; Luke 17.26-30, 34-36)*

³⁶ “Esooar erhai ne e giuneei raaenin aere awa aan epwe itto, angkenusun naaeng mwo nge resoapw giuneei, aere miniwe Naiun, pwe aaen Saam rhag.

³⁷ Pwe itton mwaaen we Naiun Aeremas epwe taeppen rhag meeta a wen noan oaton Noah.

³⁸ Noan raaenin kkewe mmwaen noataer we, aeremas re mwommwongo nge kukkanpwun, mwaaen me rhooapwut repwiuppiuniuw toori noan raaenin we Noah a teeotae wooan pwoot we.

³⁹ Rese giuneei minne epwe wen toori aaen noataer we itto niir noa oanongeer. Ina wunuunun minne epwe wen oate Naiun Aeremas epwe war.

⁴⁰ Iwe nge riurhai mwaaen re engaang wooan maat: erhai repwe pwigi noa nge erhai epwe notiw.

⁴¹ Riiurhai rhooapwut repwe ammaat mwongo; erhai repwe pwigi noa nge erhai epwe notiw.

⁴² Ieei minne oawpwe aefaaennigaemi reen, pwe oawsoapw giuneei noan raaen fa minne aaemi Soamwoon epwe wareto.

⁴³ Nge oawpwe metaf pwe ngaere soaw iimw we e giuneei ineet rhooa mwoarho we epwe itto, pwe iiy epwe mmas noa rhag, nge esoapw fang ngaeni rhooa mwoarho we aan epwe fereeinong iimw we imwan.

⁴⁴ Ieei minne pwan aaemi, oawpwe moannotae, pwe mwaaen we Naiun Aeremas epwe noa itto reen eew oat ina aaemi oawse tapeonneog reen.

*Rhooan Akkiuneo We e Wenewen me Iwe Ese Wenewen
(Luke 12.41-48)*

⁴⁵ “Iwe, iyo rhag rhoaan akkiuneo we e wenewen nge e reepiy? Iiy minne maasta we a fang ngaeni pwe epwe nemaenir rhoaan akkiuneo kkewe nge e engaenneer mwongo noan oaton efin.

⁴⁶ Ifa mwo wenepwuwaen rhoaan akkiuneo we, aere maasta we aan e itto giuneei aan feeori minikkeei igiwe ewar.

⁴⁷ Ennetaen, ipwe aengaenigaemi, pwe maasta we epwe ngaennee rhoaan akkiuneo we pwe epwe nemaeni oanongaen minikkewe pisaegin.

⁴⁸ Nge aere rhoaan akkiuneo we e aenneew, epwe niuwaenner nong noan tipan, ‘Maasta we aaei epwe mmwaei aan sefaaeneto,’

⁴⁹ nge epwene rhaepetae aan wirhiir rhoaan akkiuneo kkewe rhinan, nge e mwongo me gupwun fengaen me aaemweoi man pwunaas.

⁵⁰ Mwirin maasta we epwe sefaaeneto noan raaenin we rhoaan akkiuneo we ese niuwaenner, me eew oaton esoapw giuneei.

⁵¹ Iwe maasta we epwene fena kititiw nge efang noa neeiir rhoowe rhooa oatupwutupw. Igiwe epwe sessaeng me akkaarengi me ee.

25

Fioangoor Seig Rhooapwut Anian

¹ “Reen oaton naan nge minna Mweoiu Naaeng epwe aeffitaeg ngaeni minneen. Eno seig rhooopwut anian repwigi aar oappwun nge ra noa soawuni erhai *bridegroom*.

² Nimman me neeiir re tipoarorh, nge nimman re tipaecchem.

³ Rhooawe re tipoarorh ra pwigi aar oappwun, nge rese pwigi oatoawun rhaniun oappwun kkewe aar,

⁴ nge ikkiwe re tipaecchem ra pwigi aar oappwun fengaen me neon rhaniun oappwun kkewe aar.

⁵ Iwe igiwe *bridegroom* emmwaei aan itto, iwe ra cchoaw iwe ra maiur noa.

⁶ “Igiwe a nugaenipwoong noa nge a yor eew aekkepwas, ‘Ieen iiy *bridegroom* we! Oawitto oawpwe rhuungil!’

⁷ Iwe rhooapwut kkewe seig ra mmasetae nge ra oamoannatae oappwun kkewe aar.

⁸ Iwe, rhooawe re tipoarorh ra aengaeni rhooawe re tipaecchem pwe, ‘Oawfang ngaenigemaem egius rhaniun oappwun, pwe oappwun kka ae-maem nge repwene gunnoa.’

⁹ Nge rhooawe retipaecchem ra paniuwaenir pwe, ‘Ese mmwen, pwe iyé esoapw nnaaf aaemi me pwan aemaem. Oawnoa sitowa oawpwe noa chuwaai aaemi rhaniun oappwun.’

¹⁰ Iwe rhooawe re tipoarorh ra noa pwe repwe noa chuwaai aar rhaniun oappwun. Nge igiwe ra noa, iwe nge *bridegroom* we a war. Iwe, rhooawe nimman rhooapwut re moannotae ra tapweei nong noan imwaen gupwun we, iwe mwirin iwe a titti noa asam we.

¹¹ “Mwirin nge rhooapwut kkewe aaemweoi ra pwan war. Iwe, ra iyaekkepwas, ‘Soamwoon, soamwoon, sugi ngaenigemaem asam.’

¹² “Iwe nge *bridegroom* we a paniuwaenir pwe, ‘Ennetae, ipwe aengaeni-gaemi, ise giunegaemi.’”

¹³ Iwe Jesus a soapwei noa nge a iura pwe, “Oawpwe atapeonneogiugaemi, pwe oawse giuneei raaenin me awaan.

Fioangoor Eoniurhai Rhooan Engaang (Luke 19.11-27)

¹⁴ “Noan oaton naan nge Mweoiu Naaeng epwe aeffitaeg ngaeni minneen. Eno erhai mwaan epwene noa waeii; a faingiir rhooan engaang kkewe naiun nge a aengaenir pwe repwe nemaeni oanongaen minikkewe pwugusan.

¹⁵ A ngaennee erhai me erhai iugiugun minne epwe mmwen ngaeni: a ngaennee erhai nimingeras faiun senaapiy, nge a ngaennee pwan iwe erhai riiungeras, nge iwe erhai eew sengeras. Iwe a noa waeii noa.

¹⁶ Iwe rhag nge rhooan engaang we e pwigi nimingeras faiun senaapiy a mwetekkaein noa aengaenga iwe reen, iwe a pwan pwigi sefaaeniy pwan nimingeras menewan.

¹⁷ Epwan ina rhag wunuunun iwe e pwigi riiungeras pwe a pwan pwigi sefaaeniy pwan riiungeras menewan.

¹⁸ Nge rhooan engaang we e pwigi sengeras faiun senaapiy, a noa genengi eew niipw nge a nipwaeni noa faiun senaapiy we naiun maasta we aan noan.

¹⁹ “A ssiunaei noa mwirin nge maasta we a sefaaen to nge a aeiyegiir senaapiy kkewe naiun.

²⁰ Iwe rhooan engaang we e pwigi nimingeras faiun senaapiy a itto nge a iseni tiw pwan nimingeras. A aepesa pwe, ‘Maasta, een wongaenneaei nimingeras faiun senaapiy. Pipiiy, a pwan yo ngaeniaei nimingeras faiun senaapiy pwe menewan.’

²¹ Maasta we a aengaeni pwe, ‘Egacch, een erhai rhooan engaang mwamwaai me wenewen. Een womenaw wenewen reen oamw nemaeni minikka e mwittig, ina minne ipwe faer ngaenneog minikka e tettemoag pwe wopwe nemaeni. Itto tapweaei reen apwapwa e aaei.’

²² Iwe rhooan engaang we e pwigi riiungeras faiun senaapiy a toonong nge aepesa pwe, ‘Maasta, een wa ngaenneaei riiungeras faiun senaapiy. Pipiiy, a pwan yo riiungeras faiun senaapiy pwe menewan.’

²³ Maasta we a aengaeni, ‘Egacch, een erhai rhooan engaang mwamwaai me wenewen. Een wo menaw wenewen reen oamw nemaeni minikka emwittig, ina minne ipwe faer ngaenneog minikka etettemoag pwe wopwe nemaeni. Itto tapweaei reen apwapwa e aaei.’

²⁴ Iwe rhooan engaang we e pwigi sengeras faiun senaapiy a toonong nge aepesa pwe, ‘Maasta, i giuneei pwe een erhai mwaaen sosoong. Wo giniiy uwaen foat inamwo iga wose foat, wa ion fengaenniy uwaen irae inamwo wose oamworomwor faiun.

²⁵ Iya mesag, ina minne iya noa nipwaeni noa senaapiy we noawumw faaen ppweon reen. Pipiiy, ieen senaapiy we noawumw.’

²⁶ Iwe maasta we a paniuwaeni pwe, ‘Een erhai rhooan engaang aenneew me gagu! Wo giuneei pwe ngaang iya giniiy ikka ise foat, iya pwan ion fengaenniy uwaan ikka ise oamworomwor faiun ee?’

²⁷ Iwe, meeta wose faer iseni nong senaapiy mwu naeyi noan *bank* reen? Ina nge ipwe pwigi sefaaeniy fengaen me menewan igine iya sefaaen to.

²⁸ Igina, oaw pwigi saengi senaapiy kkomwu reen nge oawwa ngaenneei imwu eyor seig sengeras faiun senaapiy reen.

²⁹ Pwe iyo a yor meeta aan nge repwe pwan fang ngaeni, iwe epwene igin ssow noa aan; nge iyo ese yor meeta aan nge repwe pwigi saengi mwo nge iwe egius iwe eyor reen.

³⁰ Nge reen rhooan engaang e esooar ipitan, oaw oatorawow niugiu noan rorhappiung, iga epwe sessaeng nge akkaarengi me ee.’

Amwiucchiun Apwiung

³¹ “Ngaere igin mwaen we Naiun Aeremas epwene war noan nninge pwe *king* nge oanongeer angkenus repwe tapwee, nge epwe mooat wooan minna nenien *king*,

³² iwe, nge oanongeer aeremesaen faeinaengiy nge repwe rhu fengaen me weni mmwan. Nge epwe aeyimweoiuw fesaenngiir noan ruwowu mwiirh, taeppen rhag erhai rhooan neginegin maan eaeyimweoiuw fesaenngiir *sheep saengiir goat*.

³³ Epwe isenir nong *sheep* peig mwaen, nge *goat* peig rhooapwuton.

³⁴ Nge *king* we epwene aengaenir rhoowe reno peig mwaen, ‘Oawitto, aaemi rhooa wenepwu me reen Semaei! Oawpwe mweoiuni mweoi e oamoannatae faaen itaemi saengi rhaepetaen feonufan.

³⁵ Pwe ngaang iya pecchai nge aaemi oawwa oamwongowaei, iya moar nge aaemi oawwa aiuniuwaei, iya waseona nge aaemi oawwa aetiwaeyaei noan imwaemi.

³⁶ Ise memmengaag nge aaemi oawwa fang mengaagiuy, iya semwaai nge aaemi oawwa aefaaenniae, iya no noan kanepwus nge aaemi oawwa itto rhuungiae.

³⁷ Iwe rhoowe rhooa wenewen repwene paniuwaeni, ‘Soamwoon, ineet aeiya giuneei pwe wa waseona, nge aeiya aetiwoag nong noan imwaemmaem, aere ineet aeiya giuneei pwe esooar mengaagiumw, nge aeiya fang mengaagiumw?’

³⁸ Ineet aeiya giuneei pwe wa waseona, nge aeiya aetiwoag nong noan imwaemmaem, aere ineet aeiya giuneei pwe esooar mengaagiumw, nge aeiya fang mengaagiumw?

³⁹ Ineet aeiya giuneei pwe wo semwaai aere no noan kanepwus, nge aeiya itto rhuungiug?’

⁴⁰ Iwe, *king* we epwene paniuwaeni pwe, ‘Ennetaen, ipwe aengaenigaemi, ese tiwegian minne oawwa feeori ngaeni erhai neeiir rhooakka rewen pwiiy ikka regin sessoan, nge oawpwan feeori ngaeniaei.’

⁴¹ “Iwe epwan aengaenir rhooawe reno peig rhooapwuton, ‘Oawpwe siu saengiae, aaemi rhooawe Deus epwene fang aaemi aegaeregaer, oawpwe noa noan aengaet we esooar iaenin a faer oamoannatae faaen iteer Saetan me naiun angkenus!

⁴² Pwe iya pecchai, nge aaemi oawse oamwongowaei; iya moar, nge aaemi oawse ainiuwaei.

⁴³ Iya waseona, nge aaemi oawse aetiwaeyaei noan imwaemi; ise memmengaag, nge aaemi oawse fang mengaagiuy; iya semwaai me no noan kanepwus, nge aaemi oawse aefaenniaei.’

⁴⁴ Iwe repwene paniuwaeni pwe, ‘Soamwoon, ineet aemaem aeiya giuneei pwe wa pecchai aere moar, aere waseona, aere wose memmengaag, aere semwaai, aere no noan kanepwus, nge aeise aefaenniug?’

⁴⁵ Nge *king* we epwene paniuwaenir pwe, ‘Ennetaen, ipwe aengaenigaemi: ese tiwegian minne oawse feeori ngaeni erhai neeiir rhooakka re rewen pwiiy ikka regin sessoan, oawse pwan feeori ngaeniaei.’

⁴⁶ Iwe, rhooakkei repwe noa ngaeni aegaeregaer we esooar iaenin, nge rhooawe rhooa wenewen repwe noa ngaeni menaw na esooar ssiaaenin.”

26

Aar Rhiu Aenneewa Jesus

(Mark 14.1-2; Luke 22.1-2; John 11.45-53)

¹ Oatowe Jesus a moann aan fenaiuw oanongaen minikkei, a aengaenir rhooan kkayeo kkewe naiun pwe,

² “Aaemi oaw giuneei pwe a faei riiuraan nge epwene gona miniwe gupwunon *Passover*, nge miniwe Naiun Aeremas epwene toonong neepaiur aeremas pwe repwene noa kurusuw noa.”

³ Iwe soamwooniir patere me mwaaen kkewe aar ra mwiirh fengaen noan imwaen Soamwoonin Patere we itan Caiaphas,

⁴ nge ra pwiungiuw wunuunun aar repwe torofi Jesus noan mwoanomwoan pwe repwe noa niiy noa.

⁵ Nge ra aepesa pwe, “Sisoapw feeori minnee oaton gupwunon *Passover*, pwe aeremas rete aefitigogo tae.”

Rhooopwut We e Aepiti Jesus

(Mark 14.3-9; John 12.1-8)

⁶ Jesus a noa Bethany noan imwaen Simon, erhai mwaaen kaenepaai mwo igiwe.

⁷ Nge oaton we Jesus a mwongo, erhai rhooopwut a itto reen faaen eew neo effeeor saengi *alabaster* nge e oawut ngaeni neoninges eigin cchoaw paniawan, a itto aenatiw neo we wooan rhimwen Jesus.

⁸ Rhooan kkayeo kkewe ra giuneei miniwe, nge ra soong. Ra aepesa pwe, “Meeta mwo oasonopaen neoninges eei?”

⁹ Pwe neoninges een emmwen erhai epwe chuwaiuw ngaeni senaapiy temoag nge ra ngaenneer man affayeol!”

¹⁰ Jesus egiuneei meeta kkewe ra aepesa, iwe a aengaenir pwe, “Meeta oaw amwagiutiu nieen reen? Egin mwamwaai minne a feeori ngaeniaei.

¹¹ Pwe rhooa affayeo repwe fasiun yor reemi oanongaen oat, nge ngaang isoapw no rhag reemi oanongaen oat.

¹² Minne efeeori iga eaenatae neoninges wooan oanongaei, nge a faer oamoannayaei tae ngaeniaei nipwaenipw.

¹³ Ennetaen, ipwe aengaenigaemi, pwe ese tiwegin iga repwe fenaiuw Kkepas Mwamwaai een me ee, nge minne nieei a feeori nge aeremas repwene fioangei pwe aemaengimaengin faaen itan.”

*Judas a Tipaeni Epwe Fangenoa Tinnimaen Jesus
(Mark 14.10-11; Luke 22.3-6)*

¹⁴ Iwe erhai me neeiir rhooan kkayeo kkewe seig me riiurhai, iwe itan Judas Iscariot, a noa reen soamwoonin patere kkewe

¹⁵ nge a aeiineor pwe, “Meeta oawpwe ngaenneaei aere ipwe fangenoa tinnimaen Jesus?” Ra paengiwow eniig faiun senaapiy *silver* nge ra ngaen-neei.

¹⁶ ¹⁶ Saengi rhag oatowe nge Judas a giutta eew oaton ne egacch aan epwe fang ngaenir Jesus.

*Jesus me Rhooawe Naiun ra Aeni Fengaenniy Eew Mwongoon Passover
(Mark 14.12-21; Luke 22.7-13, 21-23; John 13.21-30)*

¹⁷ Noan aeyewaen raaenin Gupwunon Fenoawa we esooar *Yeast* reen, rhooan kkayeo kkewe ra itto reen Jesus nge ra aeiineow pwe, “Iya iga wo mwerhaen pwe aeipwe oamoannatae mwongoon *Passover* me ee?”

¹⁸ Jesus a aengaenir pwe, “Oawnoa noan aepinoamw na reen erhai mwaaen nge oawwa aengaeni, ‘Sinsei eiura pwe, A arapeto oatoi nge rhooan kkayeo kena naeyi me ngaang pwe feeori mwongoon *Passover* me noan imwoamw.’”

¹⁹ Iwe rhooan kkayeo kkewe ra feeori wunuunun meeta we Jesus a aengaenir, nge ra oamoannatae mwongoon *Passover* we.

²⁰ Igiwe a neeoatofaaef noa, Jesus me rhooan kkayeo kkewe seig me riiurhai ra mooat tiw reen *table* we.

²¹ Iga ra mwongo, nge Jesus a aengaenir pwe, “Ennetaen, ipwe aengaenigaemi, pwe erhai me neeimi epwene fangenoa tinnimaei.”

²² Rhooan kkayeo kkewe a igin aenneew noa nee tipeer reen kkepas we nge ra rhaepetae ne kkepas aeiyeg ngaeni, erhai me erhai ra aepesa pwe, “Soamwoon, saapw ngaang?”

²³ Jesus a paniuwaeni pwe, “Erhai ne etapweaei reen rhirinong anan fenoawa noan saepiy een, ina iiy epwe fangenoa tinnimaei.

²⁴ Minna Naiun Aeremas epwe maenoa taeppen rhag meeta we Pwap-wior we e Santus e aepesa, nge epwe ifa mwo aenneewaen mwaaen na iiy e afangmaei noa mwaaen we Naiun Aeremas! Egacch rhag igine rese nainitiw mwaaen een!”

²⁵ Judas iwe e afangmaei noa Jesus a kepastae, “Sinsei, saapw ngaang?”
Jesus a paniuwaeni pwe, “Een minimwu wo aepesa minna.”

*Aaen Soamwoon Mwongoon Faaef
(Mark 14.22-26; Luke 22.14-20; 1 Cor 11.23-25)*

²⁶ Igiwe ra mwongo, Jesus a pwigi eew fenoawa, a fang aan maeipinen aerhigerhig, iwe a giniyy nge a ngaenneer rhooan kkayeo kkewe naiun nge a aepesa pwe, “Oaw pwigi pwe oawpwe angi, pwe ieen minne oanongaei.”

²⁷ Mwirin a pwigi eew kkap, a fang aan maeipinen aerhigerhig, iwe, a ngaenneer nge a aepesa pwe, “Oawiunumi minneen oanongaemi,

²⁸ pwe ieen minne cchaei iye epwene no pwe tiweginin ppwon we aaen Deus ngaenigaemi, nge minne cchaei epwene nipiwow pwe arhiuwerhi-uwen aar monofit aeremas.

²⁹ Ipwe aengaenigaemi, pwe isoapw rhiuwen iunumi *wine* een toori raaenin na ipwe iunumi *wine* na effeo me noan minna Mweoiun Semaei.”

³⁰ Mwirin ra aeni erheo keoniu aerhigerhig, nge ra toowow ngaeni miniwe rhugun *Olives*.

*Jesus e Aepesa Aaen Peter Iura pwe Ese Giuneei
(Mark 14.27-31; Luke 22.31-34; John 13.36-38)*

³¹ Iwe Jesus a aengaenir pwe, “Nee pwongiy nge oanongaemi oawpwe nigitiae noa, pwe iwe Pwapwior we e Santus e aepesa pwe, ‘Deus epwe niyi noa rhooan neginegin *sheep* we, nge *sheep* kkewe repwene toaropas fetaen.’

³² Nge mwirin aaei menaw sefaaen, ipwe gommwonoa Galilee me mmwaemi.”

³³ Iwe, Peter a paniuwaeni pwe, “Ngaang isoapw nigitug noa, inamwo me oanongeer nge re nigitug noa!”

³⁴ Jesus a aengaeni Peter pwe, “Ennetae, ipwe aengaenug pwe mmwaen aaen maniug we epwe keokkeok nee pwongiy, nge epwe faaen enuuw oamw iura pwe wose giuneaei.”

³⁵ Peter a paniuwaeni pwe, “Esooar faaen eew ipwe aepesa minna, inamwo aere ipwe tapweog reen maenoa.”

A pwan ina rhag meeta re iura rhooan kkayeо kkewe aekkaerhai.

*Jesus a Maeipin Noan Gethsemane
(Mark 14.32-42; Luke 22.39-46)*

³⁶ Iwe Jesus me rhooan kkayeо kkewe naiun ra noa noan eew neniy itan Gethsemane, iwe a aengaenir pwe, “Oawmooat tiw igeei, pwe ngaang ipwe noa maeipin iginaan.”

³⁷ A paeninoa Peter me mwaaen riiurhai kkewe naiun Zebedee. Waeiraes me nee tip cchoaw a tooto reen,

³⁸ iwe a aengaenir pwe, “Waeiraesin noan minne nee tipaei egin temoag, arapakkaan rhag epwe niae noa. Oawno igeei oawpwe tapweaei reen metenaeg.”

³⁹ Jesus a mwet noa egius mmwan, a won rhappetiw nee ppweon nge maeipin, “Semaei, aere emmwen, wopwe pwigi saengiae kkepaen waeiraes een; nge saapw minne ngaang i tipaeni, pwe minne een wo tipaeni.”

⁴⁰ Iwe a sefaaeneto reer rhooan kkayeо kkewe eoniurhai we naiun, nge a giuneer pwe ra maiur. Iwe a aengaeni Peter pwe, “Ifa wusun, aaemi mwo nge ese mmwen oawpwe mmas ngaeniaei noan eew rhag awa?”

⁴¹ Oaw mmas nge oaw maeipin pwe oawte ppiungiunong noan sessoat. Ngeon a mwerhaen, nge oanong a apwangapwang.”

⁴² Jesus a pwan sefaaen noa maeipin, “Semaei, aere wosoapw pwigi saengiae kkepaen waeiraes een pwe ipwe iunumi, nge minna tipoamw minne epwe mmwen.”

⁴³ Jesus epwan sefaaen nge a giuneer pwe ra pwan maiur, pwe ra igin cchoaw.

⁴⁴ Iwe, Jesus a pwan mwet saengiir, a sefaaen noa maeipin reen aein-uwaen, nge epwan aeni rhag maeipin we e aeni me mmwan.

⁴⁵ Iwe a sefaaeneto reer rhooan kkayeо kkewe nge a aengaenir pwe, “Oaw rhiuwen maiur me aseoseo rhag? Pipiiy, a toori oaton repwene fangenoa Naiun Aeremas nee paaiur rhooa monofit.”

⁴⁶ Oaw rhimwitae, oaw sia noa. Pipiiy, ieei iiy mwaaen we efangenoa menewaei!”

*Aar Torofi Jesus
(Mark 14.43-50; Luke 22.47-53; John 18.3-12)*

47 Oatowe Jesus e rhiuwen kekkepas, Judas iwe erhai me neeiir rhooawe seig me riiurhai a war. Pwuwaen aeremas kkewe retapwee faaan naiiur saeitan me soapwon irae, nge re itto faaan iteer soamwoonin patere me mwaaen kkewe aar.

48 Rhooan afangmaei noa we a fang aeginngaenir pwuwa we: “Mwaaen na ipwe faeisongei ina mwaaen na oawtipaeni. Oawtorofi!”

49 Judas a faaeraeg wenewen ngaeni Jesus nge a aengaeni pwe, “Sirow woamw, Sinsei,” iwe a faeisongei.

50 Jesus a paniuwaeni pwe, “Pwiiy, feeori meeta wo itto reen.”

Iwe ra mwet ngaeni, ra torofi Jesus nge ra ammwarhiu.

51 Nge erhai me neeiir rhooawe rhoaniuwaen Jesus a waeitiwow naiun saeitan, nge a fena rhooan akkiuneo we naiun Soamwoonin Patere iwe gopiy noa eew saeningan.

52 Iwe, Jesus a aengaeni pwe, “Wopwe aeseefaaeninong saeitan mwu noawumw noan nenien. Pwe rhooakkena repweipwog saeitan repwe maenoa wooan saeitan.

53 Oawse giuneei, pwe ngaang ina emmwen ipwe tingoar ngaeni Semaei pwe epwe tipaengiae, pwe epwe mwetekkaein fang ngaeniae seig me ruwowu mwirhaen sonotawaen angkenus?

54 Nge ngaere epwe wen minneei, epwe ifa wusun nge epwe nnet miniwe e foatofoot noan Pwapwior we e Santus, iwe eiura pwe ieei meeta epwe fasiun wen?”

55 Iwe Jesus a aengaenir aeremas towunap kkewe pwe, “Meeta oawnoa itto faaan naimi saeitan me soapwon irae pwe oawpwe torofiae, pwe iga aetae ngaang erhai man mwoarho? Raaen me raaen nge ngaang imooat reemi nge ifenai noan *Temple*, nge aaemi oawse torofiae.

56 Nge ina oanongaen minikkei nge epwe wen pwe epwe nnet ngaeni minikkiwe profeta ra foatogitiw noan Pwapwior we e Santus.”

Iwe oanongeer rhooan kkayeо ra siusaengi Jesus nge ra fattapw noa.

Jesus me Weni Mmweer Soaw Kapwiung Kkewe

(Mark 14.53-65; Luke 22.54-55, 63-71; John 18.13-14, 19-24)

57 Rhooawe re torofi Jesus ra paeninoa reen Soamwoonin Patere itan Caiaphas, iwe me sinsein anniug kkewe me mwaaen kkewe aar ra mwiirh fengaen ee.

58 Nge Peter e tettapw to mwirin Jesus me itaaw toorito niugiun imwaen Soamwoonin Patere we. A toonong noan wororaen iimw we nge a mooat tiw reer rhooan poos kkewe pwe epwe giuneei meeta epwe wen.

59 Rhooawe soamwooniir patere me oanongeer rhooan *council* we ra giutta eew min oatupwutupw ne repwe tipi ngaeni Jesus pwe repwe niiy noa,

60 nge esooar meeta ne reweri, inamwo igiwe re towunap aeremas kka ra itto iutae nge re pwaeritae aar oatupwutupw reen. Mwirin riiurhai mwaaen ra iutae

61 nge ra aepesa pwe, “Mwaaen een aepesa pwe, ‘Ngaang immwenen fereeitiw aaen Deus *Temple*, nge noan enuuw raaen ipwe aiusefaeniy tae.’”

62 Soamwoonin Patere a iutae nge a aengaeni Jesus pwe, “Esooar minne wopwe paniuwaeni ngaeni kkepas kka mwaaen kaan ra tipi ngaenius?”

63 Nge Jesus a anniug noa rhag. Iwe Soamwoonin Patere a pwan aepesa ngaeni Jesus pwe, “Wopwe ppwon faaan itaen Deus na emenaw nge wa aengaenigemaem aere een Kristus, Naiun Deus.”

⁶⁴ Jesus a paniwaeni pwe, “Een minne wo iura. Nge ipwe aengaenigaemi: saengi igma oawpwene giuneei Naiun Aeremas epwe mooat peig mwaaenen iwe e oarosaen Mamaaw, nge epwe ittiw me weei naaeng wooan toapw.”

⁶⁵ Iwe Soamwoonin Patere we a fereeitiw mengaagiun nge a iura pwe, “A aepesa aenneewa Deus! Meeta sirhiuwen pwigiir to rhooan oatuttur reen? Pipiiy, oawwa sipegin rongorong aan aepesa aenneewa Deus.

⁶⁶ Meeta aaemi niunniwaen?”

Ra paniwaeni pwe, “Iiy e monofit nge epwe mae.”

⁶⁷ Mwirin ra oattuffa mesan nge re wirhiy, nge ikkiwe re peosepa

⁶⁸ ra aepesa pwe, “Aengaenigemaem, Kristus! Iyo we e wirhiug!”

Peter a Aepesa pwe Ese Giuneei Jesus

(Mark 14.66-72; Luke 22.56-62; John 18.15-18, 25-27)

⁶⁹ Igiwe Peter emooat noan wororaen iimw we imwaen Soamwoonin Patere, iwe erhai rhoapwut naiun rhooan engaang a itto reen nge a aengaeni pwe, “Een pwan erhai rhoaniwaen Jesus saengi Galilee.”

⁷⁰ Peter a paniwaeni memmweer oanongeer, nge a iura pwe, “Ngaang ise giuneei meeta mwu wo aepesa,”

⁷¹ iwe a faaeraeg wow me noan asam we. Iwe erhai rhoapwut rhooan engaengaen igiwe a giuneei Peter nge a aengaenir mwaaen kkewe igiwe pwe, “Mwaaen een eno reen Jesus re Nazareth we.”

⁷² Iwe, Peter a pwan iura pwe ese giuneei nge a aepesa pwe, “Iya aekkepan pwe ise giuneei mwaaen naan!”

⁷³ Faeiyegius noa mwirin nge rhoawre reiu igiwe ra itto reen Peter nge ra aengaeni pwe, “Ennet, een pwan erhai rhoaniwaen mwaaen naan, pwe aeiguneei rhag me reen ngingin oamw kkepas.”

⁷⁴ Iwe Peter a iura pwe, “Iya aekkepan pwe ngaang iaepesa minne ennet! Deus epwe apwiungiuwaei aere ioatupwutupw! Ngaang ise giuneei mwaaen naan.”

Iwe rhag nge e keokkeok noa maniug we,

⁷⁵ iwe Peter a maengiy miniwe Jesus eaengaeni: “Wenim mwaen epwe keokkeok maniug, een wopwe aepesa faaen enuuw pwe wose giuneeai.” Iwe a toowow niugiu nge a igin noa saeng.

27

Ra Paeninoa Jesus Reen Pilate

(Mark 15.1; Luke 23.1-2; John 18.28-32)

¹ Enoa nee oatosor moawugowug, oanongeer soamwoonin patere kkewe me mwaaen kkewe aar ra pwiungiuw wunuunun aar repwe niiy noa Jesus.

² Ra geoni noa nge ra paeninoa reen Pilate, iwe iiy minne *governor*.

Maenoan Judas

(Feof 1.18-19)

³ Igiwe Judas, iwe efang noa menewaen Jesus, a giuneei pwe ra aettieweginiy pwe Jesus epwene mae, a ssiuwen aan niunniwaen iwe a aese-faaeni ngaenir soamwoonin patere me mwaaen kkewe aar faiun senaapiy we eniig.

⁴ Nge a aepesa pwe, “Ngaang iya monofit reen aaei fangenoa menewaen erhai mwaaen se monofit.”

Iwe, ra paniwaeni pwe, “Meeta faan ngaenigemaem? Feeori pwe oamw engaang.”

⁵ Judas a oatoranong senaapiy kkewe noan *Temple* we nge a noa, iwe a noa nnoma noa iiwan.

⁶ Soamwoonin patere kkewe ra pwigi faiun senaapiy kkewe nge ra aepesa pwe, “Senaapiaen meoniuun ccha minneen, nge e aenneew ngaeni aarh anniug pwe sipwe oarhuw nong noan senaapiaen *Temple*.”

⁷ Ra tipieew fengaen wooan senaapiy we, iwe ra meoni eew faniuw itan *Potter's Field*, pwe eew nenien paeyieer waseona.

⁸ Ina minne ra aeita ngaeni pwe “Faniuwaen Ccha” toorito igina.

⁹ Iwe a pwae noa pwe ennet meeta we profeta Jeremiah e aepesa: “Ra pwigi eniig senaapiy *silver*, nepaen miniwe re Israel ra tipieew wooan pwe repwe pey aegini ngaeni mwaaen we,

¹⁰ nge ra naini senaapiy een ne meoni ngaeni *Potter's Field*, taeppen miniwe Soamwoon e anniugiu ngaeniaei.”

*Pilate e Kkepas Aeiyeg Ngaeni Jesus
(Mark 15.2-5; Luke 23.3-5; John 18.33-38)*

¹¹ Iwe Jesus a iu me mmwaen *governor* we nge a aeiyegiy Jesus pwe, “Een minne aar *king* re Jews?”

Jesus a paniuwaeni pwe, “Een minimwu wo aepesa.”

¹² Iwe esa paniuwaeni no meeta kkewe soamwoonin patere me mwaaen kkewe aar ra aepesa pwe teren.

¹³ Iwe Pilate a aengaeni pwe, “Wose rongorong towunepaen kkepesaen oatuttur kkomwu ra oaturug rhag reen?”

¹⁴ Nge Jesus ese paniuwaeni mwo nge eew, iwe *governor* we a igin mwaar noa reen.

*Ra Aettiweginiy Aaen Jesus Maenoa
(Mark 15.6-15; Luke 23.13-25; John 18.39–19.16)*

¹⁵ Reen oanongaen oaton gupwunon *Passover*, nge *governor* egaen saeneti noa erhai rhoaan kanepwus ina aeremas towunap re tingoar.

¹⁶ Nge noan oaton naan nge eno erhai rhoaan kanepwus itan nge Barabbas, nge oanongeir aeremas nge re giuneei.

¹⁷ Iwe igiwe rhooa towunap kkewe ra maegin rhu fengaen, nge Pilate a aeiineeor pwe, “Iyo e oaw tipaeni pwe ipwe saeneti ngaenigaemi, Barabbas aere Jesus we re faingi pwe *Kristus*?”

¹⁸ Efasiun giuneei pwe ra fang nong Jesus neepaiun faaen itaen aar noanowo ngaeni.

¹⁹ Iwe igiwe Pilate erhiuwun mooat wooan nenien mooaton apwiung we aan, nge nieuwe pwiuniwan a fangenoa reen eew kkepas: “Esooar meeta wopwe feeori ngaeni mwaaen mwamwaai na, pwe noan aaei ttan neepwoong we nge iya igin waeiraes noa faaen itan.”

²⁰ Iwe soamwoonir patere kkewe me mwaaen kkewe aar ra igin aetemaeginiy ngaenir aeremas pwe repwe tingoareei Pilate pwe epwe saeneti noa Barabbas, nge a niyi noa Jesus.

²¹ Nge *governor* we a aeiineeor aeremas pwe, “Iyo neeiir rhooa riiurhai een oaw tipaeni pwe ipwe saeneti ngaenigaemi?”

Ra paniuwaeni pwe, “Barabbas!”

²² Pilate a aeiineeor pwe, “Nge meeta ipwe feeori ngaeni Jesus, iwe itaen *Kristus*? ”

Oanongeir noa ra paniuwaeni pwe, “Kurusuw noa!”

²³ Nge Pilate a aeiineeor pwe, “Meeta taeppen wegitaeg aenneew e a feeori?”

Nge iir ra pwan oatomoga aar iyaekkepwas pwe, “Kurusuw noa!”

²⁴ Igiwe Pilate a giuneei pwe esooar ipitan aan epwe kkepas ngaenir, pwe ina nge epwene rhaepetae eew fitigogo, a pwigi rhaan nge a toafi

paiun memmweer aeremas kkewe nge a aepesa pwe, “Esooar monofitiy reen cchaaen mwaaen een aan mae. Pwe faer aaemi.”

²⁵ Aeremas towunap kkewe ra paniuwaeni pwe, “Cchaan epwe itto woamaem me wooar naimaem!”

²⁶ Iwe Pilate a saenet Barabbas ngaenir, nge ra wirhiy Jesus nge a fangenoa pwe repwene noa kurusuw noa.

*Sonotaw ra Aeni Aegekkaei Jesus
(Mark 15.16-20; John 19.2-3)*

²⁷ Iwe sonotaw kkewe naiun Pilate ra paeni nong Jesus noan imwaen governor, nge ra faingiir oanongeer sonotaw kkewe nge ra itto roangei noa oaron.

²⁸ Ra pwiniti saengi mengaagiun nge ra aememmengaagiun ngaeni erheo mengaag ccha.

²⁹ Iwe ra fiti eew mwaer saengi irae towfanfan nge ra ngaettae wooan rhimwen, nge ra pwan iseni nong efoarh soapwon irae noan pai mwaaenen; nge ra foatoti me mmwan nge ra aeni fetaenee aegekkaei. Ra gaen aepesa pwe, “Sirow woamw, *Kingaen Jews*.”

³⁰ Ra oattuffa, ra pwigi irae we saengi nge ra wirhiy ngaeni rhimwen.

³¹ Nge igiwe ra moann me aeni aegekkaei, ra pwiniti saengi mengaag ccha we nge ra aememmengaagiun sefaaeniy ngaeni ikkiwe sipegin mengaagiun. Iwe ra paeninoa pwe repwene noa kurusuw noa.

*Ra Kurusuw Noa Jesus
(Mark 15.21-32; Luke 23.26-43; John 19.17-27)*

³² Igiwe ra nennoa, nge ra rhuungi erhai mwaaen itan Simon saengi Cyrene; nge sonotaw kkewe ra aengimaw ngaeni pwe epwe aiufera kurus we aaen Jesus.

³³ Nge ra tooto reen eew pwiuneoi itan Golgotha, wewen nge “Nenien Peopeoi Rhimw”.

³⁴ Igaan iga ra itto aiuniu ngaeni Jesus *wine* min nofit me meras. Nge mwirin aan nnaeri, nge ese mwerhaen iuniumi.

³⁵ Mwirin aar kurusuw noa Jesus, nge ra itto aekkaerh *dice* pwe repwe inetiy minikkewe mengaagiun wooar.

³⁶ Iwe ra mooat tiw igiwe nge ra pipiiy.

³⁷ Wooan tae rhimwen ra aepperhatae aaemweoi foatofaat epwaeritae meeta we ra tipi ngaeni, e iura pwe: “Ieei Jesus, *Kingaen Jews*.”

³⁸ Iwe ra pwan kurusuur noa riiurhai rhooa mwoarho oaron Jesus, erhai me peig rhooopwuton, nge erhai me peig mwaaenen.

³⁹ Aeremas kkewe re faaeraeg noa me oaron Jesus ra gaen aepesa aen-neewa, nge re iurhiugi rhimweer

⁴⁰ nge re aepesa pwe, “Een miniwe wo iura pwe wopwe fereeitiw *Temple* we nge wa aiusefaeniy tae noan enuuw raaen! Aemenewoag aere een Naiun Deus, nge wa teeoti me wooan kurus na!”

⁴¹ Epwan ina rhag wunuunun soamwoonin patere kkewe me sinsein anniug me mwaaen kkewe aar re aeni aegekkaei Jesus nge re iura pwe,

⁴² “A aemenewaar aaemweoi, nge ese mmwenen aemenewa oanongan! Saapwi miniwe *kingaaen Israel*? Aere epwe teeoti saengi kurus naan igina, ina nge sipwe niugiuniug ngaeni.

⁴³ Eniugiuniug ngaeni Deus, nge e aepesa pwe iiy Naiun Deus. Iwe, sipwe pipiiy aere Deus epwe mwerhaen aemenewa igina!”

⁴⁴ Pwan rhooa mwoarho kkewe mwo retapweei reen kurus nge repwan aessaewa reen aar kkepas ngaeni.

Maenoan Jesus

(Mark 15.33-41; Luke 23.44-49; John 19.28-30)

⁴⁵ Saengi nuginupaen oanowas a noa, a rorhappiung noa wooan oanon-gaen faniuw we noan enuuw konook.

⁴⁶ Enoa enuuw konook nge Jesus a aekkepwas temoag tae pwe, “*Eli, Eli, lama sabachthani?*” wewen, “Aaei Deus, aaei Deus, meeta wa nigitiaeai noa reen?”

⁴⁷ Aaemweoi aeremas kkewe re iu igiwe ra rongorong miniwe nge ra iura pwe, “A faingi Elijah!”

⁴⁸ Erhai me neeiir a mwetekkaein fattapweto reen, a pwigi eew faerewa nge a rhirinong noan eew *wine* emwaenn, a iseni tae nee soapwon efoarh irae nge a aiuniu ngaeni Jesus.

⁴⁹ Nge aaemweoi re iura pwe, “Weti sipwe pipiiy aere Elijah epwe itto aemenewa.”

⁵⁰ Nge Jesus a pwan aekkepwas temoag tae faaen eew, iwe a fangetae ngeoniu.

⁵¹ Iwe nge mengaag we e tteoraeg noan *Temple* we mwo nge a taeringatiw faaen ruwowu, saengi wooan ittiw faan. A fanemwar faniuw, nge faai ra tiningaag fesaeng,

⁵² nge paeyi ra sugaeg, nge towunap rhooa maenoa kkewe naiun Deus ra menaw sefaaen.

⁵³ Ra siusaengi paeyieer nge mwirin aaen Jesus menaw sefaaen nge ra noa noan aepinoamw we e santus, igiwe pwuwaen aeremas ra noa giuneer me ee.

⁵⁴ Igiwe soamwoonin sonotaw we me sonotaw kkewe re pippipiyy Jesus ra giuneei fanemwar me oanongaen minikkiwe a wen, ra igin riutae iwe nge ra aepesa pwe, “Ennetae pwe iiy Naiun Deus!”

⁵⁵ Epwan ssow rhoapwut ikkiwe re oawruruto me itaaw noa, ikkiwe re tapweeito mwirin Jesus saengi Galilee pwe repwe tipaengi.

⁵⁶ Me neeiir rhoapwut kaan nge reno Maria Magdalene me Maria we ineer James me Joseph, me miniwe ineer mwaen kkewe naiun Zebedee.

Paeyinoan Jesus

(Mark 15.42-47; Luke 23.50-56; John 19.38-42)

⁵⁷ Igiwe a nee oatofaaef noa, erhai mwaen naiwiis saengi Arimathea a itto; itan nge Joseph, nge mwaenuei nge pwan erhai rhoaan kkayeо kkewe naiun Jesus.

⁵⁸ A noa reen Pilate nge a noa tingoar miniwe oanongaen Jesus. Iwe, Pilate a aepesa pwe repwe ngaenuei oanong we.

⁵⁹ Iwe Joseph a pwigi miniwe oanongan, a tiugumi ngaeni eew mengaag pwerh ffeo,

⁶⁰ nge a iseni nong noan paeyi ffeo we aan, iwe ekken me neeiin faai. Iwe a oasoagopeniy to efai faai gin temoag reen aesemaen paeyi we, iwe a noa.

⁶¹ Maria Magdalene me pwan Maria we erhai ra mooat saep ngaeni paeyi we.

Rhoaan Poosun Paeyi we

⁶² Mmasetae noan raaenin we Sabbath, nge soamwoonin patere kkewe me Pharisees kkewe ra itto rhuungi Pilate

⁶³ nge ra iura pwe, “Menap, aemaem aeimaengiy rhag miniwe maan oatupwutupw naan igiwe erhiuwen menaw e aepesa pwe, ‘Ipwe menaw sefaaen mwirin enuuw raaen.’

⁶⁴ Fang mwaenioamw pwe sonotaw repwe posuw gacchiuw paeyi naan toori miniwe aeinuwaen raaen, pwe minni rhoaan kkayeо kkewe naiun

resoapw mmwenen noa reen paeyi naan nge renoa mwoarhow noa minna oanongan, nge ra noa aengaenir aeremas pwe a menaw sefaaen saengi maenoa. Kkepas oatupwutupw een nge eigin oarosan aenneew saengi iwe mmwan.”

⁶⁵ Pilate a aengaenir pwe, “Oawpwigiir sonotaw repwe noa posuw gacchiuw paeyi naan.”

⁶⁶ Iwe ra noa nge ra noa ammwarhiu gacchiuw noa fai we tittin paeyi we, nge ra siusaengi aaemweoi sonotaw pwe epwe posuw.

28

Aaen Jesus Menaw Sefaaen

(Mark 16:1-10; Luke 24:1-12; John 20:1-10)

¹ Mwirin Sabbath, nee oatosoron raaenin Sunday, Maria Magdalene me pwan Maria we erhai ra noa pwe repwe noa pipiiy paeyi we.

² Nge ese mmwaei mwo nge a fanemwar faniuw, pwe naiun Soamwoon angkenus a ittiw saengi naaeng, a ittiw peniy noa faai we saengi aesemaen paeyi we nge a mooat tiw wooan.

³ Wunuunun nge a wee rhag weriwer, nge mengaagiun a gin wee rhag pwerhepwerhen snow.

⁴ Iwe nge poos kkewe ra gin ngong reen aar mesag nge ra weer maani mae.

⁵ Iwe nge angkenus we a kkepas ngaenir rhoapwut kkewe, nge a iura pwe, “Oawsoapw mesag. Igiuneei pwe oawgiutta Jesus iwe re kurusuw noa.

⁶ Esa nono igeei, a menaw sefaaen, taeppen rhag miniwe e aepesa. Oaw itto iga, oawpwe weri igiwe ewon mwo ee.

⁷ Oawmwetekkiae noa, pwe oawpwe noa aengaenir rhoan kkayeо kkewe naiun pwe, ‘A menaw sefaaen saengi maenoa, nge a gommw noa Galilee me mmwaemi, nge iginaan minne oawpwene noa weri me ee.’ Oawmaengiy meeta e iaengaenigaemi.”

⁸ Iwe ra mwetekkaein siusaengi paeyi we, ra mesag nge a pwan igin kker, ra fattapw pwe repwe noa aengaenir rhoan kkayeо kkewe naiun.

⁹ Ese mmwaei mwo nge Jesus a rhuungiir nge a aengaenir pwe, “Sirow woami.” Iwe ra itto reen, ra ammwarhiu pirheen nge ra aesirowu.

¹⁰ Jesus a aengaenir pwe, “Oawsoapw mesag! Oawnoa aengaenir rhoawwe pwiiy pwe repwe noa Galilee, pwe repwe naaen noa weriae me ee.”

Aar Poos Kkewe Fioang

¹¹ Igiwe rhoapwut kkewe ra feffaaeraeg noa, aaemweoi poosun paeyi we ra sefaaen noa noan aepinoamw we nge ra noa fioangei ngaenir soamwoonin patere kkewe oanongaen meeta we a wen.

¹² Soamwoonir patere me mwaaen kkewe aar ra rhu fengaen nge ra pwiungiuw meeta repwe feeori; iwe ra ngaenner poos kkewe towunepaen senaapiy,

¹³ nge ra aengaenir pwe, “Oawpwe aengaenir aeremas pwe, ‘Rhooan kkayeо kkewe naiun reitto neepwoong we, nge ra itto mwoarhow noa miniwe oanongan oatowe aemaem aei maiur.’

¹⁴ Nge aere *governor* erongorong kkepas eei, aemaem aeipwe aeffeta ngaeni pwe soapw reen aaemi feoffeelor aenneew, nge aaemi esooar meeta minne oawpwe tip mwaramwar reen.”

¹⁵ Iwe poos kkewe ra pwigi senaapiy we nge ra feeori meeta we re aengaenir pwe repwe feeori. Iwe fioangei nge a rheeoи noa neeir oanongeer Jews toorito igina.

*Jesus a Pwae Ngaeniir Rhooan Kkayeo Kkewe Naiun
(Mark 16.14-18; Luke 24.36-49; John 20.19-23; Feof 1.6-8)*

¹⁶ Mwirin rhooan kkayeo kkewe seig me erhai ra noa wooan rhug we noan Galilee, igiwe Jesus e aengaenii pwe repwe noa ee.

¹⁷ Igiwe ra weri, ra aesirowu, nge aaemweoi me neeiir retip mwaramwar.

¹⁸ Jesus a aerepaar to nge a iura pwe, “Semaei a ngaenneaei oanongaen nemenem woainaaeng me feoniufan pwe nemaeniaei.

¹⁹ Iwe oawnoa ngaeniir aeremas noan oanongaen pwiuneoi, oawpwe noa feeoriir pwe naeyi rhooan kkayeo, nge oawwa baptismusaar faaen itaen Saam, me Naiun me Espritu Santus.

²⁰ Nge oawwa oasuguunaar pwe repwe tapweei oanongaen minne iya aepesa ngaenigaemi oawpwe feeori. Nge ngaang ipwe nonno reemi toori nee soapwonoan feoniufan.”

Fangkenio We Foatogiaen Mark

*Aaen John Baptist Fenai
(Mat 3.1-12; Luke 3.1-18; John 1.19-28)*

¹ Ieei iiy Kkepas Mwamwaai we iwe kkepesaen Jesus Kristus iwe Naiun Deus.

² Erhaepetae reen miniwe profeta Isaiah a foatogitiw pwe,
“Deus a kkepas, ‘Ngaang ipwene fang tiw naeyi rhoaan pweipwogin kkepas
me weni mmwoamw pwe epwe noa maeneti ennepoamw.’

³ Erhai a iyaekkepwas me noan *desert* we pwe,
‘Oawpwe oamoannatae ennepaen Soamwoon,
oawpwe awenecchera eew aan epwe faaeraeg wooan.”

⁴ John a no noan *desert* we, a paptismus me epwan fenai. A aengaenir aeremas kkewe pwe, “Oawpwe toagun saengi monofitimi nge oawwa paptismus. Ina nge, Deus epwe saeneti noa aaemi monofit.”

⁵ Rhooanap we re itto saengi faniuwaen Judea me taeninimwen Jerusalem ra noa reen John. Ra pwuufayiuw noa aar monofit, nge John a paptismusaar noan pwupwu we Jordan.

⁶ John e memmengaag mengaag effeeor saengi iunaen *camel*, nge pwaanto na aan effeeor saengi ginin maan, nge anan mwongo ina manni neeiin waniwan ina nirhiugiunpweon me *honey*.

⁷ Iwe, a aengaenir aeremas pwe, “Mwaaen ee epwe wareto me mwiriy ina e taegias saengiae, ngaang mwo nge ese fin ipwe ppwoarotiw pwe ipwe pwaeisi geeogeeon nokkaan.

⁸ Ngaang i paptismus aeginigaemi reen rhaan, nge iiy epwe paptismus aeginigaemi reen Espritu Santus.”

*Aan Paptismus me Aan Sessoat Jesus
(Mat 3.13–4.11; Luke 3.21-22; 4.1-13)*

⁹ Ese pwongiy noa mwo nge Jesus a itto me Nazareth noan Galilee pwe epwe paptismus reen John noan rhan pwupwu we Jordan.

¹⁰ Igiwe rhag Jesus a teeotae me noan rhan we, a weri pwe a susu noa naaeng, iwe nge Espritu santus a ittiw wooan nge eweei rhag erhai *dove*.

¹¹ Iwe nge eew mangiungiu a ittiw me naaeng a aepesa pwe, “Een naeyi mwaaen aerhaengerhaeng, iye efin tipaei reen.”

¹² Iwe rhag nge Espritu Santus a fangenoa Jesus noan *desert* we.

¹³ A no igiwe noan iugiugiu faaeig raaen nge Saetan a aegina aan soatoni. Iwe a no neeiir maan mwoarho, iwe nge angkenus ra itto tipaengi.

*Jesus a Faingiir Faaman Rhooan Fita
(Mat 4.12-22; Luke 4.14-15; 5.1-11)*

¹⁴ Mwirin aaen John toonong noan kanepwus, Jesus a noa Galilee a noa fenaiuw Kkepas Mwamwaai we e itto me reen Deus.

¹⁵ A aepesa pwe, “A itto oatowe, Mweoiun Deus a arapeto. Oawpwe toagun saengi aaemi monofit nge oawwa niugiuw Kkepas Mwamwaai een.”

¹⁶ Igiwe Jesus a faaeraeg oaroi meoneoiniunun Galilee nge a weriir riurhai pwipwi, Simon me Andrew, iir rhoaan fita, rewug fetaen noan meoneoiniun we.

¹⁷ Iwe, Jesus a aengaenir pwe, “Oawitto tapweaei pwe ipwe kapwiung ngaenigaemi wunuunun aaemi oawpwe fita aeremas.”

¹⁸ Iwe rhag nge ra siusaengi wuug kkewe aar nge ra tapwee noa mwirin Jesus.

¹⁹ Ese pwan taaw noa aan faaeraeg nge a pwan weriir riiurhai pwipwi, James me John, ikkiwe naiun Zebedee. Reno wooan pwoot we waar nge refreeori naiur wuug.

²⁰ Nge igiwe rhag Jesus a giuneer, a faingiir. Ra siusaengi Zebedee we semeer wooan pwoot we waar me rhoan engaang kkewe nge ra tapwee noa mwirin Jesus.

*Erhai Mwaaen Ewartae Aniu Aenneew Wooan
(Luke 4.31-37)*

²¹ Jesus me rhoan kkayeo kkewe naiun ra toori taeninimwen Capernaum. Nge igiwe a toori raaenin Sabbath, Jesus a toonong noan eew wutteer Jews nge a rhaepetae aan fenai.

²² Iir aeremas kkewe re rongorong ra riutae reen aan fenai, pwe aan fenai ese weei taeppen aar fenai sinsein anniug kkewe, pwe a taeppen erhai eyor maemaewan.

²³ Reen rhag oatowe erhai mwaaen a yor erhai aniu aenneew wooan a toonong noan wutteer Jews we nge a itinong aekkepwas,

²⁴ “Meeta oamw mwerhaen ngaenigemaem, Jesus re Nazareth? Wa itto pwe wopwe oatoaropagemaem? Ngaang i giuneei een iyo: een mwaaenes-soar we rhoan pweipwogin kkepas we aaen Deus!”

²⁵ Iwe, Jesus a anniugiu ngaeni aniuwe pwe, “Wopwe anniug noa nge wa siunoa me wooan mwaaen na.”

²⁶ Iwe nge iiy aniu aenneew we a feeori mwaaen we pwe epwe ngoong fetaen, nge a aekkepwas nge a tiwti me wooan.

²⁷ Iwe aeremas towunap ra riutae nge ra rhaepetae aar kkepas neefineer, “Meeta eei? Pwan eew taeppen fenai ffeo minneei? Mwaaen een eyor maemaewan pwe eiura rhag eew nge aniu aenneew re tapwee.”

²⁸ Iwe miniwe kkepesaen Jesus a rheeoit mwetekkaei noa wooan Galilee.

*Jesus a Aecchipwa Towunepaen Aeremas
(Mat 8.14-17; Luke 4.38-41)*

²⁹ Mwirin, Jesus me James me John me rhoan kkayeo kkewe ra noa saengi wutteer Jews we nge ra noa noan imwaen Simon me Andrew.

³⁰ Iwe niewe inaan pwiuniwaen Simon ewonon semwaai reen pwer-hikkeraen ginin. Etonong rhag Jesus nge ra aengaeni wunuunun niewe.

³¹ Iwe, Jesus a toonong reen, a ammwarhiu paiun nge a tipaengitae. Iwe, a saer noa pwerhin niewe iwe a ittae engaang ngaenir.

³² Mwirin tupwunoan aenet pwe a nee oatofaaef noa, aeremas ra pweip-wog to rhoa semwaai reen Jesus, pwan rhoaweyor aniu aenneew wooar.

³³ Iwe oanongeer rhoan aepinoamw we ra itto mweoiu noa mesaen iimw we.

³⁴ Iwe Jesus a aecchipwaar tae towunepeer rhoa semwaai kkewe saengi mesemesaen aar semwaai. A asiur noa towunepaen aniu aenneew, nge ese fang ngaenir mwo nge epat pwe repwe aepesa, pwe ra fasiun giuneei iiy iyo.

*Jesus a Fenai Noan Galilee
(Luke 4.42-44)*

³⁵ Weni mmwaei raaenin we eraen, igiwe aenet esaaen teeotae, Jesus a mmasetae nge a toowow me reen iimw we. A noa eew pwiuneoi ne iiy noa rhag nge a noa maeipin e.

³⁶ Nge Simon me rhoaweyor rhinan ra noa giutta Jesus.

³⁷ Oatowe ra weri, ra aengaeni pwe, “Oanongeer aeremas ra giuttoag.”

³⁸ Nge Jesus a aengaenir pwe, “Oaw sipwe pwan noa noan aekkaew soapw, pwe ipwe noa fenai e, pwe ina faan aaei itto.”

³⁹ Iwe a noa noan oanongaen Galilee, a noa fenai noan wutteer Jews we nge a asiur wow aniu aenneew.

*Jesus a Aecchipwa Erhai Mwaaen Maemerhoar
(Mat 8.1-4; Luke 5.12-16)*

⁴⁰ Iwe, erhai mwaaen kaenepaai a itto reen Jesus, a foatotiw me mmwan nge a aeffaenipirhe ngaeni pwe epwe tipaengi. A aepesa pwe, “Aere wo mwerhaen, wa aecchipwanoa aaei semwaai.”

⁴¹ Iwe Jesus a igin faayeow, e angenoa nge a geotteopa mwaaen we, nge a paniuwaeni pwe, “Ngaang i mwerhaen, wone cchipw noa!”

⁴² Reen rhag oatowe nge kaenepaai we a rhiuw saengi mwaaen we, iwe a nimegacch noa.

⁴³ Mwirin, Jesus a igin feneow mwaaen we nge a mwetekkain ae-fenganoa,

⁴⁴ moannon aan aengaeni pwe, “Pipiyy, wosoapw aengaeni mwo nge erhai minneei, nge wa faaeraeg uwen noa reen patere pwe epwe weriug. Iwe nge a feeori oasoar we Moses e akkiuneo, pwe epwe pwaeri ngaenir aeremas pwe wa nimegacch noa.”

⁴⁵ Nge mwaaen we a noa nge a noa aepesa faaeraegiy wunuunun miniwe a wen ngaeni. Ina faaen Jesus esa mmwenen noa no fenai noan taeninimw kkewe reen. Nge a noa rhag no noan pwiuneoi ne iiy noa rhag. Iwe, aeremas saengi oanongaen pwiuneoi ra itto reen.

2

*Jesus a Aecchipwa Erhai Mwaaen Maemerhoar
(Mat 9.1-8; Luke 5.17-26)*

¹ Fitowu noa raaen me mwirin nge Jesus a sefaaenit Capernaum, iwe nge kkepas we a rheeoil noa pwe a no nee iimw.

² Iwe a igin towunap aeremas maegeto, iwe esa rhiuwen yor no neniy. Pwan paen asam we mwo nge epwan sseog noa. Iwe nge Jesus a fenai ngaenir.

³ Faaman mwaaen ra pwigito reen, erhai mwaaen e maemerhoar. ⁴ Nge pwonno igiwe ra igin towunap aeremas esa mmwen no pwe repwe pwigito mwaaen we reen Jesus. Iwe ra ngetaeni wooan oason iimw we wenewenen igiwe Jesus eno ee. Iwe ra atairaetiw mwaaen maemerhoar we ewon noan giegiy.

⁵ Igiwe Jesus a weri nepaen aar niugiuniug, a aengaeni mwaaen we e maemerhoar pwe, “Naeyi, monofitimw a mwusunoa.”

⁶ Nge aaemweoi sinsein anniug kkewe remooat igiwe ra niuwaen nong nee tipeer pwe,

⁷ “Meeta mwaaeneei a iiei wunuunun aan kkepas reen? Pwe ina nge a aepesa aenneewa Deus. Deus rhag minne emmwen epwe oamwusa noa monofit!”

⁸ Reen rhag oatowe nge Jesus a giuneei niunniwaen kkewe aar, iwe a aengaenir pwe, “Meeta oaw niuwaen minikkena e aenneew reen?”

⁹ Ifa minna e mererhaeg, aaei ipwe aengaeni mwaaen ee e maemerhoar pwe, ‘Monofitimw a mwusunoa,’ aere aaei ipwe aengaeni pwe, ‘Wopwe iutae, pwigi giemw nge wa faaeraeg noa?’

¹⁰ Ngaang ipwe pwaeri ngaenigaemi, pwe mwaaen we Naiun Aeremas eyor maemaewan wooan soanop pwe epwe oamwusa noa monofit.” Iwe a aengaeni mwaaen maemerhaar pwe,

¹¹ “Ipwe aengaeniug, iutae, pwigi giemw nge wa noa noan imwoamw.”

¹² Igiwe oanongeer nge re maegin emwaamw, mwaaen we a iutae, a pwigi gien iwe a noa. Iwe ra igin riutae reen feoffeeor we, nge ra aepingepinga Deus, nge ra aepesa pwe, “Esaaen yor mwo aemaem giuneei taeppen minneei.”

Jesus a Faangi Levi

(Mat 9.9-13; Luke 5.27-32)

¹³ Iwe Jesus a sefaaeniti miniwe meoneoiniuniun Galilee. Iwe aeremas towunap ra maegeto reen, iwe, a rhaepetae aan fenai ngaenir.

¹⁴ Nge igiwe a feffaaeraeg noa, a weri Levi iwe naiun Alphaeus, erhai rhooan iyoiyon *tax*, emooat noan aan *office*. Jesus a aengaeni pwe, “Itto tapweaei.” Iwe Levi a iutae nge a tapweei noa mwirin.

¹⁵ Mwirin noa nge Jesus a noa mwongo noan imwaen Levi. Towunepaen rhooan iyoiyon *tax* me rhooa monofit ra ttapw noa mwirin Jesus. Iwe towunepeer ra mwongo reen Jesus me rhooan kkayeo kkewe naiun reen *table* we.

¹⁶ Iwe aaemweoi sinsein anniug, iwe iir pwan Pharisees, ra giuneei pwe Jesus me rhooa monofit kkewe me rhooan iyoiyon *tax* ra mwongo fengaen, iwe ra aeiineeor rhooan kkayeo kkewe naiun pwe, “Meeta faan naimi sinsei a mwongo ngaenir rhooan iyoiyon *tax* me rhooa monofit kena reen?”

¹⁷ Jesus a rongorong aar kkepas nge a aengaenir pwe, “Rhooakka rese semwaai rese noa reer toagota, pwe rhooakka refaer semwaai. Ngaang ise itto pwe ipwe faangiir rhooa mwamwaai, pwe faer rhooa monofit.”

Kkepas Aeiineon Aecchigipin

(Mat 9.14-17; Luke 5.33-39)

¹⁸ Reen eew oat nge rhooan kkayeo kkewe naiun John Baptist me Pharisees kkewe ra aecchigipin. Iwe, aaemweoi aeremas ra itto reen Jesus ra aeiineow pwe, “Meeta naiun John rhooan kkayeo me naiur Pharisees rhooan kkayeo ra aecchigipin, nge rhooan kkayeo kkomwu noawumw rese aecchigipin reen?”

¹⁹ Jesus a paniuwaenir pwe, “Oaw niuwaenai pwe rhooa itto ngaeni gupwunon appwiuniupai eei repwe aecchigipin? Aapw, pwe iga *bridegroom* een eno reer nge resoapw aecchigipin.

²⁰ Nge epwe itto raaenin na repwe pwigi saengiir *bridegroom* we, nge ina oatona repwene aecchigipin noa.

²¹ “Esooar erhai epwe aeyae mengaag ffeo aan epwe pinisa tae wooan erheo mengaag maerhiy, nge aere epwe feeori taeppen eei, iwe mengaag ffeo we epwe fereei noa mengaag maerhiy we, nge miniwe taeringen epwene faer gin temoag noa.

²² Esooar erhai epwe aenianong *wine* ffeo noan nenien *wine* maerhiy, pwe *wine* ffeo we epwe taeringatiw nenien *wine* maerhiy we, iwe *wine* we epwe niytuw ne ppweon. Ina minne *wine* ffeo epwe pwan aekikki nong rhag noan nenien *wine* ffeo.”

Kkepas Aeiineon Sabbath

(Mat 12.1-8; Luke 6.1-5)

²³ Jesus e feffaaeraeg noa noan aekkaew maetaen *wheat* wooan raaenin Sabbath. Nge rhooan kkayeo kkewe naiun ra rhaepetae ne ferhiy iuwoapwon *wheat* kkewe.

²⁴ Iwe Pharisees kkewe ra aengaeni Jesus pwe, “Pipiiy, ese gacch ngaeni aarh anniug pwe rhoaan kkayeo kkomwu noawumw repwe feeori minna wooan raaenin Sabbath!”

²⁵ Jesus a paniwaenii pwe, “Oawsaaen aeraegi meeta we David efeeori noan oaton we e tipaeni epwe mwongo? Iiy me rhooawe rhoaniawan ra igin pecchai,

²⁶ iwe a toonong noan imwaen Deus a itinong angi fenoawa kkewe ra aeni oasoar ngaeni Deus. Minneen ewen reen oatowe Abiathar minne Soamwoonin Patere. Noan aarh anniug nge rhooawe patere rhag minne repwe mmwenen angi—nge David e angi nge a pwan ngaenner mwaaen kkewe rhoaniawan.”

²⁷ Iwe Jesus a soapwei noa pwe, “Sabbath effeelor pwe faan ngaenii aeremas, nge aeremas rese ffeeor pwe faan ngaeni Sabbath.

²⁸ Iwe mwaaen we Naiun Aeremas ina pwan iiy Soamwoonin Sabbath.”

3

Erhai Mwaaen e Maemerhoar Paiun (Mat 12.9-14; Luke 6.6-11)

¹ Iwe Jesus a sefaeniti wutteer Jews we, eno erhai mwaaen e maemerhoar paiun ee.

² Iwe nge aaemweoi aeremas ra pwan no igiwe, pwe re giutta aekkaew rhaepin minikka repwe oaturu Jesus wooan; ina faan ra pipiiy gacchiuw Jesus aere epwe aecchipwa mwaaen we wooan raaenin Sabbath we.

³ Iwe, Jesus a aengaeni mwaaen we e maemerhoar paiun pwe, “Itto weni mmweer aeremas kaan.”

⁴ Iwe a aeiineor aeremas kkewe pwe, “Meeta aarh anniug e aengaenigirh sipwe mmwenen feeori noan raaenin Sabbath? Sipwe tipaengiir, aere sipwe oawoasuur? Sipwe aemenewa erhai, aere sipwe niiy noa?”

Nge iir ra anniug noa rhag.

⁵ Jesus a igin soong igiwe ewegitaeg fetaen wooar, nge pwan reen oatowe rhag nge a pwan igin faayeeor, pwe igiwe ecchemaw neetipeer nge ese pwiung reer. Iwe a aengaeni mwaaen we pwe, “Aeitiwow poawumw.” Iwe a aeitiwow paiun, iwe a mamaaw sefaaen.

⁶ Iwe Pharisees kkewe ra siusaengi wutteer Jews we nge ra noa rhu fengaen me aaemweoi rhinaen Eroles, iwe ra noa pwiungiuw wunuunun aar repwe niiy noa Jesus.

Eew Pwuwa me Oaroi Meoneoiniun we

⁷ Jesus me rhoaan kkayeo kkewe ra noa ppaei meoneoiniuniun Galilee, nge eew pwuwaen aeremas a ttapw noa mwiriir. Ra itto saengi Galilee me Judea,

⁸ me Jerusalem, me Idumea, me eew faniuwaen eotiwen Jordan me ikkiwe faniuwaen oaron taeninimwen Tyre me Sidon. Oanongeer aeremas kaan nge ra itto reen Jesus, pwe re rongorong meeta kkewe efeeori.

⁹ Reen aan igin towunap aeremas, iwe Jesus a aengaenii rhoaan kkayeo kkewe naiun pwe repwe oamoannatae efoarh pwoot faaen itan, pwe aeremas kkewe rete aepettanoa.

¹⁰ A aecchipwaar tae pwuwaen aeremas, nge rhooawe re semwaai ra pwan aetietiy rhag pwe repwe geotteopa.

¹¹ Nge igiwe aeremas kkewe eyor aniu aenneew wooar ra weri Jesus, nge ra gaen ppiungtiw me mmwan nge ra aepwesaegini pwe, “Een Naiun Deus!”

¹² Nge Jesus a kkepas sseor ngaenii aniu aenneew kkewe pwe resoapw pwaeri ngaeni mwo nge erhai aere iiy iyo.

*Jesus a Finiir Seig me Riiurhai Oapostonus
(Mat 10.1-4; Luke 6.12-16)*

¹³ Iwe Jesus a faaeraeg tae wooan eew rhug nge a faingiir to mwaaen kkewe iiy e tipaeniir. Iwe ra itto reen,

¹⁴ nge a finiir seig me riiurhai, ikkiwe a pwan aeita ngaeniir pwe oapostonus. A aengaenir pwe, “Iya finigaemi pwe oawpwe no reei, ipwene aefengaegaemi noa pwe oawpwe noa fenai,

¹⁵ nge epwe pwan yor maemaewaemi pwe oawpwe asiur wow aniu aenneew.”

¹⁶ Ikkaan iir rhooawe seig me riiurhai a finiir tae: Simon, (Jesus a aeita ngaeni pwe Peter,)

¹⁷ James me John iwe re pwipwi, iir naiun Zebedee, (Jesus a aeita ngaeniir “Boanerges” wewen nge “Mwaaenin Pacch”),

¹⁸ Andrew, Philip, Bartholomew, Matthew, Thomas, James naiun Alphaeus, Thaddaeus, Simon, iwe erhai man menat,*

¹⁹ me Judas Iscariot, iwe e fangenoa tinnimaen Jesus.

*Jesus me Beelzebul
(Mat 12.22-32; Luke 11.14-23; 12.10)*

²⁰ Iwe Jesus a sefaaen noa nee iimw. Iwe pwuwaen aeremas kkewe repwan sefaaeneto, nge ra igin aetietiy aeremas iwe Jesus me rhoaan kkayeо kkewe naiun resa taween mwongo no.

²¹ Igiwe rhooawe aeremesan ra rongorong miniwe, ra noa pwe repwe noa aemmwena, pwe aeremas ra aepesa pwe, “A pwurhunoa!”

²² Iwe aaemweoi sinsein anniug reitto saengi Jerusalem ra aepesa pwe, “A wartae aniuwe Beelzebul wooan. Soamwoonin aniu aenneew minne efang maemaewan pwe epwe asiur noa aniu aenneew.”

²³ Iwe Jesus a faingiir to reen nge a fioang ngaeniir noan fioangon awewe: “Ifa wusun Saetan epwe pwan asiuw noa Saetan?

²⁴ Aere eew faniuw a ginigin fesaeng nge ra fiow fengaen, faniuw een epwe toarop noa.

²⁵ Aere eew famini e ginigin fesaeng nge regaen fiow fengaen, famini een epwe toarop noa.

²⁶ Iwe aere mweoiun Saetan a ginigin fesaeng, esoapw tongaeni ssiunaei noa, nge epwe ffeir noa aere rhiuw noa.

²⁷ “Esooar erhai epwe tongaeni toonong noan imwaen erhai mwaaen mamaaw pwe epwe pwigi noa pisaegin; aere epwe mmwaen geoni noa mwo mwaaen we, ina nge epwapw mmwenen piraf me noan iimw we.

²⁸ “Ennetaeen, ipwe aengaenigaemi, pwe oanongaen monofitiir aeremas epwe mmwenen mwusunoa, pwan kkepas aenneew kkewe re aepesa.

²⁹ Nge aere erhai e aepesa aenneewa Espritu Santus, esoapw tongaeni mwusunoa, pwe a feeori eew monofit kkewe esooar iaenin.”

³⁰ (Jesus a aepesa taeppen kkepas kkeei pwe iga aaemweoi aeremas ra aepesa pwe, “Erhai aniu aenneew a no wooan.”)

*Inaen Jesus me Rhooawe Pwiin
(Mat 12.46-50; Luke 8.19-21)*

³¹ Iwe rhooawe inaen Jesus me pwiin ra wareto. Ra iu niugiu iimw we nge ra tengaeg nong pwe epwe itiwow.

* ^{3:18} *man menat:* erhai mwaaen e fioang ngaeniir sonotawaen Rome faaen itaen faniuw.

³² Iwe rhooanap we oaron Jesus ra aengaeni pwe, “Pipiiy, inoamw me rhooawe pwiimw me rhooapwutomw ra no niugiu, nge ra mwerhaen rhoungiu.”

³³ Jesus a paniuwaeniir pwe, “Iyo inaei me iyo pwiiy?”

³⁴ A wegitaeg ngaenir aeremas kkewe remooat oaron nge a aengaeniir pwe, “Oaw wonoa, ikkaan iir inaei me pwiiy!

³⁵ Pwe iyo na a feeori nee tipaen Deus, nge iiy pwiiy, me mwengeaei me inaei.”

4

Fioangon Awewen Erhai Rhooan Aeperes Faiun Foat (Mat 13.1-9; Luke 8.4-8)

¹ Iwe Jesus a rhaepiy sefaaeniy aan fenai oaron meoneoiniuniun Galilee. Iwe nge pwuwaen aeremas ra itto roangei noa oaron, nge iiy a teeotae wooan efoarh pwoot a ittae mooat wooan. Iwe pwoot we a no noan nooamw we, nge rhooa towunap we ra no ngaerhei nooamw we.

² A fioang awewe ngaenir towunepaen aegiaeg, iwe a aengaeniir pwe:

³ “Oaw aiussaening! Erhai mwaaen a noa pwe epwe noa aeperes faiun foat.

⁴ Igiwe e aeperes fetaen foat kkewe, nge aekkaefai faiun foat ra ppiungiutiw wenepeigin aan we, nge man aeniaen ra itto anginoa.

⁵ Aekkaefai ra ppiungiutiw wooan kaenefai, igiwe ese manidueon ppweon ee. Aekkaaemweoi ra mwetekkaein pwaechetae, pwe igiwe rese no ppweon ttonoa.

⁶ Nge enoa ttinitae aenet nge a aeppwesa noa foat kkewe, pwe igiwe ese ttonoa waeran nee ppweon, iwe a mwetekkaein mae noa.

⁷ Aekkaefai ra ppiungiutiw neeiin irae towfanfan. Iwe irae towfanfan kkewe ra menawtae nge ra fittitae wooar iwe resa mmwenen uuwa no.

⁸ Nge aekkaefai ra ppiungiutiw noan ppweon mwamwaai we, iwe ra pwaechetae nge ra uuwa. Aekkaefai neeiir ra uwaeni eniig, aekkaefai woneig, nge aekkaefai epwiugiuw.”

⁹ Iwe Jesus a aepesa pwe, “Iyo eyor saeningan, epwe rongorong!”

Faaen Aaen Jesus Kkepesaen Fioangon Awewe (Mat 13.10-17; Luke 8.9-10)

¹⁰ Igiwe Jesus a iiy noa rhag, rhooawe retapwee me rhooawe seig me rriurhai ra itto reen nge ra tingoor ngaeni, pwe epwe awewe ngaenir faaen fioang kkewe.

¹¹ Jesus a aengaeniir pwe, “Deus a fang ngaenigaemi pwe oawpwe giuneei kkepas mwoanomwoanon minna Mweoiun Deus. Nge aaemweoi me nigiunoan repwe rongorong rhag oanongan noan fioangon awewe,

¹² pwe minni, ‘repwe pipiiy me pipiiy nge resoapw weri; repwe aiussaening me aiussaening nge resoapw metaf.

Pwe ngaere re metaf, nge repwe toagun ngaeni Deus, pwe iiy epwe oamwusaar noa.”

Jesus e Aemmetefa Fioangon Awewen Rhooan Foat we (Mat 13.18-23; Luke 8.11-15)

¹³ Iwe Jesus a aeiineor pwe, “Oawse metefaaegini fioangon awewe een? Aere oawse metefaaegini ieei, nge epwe ifa wusun aaemi oawpwe metefaaegini fioangon awewe kka aekkaew?

¹⁴ Rhooan foat we a aeperessa kkepesaen Deus.

¹⁵ Aaemweoi aeremas ra aeffitaeg ngaeni faiun kkewe re ppiungiutiw wenepeigin aan; oate ra rongorong kkepesaen Deus, Saetan a mwetekkaein itto pwigi saengiir.

¹⁶ Aaemweoi re aeffitaeg ngaeni faiun kkewe re ppiungiutiw wooan kaene-fai. Iga ra rongorong miniwe kkepesaen Deus, ra aetiwa noan aar kker.

¹⁷ Nge kkepas we ese waaraar me nee tipeer, iwe ese ssiunaei wooar. Pwe nipwaen a yor fitigogo me waeiraes faaen itaen miniwe kkepesaen Deus, ra mwetekkaein fangetae.

¹⁸ Aaemweoi aeremas ra aeffitaeg ngaeni faiun kkewe re ppiungiutiw neeiin irae towfanfan kkewe. Ikkaan iir rhooa kkewe re rongorong miniwe kkepesaen Deus,

¹⁹ nge aiunaeng reen menaw e igina me mwecheniaen senaapiy me mesemesaen aegiaeg ra toonong noan nee tipeer ra oamoapwu miniwe kkepesaen Deus, pwe esoapw mmwenen uuwa.

²⁰ Nge aaemweoi aeremas re aeffitaeg ngaeni faiun kkewe re ppiungiutiw wooan ppweon mwamwaai. Re rongorong miniwe kkepesaen Deus, ra aetiwa iwe a uuwa. Aaemweoi ra uwaeni eniig, aaemweoi wonieig, nge aaemweoi epwiugiuw.”

Eew Oappwun me Faei Saepiy (Luke 8.16-18)

²¹ Iwe, Jesus a soapwei noa aan fenai, “Meeta, eyor erhai ne epwe pwigito eew oappwun nge a iseni nong faaen eew saepiy aere faaen eew pooa? Nge saapw wooan nenien foaton?

²² Oanongaen meeta ewop noa epwene pwae noa, nge oanongaen meeta epwanipwan nge epwe pwae noa noan seram.

²³ Iyo eyor saeningan, epwe rongorong.”

²⁴ Jesus a pwan aengaenir pwe, “Oawaiussaening gacch minne oawwa rongorong! Meeta rhag oawapwiungiliur aaemweoi wooan, epwan ina rhag meeta Deus epwe aeyae ngaenigaemi, nge epwe faer cchoaw noa egius.

²⁵ Pwe iyo a yor meeta aan nge repwe pwan fang ngaeni, nge iyo ese yor meeta aan nge repwe pwigi saengi mwo nge iwe egius iwe eyor reen.”

Fioangon Foat we eMenaw

²⁶ Jesus a soapwei noa aan kkepas ngaenir, “E ieen wunuunun minne Mweoiun Deus. Erhai mwaaen e aeperes faiun foat wooan aan menaai.

²⁷ A maiur nee pwoong nge emmas neeraen, nge faiun foat we ina emmemenaw tae rhag. Nge iiy esoapw metefaaegini ifa wunuunun aaen faiun foat we memmenaw tae.

²⁸ Ppweon we minne e sipegin feeori meeta irae we epwe menawtae me uuwa reen, mmwan a sumwunutae, mwirin a yor aetin, nge oarosan a yor uwaan.

²⁹ Nge igiwe minikkewe faiun ra maaw, iwe ra gopin, pwe a toori oaton gin.”

Fioangon Awewen Faiun Mustard (Mat 13.31-32, 34; Luke 13.18-19)

³⁰ Jesus a pwan aepesa pwe, “Meeta sipwe mmwenen awewe ngaeni miniwe Mweoiun Deus? Aere ifa taeppen fioangon awewe sipwe aeyae pwe sipwe mmwenen aemmetefa?

³¹ A aweweeli ngaeni efai faiun *mustard*, iwe e oarosaen mwittig saengi pwiginnin oanongaen irae. Erhai mwaaen a pwigi faiun *mustard* we a noa foatogitiw ne ppweon.

³² Mwirin a menawtae faiun *mustard* we iwe a ssiuwen ngaeni efoarh irae e faeredit saengi oanongaen irae kkewe noan menaai we. A gin raerae noa, nge man aeniaen ra itto ffeeor feseer noan nniuriun irae we.”

³³ Jesus a fenaiuw ngaeniir aeremas kkepesaen Deus nge e aeyae taeppen fioangon awewe kkewi. A kkepas ngaeniir reen nepaen minne repwe mmwenen metefaaegini.

³⁴ Aan kkepas ngaeniir, nge ekkepas rhag noan fioangon awewe. Nge nipwaen a iiy noa rhag reer rhoan kkayeo kkewe naiun, a aemmetefa ngaeniir wewen iiy kkepas kkewe.

Jesus a Oapoassaetiw Eew Aaeng Cchoaw

(Mat 8.23-27; Luke 8.22-25)

³⁵ Noan faefin we rhag nge Jesus a aengaenir rhoan kkayeo kkewe naiun pwe, “Oaw sipwe noa epeig meoneoiniun eei.”

³⁶ Iwe ra siusaengi mwirhaen aeremas kkewe, iwe nge rhoan kkayeo kkewe ra teeotae wooan pwoot we Jesus eno wooan, iwe ra pwigi noa. Epwan yor aekkaew pwoot igiwe.

³⁷ Iwe rhag nge eew aaeng cchoaw a itto nge noa a nniunong noan pwoot we, iwe a arapakkaan epwene mweoiusiutiw.

³⁸ Jesus eno mwirin pwoot we pwe e maiur e wonotae rhimwen wooan eew iuniun. Iwe rhoan kkayeo kkewe ra faingitae ra aengaeni pwe, “Sinsei, wose aetenaegy aarh sipwene mae?”

³⁹ Iwe Jesus a iutae nge a kkepas sseor ngaeni aaeng we, “Anniug noa!” A pwan aengaeni noa, “Maniuweniuw tiw.” Iwe aaeng a seotiwi, nge a pwan rhoaraeg noa weeisaat.

⁴⁰ Iwe Jesus a aengaenir rhoan kkayeo kkewe naiun pwe, “Meeta oawwa mesag reen? Esaaen yor rhag aaemi niugiuniug?”

⁴¹ Iwe ra piunguin mesag nge ra aeiineo wooar pwe, “Iyo mwaaen een? Aaeng mwo me noa nge re tapweei mwaaenian!”

5

Jesus a Aecchipwa Erhai Mwaaen Eyor Aniu Aenneew Wooan

(Mat 8.28-34; Luke 8.26-39)

¹ Jesus me rhoan kkayeo kkewe naiun ra toori noa epeig meoneoiniuniun Galilee noan faniuwaen Gerasa.

² E teeotiw rhag Jesus me wooan pwoot we, nge erhai mwaaen a itto reen nge etowow me noan paeyi kkewe. Mwaaen een eno erhai aniu aenneew wooan,

³ nge e nonno rhag weni niipw. Esooar erhai ne emmwenen feoti ngaeni ccheen;

⁴ faaen fitowu mwo aar geoni paiun me pirheen, nge esooaw feffereei noa rhag, iwe me egaen ripiy parang we ammwarhiun ngaeni pirheen. Mwaaen een e igin mamaaw iwe esooar erhai ne epwe mmwenen ammwarhiu.

⁵ Nee pwoong me nee raaen aan mwetefetaen rhag neeiin paeyi kkewe me weei rhug, aan gaen iyaekkepwas me wunei oanongan ngaeni faai.

⁶ Erhiuwen taaw noa nge a weri Jesus, nge a fattapw ngaeni, nge a foat pwiugiuwti me weni mmwan,

⁷ nge a aekkepwas temoag tae, “Jesus, Naiun Deus iwe e oarosaen Taegias! Meeta minne wo tipaeni me reei? Iya tingoar ngaeniug mmwaen mesaen Deus pwe wosoapw aewwaeiraesiae.”

⁸ (Eiura kkepas een pwe igiwe Jesus a faer kkepas ngaeni pwe, “Aniu aenneew, toowow me reen mwaaen na!”)

⁹ Iwe, Jesus a aeiineow pwe, “Meeta itoamw?”

Mwaaen we a paniuwaeni pwe, “Itaei nge Cchon, pwe aemaem aeiigin towunap!”

¹⁰ Nge aniu aenneew we etingoar maaw ngaeni rhag Jesus pwe esoapw asiur wow me noan faniuw we.

¹¹ Eyor eew cchon sino arapeto pwiuneoi we remwongo wooan rhoangorhoang we.

¹² Iwe aniu aenneew kkewe ra aeffaenipirhe ngaeni Jesus pwe, “Fangenoa aemaem neeiir sino kenaan, wa fang ngaenigemaem pwe aeipwe wartae wooar.”

¹³ Jesus a fangenoa iir, nge aniu aenneew kkewe ra toowow saengi mwaaen we nge ra noa wartae wooar sino kkewe. Oanongaen cchon sino kkewe, iwe re aerepa riiungeras ra fattapw tiw me wenepeigin rhug we ittiw noan meoneoiniun we nge remoapw noa.

¹⁴ Mwaaen kkewe rhooan ffooanon sino ra fattapw noa nge ra noa oaronga fetaenee miniwe ewen noan aepinoamw we me menaai kkewe. Aeremas ra noa ngaeni neniy we pwe repwe noa pipiiy miniwe a wen,

¹⁵ nge igiwe ra itto reen Jesus, ra giuneei mwaaen we eyor cchon aniu aenneew wooan. A mooat igiwe nge e memmengaag, nge iiy man reepiy, iwe oanongeer ra maegin mesag.

¹⁶ Iwe rhooawe reweri meeta we ewen ra fioangei ngaenir aeremas meeta we a wen ngaeni mwaaen we eyor aniu aenneew wooan me sino kkewe.

¹⁷ Iwe ra tingoar ngaeni Jesus pwe epwe siusaengi miniwe faniuweer.

¹⁸ Nge igiwe Jesus a teeotae wooan pwoot we, mwaaen we eyor aniu aenneew wooan a tingoar ngaeni pwe, “Emmwen pwe ipwe tapweog?”

¹⁹ Nge Jesus ese mwerhaen. A aengaen pwe, “Sefaaen noa noan imwoamw reen oamw famini nge wa fioangei ngaenir minikka Soamwoon a feeori ngaeniug, iwe me aan igin gacch ngaeniug.”

²⁰ Iwe mwaaen we a siusaengi, a noa noan oanongaen miniwe Seig Aepinoamw, a noa aepesa miniwe Jesus a feeori ngaeni. Oanongeer rhooa kkewe re rongorong nge ra igin riutae.

*Naiun Jairus Rhooapwut me Rhooapwut we e Geotteopa Mengaagiun Jesus
(Mat 9.18-26; Luke 8.40-56)*

²¹ Jesus a sefaaen noa epeig nooamw we. Reen ngaerhen meoneoiniun we nge regin towunap aeremas kka ra mwirhito reen.

²² Jairus, erhai soamwoonin noan wutteer Jews we a itto, nge igiwe a weri Jesus, a aesirowu tiw me oaron pirheen

²³ nge a tingoar aeffaenipirhe ngaeni pwe, “Aeterhooapwut mwittig na naeyi a igin cchoaw aan semwaai. Faaen pirhemw itto wopwe iseni tae poawumw wooan pwe epwe takketae me epwe menaw!”

²⁴ Iwe Jesus a tapweei noa mwaaen we. Reigin towunap aeremas kka ra tapweei noa Jesus ra aetietiy ngaeni oanongaen wenepeigin.

²⁵ Eno erhai rhooapwut neeiir eseieg aan peitaeg noa noan seig me ruwowu raeg,

²⁶ inamwo igiwe a sefaaen me reer towunepeer toagota. A pwan naini oanongaen naiun senaapiy, nge faer egius mwo nge efraer kkaein noa.

²⁷ Oatowe rhooapwut we a rongorong wunuunun kkepesaen Jesus, a itto me niugiusagiuriun neeiin pinowun aeremas kkewe,

²⁸ nge a maengiy noan tipan pwe, “Aere i geotteopa rhag mengaagiun, nge ipwe mamaaw tae.”

²⁹ Reen rhag oatowe e geotteopa mengaagiun, nge semwaai we aan a iug noa, nge a meyaefi wooan oanongan pwe a rhigar saengi waeiraes we aan.

³⁰ Iwe rhag nge Jesus a meyaefi pwe eew kkeman a toowow saengi, iwe a toagun ngaeniir aeremas kkewe nge a aeiineor pwe, “Iyo we a geotteopa mengaagiuy?”

³¹ Rhoan kkayeo kkewe naiun ra paniuwaeni pwe, “Woweriir aeremas kka re aetietiy ngaeniug rhag, nge meeta wa aeiineo iyo we a geotteopoag reen?”

³² Nge Jesus a fanefetaen pwe epwe giuneei iyo we a feeori miniwe.

³³ Nge igiwe rhoapwut we a giuneei meeta we a wen ngaeni, a ngongotae reen aan mesag, iwe a itto foatoti me oaron pirheen iwe a pwaeri ngaeni wenecheran meeta we a wen ngaeni.

³⁴ Iwe Jesus a aengaeni pwe, “Naeyi, oamw niugiuniug minne a aecchip-woag tae. Wonoa noan oapoas pwe wa rhigar saengi oamw waeiraes.”

³⁵ Nge igiwe Jesus e rhiuwen kekkespas, aaemweoi rhoan pweipwogin kkespas ra itto me reen imwaen Jairus ra aengaeni pwe, “A mae noa rhoapwut we noawumw. Erhiuwen meeta ipitaen oamw itiwow angurhiu no ngaeni sinsei na?”

³⁶ Nge Jesus ese aefaaenniy meeta we re aepesa, nge a aengaeni Jairus pwe, “Wote mesag, niugiuniug rhag.”

³⁷ Jesus esa tipaeni no nge erhai epwe tapwee, pwe aaen Peter rhag me James me John iwe pwiin.

³⁸ Igiwe ra tooto reen imwaen Jairus, Jesus a giuneei aar pwurhopwurh fetaen me rongorong aar oacchorong me ngiuraegin aar saeng.

³⁹ Iwe a toonong noan iimw we a aengaeniir pwe, “Meeta oawwa pwurhopwurh fetaen reen? Meeta oawwa saeng reen? Aeteen nge ese mae, pwe aan rhag maiur.”

⁴⁰ Iwe ra kekkaei aegini, iwe a asiiur wow oanongeer me noan iimw we, nge a paenir seman me inaan aeterhooapwut we, me eoniurhai naiun rhoan kkayeo, iwe a paenir nong noan sengkin we aeterhooapwut we ewon ee.

⁴¹ A ammwarhiu tae paiun nge a aengaeni pwe, “Talitha koum!” faaen minneen nge, “Aeterhooapwut, iaengaeniug wopwe rhimwitae!”

⁴² Eiutae rhag nge a faaeraeg fetaen. (Iya seig me ruwowu raegin.) Nge igiwe a wen miniwe oanongaen aeremas kkewe ra igin riutae.

⁴³ Nge Jesus a aetiwenigiy ngaeniir pwe resoapw aengaeni mwo nge erhai, nge a pwan aengaeniir pwe, “Oawngaenneei meeta epwe angi”.

6

Rhoan Nazareth Rese Aetiwa Jesus (Mat 13.53-58; Luke 4.16-30)

¹ Jesus a siusaengi pwiuneoi we nge a sefaaen ngaeni pwugusan, nge rhoan kkayeo kkewe naiun ra pwan tapwee noa.

² Wooan raaenin Sabbath nge a rhaepiy tae aan fenai noan wutteer Jews we. Retowunap aeremas igiwe nge igiwe rhooa rongorong aan fenai ra igin mwaar reen. Ra aeiineo pwe, “Iya minne epwigi minikkei me ee? Meeta taeppen reepiy e refang ngaeni? Ifa wusun nge a mmwen ngaeni aan feeori kkeman kaan?

³ Saapw ieen taikusang we naiun Maria, iwe pwiin James, Joseph, Judas me Simon? Me saapw mwengeyan rhoapwut kka reno igeei?” Iwe resa aetiwa no.

⁴ Jesus a aengaenir pwe, “Profeta eyor aesirowuur me noan oanongaen pwiuneoi, nge ese yor aesirowuur me noan sipegin pwuguseer, me reer aeremeseer me aar famini.”

⁵ Ese mmwen epwe feeori kkeman me igiwe, pwe efaer aetekkaar tae rhag aaemweoi rhooa semwaai reen aan iseni tae paiun wooar.

⁶ A gin ssef tae nee tipan reer aeremas kkewe esooar aar niugiuniug.

*Jesus a Fangenoa Seig me Riiurhai Rhooan Kkayeo
(Mat 10.5-15; Luke 9.1-6)*

Iwe Jesus a noa noan pwugos kkewe earapeto, nge a fenai ngaenir oanongeer aeremas.

⁷ A faingi fengaennir rhooawe seig me riiurhai rhooan kkayeo nge a aefengaar noa riiurhai me riiurhai. A fang ngaenir maemaeweer pwe repwe asiur aniu aenneew me wooar aeremas,

⁸ nge a pwan anneogiu ngaenir pwe, “Oawsoapw pwigi mwo nge eew meeta wooan aaemi saei pwe eew rhag yoyo, esoapw yor aenaemi, aaemi pwetoaw, esoapw yor senaapiy noan pwoarsaemi.

⁹ Oaw nokka, nge oawsoapw pwigi mwo epeo ssiuwenin mengaagiumi.”

¹⁰ A pwan aengaenir pwe, “Ese tiwegian iya re aetiwaegaemi me ee, oawno noan iimw naan toori aaemi oawpwe siu me reen aepinoamw naan.

¹¹ Ngaere oawtoori eew taeninimw, nge rese aetiwaegaemi aere aiussaening ngaenigaemi, oawsiusaengi pwiuneoi we nge oawwa iurhiugi noa ppweoniu pwiuneoi we me wooan pirhemi. Minna ina epwene no pwe eew atapeonneog ngaenir.”

¹² Iwe ra noa fenaiuw ngaenir aeremas pwe repwe toagun saengi aar monofit.

¹³ Ra asiur noa towunepaen aniu aenneew me wooar aeremas, nge ra aepiti ngaenir tiikka towunepaen rhooa semwaai kkewe iwe ra aecchip-waar tae.

*Maenoan John Baptist
(Mat 14.1-12; Luke 9.7-9)*

¹⁴ Igiwe king Erotes a rongorong wunuunun kkepesaen Jesus, pwe itan a rheeo noa wooan oanongaen pwiuneoi. Aaemweoi aeremas ra aepesa pwe “John Baptist a menaw sefaaen saengi mae noa! Ina faaen minne eyor maemaewan pwe epwe feeori kkeman kkeei reen.”

¹⁵ Aaemweoi re aepesa pwe, “Iiy Elijah.”

Nge aaemweoi re aepesa pwe, “Iiy erhai profeta, taeppeer profeta kkewe mweowiwe.”

¹⁶ Igiwe Erotes a rongorong miniwe, a aepesa pwe, “Iiy John Baptist we i gopyi noa iiawan nge imwu a menaw sefaaen!”

¹⁷ Erotes miniwe eakkiuneo pwe repwe torofi John nge ra geoni iwe ra oatoranong noan kanepwus. Erotes a feeori minneei faaen itaen Herodias iwe a pwiuniwaeni, nge rhooopwut een nge pwan pwiuniwaen Philip iwe pwiin.

¹⁸ John Baptist a aepini ngaeni Erotes pwe, “Ese fin pwe wopwe pwiuniwaeni rhooopwut mwu pwiuniwaen pwiimw!”

¹⁹ Iwe Herodias a gin soong wooan John nge a gin mwerhaen pwe epwe niyy noa, nge ese mmwen ngaeni pwe reen Erotes.

²⁰ Erotes e mesagiu John, pwe a giuneei pwe iiy erhai mwaaen mwamwaai nge esooar, iwe e aemmwena fetaeneei rhag. Erotes e aerhaengi aan epwe rongorong ngaeni aaen John fenai, inamwo aere egaen kkaein noa aenneewaen tipan iga egaen rongorong ngaeni.

²¹ Oarosan nge Herodias a yo ngaeni niunniuwaen we aan. Wooan raaenin wupwutiwen Eroles, igiwe efeori eew gupwunnap faaen iteer naiun naiwiis, naiun soamwoonin sonotaw me aeremas kkewe re taegias me noan Galilee.

²² Oatowe rhooapwut we naiun Herodias a toonong nge a itinong pwaai, Eroles me rhooawe rhoaniawan ra gin kker reen. Iwe *king* we a aengaeni aeterhooapwut we pwe, “Meeta wotipaeni wopwe aeni? Ngaang ipwe ngaenneog ese tiwegin minne wo tipaeni.”

²³ A pwan ppwon ngaeni pwe, “Ngaang ipwe ngaenneog ese tiwegin meeta wo tingoar, inamwo esoapw me reen minne nemaeniai!”

²⁴ Iwe aeterhooapwut we a noa aeiineow miniwe inan pwe, “Meeta ngaang ipwe tingoar?”

Rhooapwut we inan a paniuwaeni pwe, “Minna rhimwen John Baptist.”

²⁵ Iwe aeterhooapwut we a mwetekkaein sefaaen noa reen *king* we nge a tingoar ngaeni pwe, “Imwerhaen pwe igina rhag nge wopwe ngaenneaei rhimwen John Baptist noan eew saepiy.”

²⁶ Minneen nge a gin aenneewa noa neetipan *king* we, nge ese mmwen pwe epwe aeseefaaeni pwe reen ppwon kkewe a feeori faaen meseer rhoa towunap kkewe.

²⁷ Iwe a fangenoa rhag erhai sonotaw nge a aengaeni pwe epwe pwigito rhimwen John. Iwe sonotaw we a noa, a noa reen noan kanepwus we, a noa gopyi noa iiuwaen John;

²⁸ iwe a pwigito rhimw we noan eew saepiy a itto ngaennee aeterhooapwut we, nge iya ngaennee miniwe inan.

²⁹ Nge igiwe rhooawe naiun John rhoaan kkayeo ra rongorong, ra itto pwigi miniwe oanongan nge ra noa paeia noa.

Jesus e Oamwongoor Nimingeras Aeremas

(Mat 14.13-21; Luke 9.10-17; John 6.1-14)

³⁰ Oapostonus kkewe ra sefaaeneto reen Jesus nge ra aengaeni oanongaen meeta ra feeori, pwan minikka ra aeni fenai.

³¹ Igiwe a gin towunap aeremas kka remaegeto me maegenoa, Jesus me rhoaan kkayeo kkewe naiun esa mmwen no repwe mwongo. Iwe a aengaeniir pwe, “Oawsa noa oaw giirh rhag eew pwiuneoi taaw noa, pwe oawpwe egius mmwenen aseoseo.”

³² Iwe iir noa rhag ra noa wooan efoarh pwoot nge ra noa ngaeni eew pwiuneoi esooar aeremesan.

³³ Nge towunepeer aeremas kka reweriir aar siunoa nge re giuneer pwe iir iyo, iwe ra siusaengi aepinoamwoor, ra fattapw noa me weni faniuw nge ra toori pwiuneoi we memmweer Jesus me rhoaan kkayeo kkewe naiun.

³⁴ Nge igiwe Jesus a teeotiwoor me wooan pwoot we, a giuneei pwuwaen aeremas kkewe, iwe nge a igin faayeeor, pwe ra aeffitaeg ngaeniir *sheep* kkewe esooar rhoaan neginegiir. Iwe a rhaepiy tae aan faniuw ngaeniir towunepaen aegiaeg.

³⁵ Noan faefin we, rhoaan kkayeo kkewe naiun ra itto reen nge ra aengaeni pwe, “Eigin anniug noa igeei, nge a pwan pwoong.”

³⁶ Wone fangenoa aeremas kena noan maat me pwugos kkomwu e arapeto pwe repwe noa chuwaai aeneer mwongo.”

³⁷ Nge Jesus a aengaeniir pwe, “Aaemi oawpwe ngaenner meeta repwe mwongo.”

Iwe ra aeiineow pwe, “Wo mwerhaen aeipwe noa chuwaai fenoawa ngaeni riiuwapwiugiuw faiun silver, pwe repwe mwongo?”

³⁸ Iwe Jesus a aeiineor pwe, "Fitifai fenoawa eyor reemi? Oawnoa pipiiy."

Nge igiwe ra giuneei, ra aengaeni Jesus pwe, "A yor niffai fenoawa me riiurhai iig."

³⁹ Jesus aepesa ngaenir rhoaan kkayeo kkewe naiun pwe, "Oawaengaenir aeremas kena pwe repwe mooat tiw wooan fetin nge epwe imweoi noa aaemweoi me aaemweoi."

⁴⁰ Iwe rhooanap we ra mooat tettaen noa, nge aaemweoiut aepwiugiuw, nge aaemweoiut aenimeig.

⁴¹ Iwe Jesus a pwigi fenoawa we niffai me iig kkewe riiurhai, a fattae naaeng nge a fang ngaeni Deus aan aerhigerhig. A giniiy fenoawa kkewe a ngaenneer rhoaan kkayeo kkewe naiun pwe repwe inetiy ngaenir aeremas kkewe. A pwan giniiy iig kkewe riiurhai pwe epwe toaw wooar aeremas kkewe.

⁴² Oanongeer nge ra maegin mwongo iwe ra faeyemwaai noa.

⁴³ Iwe rhoaan kkayeo kkewe ra ion fengaenniy iwe ra oawuta seig me ruwowu rhiug reen nusegin fenoawa me iig kkewe.

⁴⁴ Iwe nepeer mwaaen kkewe re mwongo nge nimingeras.

Jesus e Faaeraeg Noa Weei Saaet

(Mat 14.22-33; John 6.15-21)

⁴⁵ Iwe noan rhag oatowe nge Jesus a aepekkaar rhoaan kkayeo kkewe naiun pwe repwe teeotae wooan pwoot we, nge ra gommwonoa Bethsaida iwe epeig meoneoiniun we, nge iiy a aefengaer noa aeremas kkewe pwe repwe sefaan ngaeni nenieer.

⁴⁶ Mwirin aan koapwong ngaenir aeremas kkewe, a faaeraeg tae wooan eew rhug pwe epwe noa maeipin.

⁴⁷ Oatowe a pwongonoa, pwoot we a toori nugunupaen meoneoiniun we, nge Jesus a iiy noa rhag wenifaniuw.

⁴⁸ Iwe a giuneei pwe rhoaan kkayeo kkewe naiun ra aerhigaen fatiun, pwe iga refatiun ngaeni aaeng; nge nepetaen enuuw me wonowu konook neeoatosor raaen nge a itto reer, nge efaaeraeg to weeisaaet. Nge aetae epwene oanuuw saengiir,

⁴⁹ nge ra weri pwe a faaeraeg weeisaaet. Ra maengiy pwe erhai aniu, nge ra aekkepwastae.

⁵⁰ Ra maegin mesag tae igiwe ra weri.

Reen rhag oateen nge Jesus a kkepas ngaenir pwe, "Oawaemenetaegaemi! Ngaang minneei. Oawsoapw mesag!"

⁵¹ Iwe Jesus a teeotae reer wooan pwoot we, nge aaeng we a maseoseoti. Rhooan kkayeo kkewe ra mwaar,

⁵² pwe rese metefaaegini meeta faaen miniwe Jesus enoa mmwenen oamwongoor rhooawe nimingeras reen, iwe rese iit faan.

Jesus a Aecchipwaar Rhooa Semwaai me Wooan Gennesaret

(Mat 14.34-36)

⁵³ Iwe ra seraeg noa epeig meoneoiniun we iwe ra itto noan Gennesaret, nge ra noa feotaegini waa we waar me ee.

⁵⁴ Re tiwenong rhag me wooan pwoot we waar, nge aeremas ra aeginna Jesus.

⁵⁵ Iwe ra peres fetaen wooan oanongaen faniuw, pwe ese tiwegin iga rerongorong pwe eno e, nge ra pwigiir to rhooa semwaai kka rewon noan gieer.

⁵⁶ Iwe nge oanongaen pwiuneoi e Jesus enoa ee, noan pwugos, aere noan aepinoamw aere noan maat, nge aeremas repwe pweipwog to mane

semwaai noan nenien chuwaai nge ra itto tingoar ngaeni Jesus pwe aere uwen aar mwo man semwaai geotteopa soapwon mengaagiun. Iwe oanongeer iyo kkewe re geotteopa ra mamaaw noa.

7

Aar Fenai Rhaepeto Kkewe (Mat 15.1-9)

¹ Aaemweoi Pharisees me sinsein anniug kkewe re itto me Jerusalem ra mwirhito reen Jesus.

² Ra giuneei pwe aaemweoi me neeiir naiun Jesus rhooan kkayeo kkewe ra mwongo wooan paaiur nge e nimaenneew, pwe rese toafi paaiur taeppen minna Pharisees re aengaenii aeremas pwe repwe feeori.

³ (Pwe Pharisees me oanongeer Jews, re tapweei rhag miniwe rhaepeto kkewe aar ra aeni fenai ngaenii: Re fasiun gaen toafi paaiur taeppen wunuunun toatoan pai na iir refasiun feoffeori wenimmwaen aar repwe mwongo;

⁴ nge rese pwan mwongo minikka e itto me noan imwaen chuwaai igine rese nniuwani mwo. Iwe nge repwan tapweei rhag ssowun anniug kkewe re fasiun aengaenii, wunuunun aar toafi kkap, raaw, saepiy me gieer.)

⁵ Iwe Pharisees me sinsein anniug kkewe ra aeiineow Jesus pwe, “Meeta rhooan kkayeo kkomwu noawumw rese tapweei aar fenai rhaepeto kkewe aarh reen, nge ra faer mwongo wooan paaiur min nimaenneew?”

⁶ Jesus a paniuwaenii pwe, “A gin weneeti meeta we Isaiah a faer fenaiuw pwe wunuunumi. Aaemi rhooa oatupwutupw, taeppen rhag aan foatogi: ‘Deus a aepesa pwe: Aeremas kkeei ra oassoamwooniaei rhag reen aar kkepas,

nge nee tipeer a igin taaw saengiae.

⁷ Esooar ipitaen aar aesirowuwaei,
pwe refenaiuw aar aeremas anniug,
nge ra feeori pwe aetae gaen aaei anniug.’

⁸ “Aaemi oawwa oatoranoa aaen Deus anniug, nge oawwa tapweei feeori-aen aeremas.”

⁹ Nge Jesus a soapwei noa pwe, “Oawigin angmwamwaa reen aaemi oawpwe arhiwa noa anniug kkewe aaen Deus minni aaemi oawpwe ae-maemaewa kkomi.

¹⁰ Pwe Moses a aepesa pwe, ‘Wopwe aesirowu semoamw me inoamw,’ iwe me, ‘Iyo a oari seman aere inan, nge repwe niiy noa.’

¹¹ Nge aaemi oawwa aepesa pwe aere erhai a yor reen aekkaew meeta epwe tipaengi ngaeni seman aere inan, nge a aepesa pwe, ‘Minneen nge Corban,’ (faaen minneen nge aaen Deus),

¹² iwe a yor pweniun pwe esoapw tipaengi seman aere inan.

¹³ Reen taeppen fenai e oawwa aengaenii aeremas nge e oamoai noa mwaeniaen Deus. Nge e towunap aegiaeg oawfeeori ikka e ieei wusun.”

Minikka e Aenimaenueewa Aeremas (Mat 15.10-20)

¹⁴ Iwe Jesus a faingir to pwuwaen aeremas kkewe nge a aengaenii pwe, “Oawaiussaening ngaeniaei oanongaemi, pwe oawpwe metaf.

¹⁵ Esooar meeta minne epwe toonong neerhiumi nge epwe aenimaenueewagaemi noa. Pwe faer minne etowow me neerhiumi minne epwe aenimaenueewagaemi.

16 [Iyo a yor saeningan, epwe rongorong.]^{*}

17 Igiwe a mwet saengi aeremas kkewe a noa toonong nee iimw, iwe rhooan kkayeo kkewe naiun ra tingoar ngaeni pwe epwe aemmetefa ngaenir faaen kkepas kkewe.

18 Jesus a aengaenir pwe, “Iwe aaemi mwo nge oawse metaf pwan taep-pen rhag ikkina aaemweoi? Oawse metaf? Esooar minne epwe toonong nee rhiumi nge epwe aenimaenneewagaemi,

19 pwe ese toonong noan pwunnomi pwe etonong noan upwaemi, mwirin a toowow saengi oanongaemi.” (Reen kkepas een nge Jesus a pwaeritae pwe oanongaen mwongo nge egacch pwe aeremas repwe mwongo.)

20 Nge a soapwei noa nge aepesa pwe, “Meeta a toowow saengi nee rhiumi minne e aenimaenneewagaemi.

21 Pwe saengi nee rhiumi me pwunnomi, a toowow niunniwaen aen-neew, feoffeor aenneew fetaen, mwoarho, nni menaw,

22 maiur ngaeni pwiuniwaen erhai, rhegoaw me towunepaen min aen-neew, oatupwtupw, mwechenia, noanowo, kkepas aenneew, oangonon-gon me tipoaroh.

23 Oanongan feoffeor kkeei nge etowow saengi neerhiumi a itiwow aenimaenneewagaemi.”

Aaen Erhai Rhooapwut Niugiuniug (Mat 15.21-28)

24 Iwe Jesus a noa saengi igiwe a noa eew pwiuneoi earap ngaeni aepinoamwon Tyre. A toonong noan eew iimw nge ese tipaeni pwe erhai epwe giuneei pwe a no igiwe, nge ese mmwenen wop ssiunaei igiwe.

25 Iwe nge erhai rhooapwut eyor naiun aeterhooapwut ewartae aniu aenneew wooan, a rongorong wunuunun Jesus nge a itto reen nge a itto foatotiw oaron pirheen.

26 Rhooapwut een nge erhai rhooapwuton Gentile, a wupwutiw noan faniuwaen Phoenicia iwe noan Syria. A tingoar aeffaenipirhe ngaeni Jesus pwe epwe asiuw wow aniu aenneew we me reen aeterhooapwut we naiun.

27 Nge Jesus a paniuwaeni pwe, “Sipwe mmwaen oamwongoor wonigaet. Ese mwamwaai pwe sipwe pwigi aeneer wonigaet mwongo nge sa oatora ngaenir gonaag.”

28 Rhooapwut we a paniuwaeni pwe, “Menap, gonaag mwo nge re mwongo peipeyin aeneer wonigaet me faaen *table*.”

29 Iwe Jesus a aengaeni pwe, “Pwondo reen minimwu mwaenioamw, wone sefaaen noa nee iimw, pwe e aniu aenneew we a toowow me reen aeterhooapwut we noawumw.”

30 Iwe rhooapwut we a noa nee iimw nge a noa weri aetewe naiun pwe ewon noan gien, nge ennetaaen pwe aniu aenneew we a siunoa me wooan.

Jesus a Aecchipwa Erhai Niparh Ewan me Saeningan

31 Jesus a noa saengi faniuwaen Tyre a noa ngaeni Sidon toori meoneoini-unun Galilee, nge a mwet nong noan faniuwaen Decapolis.

32 Aaemweoi aeremas ra noa pwigito reen Jesus erhai mwaaen e saeningapiung nge egin waeiraes epwe kkepas, nge ra aeffaenipirhe ngaeni Jesus pwe epwe iseni tae paiun wooan.

33 Iwe Jesus a paeninoa mwaaen we saengir aeremas kkewe, a tugunong noan saeningaen mwaaen we, nge a oattuffa, nge a geotteopa rheoniuwan.

* **7:16** Petenan eei nge e soano noan aekkaew petenan kka e foatofoat noan kkepesaen Greek.

³⁴ Mwirin Jesus a fattae naaeng, a nngas faeregit noa, nge a aengaeni mwaaen we pwe, “Ephphatha!” faaen nge “Sugaeg tae!”

³⁵ Iwe rhag nge mwaaen we a mmwen epwene rongorong, a saenetaeg noa rheon ngaerhen, nge a rhaepetae aan kkepas.

³⁶ Iwe Jesus a anniugiu ngaenir aeremas kkewe pwe resoapw fioangei ngaeni mwo nge erhai; nge nepaen aan anniugiu ngaenir, nge nepaen aar noa aepesa fetaeneei.

³⁷ Oanongeer rhoawae re rongorong kkepas we ra gin mwaar. Ra aepesa pwe, “A igin mwamwaai oanongaen minikka a feeori. Epwan feeori mwo nge rhooa piung repwene rongorong, me rhooa parh eweri repwene kkepas.”

8

Jesus e Oamwongoor Faangeras Aeremas (Mat 15.32-39)

¹ Ese pwongiy mwo me mwirin nge pwuwaen aeremas ra itto rhu fengaen. Oatowe a rosonea aeneer mwongo, nge Jesus a faingir to rhoan kkayeо kkewe naiun nge a aengaenir pwe,

² “Iya faayeeor rhooa eei, pwe iga ra no reei noan eoniuraen, nge iye igina a rosonea aeneer mwongo.

³ Aere ipwe aesefaenir noa nee pwuguseer nge ise oamwongoor, nge repwe niyoarorhrorh, pwe aaemweoi e gitaaaw nenieer.”

⁴ Iwe, rhoan kkayeо kkewe naiun ra aeiineow pwe, “Iya me noan pwineoи anniug noa eei iye sipwe rhurhu mwongo me ee nge epwe nap wooar rhooa eei?”

⁵ Jesus a aeiineeор pwe, “Fitifai fenoawa eyor reemi?”

Ra paniuwaeni pwe “Fiusiufai.”

⁶ A anniugiu ngaenir rhoanap we pwe repwe mooat tiw wenippweon. Iwe a pwigi fiusiufai fenoawa nge a aengaeni Deus aan aerhigerhig, a giniytiw nge a ngaenneer rhoan kkayeо kkewe pwe repwe inetiy ngaenir rhoanap we, iwe ra feeori.

⁷ Epwan yor reer fitiman iig paecchig. Jesus a pwan fang aan aerhigerhig, iwe a ngaenneer rhoan kkayeо kkewe naiun pwe repwe inetiy ngaenir rhoanap we.

⁸⁻⁹ Oanongeer remwongo nge ra faeyemwaai. Nnepeer aeremas kkewe nge epwe sooaw faangeras. Iwe rhoan kkayeо kkewe ra oawuta fisuuw rhiug reen nusegin mwongo kkewe. Iwe Jesus a aefengaar noa aeremas kkewe nee pwuguseer,

¹⁰ Nge Jesus me rhoan kkayeо kkewe naiun ra teeotae wooan efoarh pwoot, ra saei ngaeni faniuwaen Dalmanutha.

Pharisees Kkewe ra Tingoar Eew Kkeman (Mat 16.1-4)

¹¹ Aaemweoi Pharisees ra itto reen Jesus nge ra rhaepeta aar appaniuwaeni. Re mwerhaen repwe aegina, iwe ra tingoar ngaeni pwe epwe feeori eew kkeman, pwe epwe pwae pwe Deus e tipieew ngaeni.

¹² Nge Jesus a nngas faeregit noa nge aepesa pwe, “Meeta minne aeremesaan mweoi e igina ra tingoar eew kkeman reen? Ennetaan, ipwe aengaenigaemi pwe esoapw yor eew kkeman epwe pwae ngaenir aeremas kkeei.”

¹³ A nigitir, a teeotae wooan pwoot we a noa peig we epeig me reen meoneoiniun we.

*Aar Yeast Pharisees me Erotes
(Mat 16.5-12)*

¹⁴ Rhooan kkayeо kkewe remaniuwegi noa repwe oayora pwigieer fenoawa, iwe efoarh rhag fenoawa minne eno reer wooan pwoot we.

¹⁵ Iwe Jesus a atapeonneogiur pwe, “Oawpwe aefaaennigaemi reen yeast we aar Pharisees me Erotes.”

¹⁶ Iwe ra rhaepetae aar fioang wooar pwe, “A aepesa minneen pwe iga esooar fenoawa reerh.”

¹⁷ Jesus efasiun giuneei meeta we re aepesa, iwe a aeiineor pwe, “Meeta faan aaemi aepesa aan esooar fenoawa reen? Oawsaaen giuneei aere oawsaaen metaf mwo? Erhiuwen roorh noan rhimwemi?”

¹⁸ Eyor mesaemi, oawse weriwer? Eyor saeningaemi, oawse rongorong? Oawse maengiy

¹⁹ oatowe iginiyy niffai fenoawa wooar rhooawe nimingeras? Fitowu rhiug oawwa oawuta reen nusegin mwongo?” Iwe, ra paniuwaeni pwe, “Seig me riuwarhiug.”

²⁰ Jesus a aeiineor pwe, “Nge oatowe iginiyy fusuufai fenoawa wooar rhooawe faangeras, nge fitowu rhiug esseog reen minikkewe nusegin mwongo?” Iwe ra paniuwaeni pwe, “Fisuuw rhiug.”

²¹ “Oawsaaen metaf mwo?” aaen Jesus aeiineo.

Jesus a Aeffetanoa Mesaen Erhai Mwaaen me Wooan Bethsaida

²² Ra itto Bethsaida, nge aaemweoi aeremas ra pwigito reen Jesus erhai mwaaen parh nge ra aeffaenipirheei pwe epwe geotteopa.

²³ Jesus a ammwarhiu paiun mwaaen we a paeni wow me niugun pwugos we. Mwirin aan oattuffa mesaen mwaaen we, nge a iseni tae paiun wooan, nge a aeiineow pwe, “Yor minne wa weri?”

²⁴ Mwaaen we a mmas noa nge a iura pwe, “Ooa, iya weriir aeremas, nge nigit pwe reweei waniwan kka re faaeraeg fetaen.”

²⁵ Jesus a pwan iseni sefaaen tae paiun wooan mesaen mwaaen we. Reen oateen nge mwaaen we a fan wenewen noa, pwe a ffat sefaaen minikkiwe mesan pwe a weri oanongaen aegiaeg.

²⁶ Jesus a fangenoa mwaaen we nee pwugusan nge a ammwir ngaeni pwe, “Wosoapw rhiuwen sefaaen noa reen oasoaso na.”

Peter e Iura pwe Jesus Ina Kristus

(Mat 16.13-20; Luke 9.18-21)

²⁷ Iwe nge Jesus me rhooan kkayeо kkewe naiun ra noa noan aepinoamw kkewe ngaerhen Caesarea Philippi. Noan aar feffaaeraeg noa, nge a aeiineor pwe, “Oawaengaeniaei, aeremas re iura pwe ngaang iyo?”

²⁸ Iwe nge ra aengaeni pwe, “Aaemweoi re iura pwe een John Baptist, aaemweoi re iura pwe een Elijah, nge pwan aaemweoi re iura pwe een erhai profeta kkewe.”

²⁹ Jesus a aeiineor pwe, “Nge aaemi, oawiura pwe ngaang iyo?” Peter a paniuwaeni pwe, “Een Kristus.”

³⁰ Iwe nge Jesus a oasoapwosoapw ngaenir pwe, “Esooar ne oawpwe aengaeni wunuunun mmwenei.”

Jesus a Aepesa Waeiraesin me Maenoan

(Mat 16.21-28; Luke 9.22-27)

³¹ Iwe Jesus a rhaepiy aan fenaiur rhooan kkayeо kkewe naiun nge eiura pwe, “Minna Naiun Aeremas ina epwe kkaein aan affayeо nge epwe serhoawun me reer mwaaen kkewe aar, soamwooniir patere kkewe me

sinsein anniug kkewe. Repwe niiy noa, nge mwirin eoniuraen nge epwe menaw sefaaen."

³² Egin aeffeta ngaeniir wunuunun minneei. Iwe Peter a wummuw noa egius a noa soong ngaeni.

³³ Nge Jesus a toagun ngaeniir rhoaan kkayeо kkewe naiun nge a soong ngaeni Peter. Eiura pwe, "Rhiuw me oaroi, Saetan, pwe oamw niunniuwaen ese itto me reen Deus, pwe e itto me reen aeremas."

³⁴ Iwe Jesus a faingi pwuwa we me rhoaan kkayeо kkewe naiun. Iwe a aengaeniir pwe, "Erhai ne emwerhaen tapweaei, epwe aerheei noa niunniuwaennen wooan oanongan, a aiufera aan kurus nge a tapweeito mwiriy."

³⁵ Pwe iyo emwerhaen ammwarhiu menewan epwe ppiung saengi, nge iyo eppiung saengi menewan faaen itaei pwan faaen itaen Kkepas Mwamwaai we nge epwe menaw.

³⁶ Epwe meeta ipitan aaen yo faeinaengiy nniuw noa ngaeni erhai, nge ese yo ngaeni menewan? Esooar ngaere!

³⁷ Esoapw yor meeta erhai epwe tongaeni fangenoa pwe epwe pwigi sefaaeniy menewan.

³⁸ Aere wosaew aeginiae me fenai kena aaei faaen mweoi esseogiu monofit, ina nge mwaaen we Naiun Aeremas epwe pwan saew aeginiug oatona epwe itto noan nning minna Seman fengaen me angkenus kena ressoar."

9

¹ Iwe a pwan aepesa pwe, "Ennetaeen, ipwe aengaenigaemi, pwe eyor aaemweoi aeremas igeei resoapw mae, toori oatona repwe weri itton minna Mweoiun Deus epwe itto noan mamaaw."

Nniuwen Noan Wunuunun Jesus (Mat 17.1-13; Luke 9.28-36)

² Mwirin wonowu raaen nge Jesus a paenir tae Peter, James me John wooan eew rhug taegias, nge a iir noa rhag ee. Igiwe rerhiuwen oawruru Jesus, nge a nniuwen noa wunuunun,

³ mengaagiun a moanuponup reen aan pwerheraeg noa, pwerheraeg saengi mwo nge wupwuwaen erhai mengaag me noan faeinaengiy.

⁴ Iwe nge rhoaan kkayeо kkewe eoniurhai ra weri Elijah me Moses aar Kkepas ngaeni Jesus.

⁵ Iwe Peter a aengaeni Jesus pwe, "Sinsei, a igin gacch pwe sino igeei. Aeipwe aiuwtae enuuw iimw tampwoning, eew imwoamw, eew imwaen Moses, me eew imwaen Elijah."

⁶ Iiy me rhooa kkewe rhoaniawan ra igin mesag, iwe Peter esa giuneei no meeta epwe rhiuwen aepesa.

⁷ Iwe eew toapw a itto pwaniuir noa, nge ra rongorong eew mangiungiu eitto me noan toapw we, "Ieei Naeyi mwaaen aerhaengerhaeng, oawaiussaening ngaeni!"

⁸ Ra mwetekkaein wegitaeg fetaen nge esooar ne reweri, pwe aaen Jesus rhag minne eno reer.

⁹ Igiwe ra ittiw me wooan rhug we, Jesus a igin ammwir ngaeniir pwe, "Oawsoapw aengaeni mwo nge erhai meeta oawwa weri, toori aaen mwaaen we Naiun Aeremas epwe menaw sefaaen me reen maenoa."

¹⁰ Ra tapweei meeta we e Jesus e ammwir ngaeniir, nge a rhaepetae aar Kkepas aeiyeg fengaen wooar, "Meeta faan minne menaw sefaaen saengi mae noa?"

¹¹ Iwe ra aeiineow Jesus, “Meeta sinsein anniug ra aepesa, pwe Elijah epwe gommwoto reen?”

¹² A paniuwaeniir pwe, “Epwe fasiun gommwoto Elijah pwe epwe itto oamoannatae oanongaen aegiaeg. Nge meeta rhag a foatofaat noan Pwapwior we e Santus pwe Naiun Aeremas epwe toonong noan waeiraes faeregit me aar oasoarhoawuna?

¹³ Ipwe aengaenigaemi pwe Elijah a fasiun itto, nge aeremas ra feeori ngaeni meeta aar mwerhaen, taeppen rhag meeta we Pwapwior we e Santus e aepesa.”

*Jesus e Aecchipwa Erhai Aetemwaaen Eyor Aniu Aenneew Wooan
(Mat 17.14-21; Luke 9.37-43a)*

¹⁴ Igiwe ra rhu fengaen me rhooan kkayeo kkewe aaemweoi, ra giuneei pwuwaen aeremas kkewe re pwaeniaeniir me aaemweoi sinsein anniug re aengiingi ngaeniir.

¹⁵ Igiwe aeremas kkewe ra giuneei Jesus, ra riutae, ra fattapw noa reen ra noa aewenimmwa.

¹⁶ Jesus a aeiineor rhooan kkayeo kkewe naiun pwe, “Meeta mwu oawaengiingi fengaen wooan?”

¹⁷ Erhai mwaaen me neeiir rhooa towunap we a paniuwaeni pwe, “Sinsei, iya pwigito aete naeyi reemw, pwe eyor aniu aenneew wooan nge ese mmwenen kkepas.

¹⁸ Oate aniu aenneew een epwe wartae wooan, a oatoratiw ne ppweon, nge a pwuropwur wow me noan ewan, e iin noa ngiin iwe me e cchemaw noa oanongaen. Iya aeiyegiir rhooan kkayeo kka noawumw pwe repwe oatowowuw aniu een me wooan, nge ese mmwen ngaeniir.”

¹⁹ Jesus a aengaeniir pwe, “Ifa mwo aaemi se niugiuniug faaen oatee! Epwe ifa ssiunaein aaei ipwe no reemi? Epwe ifa wusun aaei noaneenaei reemi? Oawpwigito aetena reei!”

²⁰ Ra pwigito aet we reen Jesus.

Igiwe rhag aniu aenneew we eweri Jesus, a ngong noa aetewe, iwe a ppiungiutiw ne ppweon a ittiw soagopenipen fetaen nge a pwuropwur wow me noan ewan.

²¹ Jesus a aeiineow mwaaen we semaen aetewe pwe, “A ifa pwongiaen aan ieei wusun?”

Mwaaen we semaen aetewe a paniuwaeni pwe, “Saengi rhag ne wonigaeten.

²² A faei towunap aaen aniu aenneew een menaen epwe niiy noa reen aan aerhee nong noan aengaet me ne rhaan. Faayeogemaem me tipaengi gimaem, aere emmwen ngaeniug!”

²³ Jesus a paniuwaeni pwe, “Ooa, aere een emmwen ngaeniug! Oanongaen aegiaeg nge emmwen ngaeni erhai ne eyor aan niugiuniug.”

²⁴ Mwaaen we semaen aetewe a aekkepwas temoag tae pwe, “Ngaang i niugiuniug nge egius rhag, tipaengiae epwe temoag noa aaei niugiuniug.”

²⁵ Jesus a giuneei pwe aeremas towunap kkewe ra arapeto reer, iwe a asiuw aniu aenneew we. “Aniun oawparh me saeningapiung, i aengaeniug pwe wopwe toowow me reen aetena, nge wosoapw rhiuwen sefaaeniti no!”

²⁶ Aniu aenneew we a aekkepwas tae, nge a ngong noa aetewe nge a tiw noa me wooan. A wee rhag erhai manimae kkewe, nge rhooa towunap kkewe ra aepesa pwe, “A maenoa!”

²⁷ Nge Jesus a ammwarhiu paiun aet we nge a tipaengitae, iwe aetewe a iutae.

²⁸ Mwirin aaen Jesus toonong nee iimw, rhooan kkayeо kkewe naiun ra aeiineow igiwe a iir noa rhag pwe, “Meeta aemaem aeise mmwenen oatowowuw aniu aenneew we reen?”

²⁹ Jesus a paniuwaenir pwe, “Aeggaen maeipin rhag minne emmwen epwe oatowowuur aniu kaan, esooar pwan eew me niugiunoan.”

Jesus a Pwan Aepesa Wunuunun Aan Maenoa

(Mat 17.22-23; Luke 9.43b-45)

³⁰ Jesus me rhooan kkayeо kkewe naiun ra noa saengi pwiuneoi we nge ra mwetenoa wooan Galilee. Jesus ese mwerhaen pwe aeremas repwe giuneei iga eno e,

³¹ pwe iga e fenaiiur rhooan kkayeо kkewe naiun pwe: “Mwaaen we Naiun Aeremas epwene yonong nee paaiiur aeremas kena repwe niiy noa. Nge mwirin enuuw raaen epwe menaw sefaaen.”

³² Nge rese metefaaegini faaen miniwe e aeni fenai, nge remesag aar repwe aeiineow.

Iyo e oarosaen Taegias?

(Mat 18.1-5; Luke 9.46-48)

³³ Igiwe ra itto Capernaum, nge ra toonong nee iimw, Jesus a aeiineor rhooan kkayeо kkewe naiun pwe, “Meeta we oawaengiingi fengaen wooan me wooan ennap?”

³⁴ Nge iir resa paniuwaeni no, pwe iga reaengiingi me wooan ennap aere iyo e oarosaen taegias me neeiir.

³⁵ Iwe Jesus a mooat tiw, a faingiir rhooan kkayeо seig me riiurhai nge a aengaenir pwe, “Aere erhai ne emwerhaen pwe epwe gommw, nge iiy epwe oarosaen noa aeremas nge epwe pwan engaang ngaenir oanongeer aeremas.”

³⁶ A pwigi erhai wonigaet a aiuwtae me wenimmweer. A ammwarhiu aetewe nge a aengaenir pwe,

³⁷ “Iyo e aetiwa erhai wonigaet kaan faaen itaei e aetiwaeyaei, nge iyo e aetiwaeyaei ese aetiwaeyaei rhag pwe epwan aetiwa iyo we efangeto ngaang.”

Iyo Ese Appaniuwaenigirh Iiy Rhoaniuwarh

(Luke 9.49-50)

³⁸ John a aengaeni pwe, “Sinsei, aeiweri erhai mwaaen a oatowowuw aniu aenneew faaen itoamw, nge aeiya aengaeni pwe epwe iug noa, pwe iiy saapw rhoaniuwarh.”

³⁹ Jesus a aengaenir pwe, “Oawsoapw aiugiu noa mwaaen na, pwe esooar erhai ne epwe feeori eew manaman faaen itaei, nge epwe sor sefaaen nge aepesa eew min aenneew faaen itaei.

⁴⁰ Pwe iyo ese appaniuwaenigirh nge iiy rhoaniuwarh.

⁴¹ Ennetaan, ipwe aengaenigaemi pwe iyo e aiuniu gaemi rhaan pwe iga aaemi naeyi, iiy epwe yo ngaeni minna paniuwaenin.”

Sessoaton Monofit

(Mat 18.6-9; Luke 17.1-2)

⁴² “Aere erhai efeeori pwe erhai maan mwittig kaan epwe maniuwegini noa aan niugiuniug reei, ngeefaer gacch pwe epwe geeogeeotae efaai faaen iiuwan nge a noa aekkaerh noa nee metaw. ⁴³ Aere poawumw efeeori pwe epwe ppiung noa oamw niugiuniug, gopyi noa! Efaer gacch oamw wopwe pai efoarh nge wotonong noan menaw na esooar iyaenin, mmwaen oamw wopwe pai riiufoarh nge wonoa noan niferno, noan aengaet we ese mmweneñ gunnoa.

⁴⁴ [Igiwe mwussoa kkewe egaen worheer nge rese mmwenen maenoa, nge aengaet na egaen figiir ese mmwenen gunnoa.]*

⁴⁵ Aere pirhemw efeeori pwe epwe ppiung noa oamw niugiuniug, gopiy noa. Efaer gacch oamw wopwe pirhe efoarh nge wotonong noan menaw na esooar iyaenin, mmwaen oamw wopwe pirhe riiufoarh nge ra aerheog nong noan niferno.

⁴⁶ [Igiwe mwussoa kkewe egaen worheer nge rese mmwenen maenoa, nge aengaet na egaen figiir ese mmwenen gunnoa.]

⁴⁷ Aere mesoamw efeeori pwe epwe ppiung noa oamw niugiuniug, oannusuwow! Efaer gacch oamw wopwe toonong noan minna Mweoiun Deus reen oamw maseyefai, mmwaen oamw wopwe maserufai nge ra aerheog nong noan niferno.

⁴⁸ Igiwe mwussoa kkewe egaen worheer nge rese mmwenen maenoa, nge aengaet na egaen figiir ese mmwenen gunnoa.

⁴⁹ “Aeremas towunap repwene nimegacch noa reen aengaet, taeppen eew oasoar e nimegacch noa reen aesiig.

⁵⁰ “Aesiig egacch; nge igine epwe rhiuw noa saaetiin, nge epwe mmwen sipwe aesaaeti sefaaeniy?

“Oayora aesigaen aerhaengerhaeng neefinaemi, nge oawno rhag noan oapoas ngaeni erhai me erhai aaemi.”

10

Jesus e Fenaiuw Mweoimweoyiun Appwiuniupai

(Mat 19.1-12; Luke 16.18)

¹ Iwe Jesus a siusaengi igiwe nge a noa noan faniuwaen Judea iwe nge a saei noa wooan rhan pwupwu we Jordan. Aeremas towunap ra pwan mweoiuto reen, nge iya fenaiiur taeppen rhag minna e fasiun gaen feeori.

² Aaemweoi Pharisees ra itto reen pwe repwe soatoni, nge ra aeiineow pwe, “Aengaenigemaem, egacch me noan aarh anniug pwe erhai mwaaen epwe mweoi saengi pwiuniawan?”

³ Nge Jesus a paniuwaeniir ngaeni pwan eew aeiweg pwe, “Meeta taeppen anniug Moses a ngaennegaemi?”

⁴ Ra paniuwaeni pwe, “Moses e saeneti ngaeni erhai mwaaen pwe epwe foatogi pwapwioron mweoinoa, iwe a nigit noa pwiuniawan.”

⁵ Jesus a aengaenir pwe, “Moses e foatogi anniug een faaen itaen aaemi se rongorong ngaeni aan fenai.

⁶ Pwe saengi rhag rhaepetaen feeoriun feoniufan, ‘Deus a feeoriir mwaaen me rhooapwut,’ taeppen rhag miniwe Pwapwior we e Santus e iura.

⁷ Ieei minne erhai mwaaen epwe nigit noa seman me inan nge a noa rhuu ngaeni pwiuniawan,

⁸ nge iir me riiurhai repwene eew rhag. Ina minne iir resoapw rhiuwen riiurhai no, pwe ra erhai rhag.

⁹ Essoar erhai aeremas ne epwe mweoiti fesaenngiy meeta e Deus a oarhuw fengaenniy.”

¹⁰ Igiwe ra teeo sefaaen nong noan iimw we, rhoaan kkayeо kkewe ra aeiineow Jesus faaen kkepas kkewe.

¹¹ Iwe a aengaenir pwe, “Erhai mwaaen e mweoi saengi pwiuniawan, nge a noa pwiuniwaen pwan erhai rhooapwut, iya monofit ngaeni pwiuniawan.

* ^{9:44} Petenan eei nge e soano noan aekkaew petenan kka e foatofoat noan kkepesaen Greek.

¹² Epwan aeffitaeg rhag aere erhai rhooapwut e mweoiti aan appwiuniupai nge a noa pwan pwiuniwaeni pwan erhai mwaaen, iya monofit ngaeni mwaaen we pwiuniawan.”

*Jesus a Maeipinaar Wonigaet
(Mat 19.13-15; Luke 18.15-17)*

¹³ Aaemweoi aeremas ra pwigito naiiur wonigaet reen Jesus pwe epwe iseni tae paiun wooar, nge rhooan kkayeo kkewe ra soong ngaenir.

¹⁴ Igiwe Jesus a weri meeta we ra feeori, a igin soong iwe a aengaenir pwe, “Fangeto aetekkena reei, nge oawsoapw aiugiiur, pwe minna Mweoiun Deus ina aar aeremas kka reweer wonigaet.

¹⁵ Ennetaen, ipwe aengaenigaemi, pwe iyo na ese aetiwa Mweoiun Deus taeppen erhai wonigaet, nge esoapw mmwenen toonong noan.”

¹⁶ Iwe a roamito aetekkewe noan paiun, a iseni tae paiun wooan erhai me erhai iir, nge a maeipinaar.

*Erhai Mwaaen Naiwiis
(Mat 19.16-30; Luke 18.18-30)*

¹⁷ Igiwe Jesus a pwan rhaepiy aan faaeraeg, erhai mwaaen a fattapweto reen, a foatotiw me mmwan nge a tingoareei pwe, “Sinsei mwamwaaai, meeta ipwe feeori nge epwe yo ngaeniaei menaw na esooar iaenin?”

¹⁸ Jesus a aengaeni pwe, “Meeta wo iura pwe i mwamwaaai reen? Es ooar erhai ne e mwamwaaai pwe aeggaen Deus rhag.

¹⁹ Wo giuneei anniug kkewe: ‘Wosoapw nni aeremas, wosoapw ffeeor manetemwaaai, wosoapw mwoarho, wosoapw oatupwutupw tae kkepas wooan erhai, wosoapw riugiuriug, wopwe aesirowuur semoamw me inoamw.’”

²⁰ Mwaaen we a iura pwe, “Sinsei, saengi rhag nee nipwaen wonigaeteei nge ngaang itapweei oanongaen anniug kkeei.”

²¹ Jesus a aenneta wenewenei noan aerhaengerhaeng nge a aengaeni pwe, “Eew rhag minne wopwe feeori. Wonoa ameow noa oanongaen meeta oamw nge wa fang senaapian ngaenir rhooa affaye, nge epwe yor wiinoamw me wooan naaeng. Iwe nge wa itto tapweaei.”

²² Igiwe mwaaen we e rongorong kkepas kkewe, a mas affaye noa, iwe a siunoa noan aan tip aenneew, pwe igiwe iiy erhai man naiwiis.

²³ Jesus a wegitaeg fetaen neei rhooan kkayeo kkewe naiun nge a aengaenir pwe, “Epwe ifa mwo waeiraesin aar rhoakka repisaegisaeg repwe toonong noan Mweoiun Deus.”

²⁴ Rhooan kkayeo kkewe ra riutae reen kkepas kkewe, nge Jesus a soapwei noa aan iura pwe, “Aaemi naeyi, epwe ifa mwo waeiraesin toonongan noan Mweoiun Deus!

²⁵ Egin mererhaeg aaen erhai *camel* epwe toonong noan ngetaen efoarh oaguwa, me mmwaen aaen erhai mwaaen pisaegisaeg epwe toonong noan minna Mweoiun Deus.”

²⁶ Reen minneen nge rhooan kkayeo kkewe ra igin riutae reen iwe ra aeiineo fengaen wooar pwe, “Iwe, iyo rhag epwe mmwenen menaw?”

²⁷ Jesus a fan wenewen ngaenir nge a paniuwaenir pwe, “Minneen nge ese mmwen ngaenir aeremas nge emmwen ngaeni Deus; pwe oanongaen meeta nge emmwen ngaeni.”

²⁸ Peter a kkepas tae pwe, “Pipiyy, aemaem aeiya siusaengi oanongaen aegiaeg nge aeiya itto tapweog.”

²⁹ Jesus a aengaenir pwe, “Ennetaan, ipwe aengaenigaemi pwe iyo e siusaengi imwan, aere pwiin, aere mwengeyan, aere inan, aere seman, aere naiun, aere faniawan faaen itaei me Kkepas Mwamwaai we,

³⁰ nge epwe pwigi faeregitin reen oate igina. Epwe pwigi meoniun epwe temoag saengi epwiugiuw imwan, pwiin, mwengeyan, inan, naiun me faniawan, pwan niniy aenneewa; nge noan oatona epwe itto epwe pwan pwigi menaw na esooar iaenin.

³¹ Pwe towunepeer rhooawe re amwirimwir repwene gommw, nge towunepeer rhooawe regommw repwene amwirimwir.”

Aeinuwaen Aaen Jesus Aepesa Aan Maenoa

(Mat 20.17-19; Luke 18.31-34)

³² Jesus me rhooan kkayeo kkewe naiun ra faaeraeg wooan aan we enoa ngaeni Jerusalem. Jesus a gommwonoa memmweer rhooan kkayeo kkewe, iwe nge iir ra riutae; nge ikkiwe retapweto mwirin nge ra mesag. Jesus a pwan paenir rhooawe seig me riiurhai rhooan kkayeo nge a aengaenir wunuunun meeta kka epwene wen ngaeni.

³³ A aengaenir pwe, “Oaw aiussaening, sipwene faaeraeg tae Jerusalem nge mwaaen we Naiun Aeremas epwene noa yonong neepaiiur soamwoonin patere kkewe me sinsein anniug kkewe. Repwene apwiungiu pwe epwe maenoa, nge ra fangenoa neepaiiur Gentiles,

³⁴ nge repwene aeni aegekkiae nge reoattuffa, repwe wirhiy nge reniyy noa; nge mwirin enuuw raaen nge epwe menaw sefaaen tae.”

Aar James me John Tingoar

(Mat 20.20-28)

³⁵ Iwe James me John, naiun Zebedee, ra itto reen Jesus. Ra aengaenir pwe, “Sinsei, eyor meeta aei mwerhaen wopwe feeori ngaenigemaem.”

³⁶ Jesus a aeiineeor pwe, “Meeta naan?”

³⁷ Ra paniuwaeni pwe, “Oate wa mooat wooan cchia na oamw noan minna Mweouiumw, aei tipaeni pwe wopwe oamooatagemaem oaromw, erhai peig mwaaenemw, nge erhai peig rhooapwutomw.”

³⁸ Nge Jesus a aengaenir pwe, “Aaemi oawse giuneei meeta mwu oawwa tingoar. Oawmmwenen iun me reen kkepaen aewwaeiraes e ngaang ipwe iunumi? Emmwen oawpwe baptismus noan taepen baptismus e ngaang ipwe aeni?”

³⁹ Iir ra paniuwaeni pwe, “Ooa, emmwen ngaenigemaem.”

Jesus a aengaenir pwe, “Oawmmwenen iun me reen kkap e ngaang ipwe iunumi, me oawpwan mmwenen baptismus taepen aaei baptismus.

⁴⁰ Nge saapw ngaang minne ipwe finitae iyo epwe mooat peig mwaaenee me peig rhooapwutoi. Neniy kkeei nge nenieer rhooakkena minna Semaei a fasiun feeori pwe nenieer.”

⁴¹ Igiwe rhooan kkayeo kkewe seig ra rongorong kkepas kkewe, ra igin soong wooar James me John.

⁴² Iwe Jesus a faangi fengaennir nge a aengaenir pwe, “Oaw giuneei pwe rhooakka refreeoriir pwe re nemaenir re Gentiles ina eyor maemaeweer wooar aeremas, iwe nge iir soamwoon kaan ina re nemaenir noa oanongeer aeremas.

⁴³ Nge esoapw ieei wunuunun neefinaemi. Pwe iyo a mwerhaen taegias me neeimi, iiy epwe no pwe rhooan engaang ngaenigaemi oanongaemi;

⁴⁴ nge iyo a mwerhaen pwe epwe gommw me neeimi, iiy epwe *slave* ngaenigaemi oanongaemi.

⁴⁵ Pwe miniwe Naiun Aeremas mwo nge ese itto pwe aeremas repwe engaang ngaeni, pweefaer itto pwe epwe engaang ngaenir aeremas me fangenoa menewan faaeniteer towunepaen aeremas.”

Jesus e Aeffeta Noa Mesaen Bartimaeus

(Mat 20.29-34; Luke 18.35-43)

⁴⁶ Ra toori Jericho, nge Jesus me rhooan kkayeo kkewe naiun me mwirhaen aeremas kkewe ra mwet saengi igiwe, nge erhai mwaaen parh mesan itan Bartimaeus naiun Timaeus, emooat wenepeigin aan pwe e tingoar noa rhag aemmwenen.

⁴⁷ Igiwe a rongorong pwe Jesus re Nazareth we a itto, a rhaepetae ne iyaekkepwas, “Jesus, Naiun David, faayeowaei!”

⁴⁸ Towunepeer aeremas kkewe ra soong ngaeni nge ra aengaeni pwe epwe anniug noa. Nge egius mwo nge oatomoga noa aan iyaekkepwas, “Naiun David, faayeowaei!”

⁴⁹ Jesus a iug noa nge a iura pwe, “Oawfaingito.”

Iwe ra faingi mwaaen we eparh nge ra aengaeni pwe, “Aemenetoag! Iutae pwe Jesus a faingiug.”

⁵⁰ Iwe a pwinititiw mengaagiun niugiun we, a nnustae nge enoa reen Jesus.

⁵¹ Iwe Jesus a aengaeni pwe, “Meeta wo tipaeni ipwe feeori ngaeniuug?”

Iwe mwaaen we eparh a paniuwaeni pwe, “Sinsei, ngaang i tipaeni ipwe weriwer sefaaen.”

⁵² Jesus a aengaeni pwe, “Wonoa, pwe oamw niugiuniug a aecchipwoag.”

Iwe rhag nge mwaaen we a ffatenoa mesan nge a tapweei noa mwirin Jesus wooan aan we.

11

Toonongan Jesus Noan Jerusalem

(Mat 21.1-11; Luke 19.28-40; John 12.12-19)

¹ Igiwe ra aerepato Jerusalem, oaron aepinoamw kkewe Bethphage me Bethany, reen rhugun Olives. Jesus a fangenoa riiurhai rhooan kkayeo kkewe naiun,

² nge a aengaenir pwe, “Oawnoa noan pwugos mwu mmwaemi. Nge igitine oawpwe toonong, nge oawpwe weri erhai *donkey* mwittig e feotaeg ina esaaen yor mwo erhai ne e waawa. Oawpwaeisi oawwa pwigito igeesi.

³ Nge aere eyor ne e aeiyyegigaemi aere meeta oawfeeori minna reen, oawaengaeni pwe Soamwoon e mwerhaen waawa mwo nge ennaen aese-faaenito.”

⁴ Iwe ra noa nge ra noa weri erhai *donkey* mwittig e iu wooan ennap, nge e feotaeg ngaeni iuraen aesemaen eew iimw. Nge igitine re pweppwaeisi,

⁵ nge aaemweoi aeremas kkewe reno igitine ra aeiineor pwe, “Meeta mwu oawfeeori imwu oawwa pwaeisi noa *donkey* na?”

⁶ Iir ra paniuwaenir taeppen rhag ititin kkepas kkewe Jesus e aengaenir, iwe aeremas kkewe ra nigitiir noa.

⁷ Ra pwigito *donkey* we reen Jesus nge ra iseni tae mengaagiiur wooan, nge Jesus a teeotae wooan.

⁸ Aeremas towunap kkewe ra mmerraeg tiw mengaagiiur wooan aan we, nge aaemweoi ra gopogop tiw paeiniu me wooan aar maat pwe enenaen wooan aan we.

⁹ Aeremas kkewe regommw me rhooawe retapweto mwirin ra aekkepwas, “Aepinge pinga Deus! Deus epwe aewenepwuwa aeremas na epwe itto faaen itaen Soamwoon!

¹⁰ Deus epwe aewenepwuwa minna mweoiun *king* David, na semarh ina epwene itto. Aepingepinga Deus na oarosaen taegias!"

¹¹ Igiwe Jesus a toorito Jerusalem nge a toonong noan *Temple* we, nge a fanefetaen reen oanongaen meeta. Nge pwonno igiwe a mwirin oanowas iwe a noa Bethany iiy me rhooan kkewe seig me riiurhai.

*Jesus a Soong Ngaeni Fig we
(Mat 21.18-19)*

¹² Mmasetaen raaenin we eew, igiwe ra sefaaen to me Bethany, nge Jesus a pecchai.

¹³ A wori noa me itaaw efoarh waniwan we *fig* pwe a pwaniawan noa faaen rheon, iwe a faaeraeg ngaeni pwe epwe pipiiy aere e uwa. Nge igiwe a toori *fig* we, a weri pwe rheon rhag, pwe esaaen toori mwo oaton aan epwe uwa.

¹⁴ Jesus a kkepas ngaeni *fig* we pwe, "Esooar erhai ne epwe rhiuwen mwongo uwoamw."

Nge rhooan kkayeо kkewe naiun re rongorong minikkewe mwaenian.

*Jesus a Noa Reen Temple we
(Mat 21.12-17; Luke 19.45-48; John 2.13-22)*

¹⁵ Igiwe ra toorito Jerusalem, Jesus a toonong noan *Temple* we nge a rhaepetae aan asiur wow rhooawe rechuwaai me ameomeo pisaeg me igiwe. A aerheppa noa *table* kkewe aar rhooan ssiuwen senaapiy me nenien mooat kkewe aar rhooan chuwaai *pigeons*,

¹⁶ ese fang ngaeni mwo nge erhai epwe pweipwog fetaen aegiaeg noan *Temple* we.

¹⁷ Iwe a fenaiur aeremas kkewe pwe: "E foatofoat noan Pwapwior we e Santus pwe Deus e aepesa pwe, '*Temple* e aaei nge epwe ffaip pwe imwaen maeipin faaen iteer oanongeer aeremesaen faniuw.' Nge aaemi oawwa ssiuweniy ngaeni eew nenien wopoor rhooa mwoarho."

¹⁸ Igiwe soamwoonin patere kkewe me sinsein anniug kkewe ra rongorong kkepas kkewe, a rhaepetae aar giutta meeta repwe niiy noa Jesus reen. Nge iir re mesagiu, pwe igiwe pwuwaen aeremas kkewe remwaar reen aan fenai.

¹⁹ Igiwe a nee oatofaaef noa, Jesus me rhooan kkayeо kkewe naiun ra siusaengi aepinoamw we.

*Fenaiun Aemmetefael Fig we
(Mat 21.20-22)*

²⁰ Nee oatosoraen raaenin we eraen, igiwe ra faaeraeg noa wooan aan we, ra weri *fig* we. A ppwass noa oanongaen waniwan we tooritiw minikkewe waeran.

²¹ Peter a maengiy miniwe a wen iwe a aengaeni Jesus pwe, "Sinsei, pipiiy, *fig* we wosoong ngaeni ina a ppwass noa."

²² Jesus a panluwaeniir pwe, "Oawpwe niugiuniug ngaeni Deus.

²³ Ennetaaen, ipwe aengaenigaemi pwe aere erhai epwe aengaeni rhug een pwe, 'Wopwe mwagiut wa noa oatoranoa oanongoamw nee metaw,' nge ese tip mwaramwar noan pwunnon, pwe e niugiuniug pwe meeta rhag e aepesa pwe epwe wen, ina nge epwe mmwen ngaeni.

²⁴ Ina faan minne ipwe aengaenigaemi pwe: Ngaere oawmaeipin nge oawwa tingoar eew meeta, oaw niugiuw pwe oawwa pwigi, ina nge epwe toorigaemi ese tiwegin meeta oawtingoar.

²⁵ Ngaere oawiun maeipin, oaw saeneti oanongaen soong kena aaemi wooan erhai, pwe ina nge Semaemi wooaina naaeng epwe pwan saeneti noa oanongaen meeta mini aenneew kka aaemi oawpwan feeori.

²⁶ [Ngaere oawse saenetir noa aaemweoi, Semaemi wooai naaeng esoapw pwan saeneti noa mini aenneew kena oawpwan feeori.]”*

*Kkepas Aeiineon Nemaeniaen Jesus
(Mat 21.23-27; Luke 20.1-8)*

²⁷ Iwe ra pwan sefaan to Jerusalem. Nge igiwe Jesus a faaeraeg fetaen noan *Temple* we, nge soamwoonin patere me sinsein anniug me mwaaen kkewe aar ra itto reen

²⁸ nge ra aeiineow pwe, “Meeta nemaenioamw pwe wopwe feeori minikkeei? Iyo a ngaenneog oamw nemenem?”

²⁹ Jesus a aengaeniir pwe, “Ngaang ipwe aeiineogaemi eew kkepas aeiineo, nge aere oawpwe aengaeniaei paniwaen, ngaang ipwe pwan aengaeniaemi iya iga ipwigi aaei nemenem me ee pwe ipwe feeori minikkeei.

³⁰ Oawaengaeniaei iya e itto aaen John nemenem pwe epwe baptismus fetaen: saengi Deus aere saengi aeremas?”

³¹ Ra rhaepetae aar aengimaw fengaen wooar: “Meeta sipwe iura? Aere sipwe iura pwe, ‘Saengi Deus,’ nge iiy epwe aeiineogirh pwe, ‘Nge meeta rhag oawse niugiuniug ngaeni John reen?’

³² Nge aere sipwe iura pwe, ‘Saengi aeremas...’” (Re mesagiiur aeremas, pwe igiwe oanongeer nge re niugiuw pwe John nge ennetaen erhai profeta.)

³³ Iwe ra paniwaeni Jesus pwe, “Aeise giuneei.”

Jesus a aengaeniir pwe, “Iwe ngaang isoapw pwan aengaenigaemi iya iga ipwigi me ee nemaeniaei pwe ipwe feeori minikkeei.”

12

*Fioangon Awewen Rhooan Aemmwenen Maat we
(Mat 21.33-46; Luke 20.9-19)*

¹ Iwe Jesus a kkepas ngaenir noan fioangon awewe: “Eno erhai mwaaen a foatogi eew maetaen *grape*, a feeori gurun niugiu, a genengi eew niipw pwe nenien wongowongin uwaen *grape*, iwe a aiuwtae eew imwaen poos taegias me noan. Mwirin a ngaenneer aaemweoi rhooan maat pwe repwe aefaaenniy. Iwe rhag nge a saei taaw noa.

² Nge igiwe a toori oaton gin, a fangenoa erhai rhooan akkiuneo reer rhooan maat kkewe, pwe epwe noa pwigi wiwiin me reen uwaen maat we.

³ Iwe rhooan maat ra torofi rhooan akkiuneo we, ra wirhiy nge ra aefengafeta noa, esooar meeta e pwigi.

⁴ Mwirin wonowe aan maat we a fangenoa pwan erhai naiun rhooan akkiuneo; iwe rhooan maat kkewe ra wirhiy rhimwen nge ra feeori ngaeni aekkaew wegitaeg aessaew.

⁵ Iwe wonowe a pwan fangenoa erhai rhooan akkiuneo, nge iir ra niyy noa. Nge pwan ina rhag minne refereeori ngaenir rhooa kkewe aaemweoi, aaemweoi ra wirhiir, aaemweoi ra nair noa.

⁶ Iwe nge a noa notiw erhai, iwe sipegin naiun mwaaen aecchaeng. Oarosan nge a fangenoa mwaaen we sipegin naiun, nge a iura pwe, ‘Iniugiuw, nge repwe aesirowu mwaaen enaeyi.’

⁷ Nge rhooan maat kkewe ra iura fengaenniy wooar pwe, ‘Ieei mwaaen we naiun mwaaen we aan maat eei iwe epwe pwugusaeni minnee. Oawitto sipwe niyy noa, pwe sipwe pwigi minne pwugusaen pwe pwugusarh!.’

⁸ Iwe ra torofi mwaaen we naiun, ra niyy noa nge ra oatorawow niugiun maat we.”

* **11:26** Petenan eei nge e soano noan aekkaew petenan kka e foatofoat noan kkepesaen Greek.

⁹ Iwe Jesus a aeiineor pwe, “Meeta mwaan we aan maat we epwene feeori? Epwene itto nge a niir noa rhooawe, nge a ngaenner aaemweoi maat we.

¹⁰ Oawsaaen aeraegi mwo kkepas e noan Pwapwior we e Santus?
‘Fai we rhooan kaiu iimw re aerheei noa,
nge faer ina fai we egin yor ipitan me mmwaan oanongan.

¹¹ Minneen nge feeoriaen Soamwoon,
a inamwo amwaraeran nning!”

¹² Iwe, rhooawe soamwooniir Jews aetae repwe torofi Jesus, pwe igiwe regiuneei pwe fioangoor miniwe a aengaeniir. Nge ra mesag reer rhooa towunap we iwe ra nigit Jesus iwe ra noa.

Kkepas Aeiineon Tax (Mat 22.15-22; Luke 20.20-26)

¹³ Iwe ra fangenoa aaemweoi Pharisees me aaemweoi rhinaen Erotes, pwe repwe oatupwu Jesus noan aan kkepas.

¹⁴ Iwe, ra itto reen Jesus nge ra aengaeni pwe, “Sinsei, aemaem aeigunnee pwe ewenewen oamw kkepas, nge wose niuwaen minikka aeremas ra aeni niunniwaen. Wose aefaenniy wunuunun erhai me erhai, nge wa fenaiuw wenewenen neetipaen Deus ngaenir aeremas. Aengaenigemaem, emwamwaai aarh sipwe fang tax ngaeni Soamwoonin Rome, aere aapw? Ifa wusun, sipwe fang tax aere aapw?”

¹⁵ Nge Jesus a giuneei wunuunun aar niunniwaen iwe a paniwaenir pwe, “Meeta menaen oawpwe soatoniae reen? Oawpwigito efai senaapiy silver, pwe ipwe pipiiy.”

¹⁶ Iwe ra pwigito efai senaapiy reen nge a aeiineor pwe, “Mesaen iyo me itaen iyo een?”

Iir ra paniwaeni pwe, “Soamwoonin Rome.”

¹⁷ Iwe Jesus a aengaeniir pwe, “Iwe nge oawngaeneei Soamwoonin Rome meeta aaen Soamwoonin Rome, nge oawngaeneei Deus meeta aaen Deus.”

Iwe ra igin mwaan noa reen.

Kkepas Aeiineon Menaw Sefaaen (Mat 22.23-33; Luke 20.27-40)

¹⁸ Aaemweoi Sadducees kkewe, iwe re aepesa pwe esooar menaw sefaaen me reen mae, ra itto reen Jesus nge ra aengaeni pwe,

¹⁹ “Sinsei, Moses minne e foatogi anniug eei pwe aemaem: ‘Aere erhai mwaaen a mae nge esooar naiun wooan rhoapwut we pwiuniwan, ina nge mwaaen we pwiin epwe pwiuniwaen rhoapwut we pwe epwe yor naiun pwe epwe ffai pwe naiun mwaaen we a mae.’

²⁰ Reno fiusuman pwipwi. Iwe mwaaen we etugufaeyi a pwiuniwaen erhai rhoapwut, nge a maenoa nge esaaen yor naiun.

²¹ Mwirin iwe ariurhaiun a pwiuniwaen rhoapwut we, iwe a pwan maenoa nge ese pwan yor naiun. Ieei rhag taeppen minne epwan wen ngaeni iwe aeiniurhaiun,

²² pwan ina rhag miniwe ewen ngaenir oanongeer noa: Rhooawe fiusuman re pwiuniwaen rhoapwut we nge ra pwan maenoa oanongeer nge esooar naiur wooan niewe. Mwirin noan, nge rhoapwut we a maenoa.

²³ Igina, noan raaenin na manimae repwene menaw sefaaen, iyo me neeir epwe pwiuniwaen rhoapwut we? Pwe igiwe rhoawwe fiusuman nge re pwiuniwaen niewe.”

²⁴ Jesus a paniuwaenir pwe, “Aaemi oawmwaerhei me igeei! Nge oawgiuneei faaen? Pwe iga oawse giuneei Pwapwior we e Santus aere aaen Deus mamaaw.

²⁵ Pwe oate rhooa mae repwe menaw sefaaen, nge repwene aeffitaeg ngaeniir rhag angkenusun naaeng, pwe resoapw pwiuppiuniuw no.

²⁶ Igina, reen manimae aar repwe menaw sefaaen: oawsaaen aeraagi mwo me noan Pwapwior kkewe foatogiaen Moses wunuunun waniwan we e ppwunuwow aengaet me noan? Iginaan minne e foatogi me ee aaen Deus aengaeni Moses pwe, ‘Ngaang aaen Abraham Deus, aaen Isaac Deus me aaen Jacob Deus.’

²⁷ Iiy aar Deus rhooawe remenaw, nge saapw aar rhooawe ra maenoa. Aaemi oawwa igin mwaerhei me igeei.”

Anniug we Oarosaen Taegias

(Mat 22.34-40; Luke 10.25-28)

²⁸ Erhai sinsein anniug eno igiwe nge erongorong meeta kkewe reiyaekkepesa. Egiuneei pwe egacch paniuwaen kkepas aeiineo we aar me reen Jesus, iwe a itto reen pwe epwe aeiineow: “Ifa anniug e oarosaen taegias menein oanongaen?”

²⁹ Jesus a paniuwaeni pwe, “Ieen minne oarosaen taegias me neeiin, ‘Wopwe aiussaening Israel! Soamwoon na aarh Deus ina iiy rhag minne aarh Soamwoon.

³⁰ Wopwe aerhaengi Soamwoon na oamw Deus reen oanongaen neetipoamw, reen oanongaen ngeoniumw, reen oanongaen oamw niunniwaen pwan reen oanongaen maemaewoamw.’

³¹ Nge oaruwowwaen anniug epwan igin taegias nge, ‘Wopwe aerhaengiir rhooan weni oaromw taepen rhag oamw sipegin aerhaengi oanongoamw.’ Esooar eew anniug e etaegias saengi ikka ruwowu.”

³² Sinsein anniug we a aengaeni Jesus pwe, “Emwamwaai, sinsei! Egin nnet meeta mwu wa faer aepesa, pwe Soamwoon rhag minne Deus, nge esooar erhai Deus me peig noan.

³³ Nge een wopwe aerhaengi Deus reen oanongaen neetipoamw, reen oanongaen oamw niunniwaennen me oanongaen maemaewoamw, me wopwe pwan aerhaengi rhooan weni oaromw taepen rhag oamw sipegin aerhaengi oanongoamw. Eigin yor ipitan aaen erhai epwe aiussaening firhiy anniug kka ruwowu, mmwaen aan epwe aeni oasoar maan wooan antar me mesemesaen oasoar ngaeni Deus.”

³⁴ Jesus e meyaefi gacchiun paniuwaenin kkepas kkewe aan, iwe a aengaeni pwe, “Een wose taaw saengi miniwe Mweoiun Deus.”

Mwirin nge ra mesag repwe rhiuwen kkepas aeiineo ngaeni Jesus.

Kkepas Aeiineon Iyo na Kristus

(Mat 22.41-46; Luke 20.41-44)

³⁵ Igiwe Jesus e fenai noan *Temple* we, a aeiineo eew kkepas, “Epwe ifa wusun nge sinsein anniug kkewe repwe aepesa pwe Kristus nge iiy teoteeon David?

³⁶ Espritu Santus minne e aemeyaefi ngaeni David pwe epwe aepesa: ‘Soamwoon a aengaeniai Soamwoon:

Mooat tiw peig mwaaeneei

toori aaei ipwe iseniir tiw rhooan oapwutoag faaen pirhemw.’

³⁷ David wooan oanongan e sipegin faangi Kristus pwe iiy ‘Soamwoon’, iwe epwe ifa wusun nge Kristus epwe no pwe teoteeon David?”

*Jesus a Atapeonneogiur Reer Sinsein Anniug Kkewe
(Mat 23.1-36; Luke 20.45-47)*

Ekker tipeer aeremas towunap kkewe re aiussaening ngaeni aaen Jesus fenai.

³⁸ Igiwe efenaiuw ngaeniir pwe, “Oawpwe aefaaennigaemi reer sinsein anniug kkewe re aerhaengi aar faaeraeg fetaen faaen mengaaggiur min enaenaei, nge re aerhaengi aar aeremas repwe aewenimmwaar me ae-sirowuur me noan imwaen chuwaai,

³⁹ nge re fini rhag neniy kkena nenieer rhooa taegias me noan wutteer Jews me pwiuneoi mwamwaai me noan gupwun.

⁴⁰ Re oapwurhaar rhooapwut kka ra mae pwiuniuweer nge ra pirifa saengiir pwuguseer, nge re oangona ngaeni aeremas aar maeipin enaei. Iwe nge aegaeregaaeriir ina epwene igin waeiraes!”

*Aaen Erhai Rhooapwut Maenigaech
(Luke 21.1-4)*

⁴¹ Igiwe Jesus emooat oaron nenien maenigaech we me noan *Temple* we, a pippipiir aeremas kkewe re iseis nong aar maenigaech. Towunepeer aeremas kkewe re naiwiis re iseis nong towunepaen naiiur senaapi;

⁴² nge erhai rhooapwut mwaenene pwe a mae pwiuniuwan a itto iseis nong riufai manfaifai, ina epwe aeffitaeg ngaeni oawton efa checcha.

⁴³ Jesus a faingiir rhooan kkayeо kkewe naiun nge a aengaeniir pwe, “Ennetaen, ipwe aengaenigaemi pwe miniwe rhooapwut mwaenene we efang nge etemoag saengi aar oanongeer aeremas towunap kkewe.

⁴⁴ Pwe oanongeer nge re iseni nong nusegin wiineer, nge rhooapwut een inamwo iga eigin affayeо nge a fangenoa oanongaen meeta eno reen—a fangenoa oanongaen minikka epwe menaw wooan.”

13

*Jesus e Aepesa Toaroponoan Temple we
(Mat 24.1-2; Luke 21.5-6)*

¹ Igiwe Jesus a siusaengi *Temple* we, erhai me neeir rhooan kkayeо kkewe naiun a iura pwe, “Sinsei, pipiiy nning faai me iimw kaan!”

² Jesus a paniuwaeni pwe, “Woweri iimw faeregit kaan? Esooar efa faai kaan ne epwe notiw nenien; oanongan noa nge repwene toaropoti.”

*Affayeо me Aewwaeiraes
(Mat 24.3-14; Luke 21.7-19)*

³ Jesus emooat wooan miniwe rhugun *Olives* peiginoan *Temple* we, igiwe Peter, James, John me Andrew reen nge iir noa rhag.

⁴ Ra aeiineow pwe, “Aengaenigemaem ineeta minikkeei epwe wen, me aengaenigemaem meeta minne epwe pwaeri noa pwe oaton minikkeei nge epwene wen.”

⁵ Jesus a aengaeniir pwe, “Oaw aefaaennigaemi, pwe esoapw yor erhai epwe oatupwugaemi.

⁶ Towunepeer aeremas repwene itto faaen itaei nge repwe aepesa pwe, ‘Ngaang iiy!’ Iwe nge pwuwaen aeremas repwe tupw noa reer.

⁷ Oawsoapw mesag igine oawrongorong oacchorongan moawun arapeto aere kkepesaen moawun taaw noa. Oanongaen minikkeei nge repwe mmwaen wen, nge saapw reen a arapeto ne soapwonoan.

⁸ Faniuw me faniuw repwe fiow fengaen nge mweoi me mweoi repwe pwan moawun fengaen. Epwe yor fanemwar oanongaen pwiuneoi me

naengeta. Minikkaan nge eweei pweoneotaen metaegin erhai rhooapwut iga epwe nainai.

⁹ “Aaemi wooan oanongaemi oawpwe sipegin aefaeennigaemi. Repwe torofigaemi nge re pwigigaemi nong noan nenien apwiung. Repwe wirhi-gaemi me noan wutteer Jews; oawpwe iutae mmweer soamwoonin anniug me *king* kkewe faaen itaei, pwe oawpwe aengaenir Kkepas Mwamwaai we.

¹⁰ Nge wenimmwaen epwe tooto minna nee soapwonoan, nge Kkepas Mwamwaai een epwe gommwaen fenai ngaenir oanongeer aeremesaen feoniufan wunus.

¹¹ Aere ra torofigaemi nge re isenigaemi nong noan nenien apwiung, oawsoapw pireiir reen meeta oawpwe aepesa; pwe oatona epwe noa toori oatonaan, nge oawpwe aepesa meeta na eno reemw. Pwe petenaen kkepas kena oawaepesa nge saapw mwaeniaemi, pwe e itto me reen Espritu Santus.

¹² Aeremas repwene afangmaei noa pwiiir ngaeni maenoa, nge saam repwe pwan feeori taeppen minneen ngaeni naiiur. Nge naiiur repwene pwan appaniuwaeni semeer me ineer nge refangenoa iir repwe noa niir noa.

¹³ Oanongeer aeremas nge repwene oapwutaegaemi faaen itaei. Nge iyo e aetemaegin toori nee soapwonoan nge epwe menaw.

Eew Min Aemmesagsag (Mat 24.15-28; Luke 21.20-24)

¹⁴ “Aaemi oawpwe weri eew Min Oarosaen Aemmesagsag epwe iu eew pwiuneoi saapw fasiun nenien. (Ngaeni rhoan aeraegraeg: metefaaegini minneen!) Iwe rhooawe reno Judea repwe fattapwetae weeirhug.

¹⁵ Erhai ne eno wooan wungaen iimw, esoapw teeotiwi noan imwan pwe epwe ittiw pweipwog meeta me ee.

¹⁶ Nge erhai ne eno noan maat, esoapw sefaaen ngaeni imwan pwe epwe pweipwog mengaagiun.

¹⁷ Epwe ifa mwo aar affayeo rhooapwut pwoopwo me ikka re nayigit noan oaton naan!

¹⁸ Oawpwe maeipin ngaeni Deus pwe minikkeei nge esoapw wen noan oaton pafapat.

¹⁹ Pwe waeiraesin noan raaenin kkewe epwe faer igin waeiraes saengi me mmwaen ikkiwe rhaepetaen igiwe Deus a feeori feoniufan toorito igina. Nge esoapw rhiuwen yor taeppen epwe rhiuwen itto.

²⁰ Pwe Soamwoon a oamworhomworha nepaen raaen; ngaere ese feeori, nge esooar ne epwe menaw. Nge pwonno faaen iteer rhooawe a finiir tae a oamworhomworhanoa nepaen raaen.

²¹ “Iwe ngaere erhai e aepesa ngaenigaemi pwe, ‘Pipiyy, ieei iiy Kristus!’ aere ‘Pipiyy, inaan iiy!’ oawsoapw niugiuniug ngaeni.

²² Pwe aaemweoi aeremas repwene oatupwutupw pwe iir Kristus, aere erhai profeta, nge repwene feeori min amwaraar me manaman, pwe repwe oatupwu rhooawe Deus a finiir tae aere repwe mmwesen feeori.

²³ Oawpwe aefaeennigaemi! Ngaang iya pwaeri ngaenigaemi minikkeei mmwaen aar repwe wen.

Itton Mwaaen we Naiun Aeremas (Mat 24.29-31; Luke 21.25-28)

²⁴ “Noan raaenin kkewe mwirin oaton waeiraes, aenet epwene rorhonoa, meram esoapw rhiuwen ttin,

²⁵ nge fiiu repwene ppiungiutiwi me noan naaeng, nge minikkiwe maemae-waen noan naaeng repwene mwagiut saengi nenieer.

²⁶ Iwe nge miniwe Naiun Aeremas epwene pwaeto me neeiin toapw reen maemaewan me nningan.

²⁷ Epwene fangenoa angkenus reen oanongaen pwaeisiisin faeinaengiy pwe repwe ionifengaenniy rhooawe Deus a finiir me reen esoapw feoniufan toori esoapw.

Fenaiun Waniwan e Fig

(Mat 24.32-35; Luke 21.29-33)

²⁸ “Oaw kapwiung saengi waniwan e fig. Oate minikkena raaen ra arawaraw me mechecchaar noa nge a pwiugiuw wowrheon, oawwa giuneei pwe a arapeto neraeg.

²⁹ Epwan taeppen rhag, igine oawweri minikkeei pwe a wen, oawpwene giuneei pwe oatowe ina a arapeto, oamoannatae pwe epwene rhaep.

³⁰ Ennetaen, ipwe aengaenigaemi pwe oanongaen minikkeei nge epwe wen weni mmwaen iga aeremesaen igma repwe maenoa.

³¹ Naaeng me soanop repwe soapwonoa, nge aaei kkepas esoapw soapwonoa.

Esooar Erhai e Giuneei Raaenin Aere Awa

(Mat 24.36-44)

³² “Esooar erhai e giuneei raaenin aere awa na epwe wen minikkeei reen, angkenusun naaeng mwo nge resoapw giuneei, aere miniwe Naiun, pwe aaen Saam rhag.

³³ Oaw mmas nge atapeonneogiugaemi, pwe oawse giuneei ineet oatona epwe itto noan.

³⁴ Epwe taeppen rhag aaen erhai mwaaen saei saengi pwugusan nge a siusaengi naiun rhooan engaang pwe repwe nemaeni oanongaen, mwirin a fang ngaeni erhai me erhai aan engaang, nge a anneogiu ngaeni poosun asam we pwe epwe pippipiir.

³⁵ Iwe ina minne oawpwe atapeonneogiugaemi reen, pwe oawse giuneei ineet mwaaen we imwan epwe war, aere epwe war nee oatofaaef, aere nugaenipwoong, aere weni mmwaei raaen, aere nee oatosor.

³⁶ Aere epwe mwetekkaein itto, ese gacch aan epwe werigaemi pwe oaw maiur.

³⁷ Meeta iya aengaenigaemi, iya pwan aengaenir oanongeer: Oaw atapeonneogiugaemi.”

14

Aar Rhiu Aenneewa Jesus

(Mat 26.1-5; Luke 22.1-2; John 11.45-53)

¹ Igina nge a no rhag ruwowu raaen mmwaen miniwe gupwunon Passover me gupwunon fenoawa we esooar yeast reen. Nge soamwooniir patere me sinsein anniug kkewe ra pwiungiuw noan mwoanomwoan wunuunun aar repwe torofi Jesus, pwe repwe noa niiy noa.

² Ra iura pwe, “Sisoapw feeori minneei oaton gupwunon Passover pwe aeremas rete aeftigogo tae.”

Rhooapwut we e Aepiti Jesus

(Mat 26.6-13; John 12.1-8)

³ Jesus eno noan Bethany noan imwaen Simon, erhai mwaaen kaenepaai mwo igiwe. Oaton we Jesus a mwongo, erhai rhooapwut a toonong faaen eew neo effeeor saengi *alabaster* nge e oawut ngaeni neoninges eigin cchoaw panluwan effeeor saengi eew irae itan *nard*. Rhooapwut we a ripiy neo we iwe a aeniatiw wooan rhimwen Jesus.

⁴ Aaemweoi aeremas kkewe reno reer ra soong iwe ra kkepas fengaen nee fineer, “Meeta ipitan aan oasonopa noa neoninges naan?

⁵ Aere efafur chuawaiw noa nge epwe nigiti eniupwiugiuw senaapiy we silver nge ra ngaenneer man affayeo!” Iwe iir ra igin aepesa aenneewa rhooapwut we.

⁶ Nge Jesus a aengaeniir pwe, “Oawsiusaengi rhooapwut na! Meeta oawamwagiutiu reen? Egin mwamwaai minne a feeori ngaeniaei.

⁷ Pwe rhooa affayeo repwe fasiun yor reemi oanongaen oat, nge oatona rhag oawtipaeni oawpwe tipaengiir iwe oawwa feeori. Nge ngaang isoapw no rhag reemi oanongaen oat.

⁸ A feeori iugiugiu meeta a mmwen ngaeni; a aeniatiw neo we wooan oanongaei pwe epwe oamoann ngaeni oaton aaei nipwaenipw.

⁹ Ennetae, ipwe aengaenigaemi pwe ese tiwegin iga repwe fenaiuw Kkepas Mwamwaai een me ee, nge minne nieei a feeori nge aeremas repwene fioangei pwe aemaengimaengin faaen itan.”

Judas a Tipaeni Epwe Fangenoa Tinnimaen Jesus

(Mat 26.14-16; Luke 22.3-6)

¹⁰ Iwe Judas Iscariot, erhai me neeiir rhooan kkayeо kkewe seig me riiurhai, a noa reer soamwoonin patere kkewe faaen itaen aan epwene fangenoa tinnimaen Jesus.

¹¹ Ra igin kker reen meeta we a aengaeniir, nge ra ppwon ngaeni pwe repwe ngaennee naiun senaapiy. Iwe Judas a giutta eew oaton ne egacch pwe epwe fang ngaeniir Jesus.

Jesus e Mwongo Mwongoon Passover we me Rhooan Kkayeо Kkewe Naiun

(Mat 26.17-25; Luke 22.7-14, 21-23; John 13.21-30)

¹² Noan aeyewaan raaenin gupwunon fenoawa we esooar Yeast reen, noan raaenin we ra niir noa lambs kkewe pwe mwongoon Passover we, rhooan kkayeо kkewe naiun ra aeiineow pwe, “Iya iga wo mwerhaen pwe aeipwe noa oamoannatae mwongoon Passover me ee?”

¹³ Iwe Jesus a fangenoa riiurhai me neeiir rhooan kkayeо kkewe naiun nge a aengaeniir pwe, “Oawpwe noa noan aepinoamw na, nge oawpwe rhuungi erhai mwaaen e pwigi eew ruumen rhaan. Oawwa tapweei noa

¹⁴ noan iimw na epwe noa toonong noan, nge oawwa aengaeni mwaaen na imwan iimw naan pwe: ‘Sinsei e iura pwe: Ifa sengkin na rhooan kkayeо kena naeyi me ngaang aeipwe mwongoon Passover me ee?’

¹⁵ Ina epwene pwaeri ngaenigaemi eew sengkin faeregit ina wooan tae, ina a fasiun moannotae noan, nge ina igma oawpwene noa oamoannatae me ee.”

¹⁶ Iwe rhooan kkayeо kkewe ra noa noan aepinoamw we, ra noa weri oanongaen meeta we Jesus a aengaeniir; iwe ra oamoannatae mwongoon Passover we.

¹⁷ Igiwe a pwoongtiw, Jesus me rhooan kkayeо kkewe seig me riiurhai ra itto. ¹⁸ Igiwe remooat reen table we pwe re mwongo, Jesus a iura pwe, “Ennetae, ipwe aengaenigaemi, erhai me neeimi epwene fangenoa tinnimaei, mwaaen naan nge e tapweaei reen mwongo igma.”

¹⁹ Rhooan kkayeо kkewe a aenneew noa nee tipeer reen kkepas kkewe, nge erhai me erhai a rhaepetae aan aeiineo ngaeni Jesus, “Saapw ngaang?”

²⁰ Jesus a paniuwaeniir pwe, “Epwe erhai me neeimi rhooamwu seig me riiurhai, iiy e tapweaei reen rhrinong anan fenoawa noan saepiy een.

²¹ Minna Naiun Aeremas epwe maenoa taeppen rhag meeta we Pwapwior we e Santus e aepesa; nge epwe ifa mwo aenneewaan mwaaen na

iiy e afangmaei noa mwaaen we Naiun Aeremas! Egacch rhag igine rese nainitiw mwaaen een!"

*Aaen Soamwoon Mwongoon Faaef
(Mat 26.26-30; Luke 22.14-20; 1 Cor 11.23-25)*

²² Igiwe rerhiuwen mwongo, Jesus a pwigi fenoawa we, a fang aan maeipinen aerhigerhig, iwe a giniiy nge a ngaenneer rhoaan kkayeo kkewe naiun nge a iura pwe, "Oawpwigi, pwe ieen minne oanongaei."

²³ Mwirin a pwigi eew kkap, a fang aan maeipinen aerhigerhig, nge a fang ngaeniir; iwe oanongeer ra iun me reen.

²⁴ Jesus a aepesa pwe, "Ieen minne cchaei epwe nipinoa pwe faaen iteer towunepeer aeremas, minne cchaei epwene no pwe tiwegianin ppwon we aaen Deus ngaenigaemi.

²⁵ Ennetaan, ipwe aengaenigaemi, pwe isoapw rhiuwen iunumi *wine* een toori raaenin na ipwe iunumi *wine* na effeo me noan minna Mweoiun Deus."

²⁶ Mwirin ra aeni erheo keoniu aerhigerhig, nge ra toowow ngaeni miniwe rhugun *Olives*.

*Jesus e Aepesa Aaen Peter Iura pwe Ese Giuneei
(Mat 26.31-35; Luke 22.31-34; John 13.36-38)*

²⁷ Jesus a aengaenir pwe, "Oanongaemi nge oawpwe nigitiae noa, pwe Pwapwior we e Santus e aepesa pwe, 'Deus epwe niiy noa rhoaan neginegin *sheep* we, nge *sheep* kkewe repwene toaropas fetaen.'

²⁸ Nge mwirin aaei menaw sefaaen, ipwe gommwonoa Galilee me mmwaemi."

²⁹ Peter a paniuwaeni pwe, "Ngaang isoapw nigitug noa, inamwo me oanongeer nge re nigitug noa!"

³⁰ Jesus a aengaeni Peter pwe, "Ennetaan, ipwe aengaenug, pwe nee pwongiy mmwaen aaen maniug we epwe keokkeok faaen ruwowu, nge epwe faaen enuuw oamw iura pwe wose giuneeai."

³¹ Peter a egius mwo nge e aengimaaw ngaeni, "Esooar faaen eew ipwe aepesa minna, inamwo aere ipwe tapweog reen maenoa!"

Nge oanongeer a pwan ina rhag meeta re iura.

*Jesus e Maeipin Noan Gethsemane
(Mat 26.36-46; Luke 22.39-46)*

³² Iwe ra itto reen eew pwiuneoi itan Gethsemane, nge Jesus a aengaenir rhoaan kkayeo kkewe naiun pwe, "Oawmooat igeesi iga ngaang ipwe maeipin."

³³ A paenir noa Peter, James me John. Waeiraes me nee tip cchoaw a itto reen,

³⁴ nge a aengaenir pwe, "Waeiraes noan minne nee tipaei egin temoag, arapakkaan rhag epwe niae noa. Oawno igeesi nge oawwa mmas."

³⁵ A sooir mwet saengiir egius, a oatoratiw nee ppweon nge a maeipin, aere emmwen pwe esoapw toonong noan oaton waeiraes.

³⁶ Iwe a maeipin, "Saam, Semaei! Oanongaen meeta nge emmwen ngaeiug. Pwigi saengiae kkepaen waeiraes een. Nge soapw minna ngaang itipaeni, pwe minna een wo tipaeni."

³⁷ Iwe a sefaaen nge a rhuungiir rhoowe eoniurhai pwe ra maiur. Iwe a aengaeni Peter pwe, "Simon, wa maiur? Ese mmwen mwo nge wopwe mmas noan eew rhag awa?"

³⁸ Oaw mmas nge oawwa maeipin pwe oawte ppiunguinong noan sessoat. Ngeon a mwerhaen, nge oanong a apwangapwang."

39 A pwan sefaaen noa maeipin nge epwan aeni rhag taeppen kkepas kkewe e aeni mmwan.

40 Iwe a sefaaenitiir rhooan kkayeо nge a pwan giuneer pwe ra pwan maiur; pwe ra igin cchoaw. Nge rese giuneei meeta repwe aengaeni.

41 Enoa aeinuwaen aan sefaaeneto, a aengaeniiр pwe, “Oawrhiuwen maiur me aseoseo? A gacch nepan! Awa we ina a tooto! Pipiiy, miniwe Naiun Aeremas ina repwene fangenoa nee paaiur rhooa monofit.

42 Oaw rhimwitae, oaw sia noa. Pipiiy, ieei iiy mwaaen we e fangenoa menewaeil”

Aar Torofi Jesus

(Mat 26.47-56; Luke 22.47-53; John 18.3-12)

43 Jesus e rhiuwen kekkes, nge Judas iwe erhai me neeiir rhooawe seig me riiurhai a war. Pwuwaen aeremas kkewe re tapwee faaen naiur saeitan me soapwon irae. Nge re itto faaen iteer soamwoonin patere me sinsein anniug me mwaaen kkewe aar.

44 Rhooan afangmaei noa we a fang aegin ngaenir pwuwa we: “Mwaaen na ipwe faeisongei ina mwaaen na oawtipaeni. Oawtorofi nge oawwa paeninoa nge oawwa posuw.”

45 Igiwe rhag Judas a tooto, a faaeraeg wenewen ngaeni Jesus nge a aengaeni pwe, “Sinsei!”, nge a faeisongei.

46 Iwe ra torofi Jesus nge ra ammwarhiu neogiuw.

47 Nge erhai me neeiir rhooawe re iu a waeitiow naiun saeitan, nge a fena rhooan akkiuneo we naiun Soamwoonin Patere iwe gopy noa eew saeningan.

48 Jesus a kkepas tae nge a aengaeniiр pwe, “Meeta oawnoa itto faaen naimi saeitan me soapwon irae pwe oawpwe torofiae, pwe iga aetae ngaang erhai man mwoarho?

49 Raaen me raaen nge ngaang ino reemi i fenai noan *Temple* we, nge aaemi oawse torofiae. Nge ina nigiti pwe meeta we e foatofaat noan Pwapwior we e Santus epwe nnet noa.”

50 Iwe rhag nge oanongeer rhooan kkayeо kkewe naiun ra siusaengi nge ra fattapw noa.

51 Erhai anian e memmengaag eew mini mmis, e tettapw noa mwirin Jesus. Igiwe ra menaen pwe repwe torofi,

52 a fattapw noa wooan aan esooar mengaagiun, pwe a siusaengi tiw.

Jesus me Weni Mmweer Soaw Kapwiung Kkewe

(Mat 26.57-68; Luke 22.54-55, 63-71; John 18.13-14, 19-24)

53 Iwe ra paeninoa Jesus noan imwaen Soamwoonin Patere we. Iwe soamwoonin patere kkewe, me mwaaen kkewe aar me sinsein anniug ra mwiirh fengaen.

54 Peter e tapwee noa mwirin Jesus me taaw noa nge a noa toonong noan wororaen iimw we imwaen Soamwoonin Patere we. A mooat tiw reer rhooan poos kkewe nge a raengiy reen aengaet we.

55 Soamwooniir patere me oanongeer rhooan council kkewe regiutta meeta eew teren Jesus, pwe repwe niiy noa, nge esooar meeta ne reweri.

56 Towunap rhooa oatupwutupw tae kkepas wooan Jesus, nge aar kkepe-saen oatupwutupw nge ese aeffitaeg fengaen.

57 Aaemweoi mwaaen ra iutae nge ra oatupwutupw tae kkepas wooan Jesus, nge ra iura pwe,

⁵⁸ “Aemaem aeiya rongorong aan aepesa pwe, ‘Ngaang ipwe feree *Temple* eei feeorieer aeremas, nge mwirin enuuw raaen ipwe aiusefaeniy tae pwan eew nge soapw feeorieer aeremas.’”

⁵⁹ Pwan iir mwo nge ese aeffitaeg fengaen mwaenieer.

⁶⁰ Soamwoonin Patere we a iutae memmweer oanongeer nge aeiineow Jesus, “Esooar minne wopwe paniuwaeni ngaeni kkepas kka mwaaen kaan ra tipi ngaenius?”

⁶¹ Nge Jesus a anniug noa rhag nge esooar no eew kkepas ne eiura. Iwe Soamwoonin Patere we a pwan aeiineo sefaeniy, “Een minne Kristus, Naiun Deus na Esooar?”

⁶² Jesus a paniuwaeni pwe, “Ooa ngaang. Aaemi oawpwene giuneei Naiun Aeremas epwene mooat mwaaenen firhin iwe e oarosaen Mamaaw nge epwe ittiw me weei naaeng wooan toapw.”

⁶³ Iwe Soamwoonin Patere we a fereeitiw mengaagiun nge a iura pwe, “Meeta sirhiuwen pwigiir to rhoan oatuttur reen?”

⁶⁴ Oawwa sipegin rongorong aan aepesa aenneewa Deus. Meeta aaemi mwerhaen?”

Oanongeer nge ra pwiungiuw pwe: iiy e monofit nge epwe mae noa.

⁶⁵ Aaemweoi me neeiir a rhaepetae aar oattuffa, nge repwaniuw noa mesan nge re peosepa. “Iura iyo e peosepoag!” aar aepesa. Nge poos kkewe ra noa peosepa.

Peter e Aepesa pwe Ese Giuneei Jesus

(Mat 26.69-75; Luke 22.56-62; John 18.15-18, 25-27)

⁶⁶ Peter eno rhag noan wororaen iimw we nge erhai rhoapwut naiun Soamwoonin Patere we rhoan engaang a itto reen.

⁶⁷ Igiwe a weri Peter pwe a raengiy oanongan, a fan wenewen ngaeni nge a iura pwe, “Een pwan rhoaniwaen Jesus rhoan Nazareth we.”

⁶⁸ Nge iiy a iura pwe, “Aapw, ise giuneei aere metefaaegini meeta mwu wo aepesa,” iwe a toowow niugiun. Iwe rhag nge e keokkeok noa maniug we.

⁶⁹ Rhooapwut we rhoan engaang a pwan weri sefaeniy Peter me igiwe nge a pwan aepini ngaenir rhoawo oaron pwe, “Iiy erhai rhoaniwaar!”

⁷⁰ Nge Peter a pwan aepesa pwe ese nnet.

Ese ssiunaei noa mwo nge rhoawo oaron ra pwan aengaeni Peter pwe, “Ennet, een pwan erhai rhoaniwaen mwaaen naan, pwe een pwan erhai re Galilee.”

⁷¹ Nge Peter a iura pwe, “Iya aekkepan pwe ngaang iaepesa minne ennet! Deus epwe apwiungiuwaei aere ioatupwtupw! Ise giuneei mwaaen mwu oawiyaepesa.”

⁷² Iwe rhag nge a keokkeok maniug we oaruwowwan, nge Peter a maengiy meeta we Jesus e aengaeni, “Weni mmwaen epwe keokkeok maniug, nge een wopwe aepesa faaen enuuw pwe wose giuneaei.” Eppwoar tiw rhag nge esaeng.

15

Jesus me Weni Mmwaen Pilate

(Mat 27.1-2, 11-14; Luke 23.1-5; John 18.28-38)

¹ Nee oatosor moawugowug nge soamwooniir patere me mwaaen kkewe aar ra mwiirh fengaen me sinsein anniug me iir ikkiwe aaemweoi oawuton *Council* we repwaniuw meeta repwene feeori. Ra geoni Jesus nge ra noa fangenoa reen Pilate.

² Iwe Pilate a aeiineow pwe, “Een minne aar *king* re Jews?” Jesus a paniuwaeni pwe, “Een minimwu wo aepesa.”

³ Soamwooniir patere kkewe ra tipitae wooan Jesus towunepaen aegiaeg,
⁴ iwe Pilate a pwan aeiyegiy sefaaeniy pwe, “Wosoapw paniwaeni? Wo rongorong oanongaen kkepesaen oatuttur kka ra tipi ngaeniug!”
⁵ Jesus esa paniwaeni no, nge Pilate a mwaar noa.

*Ra Aettiweginiy Aaen Jesus Mae Noa
(Mat 27.15-26; Luke 23.13-25; John 18.39–19.16)*

⁶ Oanongaen raeg reen gupwunon Passover, Pilate egaen saeneti noa erhai rhooan kanepwus, iyo we aeremas re tingoar.

⁷ Noan oaton naan nge eno erhai mwaaen noan kanepwus itan Barabbas, eno neeiir aaemweoi rhooa aenneew iwe resooaw nni aeremas faei oaton moawun.

⁸ Igiwe aeremas towunap ra rhu fengaen, ra tingoar ngaeni Pilate pwe epwe feeori wunuunun minne a fasiun feoffeeori,

⁹ iwe Pilate a aeiineor pwe, “Oaw mwerhaen pwe ipwe saeneti ngaeni-gaemi kingaaen Jews een?”

¹⁰ Pilate e giuneei pwe soamwooniir patere kkewe minne re fangenoa Jesus reen pwe epwe noa apwiung faaen itaen aar noanowo ngaeni.

¹¹ Nge soamwooniir patere kkewe ra aetemaeginiy ngaeniir aeremas kkewe pwe repwe tingoareei Pilate, pwe epwe saeneti ngaeniir Barabbas.

¹² Iwe Pilate a pwan aeiineo sefaaen ngaeniir pwe, “Nge meeta ipwe feeori ngaeni aeremas e oawfaangi pwe kingaaen Jews?”

¹³ Ra iyaekkepwas temoag tae, “Kurusuw noa!”

¹⁴ Pilate a pwan aeiineor pwe, “Meeta taeppen wegitaeg aenneew e a feeori?” Nge iir ra pwan oatomoga aar iyaekkepwas pwe, “Kurusuw noa!”

¹⁵ Pilate e tipaeni pwe epwe amwamwaaiuw nee tipeer aeremas kkewe, iwe a saeneti ngaeniir Barabbas, nge ra wirhiy Jesus nge a fangenoa pwe repwe noa kurusuw noa.

*Sonotaw Kkewe ra Aeni Aegekkaei Jesus
(Mat 27.27-31; John 19.2-3)*

¹⁶ Sonotaw kkewe ra paeninoa Jesus noan wororaen iimw we imwaen governor nge ra faingiir to oanongeir sonotaw kkewe rhoaniwaar.

¹⁷ Ra aememmengaagi ngaeni erheo mengaag siungiurhoan, nge ra pwan fiti eew mwaer saengi irae towfanfan iwe ra ngaettae wooan rhimwen.

¹⁸ Iwe ra rhaepetae ne aesirowu: “Sirow woamw, Kingaen Jews!”

¹⁹ Ra wirhiy rhimwen ngaeni efoarh irae, nge ra oattuffa, nge ra foatotiw nge ra aesirowu ngaeni.

²⁰ Igiwe ra moann reen aar aeni aegekkaei, ra pwiniti saengi mengaag siungiurhoan we, nge ra aememmengaagi ngaeni ikkiwe sipegin mengaag-iun. Iwe ra paeninoa pwe repwene noa kurusuw noa.

*Ra Kurusuw Noa Jesus
(Mat 27.32-44; Luke 23.26-43; John 19.17-27)*

²¹ Igiwe re faaeraeg noa wooan aan we, nge ra noa rhuungi erhai mwaaen itan Simon saengi Cyrene, e itto saengi eew soapw pwe epwe toonong noan taeninimw we, nge sonotaw kkewe ra aengimaw ngaeni pwe epwe aiufera kurus we aaen Jesus. (Simon semaen Alexander me Rufus.)

²² Ra paeninoa Jesus reen eew pwiuneoi itan Golgotha, wewen nge “Nenien Peopeoi Rhimw.”

²³ Igaan iga ra itto aiuniu ngaeni Jesus eew wine enofit fengaen me aekkaew saefei itan myrrh, nge ese mwerhaen iuniumi.

²⁴ Ra kurusuw noa Jesus, nge ra inetiy mengaag kkewe wooar, nge re aekkaerh *dice* wooar ngaere iyo epwe pwigi ifa.

²⁵ A kiung tiwowu nee oatosor iga re kurusuw noa.

²⁶ Foatofoaton minne ra tipi ngaeni e iura pwe: “Ieei Kingaen Jews.”

²⁷ Repwan kurusuw noa riiurhai rhooa mwoarho oaron Jesus, erhai peig mwaaenen, nge erhai peig rhooapwuton.

²⁸ [Ieei wunuunun pwe epwe pwaenoan miniwe Pwapwior we e Santus e iura pwe, “Refreeori pwe iiy erhai aeremas aenneew.”]*

²⁹ Aeremas kkewe re faaeraeg noa me oaron Jesus re iurhiugi rhimweer nge re aepesa aenneewa Jesus, “Aa! Een miniwe wo iura pwe wopwe fer-eeitiw *Temple* we nge wa aiusefaaeniy tae noan enuuw raaen!

³⁰ Iwe teeotiwi me wooan kurus na pwe wopwe aemenewoag!”

³¹ Epwan ina rhag wunuunun soamwoonin patere me sinsein anniug kkewe re aeni aegekkiae Jesus reen aar aepesa pwe, “A aemenewaar aaemweoi, nge ese mmwesen aemenewa oanongan!”

³² Oawsa pipiiy Kristus een, iwe Kingaen Israel, aan epwe teeotiwi saengi kurusuna igma, ina nge sipwe niugiuniug ngaeni!”

Nge pwan rhooa kkewe re tapweei reen kurus repwan aessaewa Jesus.

Maenoan Jesus

(Mat 27.45-56; Luke 23.44-49; John 19.28-30)

³³ Saengi nugunupaen oanowas nge oanongaen faniuw we a rorhappiung noa noan enuuw konook.

³⁴ Igiwe a enuuw konook nge Jesus a iyaekkepwas temoag tae pwe, “Eloi, Eloi, lama sabachthani?” faan nge, “Aaei Deus, aaei Deus, meeta wa nigitiae noa reen?”

³⁵ Aaemweoi aeremas kkewe re iu oaron ra rongorong kkepas kkewe, ra iura pwe, “Oaw rongorong, a faangi Elijah!”

³⁶ Erhai me neeiir a fattapweto reen faaen eew faerewa, a rhirinong noan *wine* emwaenn, nge a iseni tae nee soapwon efoarh irae. A aetitiae irae we ngaeni ewaen Jesus nge a iura pwe, “Weti sipwe pipiiy aere Elijah epwe itto ateeotiwei me wooan kurus na!”

³⁷ E apwas temoag noa rhag faaen eew, nge a nurh noa aan ngasangas.

³⁸ Mengaag we e tteoraeg noan *Temple* we mwo nge e taeringatiw faaen ruwowu, saengi wooan ittiw faan.

³⁹ Erhai soamwoonin sonotaw eiu mmwaen kurus we eweri wunuunun aen Jesus maenoa, a iura pwe, “Ennetaeen pwe mwaaen een nge Naiun Deus!”

⁴⁰ Aaemweoi rhooapwut reno igiwe, re oawruruto me itaaw. Neeiir rhooapwut kkewe nge Maria Magdalene, Maria we inaan James me Joseph iwe me pwan Salome.

⁴¹ Re tapweei Jesus me noan Galilee reen aar tittipaengi. Towunepeer rhooapwut kkewe re tapweeito Jesus me Jerusalem repwan no igiwe.

Paeyinoan Jesus

(Mat 27.57-61; Luke 23.50-56; John 19.38-42)

⁴²⁻⁴³ A faaeraeg ngaeni nee oatofaaef nge Joseph re Arimathea we a tooto. Iiy erhai e regin oawoai me noan *Council* we, iwe e wewweti itton minna Mweoiun Deus. A raaenin Aenimowu miniwe (eew raaen mmwaen raaenin Sabbath), noan maemaewaen nee tipaen Joseph a itto reen Pilate a itto tingoar miniwe oanongaen Jesus.

* **15:28** Petenan eei nge e soano noan aekkaew petenan kka e foatofoat noan kkepesaen Greek.

⁴⁴ Nge Pilate a riutae igiwe e rongorong pwe Jesus a fasiun maenoa. A tengaeg soamwoonin sonotaw we nge a aeiineow aere a ssiunaei aaen Jesus maenoa.

⁴⁵ Mwirin aan rongorong meeta we sonotaw we eiura reen mmwenen Jesus, Pilate a aengaeni Joseph pwe epwe noa pwigi mini oanongaen Jesus.

⁴⁶ Joseph meoni erheo mengaag pwerh ffeo, a iseni tiw miniwe oanongan Jesus me wooan kurus we nge a tiugumi ngaeni mengaag we, a oawnanong noan paeyi we ekken wow me neeiin faai. Iwe a oasoagopeniy to efai faai gin temoag reen aesemaen paeyi we.

⁴⁷ Maria Magdalene me Maria we inaan Joseph repipiiy nge ra giuneei iya re paeiaeni miniwe oanongaen Jesus ee.

16

Aaen Jesus Menaw Sefaaen

(Mat 28.1-8; Luke 24.1-12; John 20.1-10)

¹ Mwirin raaenin Sabbath, nge Maria Magdalene, Maria we inaan James iwe me Salome ra chuwaai neoninges, pwe repwe noa aepiti miniwe oanongaen Jesus.

² Weni mmwaei raaenin Sunday, oatowe aenet epwene teeotae, ra noa reen paeyi we.

³⁻⁴ Wooan aar faaeraeg noa, ra kkepas fengaen nee fineer, “Iyo epwe peniy ngaenigirh fai we mesaen paeyi we?” (Egin faereggit fai we.) Nge renoa fannoai paeyi we, ra giuneei pwe fai we a faer mwagiut saengi aesemaen paeyi we. ⁵ Igiwe ra toonong noan paeyi we, ra weri erhai mwaaen anian emooat peig mwaaenen paeyi we, e memmengaag min pwerhepwerh, nge ra mesaag reen.

⁶ A aengaenir pwe, “Oawsoapw mesag. Igiuneei pwe oaw giutta Jesus re Nazareth we re kurusuw noa. Esa nono igeei, a menaw sefaaen! Oawpipiiy, igaan igiwe re oawnatiw ee.

⁷ Iwe oawnoa aengaenir rhoaan kkayeo kkewe naiun me pwan Peter: ‘Iiy ina epwene gommw noa Galilee me mmwaemi; iginan minne oawpwene noa weri me ee, taeppen rhag meeta we e aengaenigaemi.’ ”

⁸ Iwe ra toowow nge ra fattapw saengi paeyi we, noan aar mesag me riu. Nge rese aepesa ngaeni mwo nge erhai, pwe ra igin mesag.

Eew Soapwonoan Kkepas Mwamwaai we

Jesus a Pwae Ngaeni Maria Magdalene

(Mat 28.9-10; John 20.11-18)

⁹ [Mwirin aaen Jesus menaw sefaaen nee oatosoron raaenin Sunday we, egommwaen pwae ngaeni Maria Magdalene, iwe e oatowowuw fiusuman aniu aenneew me reen.

¹⁰ Niewe a noa iwe a noa aengaenir rhoawwe rhinaan. Rhooawwe re sessaeng reen aenneewaen nee tipeer;

¹¹ nge igiwe ra rongorong pwe Jesus a menaw sefaaen pwe iiy a weri, nge rese niugiuniug ngaeni.

Jesus a Pwae Ngaenir Riiurhai Rhoaniuwan

(Luke 24.13-35)

¹² Mwirin minnee nge Jesus a pwaenoan pwan eew taeppen wegitaeg ngaenir riiurhai rhoaan kkayeo kkewe igiwe refaaeraeg ngaeni aepinoamw we.

¹³ Ra sefaaen nge ra aengaenir ikkiwe aaemweoi, nge iir rese niugiuniug reer.

*Jesus a Pwae Ngaenir Rhooawe Seig me Erhai
(Mat 28.16-20; Luke 24.36-49; John 20.19-23; Feof 1.6-8)*

¹⁴ Oarosan noa nge Jesus a pwae ngaenir rhooawe seig me erhai igiwe iir re mwongo. A songetiir, pwe esooar aar niugiuniug, ra pwan tipoarorh, pwe rese niugiur rhooawe ra weri pwe Jesus a menaw sefaen.

¹⁵ Iwe a aengaenir pwe, “Oawnoa wooan oanongaen faniuw oawpwe noa fenaiuw Kkepas Mwamwaai een ngaenir oanongeer aeremas.

¹⁶ Iyo e niugiuniug nge a baptismus nge epwe menaw, nge iyo ese niugiuniug nge epwe aegaeregaer.

¹⁷ Rhooakka re niugiuniug repwe fang maemaewer pwe repwe feeori manaman: repwe asiur aniu aenneew faaen itaei; nge repwe kkepesaen noa eew me eew faniuw,

¹⁸ ngaere repwe pweipwog sowufaeng aere iun pwoisiun, nge resoapw woas; nge repwe iseni tae paaiur wooar rhooa semwaai nge repwe cchipw tae.”

*Jesus a Ittae Naaeng
(Luke 24.50-53; Feof 1.9-11)*

¹⁹ Mwirin aaen Soamwoon Jesus kkepas ngaenir, a ittae naaeng a ittae mooat peig mwaaenen Deus.

²⁰ Rhooan kkayeo kkewe ra noa fenai wooan oanongaen pwiuneoi, nge Soamwoon e engaang neeiir nge epwaeri noa aar fenai pwe ennet reen oanongaen manaman kkewe ra feeori.]*

Pwan Eew Aigiugiun Kkepas Mwamwaai we

(9a) [Rhooapwut kkewe ra noa reen Peter me rhoowe rhinan ra noa fioangei ngaenir oanongaen meeta kkewe re rongorong. (10a) Mwirin minneei nge Jesus wooan oanongan a fang wow rhoan kkayeo kkewe naiun pwe repwe noa fenai fetaeneei saengi eotiw toori netow kkepas mwamwaai we kkepesaen menaw na esooar ssiaaenin.]†

* **16:20** Petenan eei nge esoano noan aekkaew petenan kka e foatofoat noan kkepesaen Greek.
† **16:10a** Petenaen eei nge esoano noan aekkaew petenan kka e foatofoat noan kkepesaen Greek

Fangkenio We Foatogiaen Luke

Fangkenio we Foatogiaen Luke

¹ Aerhaengerhaeng Theophilus:

Aeremas towunap re oarhorho pwe repwe foatogi kkepesaen meeta kka a wewwen me neeimaem.

² Iir ra foatogi meeta kka eitto ngaeniir me reer rhooakka ra fasiun weri minikkeei me neerhaepetaen nge ra aepesa iiy kkepas mwamwaai we.

³ Iwe een pwonno iga iya wori firhiy oanongaen minikkeei saengi pweoneotaen, iya niuwaenaei pwe epwe mwamwaai pwe ipwe foatogi wunuun aetettaeniin ngaeniug.

⁴ Iya feeori minneei pwe een wopwe giuneei gacchiuw minna wenewenen oanongaen meeta kkewe ra kapwiung ngaeniug.

Kkepesaen Wupwutiwen John Baptist

⁵ Noan oatowe Erotes eno pwe *kingaaen Judea*, eno erhai patere itan Zechariah, iiy etapweei tettaenin patereen Abijah. Itaen rhooapput na rhooan ngaenneyan nge Elizabeth; nge iiy epwan itto saengi eew faminiin patere.

⁶ Iir me riiurhai nge e igin mwamwaai noan meneweerafaaen mesaen Deus nge re tapweei gacchiuw oanongaen aaen Soamwoon anniug me akkiuneo.

⁷ Iir esooar naiiur pwe Elizabeth ese mmwenen nainai, nge igma mwo nge ra igin tugufaeyi.

⁸ Eraan nge Zechariah a itinong feeori aan engaang noan *Temple* we, pwe a toori oaton ginigin we aan epwe engaang noan raaenin we.

⁹ Noan peigin aaen engaang patere, nge iiy minne ra fini pwe epwe fifi oappwongesaen wooan antar. Iwe a toonong noan *Temple* we aaen Soamwoon,

¹⁰ nge rhooa towunap kkewe reno niugiu pwe re maeipin reen oatowe iiy e fifi oappwongas kkewe.

¹¹ Angkenus we naiun Soamwoon a pwae ngaeni, nge e iu peig mwaaenen antar we igiwe oappwongas we eno ee.

¹² Oatowe Zechariah a weri mwaaen we, a riu nge a mesag tae.

¹³ Angkenus we a aengaeni pwe, “Wosoapw mesag, Zechariah! Deus a rongorong oamw maeipin, iwe Elizabeth we reemw epwene naini erhai aetemwaaen. Wopwe aeitae ngaeni pwe John.

¹⁴ Epwene ifa mwo oamw wenepwu me pwapwa, iwe me aar aaemweoi wenepwu reen aan supwutiw.

¹⁵ John epwene igin taegias me faaen mesaen Deus. Esoapw iun *wine* me aerhi. Saengi rhag aan wupwutiw epwene sseog reen Espritu Santus,

¹⁶ nge iiy epwene pwigiir towunepeer re Israel ngaeni Soamwoon we aar Deus.

¹⁷ Iiy epwe gommw me weni mmwaei Soamwoon, pwe e mamaaw pwe taeppen rhag profeta we Elijah. Epwe aesefaaeni fengaenniir saam me naai pwe repwe eew rhag; iiy epwe wegiti sefaaeniir rhooa serong feon ngaeni niunniuwaen mwamwaai; nge epwe oamoannaar tae aeremas weni mmwaei Soamwoon.”

¹⁸ Zechariah a aengaeni angkenus we pwe, “Epwe ifa wusun nge iya giuneei pwe ennet minneei? Ngaang iya tugufaeyi, nge manna pwiuniuwaei nge a pwan tugufaeyi.”

¹⁹ “Ngaang Gabriel,” mwaeniaen angkenus we. “Ngaang iyi weni mmwaen Deus, iwe iiy minne efang ngaang pwe ipwe pwigito kkepas mwamwaai een reemw.

²⁰ Nge een wose niugiuniug ngaeni mwaeniaei, nge minneei epwe noa pwaetae minna wenewenen noan oaton naan. Iwe nge iga wose niugiuniug, een wosoapw mmwenen kkepas no; wopwene anniug noa rhag toori aan itto iiy raaenin na iya fasiun ppwoneei ngaeniug.”

²¹ Noan oateei nge aeremas re wewweti Zechariah nge ra niunniwaennei aere meeta a igin itinong pwongiy noan *Temple* we reen.

²² Enoa toowow, nge esa mmwenen kkepas ngaenir no, nge ra giuneei pwe eyor minne a itinong weri me noan *Temple* we. Igiwe esa mmwenen kkepas no, iwe a taenepom ngaenir rhag.

²³ Oatowe a moanno noa engaang we aan noan *Temple* we, Zechariah a sefaaen noa nee iimw.

²⁴ Enoa eew oaton nge Elizabeth a pwoopwo nge a no rhag nee iimw noan nimowu meram.

²⁵ “Ennaen igma minne Deus a tipaengiae, ” mwaeniaen niewe. “A arhi-uwa saengiae aessaewaei me neeiir rhooanap!”

Kkepesaen Wupwutiwen Jesus

²⁶ Noan oawonowuwaen meremaen Elizabeth Deus a fangetiw angkenus we Gabriel noan eew aepinoamwon Galilee itan Nazareth.

²⁷ Eyor eew aan kkepesaen oarong ngaeni erhai rhooapwut a kkefoat ngaeni mwaaen we itan Joseph, iwe itto saengi teeo we aan *king* David. Itan nge Maria.

²⁸ Angkenus we a itto reen niewe nge a iura pwe, “Oapoas epwe no reemw! Soamwoon eno reemw nge a aewenepwuwoag.”

²⁹ Maria a gin riutae reen miniwe mwaeniaen angkenus we, nge a niuwaennei meeta faan iiy kkepas kkewe.

³⁰ Angkenus we a aengaeni niewe pwe, “Wosoapw mesag, Maria; pwe Deus minne e igin mwamwaai ngaeniug.

³¹ Wopwene pwoopwo nge wa nainitiw erhai aetemwaaen, nge wa aeitae ngaeni pwe Jesus.

³² Epwe igin taegias nge epwe ffai pwe iiy naiun Deus na oarosaen taegias. Soamwoon Deus epwene feeori pwe iiy *king* taeppen rhag David we aan rhaepeto,

³³ nge epwe no pwe *king* reen teeo we aaen Jacob oanongaen oat; minna mweoiun ina esooar aigiugiun!”

³⁴ Maria a aengaeni angkenus we pwe, “Ngaang erhai piirgo. Epwe ifa wusun rhag nge a mmwen minneei?”

³⁵ Angkenus we a iura pwe, “Espritu Santus epwene ittiw woamw, nge minna kkaeinen Deus ina oarosaen taegias a no woamw. Nge faaen minneei nge aetena esooar epwene ffai pwe Naiun Deus.

³⁶ Wo maengiy rhag Elizabeth we re pwugusoamw? Iwe reiura pwe esoapw mmwenen nainai no, nge igma nge a wonowu mereman, inamwo iga a igin tugufaeyi.

³⁷ Pwe esooar eew meeta ne Deus esoapw mmwenen feeori.”

³⁸ “Ngaang erhai naiun Soamwoon rhooan akkiuneo,” aaen Maria iura. “Nigiti pwe epwe wen ngaeniaei petenaen kkepas mwu wa iura.” Iwe angkenus we a siusaengi niewe.

Maria a Noa Emwaeri Elizabeth

³⁹ Ese mmwaei mwo me weni mwirin nge Maria a oamoannatae epwe mwekkaei noa reen eew aepinoamw eno neeiin rhugun Judea.

⁴⁰ A noa reen imwaen Zechariah pwe epwe noa koapwong ngaeni Elizabeth.

⁴¹ Igiwe Elizabeth a rongorong aaen Maria koapwong nge aetewe naiun a mwagiut me noan upwan. Elizabeth a sseog reen Espritu Santus

⁴² iwe a aekkepwas faeregite tae nge a iura pwe, “Een minne wa oarosaen wenepwu me neeiir rhoopwut, nge epwan wenepwu aetena wopwe naini!

⁴³ Meeta ppweoniuun aaen min mwamwaai eei aan epwe itto wen ngaeni-aei, iye nie inaan soamwoon a itto sengaeriaei?

⁴⁴ Pwe igiwe rhag i rongorong oamw koapwong, iwe nge aete noan upwaei a mwagiut reen aaen kker.

⁴⁵ Ifa mwo oamw kker pwe wa niugiuw pwe kkepas we aaen Soamwoon ngaeniug nge epwe nnet noa!”

Aaen Maria Keoniun Aepingeping

⁴⁶ Maria a iura pwe,
“Nee tipaei a aepingepinga Soamwoon;

⁴⁷ ngeoniuy apwapwa pwe aegin Deus iiy aaei Rhooan Aemenaw,

⁴⁸ pwe iya maengiaeи ngaang naiun rhoan akkiuneo man sessoan!

Saengi igma oanongeer aeremas nge repwene faingiaeи pwe ngaang wenepwu,

⁴⁹ pwe reen min mwamwaai kka Deus na oarosaen kkeman a feeori ngaeni-aei.

Minna itan inaessoar;

⁵⁰ saengi eew me eew saaer epwaeri aan ffayeo ngaeniir rhoan oassoara.

⁵¹ A aeiti noa paiun na ekkeman
nge e oamwotoraar noa rhoana renamanam taegias noan aar niunni-uwaen.

⁵² A oatoraar tiw *king* kka re mamaaw me wooan nenien mooatoor,
nge e saeregiir tae ikka re sessoan.

⁵³ A oamwongoor rhooa pecchai ngaeni min mwamwaai,
nge a aefengaar noa rhooa pisaegisae nge esooar oawton paaiur.

⁵⁴⁻⁵⁵ Iiy e ammwarhiuto rhag ppwon we aan ngaeniir rhoawae rhaepetorh,
nge a itto pwe epwe fang tipaengieer rhoawae re Israel iwe naiun rhoan akkiuneo.

Iiy e maengiy rhag pwe epwe pwaeri ffaayeo we aan ngaeni Abraham
me oanongeer rhoan teowe aan iwe esooar iaenin!”

⁵⁶ Epwe enuuw meram aaen Maria no aegini reen Elizabeth nge a sefaaenti pwugusan.

Wupwutiwen John Baptist

⁵⁷ Enoa tooto oatowe Elizabeth epwene nainai, nge a timenewaegin erhai aetemwaaen.

⁵⁸ Rhoan weni oaron me rhooa kkewe repwugusan ra rongorong ifa mwo aaen soamwoon mwamwaai ngaeni, iwe iir ra maegin tapwee reen aan pwapwa.

⁵⁹ Igiwe aetewe a eew *week* aan no, ra itto repwe *circumcise* aegini, nge repwene aetiae ngaeni pwe Zechariah, aeiteitaen mwaaen we seman.

⁶⁰ Nge rhoopwut we inan a iura pwe, “Aapw! Epwe itaeni John.”

⁶¹ Nge ra aengaeni niewe pwe, “Aetae esooar re pwugusoamw ne e ina itan!”

⁶² Nge iir ra taenepom ngaeni mwaaen we seman, meeta e mwerhaen pwe aetewe epwe itaeni.

⁶³ Zechariah a tingoar eew pwapwior nge a foatogitiw pwe, “Itan nge John.” Ifa mwo aar riutae rhooawe!

⁶⁴ Reen otonaan rhag nge Zechariah a mmwenen kkepas, a rhaepetae aan aepingepinga Deus.

⁶⁵ Rhooan no oaroor ra igin mesag, nge kkepesaen minikkeei a rheeoii noa wooan rhugun aepinoamwon Judea.

⁶⁶ Rhooan rongorong kkepas we ra gaen niunniwaennei nge ra aeiyeg pwe, “Meeta aeteei epwene no pwe iiy?” Pwe igiwe epwae noa pwe mae-maewaen Soamwoon eno wooan.

Aaen Zechariah Woowo

⁶⁷ Zechariah we semaen John a sseog noa reen Espritu Santus, nge a aepesa wow kkepesaen oarongorong we aaen Deus:

⁶⁸ “Sipwe aepingepinga Soamwoon iwe aaen Israel Deus!

A itto epwe fang tipaengiaen naiun aeremas nge aessaenetaegiir noa.

⁶⁹ A fang ngaenigirh naiurh rhooan aemenaw eigin kkeman, rhooan teowe aaen David iwe naiun rhooan akkiuneo.

⁷⁰ A ppwon ngaeniir profeta kkewe mweoiwe

⁷¹ pwe iiy epwe aemenewaegirh saengiir rhooan kkoapwut ngaenigirh, saengi maemaeweir rhooakkenna re aeni giirh aeffaeioapwut.

⁷² E iura pwe epwe pwaeri ngaeniir rhooakkenna rhaepetorh ffaiyeo iwe me e maengiy ppwon ssoar we aan.

⁷³⁻⁷⁴ Noan aan aekkepan ngaeni Abraham we rhaepetorh iiy eppwon pwe epwe aemenewaegirh saengiir rhooan oapwutaegirh, iwe nge e nigiti ngaenigirh pwe sisoapw mesag noan aarh engaang ngaeni, ⁷⁵ pwonno giirh sipwe ssoar nge si mwamwaai me weni mmwan noan oanongaen raaenin aarh menaw.

⁷⁶ “Een naeyi, wopwene ffaai pwe profeta we naiun Deus na oarosaen taegias. Een wopwene mmweei Soamwoon wopwene oamoannatae ennepan,

⁷⁷ wopwe aengaeniir naiun aeremas repwene menaw ige emwus noa monofitii.

⁷⁸ Naiurh Deus ina e sseogiun ffayeo nge etip mererhaeg.

Epwe feeori pwe seremaen menaw epwe ttinitiw wooarh

⁷⁹ nge seremaen wooan naaeng epwe ttin noa wooar rhoa no noan rorhapiungiun maenoa,

pwe epwe aetiiti mesaen gupworh noan ennepaen oapoas.”

⁸⁰ Iwe a temoag tae aetewe iwe a mamaaw noa oanongan me ngeoniu. Iwe a no noan *desert* we e toori noan raaenin we a pwae ngaeniir re Israel.

2

Wupwutiwen Jesus (Mat 1.18-25)

¹ Noan otonaan nge Soamwoonin Rome we Augustus a akkiuneo pwe epwe yor paaepaen fainaaw noan oanongaen faniuw kka nemaeniaen Rome.

² Reen igiwe aeyewaen paaepae a rhaepetae nge Quirinius minne eno pwe *governor* reen Syria.

³ Erhai me erhai nge enoa foatogi itan reen aan taeninimw.

⁴ Joseph a noa saengi Nazareth noan Galilee a noa ngaeni Bethlehem noan Judea, igiwe esiupwutiw *king* David me ee. Joseph a noa igiwe pwe igiwe iiy teotteeon David.

⁵ A noa pwe enoa foatogi iteer me Maria, rhooapwut we a no pwe kkefoaton. Nieuwe a pwoopwo,

⁶ oatowe reno Bethlehem, a toori oaton aan supw aetewe naiun.

⁷ Nieuwe a timenewaegini aetemwaaen we mesaemmwaei naiun, nge a tiugumi nong noan mengaag nge eoana nong noan miniwe nenien anan maan, pwe igiwe esooar no nenieer me noan imwaen waseona we.

Rhooan Neginegin Sheep me Angkenus Kkewe

⁸ Eyor aekkaerhai rhooan neginegin *sheep* reno wooan menaai nee pwoong re aefaeeniir naiur maan. ⁹ Erhai naiun Soamwoon angkenus a pwae ngaeniir, nge nningen Soamwoon a ttinitiw wooar. Ra igin mesag,

¹⁰ nge angkenus we a aengaeniir pwe, “Oawsoapw mesag! Ngaang iya pwigito eew kkepas mwamwaai reemi, kkepas een epwe pwigito eew kker temoag ngaeniir oanongeer aeremas.

¹¹ Raaenin eei noan aepinoamw we aepinoamwon David rhooan aeme-naw we aaemi a supw—Kristus we Soamwoon!

¹² Ieen minne epwe anugiuniugiuw ngaenigaemi: oawpwe noa rhuungi erhai wonigaet etiugiutiug noan mengaag nge ewon noan nenien anan maan.”

¹³ Ese mmwaei mwo nge eew mwirhaen angkenus a pwae noa me oaron angkenus we erhai, ra aepingepinga Deus noan aar keon:

¹⁴ “Sia fang ssoar ngaeni Deus na eno wooai naaeng,
nge oapoas enoa ngaeniir rhooakkenna e mwamwaai nee tipan wooar!”

¹⁵ Oatowe angkenus kkewe ra nigitir ra sefaaen noa naaeng, rhooan neginegin *sheep* kkewe ra kkepas fengaen nee fineer pwe, “Sa noa Bethlehem sipwe noa weri meeta minne a wen, minne Soamwoon a aengaenigirh.”

¹⁶ Iwe ra siu mwetekkaei noa me igiwe, nge ra noa weri Maria me Joseph iwe nge reweri wonigaet we ewon noan nenien anan maan.

¹⁷ Oatowe ra weri aetewe, nge ra aengaeniir rhooawe meeta we angkenus e iura reen aetewe.

¹⁸ Oanongeer iyo kkewe re rongorong miniwe nge ra mwaar reen miniwe mwaenier rhooawe rhooan neginegin *sheep* kkewe.

¹⁹ Maria a maeng ngaeni oanongaen minikkeei nge a niuwaennei nong rhag nee tipan.

²⁰ Rhooan neginegin *sheep* ra sefaaen, nge ra aepingepinga Deus reen iwi meeta kkewe ra rongorong nge ra weri; nge taeppen rhag miniwe angkenus we a aengaeniir.

Ra Aeita Jesus

²¹ Enoa eew *week* weni mwirin, reen oatowe aetewe epwene *circumcise*, ra aeita ngaeni pwe Jesus, itiwe angkenus a fasiun ngaenneer weni mmwaen aan supw.

Ra Pwigi Noa Jesus Noan Temple we

²² A toori oatowe Joseph me Maria repwe feeori eew pwaengepwaengin aenimenim, pwe ina miniwe oasoapwosoapw we aaen Moses e aepesa. Iwe ra pwigi noa aetewe Jerusalem pwe repwe noa pwaeri ngaeni Soamwoon,

²³ pwe ina miniwe effoat noan oasoapwosoapw we aaen Soamwoon pwe, “Oanongaen mesaemmwaei naiur aetemwaaen nge repwe aeyimweoiiur ngaeni Soamwoon.”

²⁴ Ra pwai noa pwe repwe noa aeni maenigaech riiurhai *dove* aere riiurhai aeppaen *pigeons*, pwe ina miniwe e fasiun no noan oasoapwosoapw we aaen Soamwoon.

²⁵ Noan oatonaan nge eno erhai mwaaen itan Simeon eno noan Jerusalem. Iiy erhai mwaaen reepiy nge e mwamwaai noan menewan nge ewewweti oatona epwe cchipw Israel. Espritu Santus a teeotiw wooan

²⁶ nge a aniugiuniugiuw ngaeni pwe iiy esoapw mae weni mmwaen epwe weri Kristus we Soamwoon eppwoneei.

²⁷ Espritu Santus a paeni Simeon a itinong noan *Temple* we. Oatowe rhooawe inan me seman ra pwigito goagoa we noan *Temple* we pwe repwe feeori ngaeni meeta we oasoapwosoapw e iura,

²⁸ Simeon a ammwarhiu aetewe noan paiun nge a fang aerhigerhig ngaeni Deus:

²⁹ “Igina Soamwoon, een wa iseni ppwon we oamw, nge wa mwiuti ngaeni noawumw rhoaan akkiuneo pwe epwe noa noan oapoas.

³⁰ Iya weri ngaeni mesaei oamw engaengaen menaw,

³¹ iwe een wa oamoannatae me wenimmweer oanongeer aeremas:

³² eew seram epwe pwaeri ngaenir re Gentiles mwerhaen na oamw iwe me pwigito nning ngaenir noawumw re Israel.”

³³ Rhooawe inan me seman aetewe ra mwaar reen meeta kkewe Simeon eiura reen aetewe.

³⁴ Simeon a aepiniir nge a aengaeni Maria, iwe inaan aetewe, “Aeteei a ffin tae me reen Deus pwe epwe oatoaropa nge e aemenewaer towunepaen re Israel. Iiy epwe no pwe eew aeginn me reen Deus pwe towunepaen aeremas repwe appaniuwaeni noan aar kkepas,

³⁵ iwe a pwaeritae noan niunniuwaen mwoanomwoan kena aar. Nge niemaam eweei kaengin saeitan, epwe fereei pwunnomw.”

³⁶⁻³⁷ Eno erhai profeta tugufaeyi itan Anna nge a mae noa pwiuniwan. Nge iiy naiun Phanuel saengi aeinang we aaen Asher. Fisuuw raeg aan pwiuppiuniuw nge emae noa pwiuniwan. Nge igina a waniig me faawu raegin. Iiy ese nigiti *Temple* we; pwoong me raaen nge e aesirowu noa rhag Deus, e aecchigipin nge e memmaeipin.

³⁸ Noan rhag awa we e tooto nge a fang aerhigerhig ngaeni Deus nge a fioangei mmwenen aetewe ngaenir oanongeer rhooa kkewe re iya wetiwet ngaeni Deus pwe epwe saenet noa Jerusalem.

Ra Sefaaen Ngaeni Nazareth

³⁹ Igiwe Joseph me Maria ra moanon feeori minikkewe eno noan anniug we aaen Soamwoon, nge ra sefaaen ngaeni miniwe aepinoamwoor iwe Nazareth me noan Galilee.

⁴⁰ A tootae aetewe nge amamaaw noa, nge a sseog noan reepiy nge Deus a no wooan.

Aet we Jesus me Noan Temple we

⁴¹ Oanongaen raeg nge rhooawe inaan me seman Jesus ra noa Jerusalem pwe repwe noa tapweei gupwunon *Passover* we.

⁴² Oatowe a seig me ruwowu raegin Jesus nge ra noa tapweei gupwun we taeppen rhag miniwe regaen feoffeori.

⁴³ Enoa moanno noa gupwun we, rhooawe ra sefaaen noa nee pwuguseer, nge Jesus a notiw noan Jerusalem. Rhooawe inan me seman rese giuneei minneei;

⁴⁴ iir re niuwaennei pwe eno reer rhooanap we, iwe eraaen nniuw aar nennoa nge a rhaepetae aar kiukkiutta fetaeneei aetewe me neeiir aei oaroar me maereyaereer.

⁴⁵ Nge iir rese weri, iwe ra sefaaen noa giutta me Jerusalem.

46 Wooan ayeoniuraenin aar giut nge ra noa weri me noan *Temple* we, emooat neeiir sinsein Jews kkewe, eaiussaening ngaeniir nge ekekkepas aeiineo ngaeniir.

47 Oanongeir rhooa kkewe re rongorong mwaenian nge remwaar noa reen aeseefaaenin kkepas aeiyeg kkewe aan.

48 Rhooawe inan me seman reriutae reen igiwe ra noa weri, iwe nge rhooapwut we inan a aengaeni pwe, “Naeyi, meeta wa feeori ngaenigemaem minnei reen? Pwe ngaang me mwaaen e semoamw aeiya gin noanineeng reen aemaem giutta fetaeneog.”

49 Nge iya paniuwaenir nge a iura pwe, “Meeta aaemi oawnoa giutta fetaeneaei reen? Oawse giuneei pwe ngaang ipwe no noan imwaen minna Semaei?”

50 Nge iir rese metaf reen miniwe e iura.

51 Iwe Jesus a tapweei sefaaenir noa Nazareth, nge a noa aiussaening ngaeniir. Miniwe inaan a iseni nong rhag oanongan neetipan.

52 Jesus a temoag tae wooan oanongan me aan reepiy me temoagon rhaengiin me reen Deus me aeremas.

3

*Aaen John Baptist Fenai
(Mat 3:1-12; Mark 1:1-8; John 1:19-28)*

1 Noan miniwe seig me nimowu raeg aan Soamwoonin Rome we Tiberius nemenem, nge Pontius Pilate minne *governor* reen Judea, nge Erotes minne soamwoonin Galilee, iwe nge Philip we pwiiin minne soamwoonin faniuwaen Iturea me Trachonitis; iwe nge Lysanias minne soamwoonin Abilene,

2 iwe nge Annas me Caiaphas minikka Patere taegias—noan oatonaan nge Deus a fang to kkepas reen John iwe naiun Zechariah me noan *desert* we.

3 Iwe John a noa fenai fetaen noan faniuwaen rhan pwupwu na Jordan, “Toagun saengi monofitimi nge oawpwe paptismus, ina nge Deus epwe saeneti noa monofitimi.”

4 Miniwe effoat noan pwapwior we aaen profeta Isaiah pwe:
“Erhai aeremas e iyaekkepwas me noan *desert* we nge e iura pwe:
‘Oawpwe oamoannatae ennepaen Soamwoon;
oawpwe awenecchera eew aan pwe epwe faaeraeg wooan!

5 Oanongaen mwoattotiw nepetaen rhug nge sipwe oawutaeni tae,
oanongaen taeit me rhug nge epwe soan eew noa rhag.

Oanongaen aan pwoar nge epwe aewwen noa,
oanongaen aan toarumwrumw nge epwe arhannenoa.

6 Oanongeir aeremas nge repwe weri menaw na Deus epwene fangetiwi!”

7 Aeremas towunap ra maeg wow reen John pwe epwe noa paptismus aeginiir. Nge a aengaenir pwe, “Aaemi sowufaeng! Iyo e aengaenigaemi pwe oawpwe mmwenen kkewaeg saengi aaen Deus aegaeregaer iga epwe aefengato?

8 Oawssiuweniy wegitaegimi pwe epwe pwaeri noa pwe oawwa toagun saengi monofitimi. Oawsoapw niunniuaenuei pwe oawwa taaw saengi aaen Deus aegaeregaer reen aaemi aepesa pwe Abraham minne rhaepetomi. Ngaang ipwe aengaenigaemi, pwe Deus emmwenen feeori faai kaan pwe tettaenin Abraham!

9 Eew soapaen a oamoannatae pwe epwe gopyi tiw waniwan saengi waeran. Oanongaen waniwan kka ese gacch uwaan nge epwe gopogop tiw nge e aekkaerh nong noan aengaet.”

¹⁰ Aeremas ra aeiineow pwe, “Meeta minne aeipwe feeori?”

¹¹ Apaniuwaeniir pwe, “Iyo na riiuwapeo mengaagiun nge epwe fangenoa epeo pwe mengaagiun manna esoar mengaagiun, iwe nge iyo na eyor mwongo reen nge epwe fang ngaeniir aaemweoi.”

¹² Aaemweoi rhoan iyoion tax re itto pwe repwe paptismus, iwe nge ra aeiineow pwe, “Sinsei, meeta aemaem aeipwe feeori?”

¹³ Nge iiy a aengaeniir pwe, “Oawsoapw iyoiy tax temoag saengi minna eno noan oasoapwosoapw.”

¹⁴ Aaemweoi sonotaw ra pwan aeiineow pwe, “Iwe nge aemaem? Meeta aemaem aeipwe feeori?”

Nge a aengaeniir pwe, “Oawsoapw pweipwog senaapiy saengiir aeremas noan amamaaw ngaere oatupwutupw tae kkepas wooan erhai. Oawsoapw tipinap saengi minikkena paniuwaemi noan engaang.”

¹⁵ Aar aepiniugiuniug aeremas a tettemoag noa reen miniwe mwaenian, iwe nge a rhaepetae aar niunniuwaennei ngaere teorh maeni pwe John minne Kristus.

¹⁶ John a aengaeniir oanongeer noa pwe, “Ngaang iya paptismusaegaemi reen rhaan, iwe nge erhai ina epwe itto nge e taegias me mmwaei. Ngaang mwo nge ese fin ipwe pwaeisi geeogeeon nokkaan. Iiy epwe paptismusaegaemi ngaeni Espritu Santus me aengaet.

¹⁷ A kkemwarh aan sepwin pwe epwe aeyimweoiuw fesaenngiy faiun saengi peeon. Iwe, epwe ioni fengaenniy faiun nge a iseni nong noan aan imwaen iseis, nge peeon epwe oatoranong noan aengaet we ese mmwenen gunnoa.”

¹⁸ Etowunap mesemesaan aaen John fenaiuw Kkepas Mwamwaai we ngaeniir aeremas nge e aemaemaewa ngaeniir pwe repwe ssiuweniy mene-weer.

¹⁹ Iwe nge John a soong ngaeni *Governor* Erotes, pwe igiwe e rhoan ngaenne aeni Herodias, iwe rhoan ngaenneyaen mwaaen we pwiin, iwe me igiwe e towunap min aenneew kkewe efeori.

²⁰ Iwe egius mwo nge Erotes a faer gin feeori aenneewa noa pwe a iseni nong John noan kanepwus.

Aaen Jesus Paptismus (Mat 3.13-17; Mark 1.9-11)

²¹ Mwirin aar oanongeer aeremas paptismus, Jesus a pwan paptismus. Nugunupaen aan maeipin nge a susu noa naaeng,

²² iwe nge Espritu Santus a ittiw wooan eweei rhag erhai *dove*. Iwe nge eew mangiungiu a ittiw me noan naaeng nge a aepesa pwe, “Een naeyi mwaaen aerhaengerhaeng. Iye efin tipaei reen.”

Rhaepeto Kkewe Aaen Jesus (Mat 1.1-17)

²³ Oatowe Jesus a rhaepetae aan engaang, nge a eniig raegin. Aeremas re niuwaennei pwe iiy naiun Joseph, iwe naiun Heli,

²⁴ iwe naiun Matthath, iwe naiun Levi, iwe naiun Melchi, iwe naiun Jannai, iwe naiun Joseph,

²⁵ Iwe naiun Mattathias, iwe naiun Amos, iwe naiun Nahum, iwe naiun Esli, iwe naiun Naggai,

²⁶ iwe naiun Maath, iwe naiun Mattathias, iwe naiun Semein, iwe naiun Josech, iwe naiun Joda,

²⁷ iwe naiun Joanan, iwe naiun Rhesa, iwe naiun Zerubbabel, iwe naiun Shealtiel, iwe naiun Neri,

²⁸ iwe naiun Melchi, iwe naiun Addi, iwe naiun Cosam, iwe naiun Elmadam, iwe naiun Er,
²⁹ iwe naiun Joshua, iwe naiun Eliezer, iwe naiun Joram, iwe naiun Matthat, iwe naiun Levi,
³⁰ iwe naiun Simeon, iwe naiun Judah, iwe naiun Joseph, iwe naiun Jonam, iwe naiun Eliakim,
³¹ iwe naiun Melea, iwe naiun Menna, iwe naiun Mattatha, iwe naiun Nathan, iwe naiun David,
³² iwe naiun Jesse, iwe naiun Obed, iwe naiun Boaz, iwe naiun Salmon, iwe naiun Nahshon,
³³ iwe naiun Amminadab, iwe naiun Admin, iwe naiun Arni, iwe naiun Hezron, iwe naiun Perez, iwe naiun Judah,
³⁴ iwe naiun Jacob, iwe naiun Isaac, iwe naiun Abraham, iwe naiun Terah, iwe naiun Nahor,
³⁵ iwe naiun Serug, iwe naiun Reu, iwe naiun Peleg, iwe naiun Eber, iwe naiun Shelah,
³⁶ iwe naiun Cainan, iwe naiun Arphaxad, iwe naiun Shem, iwe naiun Noah, iwe naiun Lamech,
³⁷ iwe naiun Methuselah, iwe naiun Enoch, iwe naiun Jared, iwe naiun Mahalaleel, iwe naiun Kenan,
³⁸ iwe naiun Enosh, iwe naiun Seth, iwe naiun Adam, iwe naiun Deus.

4

Sessoaton Jesus

(Mat 4.1-11; Mark 1.12-13)

¹ Enoa sefaaeneto Jesus me reen pwupwu we Jordan nge a sseog noa reen Espritu Santus iwe nge Espritu Santus a paeninoa noan *desert*,
² nge Saetan a noa soatoni me ee noan faaeig raaen. Noan oanongaen raaenin kkewe nge ese mwongo, ina miniwe a meyaefi pecchai reen.
³ Saetan a aengaeni pwe, “Ngaere een Naiun Deus, wopwe aengaenir faai kaan pwe repwe ssiuweng ngaeni fenoawa.”
⁴ Jesus a paniuwaeni pwe, “Pwapwior we e Santus e aepesa pwe, ‘Saapw fenoawa rhag minne aeremas repwe menaw reen.’”
⁵ Iwe Saetan a pwigitaee weeinaaeng nge a noa pwaeri ngaeni reen rhag eew oat oanongaen mweoi me noan faeinaengiy.
⁶ Saetan a aengaeni pwe, “Ipwe ngaenneog oanongaen mamaaw kkeei me oanongaen mmwen kkeei. Oanongaen nge nemaeniaei, nge ipwe fang ngaeni iyo iye tipaei ipwe ngaenniei.
⁷ Oanongaen minikkeei nge epwe no pwe oamw igine wopwe oassotupw ngaeniaei.”
⁸ Jesus a paniuwaeni pwe, “Pwapwior we e Santus e aepesa pwe, ‘Wopwe oassotupw ngaeni Deus na oamw Soamwoon nge iiy rhag wopwe engaang ngaeni.’”
⁹ Iwe Saetan a pwigi noa Jerusalem nge a noa iseni tae pwiuneoi we oarosaen taegias me reen *Temple* we, nge a aengaeni pwe, “Ngaere een Naiun Deus nge wa oatoroagotiw me igeee.
¹⁰ Pwe iwe Pwapwior we e Santus e aepesa pwe, ‘Deus epwe akkiuneeor naiun angkenus repwe aemmwenoag.’
¹¹ Nge epwan aepesa pwe, ‘Repwe ammwarhiug tae noan paiiur pwe pirhemw mwo nge ete woas ngaeni faai.’”
¹² Iwe nge Jesus a paniuwaeni pwe, “Pwapwior we e Santus e aepesa pwe, ‘Wosoapw soatoni Deus na oamw Soamwoon.’”

¹³ Weni mwirin aaen Saetan soatoni Jesus, iwe nge a nigit noa mwo.

*Jesus a Rhaepeta Aan Engaang me Noan Galilee
(Mat 4.12-17; Mark 1.14-15)*

¹⁴ Iwe Jesus a sefaaen ngaeni Galilee, iwe nge miniwe maemaewaen Espritu Santus eno reen. Miniwe fioangon a rheeo fetaen wooan oanongan noa faniuw we.

¹⁵ A fenai fetaen noan wutteer Jews nge oanongaen aeremas ra mwaar reen.

*Rhooan Nazareth Rese Aetiwa Jesus
(Mat 13.53-58; Mark 6.1-6)*

¹⁶ Jesus a noa Nazareth, igiwe effooan me ee, nge wooan Sabbath a noa noan wutteer Jews we taepen rhag miniwe egaen feeori. A iutae pwe epwene aeraegi Pwapwior we e Santus,

¹⁷ nge ra ngaennee pwapwior we aaen profeta Isaiah. A suginoa pwapwior we nge a weri pwijuneoi we effoat me ee,

¹⁸ “Kkemenaen Soamwoon a no wooai
pwe iya ffin tae ipwe pwigito Kkepas Mwamwaai eei reer rhooa affayeo.
Iya fangenoa ngaang ipwe oaronga ngaenir rhooa kanepwus pwe iir ra saenetaeg

nge i aecchipwaar rhooa parh pwe repwe ffat noa,
me pwan aengesaar noa rhooa waeiraes

¹⁹ iwe me ipwe oaronga ngaenir aeremas pwe a toori oatowe Soamwoon epwe aemenewaar naiun aeremas.”

²⁰ Jesus a oawunnu noa pwapwior we, a ateeow sefaaeniy ngaeni aeremas we e tipaengi, iwe nge a mooat tiw. Oanongeer aeremas kkewe noan wutteer Jews we nge a meseer ngaeni rhag,

²¹ Iwe nge a aengaenir pwe, “Soapwon kkepas e noan Pwapwior we e Santus iye igina nge a pwae noa pwe ennet, iye oawwa rongorong ngaeni.”

²² Ra piungiun mwaar reen nge ra maengi noannei nong mwamwaaiun ititin aan kkepas. Ra iura pwe, “Saapw iiy mwaaen we naiun Joseph?”

²³ A aengaenir pwe, “Igiuneei firhiy pwe oawpwe aengaei sefaaeniai kkepas een, ‘Toagota, aecchipwa oanongoamw.’ Oawpwe akkiuneowaei pwe ipwe feeori me nee pwugusaei minikkewe oaw rongorong pwe ifasiun gaen feeori me noan Capernaum.”

²⁴ Jesus a iura pwe, “Ennetae, ipwe aengenigaemi, pwe profeta nge ese gacch aar aewenimmwaar me noan pwuguseer.

²⁵ Aiussaening ngaeniaei: regin towunap rhooopwut kka ra mae rhooaan ngaenneyeer me wooan Israel noan oatowe oaton Elijah, oatowe esooar worhow noan enuuw me esoapw raeg iwe a itto eew naengeta gin oarosaen temoag wooan oanongaen faniuw we.

²⁶ Inamwo nge esooar erhai ne refangenoa Elijah reen me wooan Israel, pwe aeggaen erhai rhag rhooopwut a mae rhooaan ngaenneyan eno wooan Zarephath me wooan faniuw na Sidon.

²⁷ Iwe nge ra gin ssow rhooa affayeo reen kaenepaai kka reno wooan Israel reen oatowe oaton Elisha; nge inamwo nge erhai mwo me neeiir nge ese cchipw, pwe aeggaen Naaman we erhai re Syria.”

²⁸ Igiwe aeremas kkewe reno noan wutteer Jews we ra rongorong miniwe nge a gin teeo ngaenir aar soong.

²⁹ Ra iutae rhag, iuriutepa wow Jesus me noan aepinoamw we, nge ra pwigitae wooan wungaen rhug we eno miniwe aepinoamwoor wooan. Re menaen pwe repwe aerheei noa me wooan rhug we,

³⁰ iwe nge iiy etowow rhag me nugunupaen pwuwa we nge a faaeraeg noa.

*Mwaaen we Eyor Aniu Aenneew Wooan
(Mark 1.21-28)*

³¹ Iwe Jesus a noa wooan Capernaum, eew aepinoamwon Galilee, a noa fenai ngaeniir aeremas wooan Sabbath.

³² Ra mwaar reen aan fenai, pwe igiwe eyor kkemenaen aan fenai.

³³ Noan wutteer Jews we nge eyor erhai mwaaen eyor aniu aenneew wooan; a gin aekkepwas temoag tae,

³⁴ “Ah! Meeta oamw mwerhaen ngaenigemaem, Jesus re Nazareth? Wa itto igeeli pwe wopwe oatoaropagemaem? Ngaang i giuneei een iyo: een mwaaenessoar we rhoan pweipwogin kkepas we aaen Deus!”

³⁵ Jesus a anniugiu ngaeni aniuwe pwe, “Wopwe anniug noa nge wa siunoa me wooan mwaaen na!” Iwe nge aniu aenneew we a aerheei tiw mwaaen we wenimmweer rhoowe nge a teeowow me wooan, nge esooar minne eoawoasu ngaeni.

³⁶ Aeremas ra piunguin mwaar nge ra kkepas fengaen wooar pwe, “Meeta taeppen kkepas kkeei? Eyor kkemenaen me maemaewaen aaen mwaaen een kkepas ngaeniir aniu aenneew nge ra siu!”

³⁷ Iwe miniwe fioangon Jesus a rheeoi fetaen wooan faniuw we.

*Jesus a Aecchipwa Towunepaen Aeremas
(Mat 8.14-17; Mark 1.29-34)*

³⁸ Jesus a siusaengi wutteer Jews we iwe a noa reen miniwe pwugusaen Simon. Niewe inaan pwiuniwaen Simon e semwaai pwe egin pwerhikkar ginin, iwe ra kkepas ngaeni Jesus reen mmwenen.

³⁹ A noa iwe a noa iu oaron niewe iwe nge a aengaeni pwerhikkar we pwe epwe siusaengi niewe. Iwe rhag nge esaer noa miniwe pwerhin niewe, iwe niewe a rhimwitae pwe a ittae feor fetaen minne epwe tipaengi ngaeniir.

⁴⁰ Enoa mwirin tupwunoan aenet nge oanongeer rhoowe eyor rhooa semwaai reer nge ra pwigiir to reen Jesus. Eisi tae paiun wooar oanongeer nge a aecchipwaar tae.

⁴¹ Mwuniaan mwo nge re piunguin teeowow me wooar rhooa towunap we nge ra itiwow aekkepwas pwe, “Een mwaaen we Naiun Deus!”

Jesus a kkepas sseor ngaeniir aniu aenneew kkewe pwe resoapw kkepas, pwe igiwe re giuneei pwe iiy miniwe Kristus.

*Jesus e Fenai Noan Wutteer Jews Kkewe
(Mark 1.35-39)*

⁴² Wenimmwaei raaen Jesus a nigiti aepinoamw we iwe a noa eew pwineoi ne iiy noa rhag. Aeremas a rhaepetae aar giutta fetaeneei, iwe nge renoa weri, nge ra aegina aar ammwarhiu tiw pwe ete rhiuwen siunoa.

⁴³ Iwe nge iya aengaeniir pwe, “Ngaang ipwan noa fenaiuw Kkepas Mwamwaai we reen Mweoiun Deus me noan aepinoamw kena aekkaew, pwe ina minne Deus efang ngaang pwe ipwe noa feeori.”

⁴⁴ Iwe a noa fenaiuw noan oanongan noa wutteer Jews me wooan faniuw we.

5

*Jesus a Faingir Rhoowe Mesaemmwaen Rhooan Kkayeo
(Mat 4.18-22; Mark 1.16-20)*

¹ Eraen nge Jesus eiu reen meoneoiniun we Gennesaret nipwaen aar aeremas aekkaetemaegin to pwe repwe itto rongorong miniwe kkepesaen Deus.

² A weri riiufoarh pwoot pwe ra iuriur tae wenippiy: nge rhoaan fita kkewe ra nigiti pwe ra noa wupwuuuw noa wuug kkewe naiur. ³ Jesus a toonong noan efoarh pwoot kkewe—pwoot we waen Simon—nge a tingoareei ngaere epwe mmwenen amman saengi egius mwoarhoisaet. Jesus a mooat noan pwoot we nge a fenai ngaenir rhooa towunap we.

⁴ Enoa moann aan mwaenieniy, nge a aengaeni Simon pwe, “Ammaan ffoarh wow igma enennoan ee, nge een me rhooa kkomwu rhinoamw oawwa aerheei tiw wuug mwu naimi pwe oawpwe fita.”

⁵ Simon a paniuwaeni pwe, “Soamwoon, efoarh ngaeni nee pwoong we aemaem fita nge esooar iig e aei nipaeni. Iwe ngaere ina minimwu wo iura, ina nge iya iseni tiw wuug kka naimaem.”

⁶ Ra iseni tiw wuug kkewe nge ra igin niyap iig nge aetae epwene ffeir wuug kkewe.

⁷ Iwe nge ra taenepom ngaenir rhooa kkewe rhoaniuwaar wooan pwoot we efoarh pwe repwe itto tipaengiir. Re itto iwe ra itto oawuta pwoot kkewe waar esseogtae reen iig aetae pwoot kkewe repwene mweoius.

⁸ Oatowe Simon Peter a weri miniwe a wen, a foatotiw weni mmwaen Jesus nge a iura pwe, “Siu saengiae Soamwoon! Ngaang erhai mwaaen monofit!”

⁹ Iiy me rhooa kkewe ra riutae reen towunepaen iig kkewe ra nipaeni.

¹⁰ Pwan ina rhag miniwe ewen ngaenir James me John, mwaaen kkewe naiun Zebedee. Jesus a aengaeni Simon pwe, “Wosoapw mesag: saengi igma a noa een wopwene niyap aeremas.”

¹¹ Ra iuriutae pwoot kkewe waar wenippiy, nigititiw oanongaen aegiaeg, nge ra tapweei noa Jesus.

Jesus a Aecchipwa Erhai Mwaaen

(Mat 8.1-4; Mark 1.40-45)

¹² Eew oat nge Jesus eno noan eew aepinoamw igiwe erhai mwaaen eweri eew kaenepaai eno ee. Igiwe eweri Jesus, a foatotiw wooan ppweon nge a aeffaenipirhe ngaeni pwe, “Menap, aere womwerhaen, wa aecchipwanoa aaei semwaai!”

¹³ Jesus e angenoa nge a geotteopa mwaaen we, nge a paniuwaeni pwe, “Ngaang imwerhaen, wone cchipw noa!” Reen rhag oatowe nge kaenepaai we a rhiuw saengi mwaaen we.

¹⁴ Jesus a ammwir ngaeni pwe, “Esooar ne wopwe aengaeni minnei, nge faaeraeg uwen noa reen patere pwe epwe weriug. Iwe nge a feeori oasoar we Moses e akkiuneo, pwe epwe pwaeri ngaenir aeremas pwe wa nimegacch noa.”

¹⁵ Miniwe kkepesaen Jesus a rheeo fetaen, iwe pwuwaen aeremas ra maegeto repwe itto aiussaening ngaeni nge aecchipwa aar semwaai.

¹⁶ Iwe nge egaen noa pwuwaen aeremas ee, nge a noa maeipin ee.

Jesus a Aecchipwa Erhai Mwaaen Maemerhoar

(Mat 9.1-8; Mark 2.1-12)

¹⁷ Eraaen nge Jesus efenai, nge aaemweoi Pharisees me sinsein anniug remooat igiwe, nge re itto me wooan aepinoamwon Galilee me Judea me Jerusalem. Kkeman we aaen Soamwoon eno wooan Jesus pwe epwe mmwenen aecchipwaar rhooa semwaai.

¹⁸ Aaemweoi mwaaen re pwigito erhai mwaaen e maemerhoar wooan eew giegyi, re aegina pwe repwe pwigi nong noan iimw we nge ra oawnatiw weni mmwaen Jesus.

¹⁹ Pwonna reen pwuwaen aeremas we, iwe rese mmwenen repwe toori Jesus. Iwe ra teeotae wooan iimw we, ra feingi noa aekkaew oason iimw we,

nge re atairaetiw mwaaen we noan giegyi we nugunupaen pwuwa we me weni mmwaen Jesus.

²⁰ Igiwe Jesus a weri nepaen aar niugiuniug rhooawe, a aengaeni mwaaen we pwe, “Naeyi, monofitimw a mwusunoa.”

²¹ Sinsein anniug kkewe me Pharisees kkewe a rhaepetae aar niuwaennei fengaen wooar pwe, “Iyo mwaaen e aepesa aenneewa Deus! Deus rhag minne emmwen epwe oamwusa noa monofit!”

²² Jesus e giuneei niunniuwaen kkewe aar nge a aengaeniir pwe, “Meeta oaw niuwaennei minikkena e aenneew reen?

²³ Emererhaeg pwe sipwe aepesa pwe, ‘Monofitimw a mwusunoa,’ aere sipwe aepesa pwe, ‘Iutae wa faaeraeg noa?’

²⁴ Ipwe pwaeri ngaenigaemi pwe mwaaen we Naiun Aeremas eyor mae-maewan wooan soanop pwe epwe oamwusa noa monofit.” Iwe a aengaeni mwaaen maemerhoar we pwe, “Ipwe aengaeniug, iutae, pwigi giemw wa noa noan imwoamw!”

²⁵ Iwe rhag mwaaen we a iutae me wenimmweer rhooawe, a pwigi miniwe gien iwe ewon wooan, a noa nee pwugusan, a noa aepingepinga Deus.

²⁶ Oanongeer rhooawe ra gin riutae reen aar mesag, nge ra aepingepinga Deus nge ra iura pwe, “A inamwo aemwaeraeran minikka sa weri noan raaeneei!”

Jesus a Faangi Levi

(Mat 9.9-13; Mark 2.13-17)

²⁷ Mwirin minneei, Jesus a noa weri erhai rhooan iyoiyon tax itan Levi, emooat noan aan office. Jesus a aengaeni pwe, “Itto tapweaei.”

²⁸ Iwe Levi a iutae nigit oanongaen aegiaeg nge a tapweei noa mwirin.

²⁹ Oatona nge Levi a feeori eew gupwun gin temoag me reen iimw na imwan pwe aaen Jesus, iwe nge neei rhooan itto tapweei gupwun we nge regin ssow rhooan iyoiyon tax me pwan aaemweoi aeremas.

³⁰ Aaemweoi Pharisees me sinsein anniug re appaniuwaen ngaeniir rhooan kkayeо kkewe naiun Jesus re iura pwe, “Meeta oawiun nge oaw mwongo ngaeniir rhooan iyoiyon tax me rhooa aenneew wegitaegir kkomwun reen?”

³¹ Jesus a paniuwaeniir a iura pwe, “Rhooakka rese semwaai rese noa reer toagota, pwe rhooakka refaer semwaai.

³² Ngaang ise itto pwe ipwe faangiir rhooa mwamwaai, pwe faer rhooa monofit pwe repwe toagun saengi monofitiir.”

Kkepas Aeiineon Aecchigipin

(Mat 9.14-17; Mark 2.18-22)

³³ Aekkaaemweoi aeremas re aengaeni Jesus pwe, “Rhooan kkayeо kkewe naiun John regaen aecchigipin ffoarh noa rhag nge re maeipin ffoarh, pwan ina rhag rhooan akkiuneo kka naiur Pharisees; nge rhooan kkayeо kkomwu noawumw re mwongo noa rhag me re iun noa rhag.”

³⁴ Jesus a paniuwaeniir pwe, “Oawniwaennei pwe epwe mmwen oaw-soapw oamwongoor aeremas kkewe re itto reen gupwunon appwiuniupai igiwe bridegroom we e rhiuwen no reer? Aapw!

³⁵ Nge epwe itto raaenin na repwe pwigi saengiir bridegroom we, nge ina oatona repwene aecchigipin noa.”

³⁶ Jesus a pwan aengaeniir fioangon awewe een: “Oawsoapw taeringa eew mengaag ffeo pwe oawpwe pinisa ngaeni eew mengaag maerhiy. Esooar ipitan oawpwe feeori. Iwe ngaere epwe ina, oawwa taeringa mwaenenei noa

mengaag ffeo we pwe ikka mengaag ffeo we ese aeffitaeg ngaeni mengaag maerhiy we.

³⁷ Oawsoapw pwan aenianong *wine* ffeo noan nenien *wine* maerhiy, pwonno *wine* ffeo we epwe taeringatiw nenien *wine* maerhiy we, iwe a nipi noa *wine* we nge nenien *wine* we a ffeir noa.

³⁸ *Wine* ffeo ina oawpwan ngoannong rhag noan nenien *wine* ffeo!

³⁹ Nge esooar erhai ne epwe iun *wine* maerhiy nge epwe pwan rhiuwen iun *wine* ffeo. Pwe e iura pwe, ‘*Wine* kka e ssiunaei minne enneo.’”

6

Kkepas Aeiineon Sabbath (Mat 12.1-8; Mark 2.23-28)

¹ Jesus a feffaaeraeg noa neeiin maetaen *wheat* wooan raaenin Sabbath. Rhooan kkayeo kkewe naiun ra ginigin iuwoapwon *wheat* kkewe, ra mwunuti fetaeneei noan paaiur, nge re angi minikkewe faiun.

² Aekkaerhai Pharisee kkewe ra aeiineow pwe, “Meeta oawwa feeori miniwe oasoapwosoapw we aarh e iura pwe oawsoapw feeori wooan Sabbath reen?”

³ Jesus a paniuwaenir pwe, “Oawse aeraegi mwo miniwe David efeeori noan oaton we iiy me rhooa kkewe naiun ra pecchai?

⁴ Iwe etonong noan imwaen Deus, nge a pwigi fenoawa kkewe re aeni oasoar ngaeni Deus, nge a angi nge a pwan ngaenner mwaaen kkewe rhoaniawan. Miniwe nge e aenneew ngaeni aarh oasoapwosoapw pwe aeremas repwe angi pwe aeggaen patere rhag.”

⁵ Iwe nge Jesus a soapwei noa pwe, “Minna Naiun Aeremas minne Soamwoonin Sabbath.”

Erhai Mwaaen Mae Paiun (Mat 12.9-14; Mark 3.1-6)

⁶ Wooan eew noa raaenin Sabbath nge Jesus a noa noan wutteer Jews a noa fenai. Erhai mwaaen eno ee nge e maemerhoar pai mwaaenen.

⁷ Aaemweoi sinsein anniug me aaemweoi Pharisees re giutta aekkaew rhaepin minikka repwe oaturu Jesus wooan, iwe ina faan ra pipiiy gacchiuw Jesus aere epwe aecchipwaar aeremas wooan Sabbath.

⁸ Nge Jesus e giunnei niunniwaen kkewe aar nge a aengaeni mwaaen we pwe, “Iutae nge wa itto iu wenimmwani.” Mwaaen we a iutae nge a itto iu igiwe.

⁹ Iwe nge Jesus a aengaenir pwe, “Ipwe aeiineogaemi: meeta aarh anniug e aengaenigirh sipwe mmwenen feeori noan raaenin Sabbath? Meeta aarh anniug e aengaenigirh sipwe mmwenen feeori noan raaenin Sabbath? Sipwe tipaengi aeremas ngaere sipwe oawoasuur? Sipwe aemenewaar, aere sipwe niir noa?”

¹⁰ A fan fetaen neeiir oanongeer, iwe nge a aengaeni mwaaen we pwe, “Aeitiwow poawumw.” Iwe mwaaen we a aeitiwow paiun, iwe a mamaaw sefaaen.

¹¹ A gin teoteeo aar soong rhooa kkewe iwe ra pwiungiuwwoar meeta e repwene feeori ngaeni Jesus.

Jesus a Finiir Seig me Riiurhai Oapostonus (Mat 10.1-4; Mark 3.13-19)

¹² Oatonaan nge Jesus a ittae wooan eew taeiit epwe ittae maeipin, iwe a ittae no aegini noa epwoong reen aan ittae maeipin ngaeni Deus.

¹³ Enoa raaen tae, a faingir rhooan kkayeо kkewe nge a finiir seig me riiurhai me neeiir, nge a aeita ngaenir pwe oapostonus:

¹⁴ Simon (iwe a aeita ngaeni pwe Peter) iwe nge Andrew we pwiin; James me John, Philip me Bartholomew,

¹⁵ Matthew me Thomas, James we naiun Alphaeus, iwe me Simon (iwe regaen iura pwe man menat),*

¹⁶ Judas we naiun James, iwe me Judas Iscariot, iwe e fangenoa tinnimaen Jesus.

Jesus e Fenai Nge e Aecchipwaar Aeremas

(Mat 4.23-25)

¹⁷ Igiwe Jesus enoa ittiw me wooan taeiit we iiy me oapostonus kkewe, a ittiw iunoa nefenapi reen eew mweoiuyaen rhooan kkayeо kkewe naiun. Eew pwuwaen aeremas temoag a no ee, nge remaegeto me Judea me Jerusalem me aepinoamw kkewe wenepeigin faniuwaen Tyre me Sidon;

¹⁸ remaegeto repwe itto aiussaening ngaeni me repwe itto aecchipwa aar semwaai. Oanongeer rhooakka eteeotae mwuniaan wooar nge remaegeto nge a aecchipwaar.

¹⁹ Oanongeer aeremas nge re aetemaegin repwe geotteopa, pwe miniwe kkemenan e itiwow me wooan nge a aecchipwaar noa oanongeer.

Kker me Niemaam

(Mat 5.1-12)

²⁰ Jesus a toagun ngaenir rhooan kkayeо kkewe naiun nge a iura pwe, “Oaw wenepwu aaemi rhoоa mwaenene; pwe minna Mweoiun Deus a no pwe aaemi!

²¹ Oaw wenepwu aaemi rhoоa pecchai igina; pwe aaemi oawpwene faeyemwaai! Oaw wenepwu aaemi rhoоa nee tip cchoaw; pwe aaemi oawpwene kekkaei!

²² “Oaw wenepwu aaemi igine re aeserhoawuna gaemi, asiugaemi, aesaewa gaemi, aepesa gaemi pwe oawaenuew, pwe faaen ngaeni mwaaen we Naiun Aeremas!

²³ Oawkker igine a wen minna ngaenigaemi nge oawittae maan fetaen reen aaemi mesaeig, pwe a yor paniuwaemi ina eigin faeredit me naaeng. Pwe rhoоa kkewe rhaepetoor repwan feeori taeppen minneei ngaenir profeta kkewe.

²⁴ Nge ifa mwo aenneewan ngaenigaemi aaemi rhoоamwu oawwiin igina; oawwa gaen aemmererhaeg rhag igina!

²⁵ Ifa mwo aenneewan ngaenigaemi rhoоamwu oawwa igin faeyemwaai igina; oawpwene pecchai!

Ifa mwo aenneewan ngaenigaemi rhoоamwu oaw aemweireyiir fetaen igina; oawpwene nee tip cchoaw me saeng!

²⁶ “Ifa mwo aenneewan ngaenigaemi igine oanongeer aeremas repwe aepesa gacchumi; pwe rhoоawe rhaepetoor ina rhag miniwe repwan aepesa reer profeta oatupwutupw kkewe.

Aerhaengiir Rhooan Kkoapwut

(Mat 5.38-48; 7.12a)

* **6:15 man menat:** erhai mwaaen e fliow ngaenir sonotawaen Rome faaen itaan faniuwan.

²⁷ “Nge ipwe aengaenigaemi aaemi rhooan aiussaening ngaeniaei: aerhaengiir rhooa oapwutaegaemi, ffeeor mwamwaai ngaeniir rhooa aesarhoawuna gaemi,

²⁸ oaw aewenepwuwaar rhooan soong ngaenigaemi, nge oaw maeipinaar rhooa feoffeelor aenneew ngaenigaemi.

²⁹ Ngaere erhai e pigiri epeig ne oawusupoamw, wa wegeti ngaeni peig na epeig pwe epwe pwan pigiri; ngaere erhai epwigi noa mengagiumw, wa pwan ngaennee pwan epeo.

³⁰ Ngaenneer iyo kena rhooan tingoareog aegiaeg, me ngaere erhai e pwigi pisaegimw nge wosoapw rhiuwen tingoar sefaaen no.

³¹ Oawpwe feeori ngaeniir aeremas taeppen meeta na aaemi oaw mwerhaen pwe repwe feeori ngaenigaemi.

³² “Aere oaw aerhaengiir rhag rhooa na re aerhaengigaemi, meeta faaen aaemi oawpwe pwigi eew wenepwu? Rhooa kkewe mwo rhooa monofit nge repwan aerhaengiir rhooa kkewe re aerhaengiir!

³³ Ngaere igine oawfeeor mwamwaai ngaeniir rhag rhooakkena reffeeor mwamwaai ngaenigaemi, meeta faaen aaemi oawpwe pwigi eew wenepwu? Rhooa monofit kkewe mwo nge repwan feeori taeppen rhag!

³⁴ Ngaere oawfang pisaegimi ngaeniir rhag rhooakkena oaw niunniwaenaei pwe repwe aeseefaaeni niuwenin, meeta faaen aaemi oawpwe pwigi eew wenepwu? Rhooa monofit mwo nge repwan mmwoon ngaeniir rhag rhooa monofit, pwe repwe pwan pwigi rhag nepaen miniwe refang!

³⁵ Aapw! Aerhaengiir rhooan oapwutaegaemi me ffeeor mwamwaai ngaeniir; oawfang ngaeniir pisaegimi nge oawsoapw niunniwaennen repwe aeseefaaenin. Ina nge minna wenepwuwaemi epwe temoag noa, nge oawpwe no pwe aaemi naiun Deus na oarosaen taegias. Pwe iiy nge emwamwaai ngaeniir rhooa kkewe resonap me aeremas aenneew.

³⁶ Oawpwe faayeow taeppen rhag aaen Semaemi faayeow ngaenigaemi.

Kapwiungiur Aaemweoi (Mat 7.1-5)

³⁷ “Oawsoapw apwiungiu aeremas, nge ina nge Deus esoapw pwan apwiungiugaemi; oawsoapw oamonofitiir aaemweoi, nge ina nge Deus esoapw pwan oamonofitigaemi; oaw oamwusaar noa aaemweoi, nge ina nge Deus epwe pwan oamwusagaemi.

³⁸ Oawpwe fang ngaeniir aaemweoi, pwe ina nge Deus epwe pwan fang ngaenigaemi. Ewaer, pwe ammwenemi ina epwene igin towunap, ina esoapw faer noan paimi iga oawpwe ammwarhiu fengaenniy. Nepaen minna oawaeyae ngaeniir aaemweoi, nge ina nepaen minne Deus epwe pwan aeyae ngaenigaemi.”

³⁹ Iwe Jesus a aengaenir eew fioangon awewe: “Erhai mwaaen parh mesan esoapw mmwenen wummwuw erhai ne epwan parh. Ngaere ewummwuw, nge repwe ppiung nong ne niipw iir me riiurhai.

⁴⁰ Essoar erhai aeteei suguun epwe taegias saengi aan sinsei; pwe oanongeer aeteei suguun nge epwe noa moann ngaeniir aar suguun nge repwe naaen aeffitaeg ngaeniir aar sinsei.

⁴¹ “Meeta wa weri peipei na noan mesaen pwiimw, nge wose weri soapwon irae mwu noan mesoamw?”

⁴² Epwe ifa wusun oamw aengaeni pwiimw, ‘Moawwerh pwiiy, itto ipwe tipwei wow peipei mwu noan mesoamw,’ nge wose weri soapwon irae mwu noan mesoamw een? Een erhai man oatupwutupw! Mmwaen tipwei wow

soapwon irae mwu noan mesoamw, nge wopwe naaen weri gacchiuw oamw tipwei wow peipei na noan mesaen ina pwiimw.

Efoarh Waniwan me Uwaan

(Mat 7.16-20; 12.33-35)

⁴³ “Efoarh waniwan mwamwaai esoapw uwa aenneew, nge efoarh waniwan aenneew esoapw uwa mwamwaai.

⁴⁴ Oanongaen mesemesaen waniwan nge sigiuneei reen minikkena uwaan; wosoapw mmwenen gin *fig* me reen irae towfanfan ngaere gin *grape* saengi fetin towfanfan.

⁴⁵ Erhai aeremas gacch epwe oatowowuw mini gacch saengi gacchiun noan tipan, nge erhai aeremas aenneew epwe oatowowuw mini aenneew saengi aenneewaen noan tipan. Pwe iga aaw aepesa meeta kena esseog noan pwunn.

Riiurhai Rhooan Kaiu Iimw

(Mat 7.24-27)

⁴⁶ “Meeta faan oawfaingi ngaeniaei pwe, ‘Soamwoon, Soamwoon,’ nge oawse feeori minne i aengaenigaemi reen?

⁴⁷ Erhai ne eitto reei nge e aiussaening minikka mwaeniaei nge e tapwee –ngaang ipwe pwaeri ngaenigaemi meeta na iiy eweei.

⁴⁸ Iiy eweei erhai mwaaen e aiuwtae imwan, e genengitiw nipwan taeyifan iimw we imwan nge enoa ssaenitae me wooan porow. Iwe enoa itto pwur we itto parengi iimw we nge ese ffeir iimw we, pwe igiwe egin mamaaw kaiun.

⁴⁹ Nge erhai ne e rongorong mwaeniaei nge ese tapwee, ina nge iiy epwe weei rhag mwaaen we e aiuwtae imwan nge ese ffeor taeyifan; iwe enoa itto pwur we itto parengi iimw we iwe toarop noa, ifa mwo nepaen aan ffeir noa!”

7

Jesus a Aecchipwa Rhooan Engaang we Naiun Soamwoonin Sonotawaen Rome

(Mat 8.5-13)

¹ Oatowe Jesus a moannon aepesa oanongaen minikkei ngaeniir aeremas kkewe, nge a noa Capernaum.

² Erhai soamwoonin sonotawaen Rome eno erhai naiun rhooan engaang ne egin aerhaengi; nge rhooan engaang we naiun a gin semwaai nge epwene oaropaen mae.

³ Oatowe soamwoonin sonotaw we a rongorong wunuunun Jesus, a aefengaar noa mwaaen kkewe aar re Jews repwe noa faingito Jesus pwe epwe itto aecchipwa tae rhooan engaang we naiun.

⁴ Ra noa reen Jesus nge ra noa aeffaenipirhe ngaeni, “Mwaaen een nge yor ipitan wopwe tipaengi.

⁵ Egin ffayeo ngaeniir aeremesarh nge iiy wooan oanongan a aiuwtae eew wutteer Jews pwe aarh.”

⁶ Iwe Jesus a tapweer noa rhooawe. Ese taaw saengi iimw we igiwe soamwoonin sonotaw we a aefengaen noa rhooawe maereyaeren pwe repwe noa aengaeni pwe, “Soamwoon, wosoapw aewwaeiraesiug. Pwe saapw ngaang erhai aeremas yor ipitan reen oamw wopwe itto toonong reei noan imwaei,

⁷ nge saapw ngaang erhai aeremas yor ipitan reen aaei ipwe itto ngaeniug. Wopwe aepesa rhag epat kkepas nge rhooan engaang e naeyi epwe mamaaw tae.

⁸ Ngaang mwo nge pwan ngaang erhai mwaaen ino faaen nemaeniaen erhai e soamwoon saengiae, nge epwan yor sonotaw kka reno faaen nemae-niae. Ipwe aengaeni inaan pwe, ‘Wopwe noa!’ iwe a noa; iya aengaeni inaan pwe, ‘Wopwe itto!’ iwe a itto; iwe iya aengaeni rhooan akkiuneo, ‘Feeori minneen!’ iwe a feeori.”

⁹ Jesus a mwaar oatowe erongorong minneen; a saep sefaaen ngaenir mwirhaen aeremas we rettapw to mwirin nge a aengaenir pwe, “Ipwe aengaenigaemi pwe, noan mwo Israel nge isaaen weri mwo taeppen niugiuniug een me ee!”

¹⁰ Iwe rhooawe maereyaeren soamwoonin sonotaw we ra sefaaen noa reen miniwe imwan nge ra noa weri pwe rhooan engaang we naiun a mamaaw noa.

Jesus a Aemenewa Sefaaen Tae Mwaaen we Naiun Rhoapwut we a Mae Pwiuniuwani

¹¹ Weni mwirin rhag oatowe nge Jesus a noa reen eew aepinoamw itan Nain, nge rhooan kkayeo kkewe naiun me eew pwuwaen aeremas re tapweto mwirin.

¹² Iwe oatowe a tooto reen wororaen aepinoamw we, nge ra pwigwow erhai manimae. Mwaaen we emae i rhag naiun erhai rhoapwut iwe a mae pwiuniuwani, towunepaen aeremesaen aepinoamw we re tapwee niewe.

¹³ Igiwe Soamwoon Jesus a weri niewe, iwe a gin faayeow, nge a aengaeni pwe, “Wosoapw saeng.”

¹⁴ Iwe a faaeraeg noa a noa geotteopa kakoonaen manimae we, iwe mwaaen kkewe repwigi ra iug noa. Jesus a iura pwe, “Anian een! Rhimwitae!”

¹⁵ Iwe manimae we a mooat tae iwe a ittae kkepas fetaen, iwe Jesus a fang sefaaen ngaeni niewe inan.

¹⁶ Iwe oanongeer noa ra igin mesag nge ra aepingepinga Deus. Iwe ra iura pwe, “Erhai profeta taegias iye a pwae me neeirh igina! Deus a itto epwe aemenewa naiun aeremas!”

¹⁷ Iwe miniwe kkepesaen Jesus a rheeo fetaen noan oanongaen Judea me pwiuneoi kkewe oaron.

Rhooa Kkewe John Baptist Efang Noa

(Mat 11.2-19)

¹⁸ Iwe rhooan kkayeo kkewe naiun John Baptist ra itto reen John nge ra aengaeni oanongaen minikkewe, iwe e faingiir riiurhai me neeiir

¹⁹ nge a aefengaer noa reen Soamwoon pwe repwe noa aeiyegiy pwe, “Een miniwe re iura pwe epwe itto, aere aeipwe wewweti erhai?”

²⁰ Oatowe ra itto reen Jesus, nge ra iura pwe, “John Baptist e aefengagemaem to reemw pwe aeipwe itto aeiyegiug aere een miniwe re iura epwe itto, aere aeipwe wewweti erhai?”

²¹ Faer oatowe rhag Jesus a aecchipwaar towunepaen aeremas saengi mesemesaen aar semwaai, nge epwan oatowowuur aniu aenneew me wooar, nge e aeffetaar noa rhooa masparh.

²² A paniuwaenir pwe, “Oawsefaaen noa oawwa aengaeni John meeta kka oawwa weri me rongorong: rhooa masparh ra ffatenoa, rhooa pirhemae ra faaeraeg, rhooa kaenepaai ra gacch noa, rhooa saeningapiung ra rongorong, rhooa mae ra menawtae, nge Kkepas Mwamwaai we a fenai ngaenir rhooa affayeo.

²³ Ifa mwo wenepwuweer rhooa se tip mwaramwar reei!”

²⁴ Weni mwirin aar rhooan pweipwogin kkepas kkewe naiun John ra noa, Jesus a kkepas ngaenir aeremas kkewe reen wunuunun John: “Igine oawwa

noa reen John noan *desert* we, meeta minne oaw niuwaen nei pwe oawpwe noa weri? Efoarh fetin e mwoaroro reen aaeng?

²⁵ Meeta minne oawnoa pwe oawpwe weri? Erhai mwaaen kka e memmengaag tae mengaag nning? Rhooa kkomwu re memmengaag tae taeppen minikkena imwu reno rhag noan imwaen *king!*

²⁶ Aengaeniaei, meeta oawnoa pwe oawpwe weri? Erhai profeta? Ooa, ennetaen, oawa weri erhai e taegias saengi erhai profeta.

²⁷ Pwe John miniwe Pwapwior we e Santus e iura pwe, ‘Deus a kkepas, ngaang ipwene fangetiw naeyi rhooan pweipwogin kkepas me weni mmwoamw pwe epwe noa maeneti ennepoamw.’

²⁸ Ipwe aengaenigaemi pwe John ina e taegias saengi aeremas towunap kka reno wooan soanop. Iwe nge manna oarosaen git me noan minna Mweoiun Deus ina e taegias saengi John.”

²⁹ Oanongeer aeremas nge re rongorong miniwe; iir me rhooan iyoiyon tax kkewe re rongorong minikka mwaeniaen Deus nge ewenewen, iwe oanongeer noa ra noa baptismus reen John.

³⁰ Iwe nge Pharisees me sinsein anniug kkewe rese tipaeni aaen Deus oatoat ngaeniir, iwe ina minne rese tipaeni no repwe baptismus reen John reen.

³¹ Jesus a pwan iura pwe, “Iwe, meeta ipwe aweweei ngaeniir aeremesaen mweoi e igina? Eifa wunuunuur?”

³² Ra aeffitaeg ngaeniir rhag wonigaet kkewe remooat noan nenien chuwaai. Eew mwiirh nge re iyaekkepwas ngaeniir aaemweoi, ‘Aemaem aeiya pwai kker ngaenigaemi nge aaemi oawse maan! Aemaem aeiya arhiuwerhiuw, nge aaemi oawse saeng!’

³³ John Baptist a itto, e aecchigipin nge ese pwan iun *wine*, nge aaemi oawiura pwe, ‘Iiy eyor aniu aenneew wooan!’

³⁴ A itto Naiun Aeremas, e mwommwongo nge eiun nge oawiura pwe, ‘Oawpiiy mwaaen een! Iiy erhai mwaaen mwonganap me iun *wine*, nge maereyaerer rhooan iyoiyon tax me rhooa monofit!’

³⁵ Iwe nge minna repiaen Deus a pwae noa pwe ennet reer aeremas kka re tapweei.”

Jesus me Reen Imwaen Pharisee we Simon

³⁶ Erhai Pharisee etengaeg Jesus epwe noa mwongoon faaef reen, iwe Jesus a noa reen iimw we imwan a noa mooat tiw pwe repwene mwongo.

³⁷ Noan aepinoamw we eno erhai rhooapwut monofit ee. Nieuwe e rongorong pwe Jesus e mwongo reen iimw we imwaen Pharisee we, iwe a pwigito eew neoninges,

³⁸ iwe a noa iu mwirin Jesus oaron pirheen nge a saeng nge e oasopwutiw rhaniun mesan wooan pirheen Jesus. Iwe a aepaena ngaeni aennirhimwen nge a faeisongei miniwe pirheen Jesus, iwe a aepiti ngaeni neoninges.

³⁹ Igiwe Pharisee we a weri miniwe nge a kkepastiw rhag wooan nge a iura pwe, “Ngaere igine ennet pwe erhai profeta, mwaaeneei nge epwe pwae ngaeni iyo rhooapwut een me meeta taeppen aeremas iye e itto geotteopa; pwe rhooapwut een iye erhai maan monofit!”

⁴⁰ Jesus a kkepas nge a iura pwe, “Simon, eyor minne ipwe aengaeniu mwo.”

Simon a iura pwe, “Ooa wo sinsei, aengaeniaei?”

⁴¹ Jesus a rhaepetae aan fioang, “Riurhai mwaaen re monofit senaapiy me reen erhai rhooan fang senaapiy. Erhai e monofiti nimapwiugiuw faifayiun senaapiy *silver*, nge iwe erhai nimeig.

⁴² Esooar erhai rhooawe e erhiuwen mmwesen aera minikkiwe monofitiir, iwe mwaaen we a oamoaw noa minikkewe monofitiir. Iwe ifa erhai neeiir ne epwe temoag aan aerhaengi mwaaen we?”

⁴³ Simon a paniuwaeni pwe, “Imaengi nge epwe mwaaen na etemoag minna e aar me reen monofitin.”

Jesus a iura pwe, “Ennet reemw.”

⁴⁴ Iwe a toagun ngaeni rhoapwut we nge a mwaenieniy ngaeni Simon, “Woweri rhoapwut een? Ngaang itto noan minne imwoamw, nge esooar rhaan e wongoatto pwe toatoan pirheei, nge iya faer toafi pirheei reen rhaniun mesan nge e aepaena ngaeni aennirhimwen.

⁴⁵ Wose faeisongei aei reen oamw aewenimmwaeyaei, nge iiy iye esaaen iug noa mwo reen aan faeisongei pirheei saengi rhag oatowe i tooto.

⁴⁶ Esooar tiikka e wofang pwe aepitaen rhimwei, nge iiy a faer aepiti ngaeni pirheei neoninges.

⁴⁷ Iwe ina minne ipwe aengaeniug pwe, aerhaengerhaeng temoag e a pwaeri noa, ina a tiwegian pwe oanongaen minikkiwe monofitin nge a saenetaeg noa. Iwe nge iyo na e egius rhag monofit na e aessaenetaegiy nge ina e egius rhag aan aerhaengerhaeng.”

⁴⁸ Iwe Jesus a aengaeni rhoapwut pwe, “A saenetaeg noa monofitimw.”

⁴⁹ Rhooa kkewe aaemweoi iwe remooat reen *table* we ra iura fengaenni pwe, “Iyo minne epwan gaen aessaenetaegiy aar aeremas monofit?”

⁵⁰ Nge Jesus a aengaeni rhoapwut we pwe, “Wa menaw reen oamw niugiuniug; wone noa noan oapoas.”

8

Rhooapwut Kkewe re Tapweeijesu

¹ Enoa faeiyegius noa Jesus a noa fetaen noan aepinoamw me pwugos kkewe, reen aan fenaiuw fetaeneei Kkepas Mwamwaai we reen Mweoiun Deus. Rhooan kkayeо kkewe seig me riiurhai re tapweeijesu.

² iwe me pwan aekkaerhai rhoapwut kkewe ra cchipw saengi aniu aen-neew me mesemesaen semwaai: Maria (we pwan itan Magdalene), niewe Jesus e oatowowuw fiusuman aniu aenneew me wooan;

³ Joanna we rhooan ngaenneyaan Chuza we e nemaeni minikkiwe pisae-gin Eroles; me Susanna, me pwan towunepeer rhoapwut kkewe regaen pwan tipaengi fetaeneei Jesus me rhooan kkayeо kkewe naiun.

Fioangon Awewe Erhai Rhooan Aeperes Faiun Foat

(Mat 13:1-9; Mark 4:1-9)

⁴ Aeremas ra maegeto reen Jesus saengi eew me eew aepinoamw; iwe enoa mweoiuto eew pwuwa temoag nge Jesus a fioangei ngaenier eew fioangon awewe:

⁵ “Eno erhai mwaaen a noa pwe epwe noa aeperes faiun foat. Igiwe e aeperes fetaen foat kkewe, aekkaefai faiun ra ppiungiutiw wenepeigin aan we, nge repwuriir noa, nge man aeniaen epwan anginoa.

⁶ Aekkaefai ra ppiungiutiw wooan kaenefai, renoa pwaech tae nge reppwass noa pwe ese patapat ppweoniun.

⁷ Aekkaefai ra ppiungiutiw neeiin irae towfanfan. Iwe irae towfanfan kkewe ra menawtae nge ra fittitae wooar iwe ra maenoa.

⁸ Nge aekkaefai ra ppiungiutiw wooan ppweon mwamwaai, iwe ra menaw tae nge ra uwa, nge efoarh nge epwe epwiugiuw uwaan.”

Iwe Jesus a soapwei noa, “Iyo eyor saeningan, epwe rongorong!”

*Faaen Aaen Jesus Kkepesaen Fioangon Awewe
(Mat 13.10-17; Mark 4.10-12)*

⁹ Rhooan kkayeo kkewe ra aeiineow Jesus meeta faaen fioang we.

¹⁰ Iwe a paniwaeniir pwe, “Deus a fang ngaenigaemi pwe oawpwe giuneei kkepas mwoanomwoanon minna Mweoiun Deus, nge iga aaemweoi ina epwe toowow noan fioangon awewe, pwe ina repwene pipiiy nge resoapw weri, nge ina repwene aiussaening nge resoapw metaf reen.

*Jesus e Aemmetefa Fioangon Awewen Rhooan Foat we
(Mat 13.18-23; Mark 4.13-20)*

¹¹ “Ieen faaen fioang we: faiun foat we ina kkepesaen Deus.

¹² Faiun kkewe re ppiungiutiw wenepeigin aan, ra aeffitaeg ngaeni rhooawe re rongorong kkepesaen Deus, nge e itto rhag Saetan nge e itto pwigi noa miniwe kkepesaen Deus me reer, pwe rese niugiuniug iwe ra menaw.

¹³ Nge faiun kkewe re ppiungiutiw wooan kaenefai, ra aeffitaeg ngaeni rhooawe re rongorong kkepas we nge ra kker aegini. Nge ina rhag ese itinong nee tipeer; pwe egifet rhag aar niugiuniug, pwe e itto rhag oaton sessoat nge ra mwetekkaein fangetae.

¹⁴ Nge faiun kkewe re ppiungiutiw neeiin irae towfanfan, ra aeffitaeg ngaeni rhooawe re rongorong; nge aiunaeng me naiwiis me aemmesaeigaen wooan feoniufan a fittiir noa iwe ese mmarrh minikkewe uwaan.

¹⁵ Nge faiun kkewe re ppiungiutiw noan ppweon mwamwaai, ra aeffitaeg ngaeni rhooa kkewe re rongorong minna kkepesaen Deus; nge ra aeiseisa nong noan ennetin me mwamwaaiun pwunnoor, nge ra aetemaegin rhag toori aar uwa.

*Eew Oappwun Eno Faaen Saepiy
(Mark 4.21-25)*

¹⁶ “Esooar ne egaen fifi oappwun nge a iseni nong faaen saepiy ngaere ngoanoa faaen pooa. Pwe refaer pwigi ngaettae wooan nenien oappwun pwe aeremas repwe seram igine ra toonong.

¹⁷ “Oanongaen meeta ewop noa epwene pwae noa, nge oanongaen meeta epwanipwan nge epwe pwae noa noan seram.

¹⁸ “Oawpwe aefaaennigaemi reen wunuunun aaemi aiussaening; pwe iyo a yor meeta aan nge repwe pwan fang ngaeni, nge iyo kena esooar nge refaer pwigi saengiir mwo nge giufetin minikkena re maengiy pwe eno reer.”

*Rhooapwut we Inaen Jesus me Mwaaen Kkewe Pwiin
(Mat 12.46-50; Mark 3.31-35)*

¹⁹ Rhooapwut we inaen Jesus me mwaaen kkewe pwiin re itto reen, nge rese mmwenen rhungaeni pwonno rhooanap we.

²⁰ Nge erhai a aengaeni Jesus pwe, “Niewe inoamw me mwaaen kkewe pwimw ikka reno niugiun, nge re mwerhaen repwe rhuungiug.”

²¹ Jesus a aengaenir oanongeir pwe, “Maan na inaei me mwaaen kena pwiyy ina rhooakka re rongorong kkepesaen Deus nge re tapweei.”

*Jesus a Oapoassaetiw Eew Aaeng Cchoaw
(Mat 8.23-27; Mark 4.35-41)*

²² Eraan Jesus a teeotae wooan efoarh pwoot Iiy me rhooan kkayeo kkewe naiun nge a aengaenir pwe, “Oaw sipwe noa epeig meoneoiniun eei.” Iwe ra noa.

²³ Igiwe ra sesseraeg noa nge Jesus a maiur noa. Ese mmwaei mwo nge a noa itto eew aaeng cchoaw noan meoneoiniun we, iwe pwoot we a mweomweoyius nge rhooa kkewe ra no noan oawoas.

²⁴ Rhooan kkayeо kkewe ra noa reen Jesus ra noa faingitae, ra iura pwe, “Soamwoon, Soamwoon! Sipwene mae!”

Jesus a mmasetae a kkepas sseor ngaeni aaeng we me noa we pwe repwe poas noa; iwe ra iug noa, nge a igin rhoaraeg noa.

²⁵ Iwe a aengaeniir rhooan kkayeо kkewe pwe, “Eno iya aaemi niugi-niug?”

Rhooawe ra riutae nge ra mesag, nge ra iura fengaenni wooar pwe, “Iyo mwaaeneei? Emwaenieniy ngaeni aaeng me noa, nge retapwee mwaaenian!”

*Jesus a Aecchipwa Erhai Mwaaen Eyor Aniu Aenneew Wooan
(Mat 8.28-34; Mark 5.1-20)*

²⁶ Jesus me rhooan kkayeо kkewe naiun ra saei saengi Galilee nge ra noa Gerasa, iwe eno peigin meoneoiniun we me eotiw.

²⁷ Igiwe Jesus a tiwegitae ppiy, nge a noa rhuungi erhai mwaaenin aepinoamw we nge eyor aniu aenneew wooan. A ssiunaei aaen mwaaen een se memmengaag nge ese pwan nonotiw no noan imwan, pwe a noa no fetaen rhag noan paeyi kkewe.

²⁸ Iwe oatowe eweri Jesus, nge a igin eor noa, nge a foatotiw me weni mmwaen Jesus nge a aepwesaegini pwe, “Jesus, mwaaen na Naiun Deus na oarosaen taegias! Meeta minne wotipaeni me reei? Iya aeffaenipirheog pwe wosoapw aewwaeiraesiae!”

²⁹ Eiura minneeи pwe iga Jesus a oatowowuw mwuniaan aenneew we me wooan. Towunepaen oatokka epwe kkaein ngaeni, nge inamwo iga egeeogeeo paiun me pirheen ngaeni *ccheen* nge egaen mweoiti, iwe mwuniaan we a pwigi noa noan *desert*.

³⁰ Jesus a aeineow pwe, “Meeta itoamw?”

Mwaaen we a paniuwaeni pwe, “Itaei nge Cchon,” pwonno iga a towunap mwuniaan wartae wooan.

³¹ Mwuniaan kkewe ra aeffaenipirheei Jesus pwe esoapw fangenoa iir noan niipw we eigin nennoan.

³² Eew cchon sino re mwongo fetaen wooan eew taeiit. Iwe mwuniaan kkewe ra aeffaenipirhe ngaeni Jesus pwe epwe aeweraar tae wooar sino kkewe, iwe a aeweraar tae wooar.

³³ Iwe aniu kkewe ra toowow me wooan mwaaen we nge ra wartae wooar sino kkewe. Cchon sino we ra fattapw tiw rhag me wenepeigin rhug we ittiw noan meoneoiniun we itinong moapw noa.

³⁴ Mwaaen kkewe rhooan ffooanon sino reweri meeta we a wen, iwe ra fattapw noa arheoiwa fetaeneei noan aepinoamw we me menaai kkewe.

³⁵ Aeremas ra maeg wow pipiiy miniwe a wen, nge renoa itto reen Jesus ra itto rhuungi mwaaen we retowow mwuniaan me wooan, pwe emooat wenepeigin pirheen Jesus, nge e memmengaag nge iiy man reepiy; iwe rhooa kkewe ra igin mesag.

³⁶ Rhooawe reweri miniwe ra fioangei ngaeniir aeremas wunuunun aar aniu aenneew kkewe toowow me wooan mwaaen we.

³⁷ Iwe rhag nge oanongeer aeremesaen pwiuneoi we ra tingoareei Jesus epwe nigitiiр, pwe igiwe ra igin mesag. Iwe Jesus a teeotae wooan pwoot we a noa.

³⁸ Mwaaen we etowow aniu kkewe me wooan a aeffaenipirhe ngaeni Jesus epwe tapwee.

Nge Jesus a aefenganoa, nge a aengaeni pwe,

39 “Sefaaen noa nee pwugusoamw nge wa noa fioangei meeta e Deus a feeori ngaeniug.” Iwe mwaaen we a noa fetaen noan aepinoamw we a noa fioangei fetaeneei meeta we Jesus a feeori ngaeni.

Rhooapwut we Naiun Jairus me Rhooapwut we e Geotteopa Mengaagiun Jesus

(Mat 9.18-26; Mark 5.21-43)

40 Oatowe Jesus enoa sefaaeniti peigin meoneoiniun we epeig, aeremas ra itto aetiwa, pwe igiwe ra wetiwet noa rhag iiy.

41 Erhai mwaaen itan Jairus a noa itto; iiy erhai soamwoonin wutteer Jews. A itto foatotiw weni mmwaen pirheen Jesus a aeffaenipirhe ngaeni epwe tapweei noa reen iimw na imwan,

42 pwe igiwe rhooapwut we naiun iwe enaaen seig me ruwowu raegin a oaropaen mae.

Igiwe Jesus a tapweei noa nge aeremas ra igin itto aetietiy ngaeni.

43 Eno erhai rhooapwut neeiir eseug aan peitaeg noa noan seig me ruwowu raeg, nge esooar erhai ne emmwenen aecchipwa.

44 Rhooapwut we a itto me niugiusagiuriun Jesus a itto geotteopa soapwon mengaagiun, iwe rhag nge e iug noa aan noa epeig faniuw.

45 Nge Jesus a aeiineo pwe, “Iyo we e geotteopayaei?”

Oanongeer rhooawe nge re iura pwe saapw iir, nge Peter a iura pwe, “Soamwoon, regin ssow rhooakka repwaeniaenig noa me aetietiy ngae-niug.”

46 Jesus a iura pwe, “Erhai imwu e geotteopayaei, pwe imeyaefi maemae-waei aan toowow me wooai.”

47 Iwe rhooapwut we a giuneei pwe a pwae miniwe efeeori, iwe a noa faaeraeg ngongongoto a itto aerheei tiw me wenimmwaen pirheen Jesus. Weni mmweer rhooanap we iwe niewe a aengaeni faaen minne e geotteopa reen me wunuunun aan iug noa aan noa epeig faniuw oatowe e geotteopa.

48 Jesus a aengaeni niewe pwe, “Naeyi, oamw niugiuniug minne a aecchip-woag tae. Wonoa noan oapoas.”

49 Nge igiwe Jesus erhiuwen kekkepas, nge erhai rhoaan oarong a noa itto me reen imwaen Jairus nge a aengaeni Jairus pwe, “A mae noa rhooapwut we noawumw, wosoapw rhiuwen angiurhiu no Sinsei na.”

50 Jesus erongorong miniwe nge a aengaeni Jairus pwe, “Wosoapw mesag; niugiuniug rhag ina nge epwe menaw tae.”

51 Oatowe enoa toorito iimw we, ese tipan pwe aeremas repwe tapweei nong nee iimw pwe aeggaen Peter rhag me John me James iwe me mwaaen we seman me inaen aet we.

52 Oanongeer aeremas kkewe noan iimw we ra saeng wooan aet we. Jesus a iura pwe, “Oawsoapw saeng; aeteen iye ese mae, pwe aan rhag maiur!”

53 Rhooa kkewe ra kekkaei aegini pwe igiwe re giuneei pwe aet we a mae.

54 Jesus a ammwarhiu tae paiun nge a iura pwe, “Rhimwitae, moawwerh!”

55 Iwe a menaw tae nge a rhiuwei rhimwitae rhag. Iwe Jesus a aengaenir repwe ngaennee anan mwongo.

56 Mwaaen we seman me inaen aet we ra riutae, nge Jesus a ammwir ngaenir pwe resoapw aengaeni mwo nge erhai meeta e a wen.

¹ Jesus a faangi fengaennir rhooawe seig me riiurhai a fang ngaenir nemaenieer me aar manaman pwe repwe asiur aniu aenneew me aecchipwaar rhooa semwaai.

² Iwe a aefengaar noa pwe repwe noa fenaiuw minna Mweoiun Deus nge re aecchipwaar rhooa semwaai.

³ A aengaenir pwe, “Esooar minne oawpwe pwigi wooan aaemi saei: oawsoapw pwigi yomi, oawsoapw pweipwog aaemi pwetoaw, oawsoapw pweipwog mwongo, oawsoapw pweipwog senaapiy, oawsoapw pwan pweipwog ssiuwenin mengaagiumi.

⁴ Ese tiwegian iya re aetiwaegaemi me ee, oawno noan iimw naan toori aaemi oawpwe siu me reen aepinoamw naan;

⁵ iwe nge pwiuneoi na aeremas rese aetiwaegaemi me ee, nge oawwa siusaengi pwiuneoi we nge oawwa iurhiugi noa ppweoniuun me wooan pirhemi pwe eew atapeonneog ngaenir.”

⁶ Rhooan kkayeо kkewe ra noa fetaen noan aepinoamw kkewe, ra noa fenaiuw Kkepas Mwamwaai we nge re aecchipwaar aeremesaen oanongaen pwiuneoi.

*Aaen Erotes Pwurhopwurh Fetaen
(Mat 14.1-12; Mark 6.14-29)*

⁷ Oatowe Erotes, we soamwoonin Galilee, e rongorong minikkewe a wen a igin pwurhopwurh fetaen, pwe aaemweoi re iura pwe John Baptist a menaw sefaaen.

⁸ AAemweoi re iura pwe Elijah minne a pwaeto, iwe nge pwan aaemweoi re iura pwe erhai *profeta* kkewe mweoiwe minne a menaw sefaaen.

⁹ Erotes a iura pwe, “John iwe iya gopyi noa iiuwaen, nge iyo mwaaeneei irongorong kkepesan?” Iwe a aekkaetemaegini fetaeneei aan epwe noa weri Jesus.

*Jesus e Oamwongoor Nimmingeras Aeremas
(Mat 14.13-21; Mark 6.30-44; John 6.1-14)*

¹⁰ Iwe ra sefaaeneto oapostonus kkewe ra itto aengaeni Jesus meeta kkewe ra feeori. A wummwuur, iwe iir rhag ra noa reen eew aepinoamw itan Bethsaida.

¹¹ Igiwe pwuwaen aeremas we ra rongorong ra pwan ttapw noa mwirin. Jesus a aewenimmwaar, a fenaiuw ngaenir wunuunun minna Mweoiun Deus iwe nge e aecchipwaar rhooakka re semwaai.

¹² Noan faefin we nge rhooan kkayeо kkewe naiun ra itto reen nge ra aengaeni pwe, “Eigin anug noa igeeli nge a pwan pwoong. Aefengaar noa aeremas kaan neeaepinoamw pwe repwene noa sipegin chuwaai aeneer mwongo.”

¹³ Jesus a faer aengaenir pwe, “Oawfang ngaenir aeneer.”

Nge ra iura pwe, “Niffai rhag fenoawa me riiurhai iig minne eno remaem. Wo mwerhaen pwe aeipwe noa nge aeiya noa chuwaai to aeneer rhooanap een?”

¹⁴ (Repwe nimingeras mwaaen reno igiwe.)

Jesus a aengaenir rhooan kkayeо kkewe naiun pwe, “Oaw aengaenir pwe repwe mooat tiw nge repwe aenimeig aeremas noan eew me eew pwoatu.”

¹⁵ Weni mwirin aar rhooan kkayeо kkewe feeori miniwe,

¹⁶ nge Jesus a pwigi fenoawa kkewe niffai me iig kkewe riiurhai, a fattae naaeng nge a fang ngaeni Deus aan aerhigerhig. Iwe a giniiy fenoawa kkewe nge a fang ngaenir rhooan kkayeо kkewe pwe repwe inetiy wooar aeremas kkewe.

¹⁷ Oanongeer nge ra maegin mwongo iwe ra mat noa. Iwe rhooan kkayeo kkewe ra oawuta seig me ruwowu rhiug reen nuseg kkewe.

*Peter e Iura pwe Jesus Iwe Kristus
(Mat 16.13-19; Mark 8.27-29)*

¹⁸ Igiwe Jesus noa rhag aan noa maeipin, rhooan kkayeo kkewe ra noa itto reen. Iwe a aeiyegiir, "Aeremas re iura pwe ngaang iyo?"

¹⁹ Ra paniwaeni, "Aaemweoi re iura pwe een John Baptist, nge aekkaaemweoi re iura pwe een Elijah, nge pwan aekkaaemweoi re iura pwe een erhai *profeta* kkewe mweoiwe nge wa menaw sefaaen."

²⁰ A aeiineeor pwe, "Nge aaemi, oawiura pwe ngaang iyo?"

Peter a paniwaeni pwe, "Een Kristus we Naiun Deus."

*Jesus a Aepesa Waeiraesin me Maenoan
(Mat 16.20-28; Mark 8.30–9.1)*

²¹ Jesus a aetiwenigiy ngaeniir pwe resoapw aengaeni mwo nge erhai minnei.

²² Nge a pwan aengaeniir pwe, "Mwaaen na Naiun Aeremas ina epwe gin affayeo nge e serhoawun me neeiir mwaaen kkewe aar me soamwoonin patere me sinsein anniug. Repwene niiy noa nge eoniuraen mwirin nge a menaw sefaaen."

²³ Nge a aengaeniir oanongeer pwe, "Erhai ne emwerhaen tapweaei, epwe aerheei noa niunniwaennen wooan oanongan, a aiufra aan kurus oanongaen raaenin, nge a tapweeito mwiriy."

²⁴ Pwe iyo emwerhaen ammwarhiu menewan, epwe ppiung saengi. Nge iyo eppiung saengi menewan pwonno ngaang, epwe giuneei menaw.

²⁵ Epwe yor ipitan igine eyo ngaeniug oanongan noa faeinaengiy nge a soano saengiug menewoamw? Esooar ipitan!

²⁶ Aere wosaew aeginiae me fenai kka aaei, ina nge mwaaen we Naiun Aeremas epwe pwan saew aeginiug igine a noa itto noan nning me nning mwaaen na Seman me nningeer angkenus kena resantus.

²⁷ Ipwe anugiuniugiuw ngaenigaemi pwe eyor aaemweoi aeremas igeei resoapw mae toori otona repwe weri minna Mweoiun Deus."

*Nniuwen Noan Wunuunun Jesus
(Mat 17.1-8; Mark 9.2-8)*

²⁸ Epwe eew noa *week* mwirin aan Jesus aepesa minikkeei, nge a pwigir Peter, John, me James ra ittae maeipin wooan eew rhug.

²⁹ Oatowe emaeipin, a nniuwen noa wunuunun wooan mesan, nge miniwe mengaagiun a marette pwerhepwerh noa.

³⁰ Ese mmwaei mwo nge riiurhai mwaaen ra itto mwaenieniy ngaeni. Iir Moses me Elijah,

³¹ repwaeto noan nning seramram nge ra itto mwaenieniy ngaeni Jesus reen wunuunun aan epwene pwaeritae aaen Deus koat reen aan epwe mae noa me noan Jerusalem.

³² Peter me rhooawe rhoaniawan ra igin maiur, nge renoa mmasetae ra weri miniwe seramramaen nning Jesus me mwaaen kkewe riiurhai iwe reiu oaron.

³³ Igiwe mwaaen kkewe riiurhai ra siunoa, nge Peter a aengaeni Jesus pwe, "Sinsei, a igin gacch pwe sino igeei. Aeipwe aiuwtae enuuw iimw tampwoning, eew imwoamw, eew imwaen Moses, me eew imwaen Elijah." (Ese metefaaegini faaen minikkiwe e aepesa.)

³⁴ Igiwe e rhiuwen kkepas, a itto eew toapw pwaniuur noa faaen niuriun; rhooan kkayeo kkewe ra mesag reen toapw we a itto pwaniuur noa.

³⁵ Eew mangiungiu a noa ittiw me noan toapw we, “Ieen mwaaen e naeyi, iye iya finitae—oawaiussaening ngaeni!”

³⁶ Iwe mangiungiu we a iug noa, iwe a Jesus noa rhag. Rhooan kkayeo kkewe ra anniug aegini noa rhag miniwe, nge esooar mwo erhai ne reaengaeni meeta we ra weri reen oatowe.

*Jesus e Aecchipwa Erhai Aetemwaaen Eyor Aniu Aenneew Wooan
(Mat 17.14-18; Mark 9.14-27)*

³⁷ Mmasetaan raaen we eraan nge Jesus me rhooan kkayeo kkewe eoniurhai ra ittiw me wooan rhug we, nge eew pwuwa temoag ra itto reen Jesus.

³⁸ Erhai mwaaen a aekkepwas me noan pwuwa we, “Sinsei! Faaen pirhemw, itto pipiiy aet e naeyi—ieen rhag naeyi mwaaen!

³⁹ Oate aniu aenneew een epwe kkaein tiw wooan, nge erhiuwen apwas rhag nge a ittiw cchech fetaen, pwuropwur wow noan ewan; e aewwaeiraesi fetaeneei rhag nge esa siusaengi no!

⁴⁰ Iya aeffaenipirhe ngaenir rhooan kkayeo kkewe noawumw pwe repwe oatowowuw, nge ese mmwen ngaenir.”

⁴¹ Jesus a panuwaeni pwe, “Ifa mwo aaemi se niugiuniug me ruguppin faaen oatee! Epwe ifa ssiunaein aaei ipwe no reemi? Epwe ifa wusun aaei noaneenaei reemi?” Iwe nge a aengaeni mwaaen we pwe, “Pwigito aetemwu noawumw iga.”

⁴² Igiwe aetewe a itto reen nge aniu aenneew we a aerheitiw wooan ppweon a ittiw cchech fetaen. Jesus a aerh ngaeni aniu aenneew we pwe epwe toowow, iwe a aecchipwa aet we, iwe a iseni sefaaeniy ngaeni mwaaen we seman.

⁴³ Oanongeir rhooawe ra mwaar reen maemaewaen kkemenaen Deus.

*Jesus a Pwan Aepesa Wunuunun Aan Maenoa
(Mat 17.22-23; Mark 9.30-32)*

Oanongeir aeremas kkewe nge ra riutae reen meeta kkewe Jesus a feeori nge a aengaenir rhooan kkayeo kkewe naiun pwe,

⁴⁴ “Oawteorh maniuwegini minne ipwe aengaenigaemi! Mwaaen we Naiun Aeremas epwene yonong nee paaiur aeremas.”

⁴⁵ Iwe nge iir rhooan kkayeo kkewe naiun rese metefaaegini faaen miniwe mwaenian. Miniwe ekooap saengiir pwonno rete metefaaegini, iwe iir ra mesag pwe repwe aeyieg.

*Iyo e Oarosaen Taegias?
(Mat 18.1-5; Mark 9.33-37)*

⁴⁶ Iwe rhooan kkayeo kkewe ra aengiingi fengaen neeiir ngaere iyo e oarosaen taegias.

⁴⁷ Jesus a giuneei niunniwaen kkewe aar, iwe a pwigi erhai wonigaet a aiuw tiw oaron,

⁴⁸ a aengaenir pwe, “Iyo e aetiwa aeteen faaen itaei, ina e aetiwaeyaei; nge iyo erhai ne e aetiwaeyaei, ina e aetiwa aeremas na efangeto ngaang. Pwe iyo na oarosaen sessoan neeimi nge ina iiy minne oarosaen taegias.”

*Iyo na Ese Appaniuwaenigaemi Nge Ina Rhoaniuwaemi
(Mark 9.38-40)*

⁴⁹ John a iura pwe, “Sinsei, aeiweri erhai mwaaen e oatowowuw aniu aenneew faaen itoamw, nge aeiya aengaeni pwe epwe iug noa pwe saapw iiy rhoaniuwarh.”

⁵⁰ Jesus a aengaeni pwe, “Oawsoapw aiugiu noa, pwe iyo na ese appaniuwaenigaemi ina rhoaniuwaemi.”

Eew Aepinoamwon Samaria Ese Aetiwa Jesus

⁵¹ Igiwe a arapeto oaton aaen Jesus noa naaeng, a aettiweginiy nee tipan epwe noa Jerusalem.

⁵² A fangenoa rhooan pweipwogin kkepas repwe noa wooan eew aepinoamw me Samaria repwe noa oamoannatae oanongaen meeta me weni mmwan.

⁵³ Iwe nge aeremesaen pwiuneoi we rese mwerhaen aetiwa pwe igiwe epwae ngaenir pwe epwene noa Jerusalem.

⁵⁴ Igiwe James me John ra giuneei miniwe ra aengaeni pwe, “Soamwoon, wo mwerhaen pwe aeipwe tingoar noa aengaet naaeng pwe epwe ittiw figiir noa?”

⁵⁵ Jesus a toagun ngaenir a soong ngaenir.

⁵⁶ Iwe Jesus me rhooan kkayeo kkewe naiun ra noa wooan eew noa aepinoamw.

Rhooan Mwerhaen Tapweei Mwirin Jesus

(Mat 8.19-22)

⁵⁷ Igiwe ra noa erhai mwaaen a aengaeni Jesus, “Ese tiwegin iga wopwe noa ee nge ngaang ipwe tapweog.”

⁵⁸ Jesus a aengaeni pwe, “Fox eyor ngeteer, man aeniaen eyor feseer, iwe nge mwaaen we Naiun Aeremas esooar eew pwiuneoi ne epwe noa wonotiw aseoseo ee.”

⁵⁹ Jesus a pwan aengaeni erhai mwaaen, “Itto tapweaei.”

Iwe mwaaen we a paniuwaeni pwe, “Soamwoon, mmwaen fang mwo ngaang ipwe sefaaen noa nipwaeni noa mwaaen na semaei.”

⁶⁰ Jesus a paniuwaeni pwe, “Nigitiir rhooa mae repwe sipegin nipwaeni aar mae. Nge een wa noa arheoiwa fetaeneei kkepesaen minna Mweoiun Deus.”

⁶¹ Pwan erhai mwaaen a iura, “Menap, ipwe tapweog; nge ipwe mmwaen noa mwo oapwongiir aaei famini.”

⁶² Jesus a aengaeni pwe, “Erhai ne epwe rhaepetae aan engaengaen maat nge e feffan sefaaen nge iiy esoapw firh ngaeni minna Mweoiun Deus.”

10

Jesus e Aefengaar Noa Rhooawe Fisiig me Riiurhai

¹ Mwirin minneen nge Soamwoon a finiir fisiig me riiurhai mwaaen, nge a aefengaar noa e repwe riiurhai me riiurhai, pwe repwe gommw noa noan eew me eew aepinoamw me taeninimw kkewe iiy epwe noa e.

² Iya aengaeni pwe, “A towunap uwaen menaai, nge re fitiman rhag rhooan gin. Oaw maeipin ngaeni soamwoonin maat we pwe epwe fangenoa rhooan engaang pwe repwe giniiy oanongaen uwaen maat we aan.

³ Oawnoa! Ipwene aefengaegaemi noa pwe oawpwene wee rhag *sheep* neeiir *wolves*.

⁴ Oawsoapw pweipwog aaemi saiff ngaere pwetoaw ngaere nokkaemi; nge oawsoapw iunoa pwe oawpwe koapwong ngaenir aeremas me wooan ennap.

⁵ Ese tiwegin eew iimw ne wopwe toonong noan nge mesaemmwaen minna wopwe iura ina, ‘Oapoas epwe no reer rhooan imweei.’

⁶ Ngaere eyor erhai aeremas ne epoas eno iginaan, iwe nge oawwa nigliitiw kkepesaen oapoas we aaemi reen; iwe ngaere esooar, ina nge oawwa pwigi sefaaeniy kkepesaen oapoas we aaemi.

⁷ Oawpwe no rhag noan iimw we, nge oawmwongo nge oawiun ese tiwegin meeta refang ngaenigaemi, pwe rhoaan engaang ina epwe toowow paniuweer. Oawsoapw siu me reen eew iimw nge oawnoa me reen eew.

⁸ Ngaere igine oawtonong noan eew aepinoamw nge re aetiwagaemi, oawmwongo meeta refang ngaenigaemi,

⁹ oawaecchipwaar rhooa semwaai noan aepinoamw naan, nge oawaengaenir aeremas kena reno noan pwe, ‘Mweoiun Deus a arapeto reemi.’

¹⁰ Ngaere oawitinong noan eew aepinoamw nge rese aetiwagaemi, nge oawwa itiwow wooan ennap nge oawwa iura pwe,

¹¹ ‘Eew mwo ppweoniuun noan aepinoamw e aepinoamwomi iye emmwarh tae wooan pirhemaem nge iye aeipwene peonitiw reemi. Nge oawwa maengi rhag pwe minna Mweoiun Deus ina a arap ngaenigaemi!’

¹² Iya aengaenigaemi pwe noan Raaenin Apwiung nge Deus epwe faayeow re Sodom memmweer aeremesaen aepinoamw naan!

Aepinoamw Kkewe Rese Niugiuniug

(Mat 11.20-24)

¹³ ‘Ifa mwo aenneewan ngaenigaemi aaemi rhoaan Chorazin! Pwan ifa mwo aenneewan ngaenigaemi aaemi rhoaan Bethsaida! Aere kkeman kka refreeori me wooan igeei minne refreeori me wooan Tyre me Sidon, ina nge a ssiunaei rhag aar mooat tiw, nge ra memmengaag tutu nge re oamworomwor tae fenang wooar, pwe epwe pwae noa aar toagun saengi monofit!

¹⁴ Noan Raaenin Apwiung nge Deus epwe faayeow re Tyre me re Sidon me mmwaemi.

¹⁵ Nge een Capernaum! Wo tipaeni wopwe tooritae naaeng? Een wopwe ppiungiutiw noan niferno!’

¹⁶ Jesus a aengaenir rhoaan kkayeo kkewe naiun pwe, “Iyo e aiussaening ngaeniuug e aiussaening ngaeniaei; nge iyo e oapwutaegaemi e oapwutaeyaei, nge iyo e oapwutaeyaei e oapwuta iyo na efangeto ngaang.”

Rhooawe Fisiig me Riiurhai ra Sefaaeneto

¹⁷ Mwaaen kkewe fisiig me riiurhai ra sefaaeneto noan aar igin kker. Ra iura, “Soamwoon, mwuniaan mwo nge re aiussaening mwaeniaemaem reen kkemenaen minna itoamw!”

¹⁸ Jesus a paniuwaenir pwe, “Iweri Saetan aan ppiungiutiw pwe eweei rhag ffiutiwen weriwer me noan naaeng.

¹⁹ Aiussaening! Iya ngaennegaemi kkaeinemi, pwe epwe mmwen pwe oawpwe faaeraeg wooar sowufaeng me maennipwong, nge oawniiy noa minikkena kkaeinen mwuniaan nge esooar minne oawpwe woas reen. ²⁰ Iwe nge oawsoapw igin kker reen pwonno iga aniu aenneew re aiussaening ngaenigaemi; pwe oawfaer kker pwe iga itaemi a foatofoat me wooan naaeng.”

Jesus a Kker

(Mat 11.25-27; 13.16-17)

²¹ Reen oatowe nge Jesus a sseog noan kker me reen Espritu Santus nge a iura pwe, “Semaei, Soamwoonin naaeng me soanop, iya ngaenneog oamw aerhigerhig, pwe wa oapanoa minikkei saenguir rhooa reepiy me metefaaegini, nge wa pwaeri ngaenir rhooa kkewe reweer wonigaet. Ennet, Semaei, pwe ina minna wo tipaeni epwe wen.

²² “Semaei a ngaenneaei oanongaen meeta. Nge esooar erhai ne e giuneei minna Naiun pwe aeggaen minna Seman rhag, nge esooar ne e giuneei

minna Seman pwe aeggaen minna Naiun rhag, iwe me iyo kena minna Naiun a finiir tae pwe epwe pwaeri ngaeniir.”

²³ Iwe Jesus a toagun ngaeniir rhoaan kkayeo kkewe naiun nge a iura pwe, “Wenepwu iir maskena ra weri meeta aaemi oawwa weri!

²⁴ Iya aengaenigaemi pwe ressow *profeta* me *king* ra mwerhaen weri meeta kka aaemi oawwa weri, nge iir rese weri. Ra pwan mwerhaen rongorong meeta kka aaemi oawwa rongorong, nge iir rese rongorong.”

Fioangon Re Samaria we e Mwamwaai

²⁵ Erhai sinsein anniug a itto epwe soatoni Jesus. Mwaaen we a iura pwe, “Sinsei, meeta minne ipwe feeori nge epwe yo ngaeniaei menaw na esooar iaenin?”

²⁶ Jesus a paniuwaeni pwe, “Meeta miniwe Pwapwior we e Santus e iura? Meeta aemmetefan me reemw?”

²⁷ Mwaaen we a iura pwe, “Wopwe aerhaengi Soamwoon na oamw Deus reen oanongaen neetipoamw, reen oanongaen ngeoniumw, reen oanongaen oamw niunniwaen, pwan reen oanongaen maemaewoamw, iwe nge wa aerhaengiir rhoaan weni oaromw taepen rhag oamw sipegin aerhaengi oanongoamw.”

²⁸ Jesus a iura pwe, “Ennet ngaeniug, wopwe feeori minikkena nge wopwe menaw.”

²⁹ Iwe nge iiy e tipaeni epwe pwaeri noa pwe ennet meeta kkewe e iura, iwe a aeiineow Jesus pwe, “Iyo kena aeremesaen weni oaroi?”

³⁰ Jesus a paniuwaeni pwe, “Eyor erhai mwaaen emwet saengi Jerusalem epwe noa Jericho nge rhooa mwoarho ra torofi, ra pwigi saengi mengaagiun, ra niiy, nge ra nigit noa nge epwene oaropaen mae.

³¹ Enoa wen ngaeni pwe erhai patere epwan taeri rhag ennap we; igiwe eweri mwaaen we nge a toakonoa peigin aan we me epeig.

³² Epwan ina wunuunun erhai re *Levite* epwan itto pwiuneoi we, a weri mwaaen we nge a pwan toakonoa me peigin ennap we.

³³ Iwe nge erhai re Samaria enoa faaeraegto, a pwan itto rhuungi mwaaen we, eweri rhag mwaaen we nge a gin ffaiyeow.

³⁴ A noa reen mwaaen we, a noa aepiti minikkewe ginisan ngaeni tiikka me *wine*, iwe a tiugumi noa; a iseni tae mwaaen we wooan manewe naiun nge a pwigi noa noan imwaen waseona, iwe a noa aemmwena me ee.

³⁵ Mmasetaen raaen we eraen a pwigi riiufai faifayiun senaapiy a ngaen-neei mwaaen we aan iimw we. Iwe a aengaen pwe, ‘Wa aemmwena aeremas een, nge ese tiwegin meeta paerenoan oamw ammwen, nge ngaang ipwe aeseefaaeni ngaeniug oate ipwe sefaaeneto.’”

³⁶ Jesus a soapwei noa, “Noan oamw niunniwaen nge ifa erhai me neeir rhooa kkewe eonurhai ne effaiyeow mwaaen we rhooa mwoarho reniyy?”

³⁷ Sinsein anniug we a paniuwaeni pwe, “Aeremas we e aemmwena.”

Iwe Jesus a paniuwaeni pwe, “Wonoa nge wa noa feeori taepen rhag minnaan.”

Jesus a Noa Sengaeriar Martha me Maria

³⁸ Igiwe Jesus me rhoaan kkayeo kkewe naiun ra noa, Jesus a itinong noan eew aepinoamw nge erhai rhoooput itan Martha a aetiwa nong noan iimw we imwan.

³⁹ Eno erhai pwiin rhoooput itan Maria, a itto mooat tiw reen pirheen Soamwoon nge a aiussaening ngaeni fenai kkewe aan.

⁴⁰ Martha a tip mworhomworh reen oanongaen engaang kkewe a feeori, iwe a itto reen Jesus a aengaen pwe, “Soamwoon, wose aetenaegiy noa mwo

pwe nie pwiiy a nigit ngaeniaei rhag oanongaen engaang pwe ipwe feeori? Aengaeni pwe epwe itto tipaengiae!"

⁴¹ Soamwoon a iura pwe, "Martha, Martha! Etowunap minikkena wa aiunaengiy noa rhag nge esa poas no tipoamw reen,

⁴² pwe aeggaen eew noa rhag minne eyor ipitan. Maria a fini minna egacch, nge esooar erhai ne epwe pwigi saengi."

11

Jesus a Fenaiuw Wunuunun Maeipin (Mat 6.9-13; 7.7-11)

¹ Eraen nge Jesus a maeipin eew pwiuneoi. Oatowe enoa moann aan maeipin, erhai me neeiir rhoaan kkayeo kkewe a aengaeni pwe, "Soamwoon, fenaiuw ngaenigemaem wunuunun maeipin, taeppen aaen John fenaiuw ngaenir rhoaan kkayeo kkewe naiun."

² Jesus a aengaeniir pwe, "Igine oawpwe maeipin, ieen minne oawpwe iura:

'Semmaem,
aemwo epwe ssoar minna itoamw ina e santus;
aemwo Mweouiumw epwe war.

³ Ngaennegemaem aenemaem mwongo eraen me eraen.

⁴ Wopwe saeneti noa aemaem monofit,
wunuunun pwan aemaem aeiya saenetir noa rhoakkina remonofit
ngaenigemaem.

Wosoapw oatonongegeamaem noan sessoat."

⁵ Iwe Jesus a aengaeniir rhoaan kkayeo kkewe naiun pwe, "Ngaere igine a nugaenipwoong nge erhai me neeimi a noa reen imwaen erhai maereyaeren nge a iura pwe, 'Maereyaerei, ipwe tingoareog mwo eoniufai fenoawa.

⁶ Erhai maereyaerei enaaen wareto rhag me wooan aan saei, nge esooar minne ipwe fang pwe anan me reen imwaei!"

⁷ Iwe nge ngaere mwaaen we maereyaeremw a noa kkepas wow me neeimw nge e iura pwe, 'Wosoapw itto aetipoapwutaeyaei! A fasiun amwarh noa asam nge ngaang me aetekka naeyi aeiya maiur. Isoapw mmwenen rhimwitae pwe ipwe iseis ngaeniug aegiaeg.'

⁸ Ipwe aengaenigaemi pwe inamwo e iura esoapw rhimwitae pwe epwe ngaenneog fenoawa kena pwe iga oaw maereyaer, nge iiy ina epwe fasiun rhimwitae pwe epwe ngaenneog oanongaen minikkena wotingoar pwe iga een wose saew reen oamw tingoar noa rhag.

⁹ Ina minne ngaang ipwe aengaenigaemi pwe: oawpwe tittingoar, ina nge epwe yo ngaenigaemi; oawpwe giutta, ina nge oawpwe weri; oawpwe apiungiupiung wooan asam, ina nge epwe sugaeg ngaenigaemi.

¹⁰ Pwe iyo a tittingoar nge epwe yo ngaeni, nge iyo a giutta epwe weri, nge asam epwe sugaeg ngaeni iyo na e apiungiupiung.

¹¹ Emmwen pwe aaemi saam kena oawpwe ngaennee naimi sowufaeng igine e tingoar iig?

¹² Me ngaere oawpwe ngaennee erhai maennipwong aere e tingoar soagun?

¹³ Inamwo aaemi aeremas aenneew, nge oawwa giuneei aaemi oawpwe fang ngaenir naimi minikka emwamwaai. Epwe ifa mwo nepaen faeregitin aaen minna Semaemi wooaina naaeng epwe fang Espritu Santus ngaenir rhoakkina re tingoar ngaeni!"

*Jesus me Beelzebul
(Mat 12.22-30; Mark 3.20-27)*

¹⁴ Jesus a oatowowuw erhai aniu aenneew me wooan erhai mwaaen ese mmwenen kkepas; oatowe e oatowowuw aniu aenneew we me wooan mwaaen we, iwe mwaaen we a rhaep aan mmwenen kkepas fetaen. Iwe pwuwaen aeremas we ra mwaar reen miniwe,

¹⁵ nge aekkaaemweoi ra iura pwe, “Beelzebul, manewe soamwoonin aniu aenneew, minne efang maemaewan pwe epwe asiur noa aniu aenneew.”

¹⁶ Nge aaemweoi re niunniuwaen repwe aegina Jesus, iwe ra aengaeni pwe epwe feeori eew kkeman pwe epwe pwaeri noa pwe efin tipaen Deus reen.

¹⁷ Nge Jesus e giuneei niunniuwaen kkewe aar, iwe a aengaenir pwe, “Aere eew faniuw a ginigin fesaeng nge ra fiow fengaen woor, faniuw een esoapw ssiunaei; nge rhooan eew famini ne rese tip eew nge repwe toaroporop.

¹⁸ Iwe ngaere minna mweoiun Saetan epwan ginigin kkit tiw nge re fiffiow fengaen rhag woor, epwe ifa wusun rhag nge epwe iutae aan nemenem? Oawiura pwe i oatowowuw mwuniaan pwe iga Beelzebul efang ngaeniaei maemaewaei.

¹⁹ Ngaere igine e ieei wunuunun aaei asiur noa, iwe nge eifa wusun aar rhooa kkomwu rhoaniuwaemi asiur noa aniu aenneew? Rhooa kkomwu rhoaniuwaemi ra pwaeritae pwe oaw mwaerhei!

²⁰ Aapw, ngaang ina i oatowowuw aniu aenneew noan minna kkemenaen Deus, nge ieen minne a pwaeri noa pwe minna Mweoiun Deus a faer toorigaemi.

²¹ “Igine erhai mwaaen mamaaw, a fasiun oamoannatae oanongaen niman, nge e posuw iimw na imwan, ina nge oanongan noa pisaegin nge epwe gofaeg rhag.

²² Iwe ngaere igine erhai mwaaen e mamaaw saengi a itto fiow ngaeni nge a niiy, ina nge epwene pwigi noa oanongaen minikkewe niman ikkiwe mwaaen we a aeisetip wooan nge a noa inety fetaenei meeta kkewe emwoarhow.

²³ “Erhai ne ese tapweaei, nge iiy rhooa aenneew ngaeniaei, nge erhai ese tipaengiae reen ioi, iiy erhai rhoaan oammwoatoar.

*Sefaaeneton Aniu Aenneew
(Mat 12.43-45)*

²⁴ “Igine erhai aniu aenneew epwe toowow me wooan erhai aeremas, nge ina epwene faaeraeg fetaen wooan faniuw paenekka pwe egiut nenien aan aseoseo. Ngaere esooar eew neniy e rhuungi, nge ina epwene aengaeni oanongan pwe, ‘Ipwene sefaaen noa reen imwaei iwe i siusaengi.’

²⁵ Iwe a sefaaen nge a noa rhuungi iimw we pwe a nimegacch noa noan pwe oanongaen aegiae nge a wonopaeg noa nenien.

²⁶ Iwe epwe noa nge a noa paenir to fiusuman aniu aenneew kena re igin kkaein aar aenneew saengi, nge ra itto no pwiuneoi we. Iwe igiwe a moann oanongan noa, nge wunuunun aeremas we a faer igin aenneew saengi mmwaen miniwe rhaepetaen.”

Ennetae Kker

²⁷ Oatowe Jesus e aepesa minikkeli, erhai rhoapwut eno noan pwuwa we a kkepas tae nge a iura pwe, “Ifa mwo nepaen mwamwaaaiun tipan rhoapwut na e timenewaeginiug me e attiug!”

²⁸ Iwe Jesus a paniuwaeni pwe, “Epwe faer ifa mwo mwamwaaaiun tipeer rhoakkena re rongorong minna oanoon Deus nge re aesirowu!”

Re Tittingoar Eew Kkeman
(Mat 12.38-42)

²⁹ Oatowe aeremas kkewe ra itto roangei noa Jesus, a kkepas nge eiura pwe, “A ifa mwo aenneebeer aeremesaen mweoi e igina! Re tittingoar eew kkeman, nge esooar eew kkeman ne epwe pwae ngaenir pwe aeggaen kkeman we rhag Deus efteeori ngaeni Jonah.

³⁰ Epwe weei rhag wunuunun aaen *profeta* Jonah eno pwe eew aeginngaenir re Nineveh, nge mwaaen na Naiun Aeremas epwene no pwe eew aeginngaenir aeremesaen mweoi e igina.

³¹ Noan Raaenin Apwiung nge Queen reen Sheba epwe iutae nge a oamonofiti aeremesaen mweoi e igina, pwe iiy a itto saengi faniuwaen taaw noa pwe epwe itto aiussaening ngaeni aaen *king* Solomon kkepesaen reepiy; nge ipwe aengaenigaemi pwe erhai e taegias saengi Solomon eno igeei!

³² Noan Raaenin Apwiung re Nineveh repwe iutae nge ra oamonofiti aeremesaen mweoi e igina, pwe iga iir re toagun saengi monofitiir oatowe re rongorong fenai kkewe aaen Jonah; nge ipwe aengaenigaemi pwe erhai e taegias saengi Jonah eno igeei!

Minna Seremaen Oanong
(Mat 5.15; 6.22-23)

³³ “Esooar erhai epwe figi eew oappwun nge a oapanoa ngaere iseni nong faaen saepiy; pwe ina epwe faer iseni tae wooan nenien oappwun, pwe aeremas repwe weri sereman igine repwe toonong.

³⁴ Minikkena mesoamw ikkina eweei pwe oappwunon oanongoamw. Igine epwe ffat mesoamw, ina nge minna oanongoamw epwe seram; nge igine ese ffat mesoamw, ina nge minna oanongoamw epwe rorhappiung.

³⁵ Iseni tipoamw pwe seram na nee tipoamw ete no pwe rorhappiung.

³⁶ Ngaere igine oanongoamw e seram, nge esooar mwo egius me reen ne eno noan rorhappiung, ina nge oanongoamw epwe seram taeppen rhag aaen eew oappwun aesseremoag.”

Jesus a Pwaeritae Tereer Pharisee me Sinsein Anniug Kkewe
(Mat 23.1-36; Mark 12.38-40)

³⁷ Iwe oatowe Jesus enoa moannon kkepas, erhai Pharisee a aerigirig iiy pwe epwe noa mwongo reen; iwe a noa mooat tiw reen pwe ra mwongo.

³⁸ Pharisee we eriutae oatowe eweri Jesus pwe ese nniuwa paiun wenimwaaen aan epwe mwongo.

³⁹ Iwe Soamwoon a aengaeni pwe, “Iwe igina, aaemi Pharisee oawgaen nniuwa niugiuu aaemi kkap me saepiy, nge nee tipaemi esseogiu rhegoaw me feoffeelor aenneew.

⁴⁰ Oawpwurh! Saapw Deus minne efteeori minna niugiuu me pwan minna noan?

⁴¹ Oawfang ngaenir rhooa affayeo oawton kkap me saepiy kena aaemi, ina nge oanongan aegiaeg epwe nim me reemi.

⁴² “Ifa mwo aenneewan ngaenigaemi aaemi Pharisee! Oawngaennee! Deus eew me reen ginigin seig me reen *mint* me *dill* me *cumin* me oanongaen waninges, iwe nge oaw oatoranoa ikkina efin me aaemi ffayeo ngaeni Deus. Ikkeei anniug kka oawpwe pomwoni, nge oawsoapw nigit noa ikkina aekkaew.

⁴³ “Ifa mwo aenneewan ngaenigaemi aaemi Pharisee! Oawaerhaengi rhag oawpwe mooat wooan neniy kkena nenieer rhooa taegias me noan wutteer Jews, nge reaerhaengi aar aeremas repwe aewenimmwaar me aesirowuur me noan imwaen chuwaai.

44 Ifa mwo aenneewan ngaenigaemi! Oawwa weei paeyi kkewe esooar aeginn wooan ikkiwe aeremas refaaeraeg fetaen wooan nge rese giuneei."

45 Iwe nge erhai me neeiir sinsein anniug kkewe a aengaeni pwe, "Sinsei, wopwan igin aessaewaegemaem reen meeta kkomwu woiura!"

46 Jesus a paniuwaeni pwe, "Epwe pwan ifa mwo aenneewan ngaenigaemi aaemi sinsein anniug kena! Pwe oawwa iseis tae mini cchoaw wooar aeremas, nge aaemi mwo nge oawse aeitiwow egatt aiuttiumi pwe oawpwe tipaengiir.

47 Ifa mwo aenneewan ngaenigaemi! Oawfeeori paeyieer rhooawe *profeta* pwe epwe gacch, pwe ina iir rhooa kkewe rhaepeto kkewe aaemi reniyy maaer noa.

48 Aaemi wooan oanongaemi oawwa aepwaeri noa pwe oawtipieew ngaeni meeta kkewe rhaepeto kkewe aaemi refeoeri; reniyy maaer noa *profeta* kkewe, nge aaemi oawwa feeori paeyieer.

49 Iwe reen minneei nge minna Repiaen Deus eiura pwe, 'Ipwe fangetiw *profeta* me rhoaan akkiuneo reer; nge iir repwe niiy maaer noa aekkaaemweoi nge re aewwaeiraesiir aekkaaemweoi.'

50 Iwe aeremesaen faaen mweoiu repwene aegaeregaer pwe faan ngaenir *profeta* kkewe reniyy maaer noa saengi oatowe ffeeor taen faeinaengiy,

51 saengi oatowe reniyy maei noa Abel noa ngaeni oatowe reniyy maei noa Zechariah, iwe reniyy tiw me nepetaen antar me Pwiuneoi we epin. Ennetaan, ipwe aengaenigaemi, pwe aeremesaen faaen mweoiu nge repwe aegaeregaer pwe faan ngaenir *profeta* kkewe reniyy maaer noa.

52 "Ifa mwo aenneewan ngaenigaemi aaemi sinsein anniug! Oawammwarhiu *key* we epwe sugi ngaeni asam we aesemaen reepiy; aaemi mwo nge oawsoapw pwan toonong, nge oawpwan aiugiur iyo kena repwe mwerhaen toonong!"

53 Oatowe Jesus a siusaengi pwiuneoi we, nge sinsein anniug kkewe me *Pharisee* kkewe ra rhaep aar aepesa aenneewa nge rekkepas aeiyeg ngaeni reen mesemesaen aegiaeg,

54 minni pwe repwe oatupwu pwe repwe pipiiy ngaere epwe rugunoa aan kkepas.

12

Eew Atapeonneog Reen Riugiuriug (Mat 10.26-27)

1 Iga sengeras aeremas repwe pwuwa fengaen, nge ra pwuu tae rhag wooan pirheen erhai, Jesus a aengaenir rhoaan kkayeo kkewe naiun pwe, "Oawaefaaenigaemi reen yeast kkewe aar *Pharisees*—wewen minneei nge aar riugiuriug.

2 Oanongaen meeta na epwe mwoan nge epwe pwaetae, nge oanongaen meeta ewop nge epwene pwae noa.

3 Iwe ina ese tiwegian minne oawaepesa me ne roorh nge ina epwene rong noa noan seram, nge ese tiwegian minne oawpwe ngiuniungiuniuw me nee iimw nge ina aeremas repwene aekkepwas aegini fetaeneei me wooan wungaen iimw.

Iyo na Sipwe Mesagiu (Mat 10.28-31)

4 "Ipwe aengaenigaemi, wenimaereyaerei, oawsoapw mesagiir rhooamwu regaen niiy noa oanongaemi, pwe epwe noa wenimwirin nge esooar no eew min aenneew ne repwe rhiuwen mmwenen feeori.

⁵ Ipwene pwaeri ngaenigaemi iyo na oawpwe mesagiu: oawpwe mesagiu Deus, pwe iiy minne eyor maemaewan pwe epwe oatoragaemi nong noan niflerno weni mwirin aan niiy gaemi noa. Niugiuniug ngaeniaei, pwe iiy minne oawpwe mesagiu!

⁶ “Pwe meeta, saapw riiufai checcha nge paniuwaenin nimman nicchok? Iwe nge esooar mwo erhai neeiir ne Deus emaniuwegi noa.

⁷ Oanongaen aennirhimwemi mwo nge Deus epaengi. Ina oawsoapw mesag, pwe aaemi ina eyor ipitaemi memmweer towunepeer nicchok!

Pwuwaafai me Oasoarhoawuna Kristus

(Mat 10.32-33; 12.32; 10.19-20)

⁸ “Ipwe aengaenigaemi pwe ese tiwegin iyo kkena re aepesa pwe iir naeyi me neeiir aeremas, nge epwe pwan ina wunuunun aaen mwaaen we Naiun Aeremas epwe feeori ngaeniir me weni mmweer angkenus kkena naiun Deus.

⁹ Nge iyo kena resaep saengiaeai me neeiir aeremas, nge epwe pwan ina wunuunun aaen mwaaen we Naiun Aeremas feeori ngaeniir me weni mmweer angkenus kkena naiun Deus.

¹⁰ “Ese tiwegin iyo na ekkepas aenneewa mwaaen we Naiun Aeremas nge epwe mmwenen mwusunoa; nge iyo na ekkepas aenneewa Espritu Santus esoapw mmwenen saenetaeg.

¹¹ “Igine repwe pwigiug noa pwe wopwe noa apwiung noan wutteer Jews aere weni mmweer *governor* ngaere soamwoonin faniuw, nge oawsoapw pireiir reen wunuunun meeta kena oawpwe feeori me aepesa.

¹² Espritu Santus epwe kapwiungiu ngaenigaemi meeta kena oawpwe aepesa.”

Fioangon Awewen Erhai Mwaaen Naiwiis we Epwurh

¹³ Erhai mwaaen me noan pwuwa we a aengaeni Jesus pwe, “Sinsei, aengaeni maan na pwiiy pwe epwe aemegena woamaem minikkena pisaegi-maem ina mwaaen na semmaem e nigiti ngaenigemaem.”

¹⁴ Jesus a paniuwaeni pwe, “Maereyaerei, iyo efang ngaeniaei maemae-waei pwe ipwe aettiwegini ngaere ipwe aemegena pisaeg kena woami?”

¹⁵ A aengaenir pwe, “Oawneogiuw tipaemi nge oaw aefaaennigaemi reen mesemesaen rhegoaw, pwe wenewenen oamw menaw ina ese ffeeorto me reen minikkena oamw, inamwo ifa nepaen oamw naiwiis.”

¹⁶ Iwe nge Jesus a aeni ngaeniir fioangon awewe een: “Eno erhai mwaaen ne e naiwiis nge e towunap uwaen mwongoon minikkena pwugusan.

¹⁷ A niunniwaennei nong rhag wooan oanongan; ‘Esooar no iga ipwe iseni noa e uwaen minikka fetaen ee. Meeta ipwe feeori?’

¹⁸ A aepesa pwe, ‘Ieen minne ipwene feeori. Ipwene fereei tiw soko e aaei nge iya feeori sefaaeniy aekkaew min tettemoag, pwe ipwene iseni oanongaen uwaen minikka fetaen me minikka pisaegiy noan.

¹⁹ Nge ina ipwene gaen iura pwe, mwaaen wenepwu! A yo ngaenius oanongaen minikkewe e mwamwaai pwe ammwenemw reen fitowu mwo raeg. Wonoa amaniuwa noa, wopwe mwongo, iun, nge wo apwapwa fetaen.’

²⁰ Nge Deus a aengaeni pwe, ‘Wopwurh! Noan pwongin eei rhag nge wopwene fangetae oamw nngas; iwe nge iyo na epwene pwigi oanongaen minikka wa iseni rhag pwe ammwenemw?’”

²¹ Jesus a soapwei noa, “Egaen ieei wusun minne egaen wen ngaenir rhoakka regaen oacchongatae rhag naiwiiseer, nge rese naiwiis faaen mesaen Deus.”

*Niugiuniug Ngaeni Deus
(Mat 6.25-34)*

²² Iwe Jesus a aengaeniir rhooan kkayeо kewe naiun pwe, “Iwe ipwe aengaenigaemi pwe oawsoapw aiunaeng reen mwongo kkomwu oawpwe menaw reen, ngaere reen mengaagiun oanongaemi.

²³ Menaw ina e igin yor rhaengin mmwaen mwongo, nge oanong ina eyor rhaengin me mmwaen mengaag.

²⁴ Pipiir mwiiy kenaan: rese foat faiun waniwan ngaere gin uwaen waniwan; esooar aar soko; nge Deus e oamwongoor! Aaemi e igin yor ipitaemi memmweer man aeniaen!

²⁵ Eyor neeimi epwe mmwenen enaenaei noa egius menewan reen aan aiunaeng?*

²⁶ Ngaere igine ese mmwenen ngaenigaemi minikka e paerhigerhig, pwan minin meeta aaemi pireiir reen ikka aekkaew?

²⁷ Pipiir wunuunun aaen peeon waniwan menawtae: rese engaang nge rese pwan ffeeor mengaagiur. Nge ngaang ipwe aengaenigaemi, pwe igiwe mwo *king* Solomon e menaw iwe erhai man ssow wiinan nge esooar mengaagiun ne enning noa me mmwaen peeon waniwan kaan.

²⁸ Pwe Deus minne aememmengaagiur fetinen neeiin waniwan—fetin kka eyor igma, nge resoapw nonoa naiu, pwe ra figaeg noa newumw. Pwe meeta, Deus esoapw mmwenen aememmengaagiugaemi? Me gaen mwittiginen aaemi niugiuniug!

²⁹ “Iwe oawsoapw igin aenneewa tipaemi, oawsoapw tip mwaramwar reen meeta kena oawpwe mwongo me iun.

³⁰ (Pwe re Gentiles me noan faeinaengiy nge retip mwaramwar reen oanongaen minikka.) Minna na Semaemi egiuneei pwe oawpwe ammweneni minikkeei.

³¹ Nge ina rhag, oawpwe pwan giutta minna Mweoiun Deus, nge ina nge iiy epwe fang ngaenigaemi meeta kenaan.

*Wenepwu Kena WooaiNaaeng
(Mat 6.19-21)*

³² “Oawsoapw mesag, aaemi ikkina fitiman, pwe minna Semaemi ina e mwamwaai tipan epwe ngaennegaemi minna Mweoiun.

³³ Chuwaiuw noa oanongaen pisaegimi nge oawfang senaapian ngaenir rhooa mwaenene. Oawpweipwog aaemi pwetoaw kewe ese mmwenen ffeir, nge oawwa iseis nong wenepwuwaemi me wooainaeng noan, ina esoapw mmwenen gitigit tiw pwe esooar maan mwoarho ne epwe mwoarhow, nge esooar manepwur ne epwe mmwenen fereei.

³⁴ Pwe pwunnomi epwe no rhag iga wenepwuwaemi eno ee.

Rhooan Akkiuneo Kkewe reAnneogiuneog

³⁵ “Oawpwe neogiuw tipaemi reen minikka epwe ikkitto, oawwa pwigi aaemi oappwun nge oawwa figi,

³⁶ pwe epwe weer rhag rhooan akkiuneo kkewe re wewweti maasta we aar aan epwe sefaaen to me reen gupwunon appwiuniupai we. Oatona epwe noa sefaaen nge epwe apiungiupiung rhag asam we, nge ra sugi.

³⁷ Ifa mwo aar kker rhooan akkiuneo kka maasta we aar epwe noa itto nge e rhuungiir pwe re rhiuwen mmas pwe re wewweti noa rhag! Ennetaan, ipwe aengaenigaemi, pwe maasta we epwe noa itto nge a pwiniti mengaagiun, a amooattiweer, nge iiy minne epwene ffeeor ngaenir aeneer.

* ^{12:25} aere: Eyor erhai me neeimi ne epwe mmwen aenaenaeinoa egius taegiasan oanongan reen aan aiunaeng?

38 Ifa mwo aar kker igine maasta we e itto rhuungiir nge re oamoannatae, inamwo igine enoa itto nugaenipwoong ngaere weni mmwaei raaen!

39 Nge oawpwe metaf pwe ngaere soaw iimw we e giuneei oaton aaen maan mwoarho we epwe itto, iwe nge iiy esoapw fang ngaeni rhooa mwoarho we epwe fereeinong iimw we imwan.

40 Nge pwan aaemi nge oawpwan oamoannatae, pwe mwaaen we Naiun Aeremas epwe noa itto reen eew oat ina aaemi oawsoapw tapeonneog reen.”

*Rhooan Akkiuneo we e Wenewen me Iwe Ese Wenewen
(Mat 24.45-51)*

41 Peter a iura pwe, “Soamwoon, nge aemaem rhag minne wo niuwaennei ngaenigemaem fioangon awewe een, ngaere oanongeer aeremas?”

42 Soamwoon a iura pwe, “Ina nge iyo rhoaan akkiuneo na e wenewen nge e reepiy? Iiy minne maasta we a fang ngaeni pwe epwe nemaenir rhoaan akkiuneo kkewe nge e ngaenner mwongo noan oaton efin.

43 Ifa mwo wenepwuwaen rhoaan akkiuneo we, aere maasta we aan e itto giuneei aan feeori minikkeei igiwe ewar!

44 Ennetaen, ipwe aengaenigaemi, pwe maasta we epwe ngaennee rhoaan akkiuneo we pwe epwe nemaeni oanongaen minikkewe pisaegin.

45 Nge ngaere igine rhoaan akkiuneo we e niuwaennei pwe maasta we aan epwe mmwaei aan sefaaeneto, nge a rhaepetae aan wirhiir rhoaan akkiuneo kkewe rhinan, mwaaen fengaen me rhooopwut, nge e mwongo nge e iun e pwunaas noa,

46 ina nge maasta we epwe sefaaeneto noan raaenin we rhoaan akkiuneo we ese niuwaennei, me eew oaton esoapw giuneei. Iwe maasta we epwene fena kititiw nge efang noa neeiir rhooawe rhooa misimis.

47 “Rhooan akkiuneo na e giuneei minna maasta we aan e mwerhaen pwe epwe feeori, nge ese oamoannatae pwe epwe feeori, ina nge epwe igin temoag aegaergaer na repwe feeori ngaeni.

48 Iwe nge rhoaan akkiuneo na ese giuneei minna maasta na aan e tipaeni, nge efaer feeori minne epwe woawwoaw reen, ina nge epwe ppaen woawwoaw na repwe fang ngaeni. Aere Deus efang towunepaen aegiaeg ngaeni erhai aeremas, ina nge aeremas we a pwan igin towunap noa meeta epwe feeori, ina nge Deus a pwan igin towunap meeta epwe aeilineow.

*Jesus Minne e Pwigito Aengimaw
(Mat 10.34-36)*

49 “Iya itto ipwe ffooanaetae eew aengaet wooan faeinaengiy, nge eifa mwo aaei aeniaen ngaere a fasiun giu!

50 Eyor eew baptismus ipwe baptismus reen, nge eifa mwo nepaen waeiraes noan tipaei igma toori aan epwe moanno noa!

51 Oaw niuwaennei pwe i itto pwe ipwe pwigito oapoas noan faeinaengiy? Aapw, saapw oapoas, pwe aeyimweoi.

52 Saengi igma a noa eew iimw ne re nimman aeremesaen ina repwene aeyimweoi, eoniurhai repwene aengimaaw ngaenir ikkina riiurhai nge riiurhai repwene aengimaaw ngaenir ikkina eoniurhai.

53 Semeer repwene aengimaaw ngaenir mwaaen kkena naiiur, nge mwaaen kkena naiiur repwene aengimaaw ngaenir mwaaen kkena semeer; iin repwene aengimaaw ngaenir naiiur rhooopwut nge naiiur rhooopwut repwene aengimaaw ngaenir ineer; inaen pwiuniweer repwene aengimaaw ngaenir pwiuniwaen naiiur nge pwiuniwaen naiiur repwene aengimaaw ngaenir inaen pwiuniweer.”

*Metefaaeginin Faei Oat Kkeei
(Mat 16.2-3)*

⁵⁴ Jesus a pwan aengaenir aeremas kkewe pwe, “Oate oawweri eew toapw e ittae me netow, oawwa iura rhag pwe epwe piung worhow—iwe a piung.

⁵⁵ Nge oawpwe meyaifi aaen aaeng peopeoto me eor, nge oawwa iura pwe epwene pwerhikkar—in a nge epwene pwerhikkar.

⁵⁶ Maan oatupwutupw! Oawmmwenen woo ngaeni faeinaeng me noan naaeng nge oawwa mmwenen iura wunuunun mesaei raaen; ina nge meeta faan oawse giuneei mmwenen minikka ewen oatokkeei reen?

*Oapoasson Nee Finarh me Rhooan Kkoapwutorh
(Mat 5.25-26)*

⁵⁷ “Meeta ese mmwen ngaenigaemi pwe aaemi rhag oawpwe aettiwegini minne efin oawpwe feeori reen?

⁵⁸ Ngaere erhai e pwigiug noa noan nenien apwiung pwe wopwe apwiung, een wopwe oarhorho wopwe oapoassa nepetaemi weni mmwaen wopwe gona nenien apwiung. Ngaere wose feeori ina nge een wopwene noa weni mmwaen soaw apwiung nge iiy a aefengoag noa nee paaiur *police*, nge iir ra noa kanepwusoag noa.

⁵⁹ Ipwe aengaenig pwe iginaan iga wopwe noa no e toori oamw piungtiw oanongaen paniuwaen monofitimw.”

13

Toagun Saengi Monofitimi pwe Oawte Mae

¹ Noan eew oat aekkaerhai aeremas re fioangei ngaeni Jesus mmweneer re Galilee kkewe Pilate eniir noa reen oatowe refang aar maenigaech ngaeni Deus.

² Jesus a paniuwaenir pwe, “Reen iga e ina wusun aar mae noa iir re Galilee kkena, nge aaemi oawniuwaen pwe remae pwe ekkaein monofitii memmweer oanongeer noa re Galilee kaan?

³ Aapw saapw ina! Ipwe aengaenigaemi pwe ngaere igine oawse toagun saengi monofitimi, nge aaemi oawpwe pwan maegin mae noa.

⁴ Nge aeremas kkewe seig me waniman ikkiwe remae noa oatowe eppiungiutiw iimw taegias we Siloam wooar? Oawniuwaen pwe remae pwe ekkaein monofitii memmweer oanongeer aeremas kena reno noan Jerusalem?

⁵ Aapw saapw ina! Ipwe aengaenigaemi pwe ngaere igine oawse toagun saengi monofitimi, nge aaemi oawpwe pwan maegin mae noa.”

Fioang Awewen Eew Fig Iwe Ese Uwa

⁶ Iwe Jesus a aengaenir fioangon awewe een: “Eno erhai mwaaen ne emenaw tae eew *fig* me noan menaai na aan. Egiut uwaen *fig* we nge esooar minne e rhuungi.

⁷ Iwe a aengaeni rhooan menaai we naiun pwe, ‘Een pipiiy, a enuuw raeg aaei itto giut uwaan *fig* eei, nge esooar minne i rhuungi me wooan. Een gopyi tiw! Meeta ipitaen aan itto foat wooan ppweon eei?’

⁸ Nge rhooan engaengaen menaai we a aengaeni pwe, ‘Soawumwaer, nigit mwo reen eew raeg pwe ipwe genengi pwaeniaeniy fetaenee mwo nge iya iseis nong koyasiun.

⁹ Nge ngaere enoa raeg iiy nge a yor uwaan ina nge a mwamwaai; ngaere esooar, ina nge wonaaen gopyi tiw.”

Jesus a Aecchipwa Aaen Semwaai Erhai Rhooapwut Wooan Sabbath

¹⁰ Wooan Sabbath nge Jesus a fenai noan eew wutteer Jews.

¹¹ Erhai rhoopwuton pwiuneoi we a seig me wanuuw raeg aan semwaai pwe eno erhai aniu aenneew wooan; eppwoar sagiuriun nge ese mmwenen iutae.

¹² Oatowe Jesus enoa weri nge a faingiwow, “Rhooapwut mwuun, wopwene saenetaeg me reen oamw semwaai!”

¹³ A iseni tae paiun wooan niewe, nge noan oaton we rhag nge a uwen tae nge a aepingepinga Deus.

¹⁴ Soamwoonin wutteer Jews we a soong wooan Jesus pwe igiwe e aecchipwa rhooapwut we wooan Sabbath, a kkepas tae nge a aengaenir pwe, “Wonowu raaen raaenin aarh sipwe engaang; iwe ina epwe noa itto raaen kenaan nge oawwa itto aecchipwaar rhooa semwaai, nge saapw wooan Sabbath!”

¹⁵ Soamwoon a paniuwaeni pwe, “Maan oatupwutupw! Aaemi oawmmwenen pwaeisi naimi wakke ngaere *donkey* me noan gurur nge oawwa paenir noa oawpwe noa aiuniiur rhan wooan Sabbath.

¹⁶ Igina ina eno erhai rhoan aeinang we aaen Abraham ina a seig me wanuuw raeg aaen Saetan geoni; sisoapw saenetie nieen wooan Sabbath?”

¹⁷ Aessefaaenin kkepas we aan a aessaewaar noa rhooa kkewe rhoan kkoapwuton, nge aeremas towunap ra faer igin pwapwa reen oanongaen min mwamwaai kkewe efteeori.

Fioang Awewen Faiun Mustard we (Mat 13:31-32; Mark 4:30-32)

¹⁸ Jesus a aeiyeg pwe, “Eifa wusun minna Mweoiun Deus? Meeta minne ipwe awewe ngaeni?

¹⁹ E ieen wusun. Erhai mwaaen a pwigi efai faiun *mustard* nge a noa foatogi noan menaai we aan. A pwaech miniwe faiun nge a temoag noa pwe efoarh waniwan, nge man aeniaen ra itto ffeeor feseer wooan raaen.”

Fioang Awewen Eew Yeast (Mat 13:33)

²⁰ Jesus a pwan aeiineo, “Meeta minne ipwe awewe ngaeni minna Mweoiun Deus?

²¹ E ieen wusun. Erhai rhoopwut e pwigi egius *yeast* nge anofiti fengaeniy me enuuw pwaecchin fenoawa emas toori aan pwo tae fenoawa we.”

Asam we e Rheogit (Mat 7:13-14, 21-23)

²² Jesus a toonong noan aepinoamw kkewe me pwugos kkewe, nge a fenai fetaen aeremas igiwe e nennoa ngaeni Jerusalem.

²³ Erhai a aeiineow pwe, “Soawumwaer mwuun, aekkaerhai rhag minne repwe menaw?”

Jesus a paniuwaeni pwe,

²⁴ “Oarhorho pwe wopwe faer nong noan asam na erheogit; pwe iga re towunap aeremas repwe aeginaar nong nge resoapw takkenong.

²⁵ Miniwe soamwoonin iimw we epwene iutae nge a ttiy noa asam we; iwe oawpwene iu nasam pwe oawpwene apiungiupiung nong wooan asam nge oawwa iura pwe, ‘Soawumwaer, sugi mwo asam!’ nge iiy epwe paniuwaeni gaemi pwe, ‘Ise giuneei igine aaemi oaw itto me ee!’

²⁶ Nge aaemi oawpwene paniuwaeni pwe, ‘Aemaem aeimwongo me iun me reemw; een wo fenaiuw noan miniwe aepinoamwomaem!’

²⁷ Nge iiy epwene pwan iura sefaaeniy pwe, ‘Ngaang ise giuneei igine aaemi oawitto me ee. Oawsiu noa me oaroi, oanongaemi rhooa wegitaeg aenneew!’

²⁸ Ifa mwo aaemi pwe sessaeng me akkaarengi, igine oawpwene weriir Abraham, Isaac, Jacob, me oanongeer *profeta* kkewe me noan miniwe Mweoiun Deus, nge aaemi oawwa faer aekkaerh noa!

²⁹ Aeremas repwene maegeto me eotiw me netow, eor meefaeng, iwe ra itto mooat tiw noan gupwunnap na noan Mweoiun Deus.

³⁰ Iwe aaemweoi re amwirimwir repwene gommw, nge aaemweoi re-gommw repwene amwirimwir.”

Aaen Jesus Aerhaengerhaeng Ngaeni Jerusalem (Mat 23.37-39)

³¹ Noan oatowe rhag nge aekkaaemweoi *Pharisee* ra itto reen Jesus ra aengaeni pwe, “Wopwene siu me igeei wa noa eew pwiuneoi, pwe Erotes a mwerhaen epwene niug noa.”

³² Jesus a paniuwaenir pwe, “Oawnoa oawwa noa aengaeni maan oatup-wutupw na pwe: ‘Ipwe oatowowuw mwuniaan nge iarhiwa aar semwaai aeremas iginia me naiu, nge wooan ayeoniuraenin raaen nge a moann aaei engaang.’

³³ Inamwo nge ngaang ipwene noa raaeneei, naiu, me raaennenaan; pwe ese ffin pwe erhai *profeta* epwe noa mae me eew pwiuneoi pwe noan rhag Jerusalem.

³⁴ “Jerusalem, Jerusalem! Wa niir noa *profeta* kkewe, nge woteraar rhoaan pweipwogin kkepas kkewe Deus efangoeto reemw! A faaen fiteig aaei mwerhaen pwe ipwe ioni fengaenniy noawumw aeremas, taeppen maniug a ioni fengaenniy naiun faaen paiun, nge een wose mwerhaen pwe ipwe feeori!

³⁵ Iwe *Temple* we oamw ina aeremas repwe siusaengi iwe peonoa. Ipwe aengaenigaemi pwe aaemi oawsoapw weriae no toori oatona oawpwe iura pwe, ‘Deus epwe aewenepwuwa aeremas na epwe itto faaen itaen Soamwoon.’”

14

Jesus e Aecchipwa Aaen Erhai Mwaaen Semwaai

¹ Eew Sabbath Jesus enoa epwe noa mwongo reen imwaen erhai soam-woonin *Pharisee*; nge aeremas regaen igin pipiiy firhiy.

² Erhai mwaaen epwo pirheen me paiun a noa itto reen Jesus,

³ iwe nge Jesus a kepastae nge a aengaenir sinsein anniug kkewe me *Pharisees* kkewe pwe, “Meeta Anniug we aarh eiura sipwe aecchipwaar aeremas wooan Sabbath ngaere aapw?”

⁴ Nge iir rese paniuwaeni. Iwe Jesus a paeni mwaaen we, a aecchipwa, nge a aengaeni pwe epwene noa.

⁵ Iwe a aengaenir rhooawe pwe, “Ngaere igine erhai me neeimi eyor naiun wonigaet ngaere wakke nge eppiung nong noan eew rhanniunim wooan Sabbath, oawsoapw taiuw mwetekkaeiwow inamwo raaenin Sabbath miniwe?”

⁶ Nge erhai mwo me neeiir nge ese mmwen ngaeni epwe paniuwaeni.

Mesoanosooan me Ttiumwiun

⁷ Jesus eweriir aaemweoi me neeiir waseona kkewe refini pwiuneoi kkewe eigin mwamwaai pwe repwe mooat ee, iwe a fioangei ngaenir fioangon awewe een.

⁸ “Igine erhai epwe aerigirig wopwe noa tapwee i eew gupwunon appwiuniupai, wosoapw noa mooat pwiunoei na e oarosaen mwamwaai. Pwe ina maeni epwe yor erhai ina eyor ipitan me mmwoamw ina epwe noa itto,

⁹ nge iyo we e faingigaemi epwe noa itto nge epwene aengaeniug pwe, ‘Merenoa pwe mwaaen een epwe mooat igma.’ Iwe ina een wopwene saew nge wopwene noa mooat tiw pwiunoei na e oarosaen sessoan.

¹⁰ Ieen minne oawpwe feeori, igine repwe aerigirig, wopwe noa wa noa mooat igma oarosaen sessoan ee, ina nge iyo we e faingiug epwe noa itto reemw nge epwene aengaeniug pwe, ‘Moawwerh maereyaerei, itto mooat iga e mwamwaai e.’ Ieen minne epwene aetaegisoag tae me neeiir aeremas kkena reno pwe een erhai aeremas eyor ipitoamw.

¹¹ Pwe iyo na e aetaegiasa tae epwe sessoanotiw, nge iyo na epwe oasossonaetiw epwe taegias tae.”

¹² Iwe Jesus a aengaeni iyo we e faingito pwe, “Igine wopwe gaen ffeeor oamw mwongoon oanowas ngaere mwongoon faaef, wosoapw faingir maereyaeremw ngaere pwiimw ngaere perhaengioamw ngaere iyo kkena aeremesaen weni oaromw igma renaiwiis – pwe ina repwe pwan faingi sefaaeniug pwe wopwe pwan noa tapweer reen gupwun pwe repwe paniuwaeni ngaeniug meeta we wofeeori ngaenir.

¹³ Igine wopwe gaen ffeeor oamw gupwun, faingir rhoakkena remwaenene, rhoakkena emwaetete oanongeer, rhooa mae pirheer, me rhooa parh;

¹⁴ ina nge wopwe wenepwu, pwe iga iir rese mmwen repwe paniuwaeni meeta we wofeeori ngaenir. Deus epwe paniuwaeni oamw feoffeelor noan raaenin na oanongeer aeremas kena remwamwaai repwene menaw tae me reen mae.”

Awewen Gupwun Igin Temoag we (Mat 22.1-10)

¹⁵ Oatowe erhai me neeiir waseona kkewe remooat reen *table* we erongorong minikkewe, nge a aengaeni Jesus pwe, “Ifa mwo aar kker rhoakka repwe tapwee i gupwun na noan minna Mweoiun Deus!”

¹⁶ Jesus a aengaeni pwe, “Eno erhai mwaaen efeeori eew gupwun igin temoag nge eigin towunap aeremas kka e faingir.

¹⁷ Igiwe a toori oaton gupwun we nge a fang noa erhai naiun rhoaan akkiuneo epwe noa faingir waseona kkewe, ‘Oawitto pwe oanongaen meeta nge a oamoannatae!’

¹⁸ Iwe nge erhai me erhai neeiir a ffeeor fetaen mwarhneokkiur. Manewe egommw a aengaeni rhoaan akkiuneo we pwe, ‘Ngaang iya chuwaiuw eew maat nge ipwe noa mwo sengaeri; faaen pirhemw nge isoapw mmwenen tapweog.’

¹⁹ Nge iwe erhai a iura pwe, ‘Ngaang inaaen chuwaiur seig wakke nge iye ipwene noa aegina aaei aengaenga; faaen pirhemw nge isoapw mmwenen tapweog.’

²⁰ Nge iwe erhai a iura pwe, ‘Ngaang iye inaaen appwiuniupai noa rhag, nge ina faaen minne isoapw mmwenen toowow reen.’

²¹ Iwe rhoaan akkiuneo we a sefaaen nge a noa aengaeni maasta we aan oanongaen minikkewe re iura. Maasta we a igin soong nge a aengaeni rhoaan akkiuneo we pwe, ‘Mwetekkaei wow wooan aan temoag kena me aan mwittig kkomwu ne aepinoamw, nge wa pwigiir to rhooa mwaenene, rhooa mwaetete oanongeer, rhooa parh, me rhooa pirhemae.’

²² Ese mmwaei mwo nge rhooan akkiuneo we a itto iura pwe, ‘Iya moann aaei feeori meeta kkewe wo iura, nge e rhiuwen nenieer aeremas.’

²³ Iwe maasta we a aengaeni rhooan akkiuneo we naiun pwe, ‘Wonoa itiwow noan ennap me aan paecchig kena enoa niugiu aepinoamw pwe wopwe noa faingiir to aeremas, pwe epwe sseog noa noan iimw we imwaei.

²⁴ Ipwe aengaenigaemi pwe esooar erhai me neeiir rhooawe simmwaen faingiir ne epwe nnaeri egius me reen mwongoon gupwun e aaei.”

Wunuunun Aaen Erhai Epwe No pwe Rhooan Kkayeo (Mat 10.37-38)

²⁵ Eew oat igiwe e igin towunap aeremas re tettapwei Jesus, a wegitaeg nge a aengaenir pwe,

²⁶ “Iyo kka re itto reei resoapw mmwenen no pwe naeyi rhooan kkayeo ige-
rine rese aerhaengiae noa memmweer semeer me ineer, rhooan ngaenner
me naiur, pwir me mwengeyeer, me iir wooan oanongeir.

²⁷ Iyo kena rese aiufera aar kurus nge ra itto tapweaei resoapw mmwenen
no pwe naeyi rhooan kkayeo.

²⁸ Ngaere igine erhai me neeimi e niunniwaennoi pwe epwe feeori eew
iimw taegias, mesaemmwaen minne wopwe feeori ina wopwe mooat tiw
wa aeperha paniuwaen, pwe wopwe giuneei ngaere epwe toaw ngaenug
paniuwaen aan moann ngaenug engaang na oamw.

²⁹ Ngaere wose feeori minnei, nge ina esoapw mmwenen moann ngae-
niug iimw taegias eei mwirin oamw feeori noa poasopoason; nge oanongeir
rhooakkena reweri meeta ewen repwene kekkaei aeginiug.

³⁰ Nge repwene iura pwe, ‘A rhaepetae oamw kaiu nge ese mmwenen
moann ngaenug oamw engaang!’

³¹ Ngaere erhai *king* epwigiir seig sengeras sonotaw repwe noa
moawun ngaeni pwan erhai *king* epwigiir riiuweig sengeras sonotaw,
mesaemmwaen ina epwe mooat tiw a niunniwaennoi mwo ngaere epwe
mmwenen niir rhooan peig na epeig.

³² Ngaere esoapw mmwen, iwe epwene fangenoa naiun rhooan akkiuneo
reen *king* na erhai iga e rhiuwen taaw pwe repwe feeori fengaenniy oapoa
nepeteer.

³³ Epwe iiei rhag wusun pwe esooar neeimi ne epwe mmwenen no pwe
naeyi rhooan kkayeo ige ese oatoranoa oanongaen aegiaeg.”

Aesiig we Ese Saaet (Mat 5.13; Mark 9.50)

³⁴ “Aesiig ina emwamwaai, iwe ngaere esa saaet no, sisoapw mmwenen
aesaaeti sefaaeniy.

³⁵ Ese gacch ngaeni ppweon ngaere koiyas; re aekkaerh noa. Iyo eyor
saeningan, epwe rongorong!”

15

Sheep we e Mwaenirh Noa (Mat 18.12-14)

¹ Eew raaen nge ra noa ssow to rhooan iyoiyon *tax* me rhooa monofit ra
itto aiussaening ngaeni Jesus.

² Nge Pharisees me sinsein anniug kkewe a rhaepetae aar mwangiuni-
ngiun pwe, “Mwaaneei e aetiwaar rhooa monofit nge epwan mmwenen
mwongo reer!”

³ Jesus a aeni ngaenir fioangon awewe we:

4 “Aere igine erhai neeimi eyor epwiugiuw naiun *sheep* iwe nge erhai me neeiir emwaenirh noa –meeta wopwene feeori? Wopwene nigitir noa *sheep* kkewe tiweig me tiweman nge wa noa giutta fetaeneei manewe emwaenirh noa ssiaaenin oamw noa rhuungi. **5** Igine wonoa rhuungi nge wopwene igin kker, nge wopwene ngaettae wooan eferoamw

6 nge wa pwigi noa nee iimw. Wopwene faingiir to weni maereyaeremw me rhooan no oaromw, wopwene aengaenir pwe, ‘Iya igin kker pwe iya rhuungi *sheep* we naeyi iwe emwaenirh noa. Sipwene oagupwuna!’

7 Iwe, ipwe aengaenigaemi pwe epwe pwan igin temoag kkeren weeinaaeng wooan erhai man monofit etoagun saengi monofitin mmweer rhooawe tiweig me tiweman ikkiwe rese toagun saengi monofitiir.

Faiun Senaapiy we Eppiung Noa

8 “Aere igine eyor erhai rhoapwut eyor seig naiun faiun senaapiy nge efai eppiung noa –meeta nieuwe epwene feeori? Epwe figi eew oappwun, a peoni noan iimw we imwan, nge a aetemaeginiy aan giutta toori aan noa weri.

9 Oatona epwe noa weri nge epwene faingiir maereyaeren me rhoakkrena reno oaron nge epwene aengaenir pwe, ‘Iya igin kker pwe iya weri faiun senaapiy we eppiung saengiae. Sia oagupwuna.’

10 Ipwe aengaenigaemi pwan ieen rhag taeppen aar kker angkenus kkewe naiun Deus igine erhai maan monofit a toagun saengi monofitin.”

Aetemwaaen we e Mwaenirh Noa

11 Jesus a soapwei noa nge a iura pwe, “Eyor erhai mwaaen reno riiurhai naiun aetemwaaen.

12 Aetewe egit a aengaeni pwe, ‘Semaei, ngoatto inetiyy me reen minikkomwu oamw.’ Iwe mwaaen we a giniyy minikkewe aan wooar aet riiurhai kkewe naiun.

13 Enoa mwirin fitowu raaen nge aetewe egit a chuwaiuw noa minikkewe aan nge a pwigi senaapian nge a siusaengi miniwe pwugusan. A noa wooan eew faniuw taaw noa, iwe a noa oasonopa noa senaapiy kkewe naiun reen wegitaeg kkewe e aenneew.

14 Iwe a noa oarosa noa senaapiy kkewe naiun. Nge enoa wenimwirin a noa itto eew naengeta ngaeni faniuw we, iwe a noa mwaenene noa aetewe.

15 Iwe a noa engaang ngaeni erhai aeremesaen faniuw we, aan engaang ina rhooan oamwongon sino.

16 Aetewe a gaen aeniaen pwe epwe mwongo minikkewe anan sino pwe igiwe esooar ne egaen ngaennee anan.

17 Amwiucchiunoan igiwe aetemwaaen we enoa metaf noa wooan nge a iura pwe, ‘Oanongeer rhoaan engaang kkewe naiun mwaaen we semaei nge e igin towunap aeneer nge ngaang iye ipwene oaropaen maen pecchai noa!

18 Ipwene iutae igina nge ipwene noa reen mwaaen we semaei nge iya aengaeni pwe, “Semaei, iya monofit ngaeni Deus nge iya pwan monofit ngaeniug.

19 Esa ferhanno ipwe ffai pwe ngaang noawumw; aeffitaegiaeai noa rhag me rhooan engaang kkena noawumw.”

20 Iwe a iutae a sefaaen noa reen mwaaen we seman.

“Aetewe erhiuwen taaw saengi iimw we imwan nge mwaaen we seman a weri; a igin ffiayeow, iwe a fattapw ngaeni, a roamito aetewe naiun nge a faeisongei.

21 Nge aetewe a iura pwe, ‘Semaei, iya monofit ngaeni Deus nge iya pwan monofit ngaeniug. Isa ferhanno ipwe ffai pwe ngaang noawumw.’

²² Nge faer mwaaen we seman a faingir rhooan akkiuneo kkewe naiun, ‘Oaw mwetekkai! Oawnoa pwigito mengaag na oarosaen mwamwaa i oawpwe aememmengaagi ngaeni. Nge oawwa iseni tae efai *ring* wooan aiuttiun nge oaw iseni tae nokkaan wooan pirheen.

²³ Iwe nge oawwa noa oawpwe noa pwigito wakke na oarosaen soopwun oawwa itto niiy pwe oaw sipwene feeori eew gupwun faeregit pwe aan!

²⁴ Pwe aetewe naeyi iwe a mae, igina a menaw; e mwaenirh noa nge igina iya weri.’ Iwe ra feeori gupwun we aar.

²⁵ “Noan oatowe nge aetewe etugufaeyi eno noan maat. Nge a noa sefaaeneto reen iimw we imweer nge a rongorong pwe ra pwai me wur.

²⁶ A faingi erhai rhooan akkiuneo kkewe a aeiineow pwe, ‘Meeta a wen?’

²⁷ Rhooan akkiuneo we a iura pwe, ‘Aet we pwiiimw a sefaaeneto nee iimw, nge mwaaen we semoamw a aengaenir repwe niiy noa wakke we oarosaen soopwun pwe igiwe enoa sefaaeneto nge esooar minne ewen ngaeni.’

²⁸ Aet we etugufaeyi a soong esa mwerhaen toonong no nee iimw; iwe mwaaen we seman a teeowow aeffaenipirhe ngaeni epwe toonong.

²⁹ Nge iiy a appaniuwaeni mwaaen we seman, ‘Pipiyy, fiteig raeg aaei engaang ngaeniug taeppen aaen engaang erhai *slave*, nge esaaen yor mwo faaen eew ne i tipowwen ngaeniug. Nge meeta minne wongaenneaei? Erhai mwo *goat* nge wose ngaenneaei pwe aeipwe gupwun wooan me rhooakka maereyaerei!

³⁰ Nge aete noawumw iye e oasonopa noa senaapiaen minikkewe wofang ngaeni wooar rhooapwutoi chuwaai, nge enoa rhag itto nge wa niiy ngaeni wakke we oarosaen soopwun pwe aan mwongoon gupwun!’

³¹ Mwaaen we seman a iura pwe, ‘Moawwerh naeyi, een wo nonno rhag oaroi, nge oanongaen minikka aaei nge eno pwe oamw.

³² Nge sipwe apwapwa pwe sa kker, pwe aetewe pwiiimw iwe a mae nge igina a menaw sefaaen; e mwaenirh noa nge igina iya weri.”

16

Soamwoonin Engaang we e Riugiuriug

¹ Jesus a aengaenir rhooan kkayeo kkewe naiun pwe, “Eno erhai mwaaen naiwiis eno erhai naiun rhooan akkiuneo e nemaeni minikkewepisaegin. Ra aengaeni mwaaen we pwe rhooan akkiuneo we a oasonopa senaapiy kkewe naiun,

² iwe a faingito a aengaeni pwe, ‘Meeta minne iya rongorong pwe fioangomw? Foatogitiw pwapwioron minikka pisaegiy, pwe iga een wosoapw nono pwe rhooan nemenemaen minikka aaei.’

³ Rhooan akkiuneo we a kkepastiw rhag wooan nge a iura pwe, ‘Maasta e aaei epwene arhiuwaeyaei me reen engaang e aaei. Meeta ipwene feeori? Ngaang ise mamaaw pwe ipwe noa no pwe rhooan kkenin maat, iwe nge ngaang isaew pwe ipwe noa tingoar fetaen.

⁴ Iya giuneei meeta ipwene feeori! Oatona epwe noa sooar noa engaang e aaei, epwene yor maereyaerei ikka repwene aewenimmwaeyaei nong noan imweer.’

⁵ Iwe a faingir nong rhooa kkewe eyor monofitiir ngaeni maasta we aan. A aeiineow iwe egommw pwe, ‘Fiteig monofitmw ngaeni maasta e aaei?’

⁶ Mwaaen we a paniuwaeni pwe, ‘Epwiugiuw pwaerinaen tiikkaen *olive*.’ Rhooan akkiuneo we a iura pwe, ‘Ieen pwapwioron monofitmw; itto mooat tiw nge wa foatogi pwe nimeig.’

⁷ A pwan aeineow iwe erhai pwe, ‘Nge een—fiteig monofitimw?’ Mwaaen we a paniwaeni pwe, ‘Sengeras tutuun *wheat*.’ Nge a pwan aengaeni pwe, ‘Teen pwapwioron monofitimw, foatogi pwe wanepwiugiuw.’

⁸ Pwonna reen meeta we a feeori, maasta we a aepingepingha rhoaan akkiuneo we naiun iwe e riugiuriug, pwe ieei faaen minne aeremesaen soanop reign tipaecchem reen feeoriun minikka ammweneer wooan oanongeer memmweer rhooakkrena reno noan seram.”

⁹ Iwe Jesus a pwan iura pwe, “Ipwe aengaenigaemi pwe, oawgiut maereyaeremi nge oawpwe nainai meeta wiinaemi me soanop, pwe oawpwe noa mae noa nge repwe mmwenen aewenimmwoag nong noan iimw na esooar iaenin.

¹⁰ Iyo na ewenecchar menewan noan minikka emwittig nge epwe pwan wenecchar menewan noan minikka etettemoag; nge iyo na eoatupwutupw noan minikka emwittig nge epwe pwan oatupwutupw noan ikka etettemoag.

¹¹ Pwe ngaere ese wenecchar menewoamw noan minikka pisaegin wooan soanop, nge epwe ifa wusun nge epwe niugiug reen pisaeg kka ennet?

¹² Pwe ngaere ese wenecchar oamw engaang ngaeni pisaegin erhai, nge iyo epwe mwerhaen fang ngaeniug ikkina pisaegimw?

¹³ “Essoar erhai rhoaan akkiuneo epwe engaang ngaeniir riiurhai maasta. Ina epwe oapwuta erhai, nge aerhaengi iwe erhai, me ngaere epwe mwamwaai ngaeni erhai, nge a aenneew ngaeni erhai. Ese mmwen oawpwe engaangappag ngaeni Deus me senaapiy.”

Aekkaew Kkepas Kkewe Aaen Jesus (Mat 11.12-13; 5.31-32; Mark 10.11-12)

¹⁴ Igiwe Pharisees kkewe ra rongorong minnee ra aeni fetaaeee aegekkaei Jesus, pwe igiwe iir re aerhaengi senaapiy.

¹⁵ Jesus a aengaenir pwe, “Aaemi rhooa kkewe regaen feeori mwamwaaiuw wunuunuur me noan meseer aeremas, nge Deus e giuneei noan tipaemi. Pwe minikka egaen yor ipitaen me noan tipeer aeremas nge esooar ipitan me noan tipaen Deus.

¹⁶ “Oasoapwosoapw kkewe aaen Moses me ikkiwe foatogieer profeta kkewe e enoa toorito oaton John Baptist; mwirin a itto Kkepas Mwamwaai we reen Mweoiun Deus, iwe oanongeer aeremas ra aetietiy nong repwe toonong.

¹⁷ Iwe nge e mererhaeg egius aaen naaeng me soanop repwe nurh noa me mmwaen aeppaerhigin oasoapwosoapw kkeei epwe nurh noa.

¹⁸ “Erhai mwaaen epwe mweoi saengi pwiuniawan nge a noa pwiuniwaeni erhai, nge iiy a feeori eew feoffeelor aenneew; nge erhai ne e pwiuniwaeni erhai rhooapwut ne a siusaengi pwiuniawan nge iiy a feeori monofit.

Mwaaen we e Naiwiis me Lazarus

¹⁹ “Eno erhai mwaaen naiwiis ememmengaag rhag mengaag cchoaw paniawan nge egin mwamwaai aan nonno oanongaen raaenin.

²⁰ Epwan no erhai mwaaen affayeo itan Lazarus, erupw wooan oanongan, epwan gaen ikkitto reen aesemaen imwaen mwaaen naiwiis we,

²¹ egaen aeniaen pwe epwe mwongo peipheyin mwongo kena egaen ppungtiw me wooan *table* we aaen mwaaen naiwiis we. Nge gonaag mwo nge re itto tumwuri minikkewe rupwun.

²² Iwe mwaaen affayeo we a maenoa nge angkenus ra itto pwigi epwe noa mooat oaron Abraham me noan gupwun we weeinaaeng. Iwe nge mwaaen naiwiis we a pwan mae ra noa nipwaeni,

²³ nge noan nifierno wonowe a igin metaeg, a noa fattae a noa weri Abraham me itaaw noa, a noa weri Lazarus pwe eno oaron.

²⁴ Wonowe a faingi, ‘Semaei Abraham, faayeowaei, wa fangenoa mwo Lazarus epwe rhiri aiuttiun noan eew rhaan pwe epwe itto aepetapeta minne rheon iiuwaei pwe ngaang iya igin metaeg noan aengaeteei!’

²⁵ Abraham a iura pwe, ‘Wo maengiy rhag naeyi, pwe noan oatowe womenaw nge oanongaen mini mwamwaai nge itto reemw, nge Lazarus iwe oanongaen mini aenneew nge enoa reen. Igina iya no noan kker nge een wa no noan waeiraes.

²⁶ Nge soapw pwan ina rhag, pwe eew niipw gin nenoan eno nepetarh, manekka remwerhaen faaeraeg wow me igaan nge resoapw mmwenen toowow, nge iyo kena remwerhaen faaeraegto me igina nge resoapw pwan mmwen.’

²⁷ Mwaaen naiwiis we a iura pwe, ‘Iya tingoor aeffaenipirhe ngaeniug semaei Abraham wopwe fangenoa Lazarus reen imwaen mwaaen we semaei,

²⁸ igiwe reno rhoa nimman pwiiy ee. Aengaeni epwe noa a noa atapeon-neogiiur pwe rete itto noan pwileneoi e nenien waeiraes.’

²⁹ Abraham a iura pwe, ‘Mwaaen kkewe pwiimw ra fasiun tapeonneog reen Moses me profeta kkewe; repwe aiussaening ngaeni meeta repwe iura.’

³⁰ Mwaaen naiwiis we a paniuwaeni pwe, ‘Ese nnaaf minna, semaei Abraham! Pwe ngaere erhai emenaw sefaaen tae me reen mae a noa reer nge repwe toagun saengi monofitiir.’

³¹ Abraham a iura pwe, ‘Aere rese aiussaening ngaeniir Moses me profeta kkewe, nge iir resoapw niugiuniug, inamwo me igine erhai emenaw sefaaen tae me reen mae noa.”

17

Meeta Kka e Oamonofitiir Aeremas (Mat 18.6-7, 21-22; Mark 9.42)

¹ Jesus a aengaeniir rhoaan kkayeo kkewe pwe, “Minikka e feoffeori pwe aeremas repwe monofit ina epwe wewwen rhag, nge ifa mwo aenneewan ngaeni aeremas na efeeori minikkeei pwe epwe wen!

² Efaer gacch ngaeni igine aere e geeogeo tae efai fai temoag rhaepin iiwan a aegekkaerh noa neeset me mmwaen aan feeori pwe erhai aet mwittig kaan epwe monofit.

³ Iwe oawemwaeri meeta kkomwu oawgaen feeori!

“Aere igine erhai pwiimw e monofit, soong ngaeni, aere e toagun saengi aan monofit, saenet noa.

⁴ Aere igine e monofit ngaeniug faaen fisuuw noan eraaen, nge a gaen itto aengaeniug pwe, ‘ngaang iya toagun saengi monofitiy,’ wopwe pwan saenet noa.”

Niugiuniug

⁵ Oapostonus kkewe ra aengaeni Soamwoon pwe, “Oatomoga noa aemaem niugiuniug.”

⁶ Soamwoon a paniuwaeni pwe, “Aere aaemi niugiuniug eweei nepaen faun *mustard* een, emmwen oawpwe aengaeni waniwan temoag een pwe, ‘Wisaegtae me waeroamw wa noa foat noa neeset!’ ina epwe rongorong ngaeniug.

Aaen Erhai Rhooan Akkiuneo Engaang

⁷ “Aere erhai noawumw rhooan akkiuneo engaang fetaen noan maat aere e aefaenniy noawumw *sheep*, iwe nge enoa itto me noan maat, wopwe mmwenen aengaeni pwe aemwetekkaeiyiug pwe epwene mwongo?

⁸ Aapw aere! Wopwe faer aengaeni pwe, ‘Wonoa feeori aenaei mwongo, nge wa ngaettai mengaagiun oamw engaang nge wa itto ngoatto aenaei pwe ipwe mwongo nge i iun; inoa moann nge een wonaaen mwongo.’

⁹ Rhooan akkiuneo we mwo nge wosoapw ngaennee aan aerhigerhig pwe iga e tapweei oamw akkiuneo, aere meeta?

¹⁰ Epwan ina rhag wusumi; oatona oawpwe oamoanna meeta oawpwe feeori, nge oawwa iura pwe, ‘Aemaem rhag rhooan akkiuneo; aeifeeori rhag engaang kka aemaem.’”

Jesus e Aecchipwa Seig Mwaaen

¹¹ Igiwe Jesus a nennoa ngaeni Jerusalem, e faaeraeg wooan ayiuweyi-uwen nepetaen Samaria me Galilee.

¹² Oatowe a toonong noan eew pwugos, a rhuungiir seig mwaaen kaenepaai. Reiu rhag me itaaw,

¹³ nge ra aekkepwas, “Jesus! Soamwoon! Faayeogemaem!”

¹⁴ Jesus a weriir nge a aengaeniir pwe, “Oawnoa aengaeniir patere pwe repwe worigaemi.”

Igiwe ra feffaaeraeg noa nge a rhiuw noa minikkewe kaenepaaiur.

¹⁵ Oatowe erhai me neeiir a weri pwe a cchipw noa miniwe ginin, iwe a sefaaen, nge a gaen igin oatomogatae aan aepingepinga Deus.

¹⁶ A itto aerheitiw oanongan reen pirheen Jesus a itto fang aan aerhigerhig. Mwaaen we nge erhai re Samaria.

¹⁷ Jesus a kkepas nge a iura pwe, “Nge aetae iwe seig rhooa kkewe e mwamwaai noa giniir; nge ifa ikkiwe tiweman?

¹⁸ Meeta faaan minne waseona een rhag minne e sefaaeneto pwe e itto fang aaen Deus aerhigerhig reen?”

¹⁹ Nge Jesus a aengaeni pwe, “Iutae wa noa; pwe oamw niugiuniug a aetekkoagtae.”

Itton Minna Mweoiun Deus (Mat 24.23-28, 37-41)

²⁰ Aekkaerhai Pharisees re aeiineow Jesus ineeta epwe itto minna Mweoiun Deus. Nge a paniwaeni pwe, “Minna Mweoiun Deus ina esoapw itto nge noan taeppen we sipwe rhuungi.

²¹ Esooar ne epwe iura pwe, ‘Oawpipiiy pwe ieei iiy!’ aere ‘Inaan iiy!'; pwe minna Mweoiun Deus ina a no neeimi.”

²² Iwe aengaeniir rhooan kkayeo kkewe naiun pwe, “Eyor oatokka oawaeneaenei pwe oawpwe weri eew minikkena raaenin mwaaen we Naiun Aeremas, nge oawsoapw weri.

²³ Eyor manekka repwe aengaenigaemi pwe, ‘Fannoiginaan!’ aere, ‘Fatto igaan!’ Nge aaemi oawsoapw toowow noa giutta fetaeneei.

²⁴ Pwe igine epwene weriwer noan naaeng nge e aesserema noa noan naaeng, ina epwe pwan ina wusun mwaaen we Naiun Aeremas noan minna raaenin.

²⁵ Nge mmwan, ina epwe igin affayeo me serhoawun me reer aeremesaen raaennekkee.

²⁶ Epwe pwan taeppen miniwe ewen mweoiun Noah, ina epwe pwan wen noan raaenin mini Naiun Aeremas.

²⁷ Oanongeer aeremas re rhiuwen mwommwongo me kukkupwun, nge mwaaen me rhoapwut re pwiuppiuniuw toori raaenin we Noah a teeotae rhiun pwoot we waan, iwe e itto rhag noataer we niir noa oanongeer.

²⁸ Epwe pwan taeppen weni mweoiun Lot. Oanongeer aeremas nge re mwongo noa rhag me kkupwun noa rhag, nge re chuwaai fetaen, foato fetaen, me kaiu fetaen iimw.

²⁹ Noan raaenin we Lot a nigit Sodom, aengaet me *sulfur* a piungtiw me noan naaeng a ittiw niir noa oanongeer.

³⁰ Epwe pwan ina wusun minne epwe wen noan raaenin na epwe pwaeto mwaaen we Naiun Aeremas.

³¹ "Noan raaenin naan nge iyo eno wooan wungaen iimw, esoapw teeotiwi no nee iimw epwe pweipwog pisaegin; pwan ina rhag wusun iyo eno noan maat pwe esoapw pwan sefaen noa nee iimw.

³² Oaw maengiy rhag niewe pwiuniuwaei Lot!

³³ Iyo na emwerhaen epwe ammwarhiu menewan ina epwe ppiung saengi; nge iyo na eppiung saengi menewan, ina epwe menaw.

³⁴ Ipwe aengaenigaemi, pwe noan pwongin naan riiurhai aeremas re maiur wooan eew pooa; erhai repwe pwigi noa nge erhai epwe notiw.

³⁵ Riiurhai rhoapwut repwe ammaat mwongo; erhai repwe pwigi noa nge erhai epwe notiw.

³⁶ [Igine riiurhai mwaaen repwe engaang noan maat nge erhai ra pwigi noa nge erhai a notiw.]*

³⁷ Rhooan akkiuneo kkewe naiun ra aeiineow pwe, "Iya, Soamwoon?"

Jesus a paniwaeni pwe, "Ese tiwegian igine epwe yor erhai manimae ee, nge witiyas repwe mweoiuto reen."

18

Fioang Awewen Erhai Rhooapwut Mae Pwiuniawan me Erhai Soaw Kap-wiung

¹ Iwe Jesus a fioangei ngaenir rhoaan kkayeо kkewe naiun eew fioangon awewe pwe repwe memmaeipin noa rhag oanongaen oat nge resoapw mwetekkaein fangetae.

² "Eno erhai soaw apwiung noan eew aepinoamw nge ese mesagiu Deus nge ese pwan aesirowuur aeremas.

³ Noan aepinoamw we nge epwan no erhai rhoapwut a mae pwiuniawan, nge esooaw ikkitto rhag reen pwe epwe tipaengi nge a aengaeni pwe, 'Tipaengiaeи me reer rhoaan appaniwaen ngaeniae.'

⁴ A ssiunaei aaen soaw apwiung we ese mwerhaen tipaengi rhoapwut we, nge enoa mwirin nge a maengiy nong rhag noan tipan pwe, 'Inamwo ikka ise mesagiu Deus aere aesirowu aeremas,

⁵ iwe nge iga rhoapwut een a soaw ikkitto rhag angiurhiuwaei, iwe ipwene feeori ngaeni meeta na e tipaeni. Ngaere ise feeori ngaeni nge ina epwe ikkitto rhag angiurhiuwaei toori aaei sipegin aerhigerhig noa."

⁶ Iwe Soamwoon a pwan iura pwe, "Oaw aiussaening ngaeni meeta soaw apwiung aenneew we a iura.

⁷ Iwe Deus esoapw faer ppaenir aeremas kkena a finiir iga ra sessaeng ngaeni rhag neepwoong me neeraen pwe epwe tipaengiir? Oaw niuwaenuei nge epwe mmwaei aan tipaengiir?

* ^{17:36} Petenan eei nge e soano noan aekkaew petenan kka e foatofoat noan kkepesaen Greek.

⁸ Ipwe aengaenigaemi pwe Deus epwe mwetekkaei aan oayoow ngaenir minikkena iir re tipaeni. Iwe oaw niuwaennei pwe mwaaen we Naiun Aermas epwe weri tiwegin me wooan soanop reen oatonoa epwe sefaaeneto?"

Fioang Awewen Erhai Pharisee me Erhai Rhooan Iyoiyon Tax

⁹ Jesus a pwan fioangei awewe een ngaenir aeremas kka re maengiy pwe iir regacch noa memmweer aaemweoi iwe nge oanongeer aeremas re sessoan tiw faer.

¹⁰ "Nonno noa wooar riiurhai mwaaen renoa noan *Temple* we pwe repwe noa maeipin; erhai Pharisee nge erhai rhooan iyoiyon tax.

¹¹ Pharisee we a noa imweoi noa pwe a maeipin nge a iura pwe, 'Wa aerhigerhig Deus pwe ngaang ise rhegoaw, ise oatupwtupw, me maiur ngaeni pwiuniuwaen erhai, taeppeer aeremas kka aaemweoi. Wa aerhigerhig pwe ngaang ise taeppen rhooan iyoiyon tax na eno iginaan.

¹² Ngaang ise mwongo noan riiuraaen noan eew *week*, nge iya fang ngae niug giniginin eew me reen seig me reen oanongan noa meeta paniuwaei.'

¹³ Nge rhooan iyoiyon tax we e iu me itaaw noa nge ese mmwen mwo nge epwe fattae weei naaeng, a gaen tugutuguw ne aiungan nge a gaen iura pwe, 'Deus, faayeowaei, ngaang erhai man monofit!"

¹⁴ Jesus a iura pwe, "Ipwe aengaenigaemi pwe rhooan iyoiyon tax naan nge saapw Pharisee naan minne enoa nee iimw nge e mwamwaai me noan sapweoiniun Deus. Pwe iyo na e aetaegiasa tae epwe sessoanotiw, nge iyo na epwe oasossonaetiw epwe taegias tae."

Jesus a Maeipinaar Wonigaet Mwittig

(Mat 19.13-15; Mark 10.13-16)

¹⁵ Aaemweoi aeremas re pwigito naiiur wonigaet mwittig pwe Jesus epwe iseni tae paiun wooar. Rhooan kkayeo kkewe naiun ra weriir nge ra soong ngaenir reen miniwe refreeori,

¹⁶ nge Jesus a faingiir aetekkewe nge a aengaenir pwe, "Fangeto aetekkena reei, nge oawsoapw aiugiur, pwe minna Mweoiun Deus ina aar aeremas kka reweer wonigaet.

¹⁷ Ennetaen, ipwe aengaenigaemi pwe iyo na ese aetiwa Mweoiun Deus taeppen erhai wonigaet, nge esoapw toonong noan."

Erhai Mwaaen Naiwiis

(Mat 19.16-30; Mark 10.17-31)

¹⁸ Erhai soamwooniir Jews a aeiineow Jesus pwe, "Sinsei mwamwaai, meeta ipwe feeori nge epwe yo ngaeniaei menaw na esooar iaenin?"

¹⁹ Jesus a aengaeni pwe, "Meeta wo iura pwe i mwamwaai reen?" Esooar erhai ne e mwamwaai pwe aeggaen Deus rhag.

²⁰ Wo giuneei anniug kkewe: wosoapw ffeeor manetemwaai, wosoapw nni aeremas, wosoapw mwoarho, wosoapw oatupwtupw tae kkepas wooan erhai, aesirowuur semoamw me inoamw.

²¹ Mwaaen we a paniuwaeni pwe, "Saengi rhag nee nipwaen wonigaeteei nge ngaang i tapweei oanongaen oasoopwosoapw kkeei."

²² Igiwe Jesus a rongorong miniwe nge a aengaeni pwe, "Erhiuwen no eew minne wopwe feeori. Wonoa ameow noa oanongaen pisaegimw nge wa fang senaapian ngaenir rhoa affaye, ina nge epwe yor wiinoamw me wooai naaeng. Iwe wa itto wopwe itto tapweaei."

²³ Igiwe mwaaen we a rongorong miniwe a igin aenneew tipan, pwe igiwe iiy erhai man naiwiis.

²⁴ Jesus a weri pwe a aenneew tipan nge a iura pwe, "Ifa mwo waeiraesin aar rhoakka re pisaegisaeg repwe toonong noan minna Mweoiun Deus!"

²⁵ Egin mererhaeg aaen erhai *camel* epwe toonong noan ngetaen efoarh oaguwa, me mmwaen aaen erhai mwaaen pisaegisaeg epwe toonong noan minna Mweoiun Deus.”

²⁶ Rhooa kkewe re rongorong miniwe ra aeiineo pwe, “Iwe, iyo rhag epwe mmwenen menaw?”

²⁷ Jesus a paniwaeni pwe, “Minikkena ese mmwen ngaenir aeremas nge emmwen ngaeni Deus.”

²⁸ Peter a iura pwe, “Pipiyy! Aemaem aeiya nigit pwugusaemmaem nge aeiya itto tapweog.”

²⁹ Jesus a aengaenir pwe, “Ennetaen, ipwe aengaenigaemi pwe aere erhai e siusaengi imwan, aere pwiuniwan, aere pwiin, aere seman aere inan, aere naiun pwe faaen itaen minna Mweoiun Deus,

³⁰ ina epwe gin temoag minne epwe pwigi reen oate igina, nge noan oatona epwe itto epwe pwan pwigi menaw na esooar iaenin.”

Aeinuwaen Aaen Jesus Aepesa Aan Maenoa

(Mat 20.17-19; Mark 10.32-34)

³¹ Jesus a paenir noa rhoaan akkiuneo kkewe seig me riiurhai a aengaenir pwe, “Oaw aiussaening! Sipwene noa Jerusalem nge oanongaen meeta kkewe profeta kkewe re iura pwe wunuunun mwaaen we Naiun Aeremas ina epwene nnetaen wen.

³² Repwene iseni nong nee paaiur Gentiles, ina repwene aeni aegekkaei, me aessaewa, nge re oattuffa.

³³ Repwene wirhiy nge reniyy noa, mwirin enuuw raaen nge a menaw sefaaen tae.”

³⁴ Nge rhoaan akkiuneo kkewe naiun nge rese metefaaegini minikkewe; pwe faan kkepas kkewe nge emwoan saengiir, iwe rese metefaaegini meeta kkewe Jesus e aepesa.

Jesus a Aeffetanoa Mesaen Erhai Mwaaen Parh

(Mat 20.29-34; Mark 10.46-52)

³⁵ Jesus a aekkaerepa to Jericho, igiwe erhai mwaaen parh e mooaton wenepeigin aan nge e tittingoar noa rhag.

³⁶ Igiwe a rongorong aar rhoaanap we itto faaeraeg noa me oaron, nge a aeiineor pwe, “Meeta eei?”

³⁷ Ra aengaeni pwe, “Jesus re Nazareth iye epwe faaeraeg na me igeei.”

³⁸ Mwaaen we aekkepwas noa, “Jesus, Naiun David, faayeowaei!”

³⁹ Aeremas kkewe reno mmwan ra soong ngaeni pwe epwe anniug noa. Nge egius mwo nge oatomoga noa aan iyaekkepwas, “Naiun David, faayeowaei!”

⁴⁰ Jesus a iug noa nge a akkiuneo pwe repwe pwigito man masparh we reen. Igiwe a arapeto nge Jesus a aeiineow pwe,

⁴¹ “Meeta wa tipaeni pwe ipwe feeori ngaeniug?”

Nge a paniwaeni pwe, “Soawumwaer! Ngaang i mwerhaen ipwe weriwer sefaaen.”

⁴² Jesus a aengaeni pwe, “Iwe fanoa pwe wopwe weriwer! Oamw niugiug a aecchipwoag.”

⁴³ Iwe rhag nge wonowe a ffatenoa mesan, iwe a tapweei Jesus iwe a itto fang aaen Deus aerhigerhig. Igiwe rhoaanap we ra weri miniwe ra aepingepinga Deus.

- ¹ Jesus a itto noan Jericho iwe ra feffaaeraeg noa.
- ² Eyor erhai soamwoonin rhooan iyoion *tax* itan Zacchaeus, erhai man naiwiis.
- ³ Iiy e aekkaegin epwe weri Jesus nge igiwe iiy erhai mwaaen mwittig ese weri Jesus me noan pwuwa we.
- ⁴ Iwe a fattapw noa me mmwaen pwuwa we a noa teeotae wooan efoarh waniwan pwe epwe weri Jesus aan faaeraeg noa me igiwe.
- ⁵ Oatowe Jesus enoa itto pwioneoi we, enoa fattae a weri Zacchaeus iwe a aengaeni pwe, “Mwetekkaeitiw Zacchaeus pwe ipwe no noan iimw we imwoamw raaeneei.”
- ⁶ Zacchaeus a teeo mwetekkaeitiw a itto aewenimmwa Jesus noan aan kker.
- ⁷ Oanongeer aeremas kkewe ra weri minikkewe a rhaepetae aar mwangiu-niungiun pwe, “Mwaaen een epwene noa no noan imwaen erhai man monofit!”
- ⁸ Zacchaeus a iutae nge a aengaeni Soamwoon pwe, “Soawumwaer! Ngaang ipwene fang esoapwpisaegiy ngaenir man affaye, nge ngaere eyor mane iriugiuriug ngaeni nge ipwe aesefaaeni paniwaen minikkena aan faaen faawu.”
- ⁹ Jesus a aengaeni pwe, “Menaw a toori imwee raaeneei, pwe pwan mwaaeneei nge pwan iiy teoteen Abraham.
- ¹⁰ Manewe Naiun Aeremas eitto giut nge eitto aemenewaar rhoa mwaenirh noa.”

Fioangon Faiun Gold (Mat 25.14-30)

- ¹¹ Nugunupaen aar aeremas aiussaening minikkei nge Jesus a soapwei noa aan kkepas nge a fioangei ngaenir eew fioangon awewe. Igina nge a aekkaerepa noa Jerusalem, nge rhooawe ra niuwaen pwe miniwe Mweoiun Deus epwene oaropaen pwaeto.
- ¹² A iura pwe, “Eno erhai mwaaen taegias epwene noa wooan eew faniuw taaw noa epwene noa no pwe *king*, nge mwirin a sefaaneto nee pwugusan.
- ¹³ Wenimmwaen aan epwe noa a faingi fengaennir rhooan akkiuneo kkewe naiun iwe seig, nge a ngaenner eew tutuun *gold* nge a aengaenir pwe, ‘Oawgiutta ngaere eyor minne oawpwe aemenewa ngaeni minneen igine ipwene noa.’
- ¹⁴ Iwe nge aeremas kkewe naiun nge re oapwuta, iwe ra fangenoa rhooan pweipwogin mwaenier wooan faniuw we eew pwe, ‘Aemaem aeise tipaeni mwaaen een pwe epwe no pwe aemaem *king*.’
- ¹⁵ “Ra oatonongei mwaaen we pwe *king* nge a noa sefaaneto. Iwe rhag nge a akkiuneo rhooan engaang kkewe naiun pwe repwe itto reen pwe epwe pipiiy a ifa nepaen minne ra aemenewa ngaeni senaapiy kkewe.
- ¹⁶ Iwe egommw a iura pwe, ‘Menap, a seig aan paer noa faiun *gold* minne iya aemenewa ngaeni iwe efai iwe wo ngaenneaei.’
- ¹⁷ Mwaaen we a iura pwe, ‘Woigin mwamwaai. Een erhai rhooan akkiuneo we wo igin mwamwaai! Pwonna iga min paerhigerhig mwo nge wo anugiuniug noan, een wopwene nemaeni seig aepinoamw.’
- ¹⁸ Rhooan akkiuneo we ariiurhaiun a noa itto a iura pwe, ‘Menap, a nimowu aan paer noa faiun *gold* minne iya aemenewa ngaeni iwe wo ngaenneaei.’
- ¹⁹ Iwe mwaaen we a iura pwe, ‘Een wopwene nemaeni nimowu aepinoamw.’

²⁰ Iwe erhai a noa itto nge a iura pwe, ‘Menap, ieen faiun *gold* we noawumw ioapa noan eew mengaag.

²¹ I mesagiug pwe iga een erhai mwaaen sosoong. Wopwigi minikka saapw oamw nge wo giniiy minikka saapw foatogiyamw.’

²² Mwaaen we a aengaeni pwe, ‘Een erhai rhooan akkiuneo e aenneew! Minikkomwu mwaenioamw nge ipwene oamonofitiug wooan! Wo giuneei pwe ngaang erhai man sosoong, i pwigi mwo nge minikkena saapw aaei nge iginiiy uwaen irae kena ise foatogi.

²³ Iwe meeta rhag wose ngoannong senaapiy we naeyi noan *bank* reen? Ina nge ipwe pwigi nge epwene yor menewan iga iya sefaaeneto.’

²⁴ A aengaenir rhooa kkewe reiu pwe, ‘Pwigi saengi mwaaen mwuun faiun *gold* na nge oawwa ngaennee i mwaaen we seig naiun faiun *gold*.’

²⁵ Nge ra aengaeni pwe, ‘Menap, a fasiun seig naiun *gold*!’

²⁶ A iura pwe, ‘Ipwe aengaenigaemi pwe, iyo a yor meeta aan nge repwe pwan fang ngaeni, nge iyo ese yor meeta aan nge repwe pwigi saengi mwo nge iwe egius iwe eyor reen.

²⁷ Igina, nge rhooa kkewe rhooan kkoapwutoi ikkiwe rese tipaeni pwe ipwe no pwe aar *king*, oawpwigiir to igeesi, iwe oawwa itto niir tiw me weni mmwaei!’”

Toonongan Jesus Noan Jerusalem

(Mat 21.1-11; Mark 11.1-11; John 12.12-19)

²⁸ Mwirin aaen Jesus aepesa minneei, nge a gommw noa weni mmweer ra noa ngaeni Jerusalem.

²⁹ Igiwe a aerepato Bethphage me Bethany me reen miniwe rhugun *Olives* nge a akkiuneeor noa riiurhai rhooan kkayeо kkewe naiun

³⁰ nge a aengaenir pwe: “Oawnoa noan pwugos mwu mmwaemi; nge oatona oawpwe toonong nge oawpwe weri erhai *donkey* mwittig e feotaeg ina esaaen yor mwo erhai ne e waawa. Oawpwaeisi oawwa pwigito igeesi.

³¹ Ngaere igine aeremas e aeiineogaemi aere meeta oawsaenet reen, oawwa aengaeni pwe Soamwoon e mwerhaen waawa.”

³² Ra noa nge oanongaen min kkewe Jesus e aengaenir nge ewen ngaeni.

³³ Igiwe ra pweppwaeisi ooas mwittig we nge manewe naiun a mwae-nieniy ngaenir, “Meeta oawwa pwaeisi noa reen?”

³⁴ Ra paniuwaeni pwe, “Maasta e mwerhaen waawa”,

³⁵ iwe ra pwigi noa *donkey* we reen Jesus. Ra iseni tae minikkewe mengaagiiur wooan, iwe ra iseni tae Jesus wooan.

³⁶ Igiwe Jesus a faaeraeg nge aeremas ra mmerraeg tiw mengaagiiur wooan ennap we.

³⁷ Igiwe a aerepato Jerusalem, pwiuneoi we ennap we e ittiw me reen rhugun *Olives*, rhooa towunap kkewe naiun rhooan kkayeо ra rhaepetae aar fang aan Deus aerhigerhig, nge re aekkepwas temoag tae reen aar aepingepinga Deus reen oanongaen manaman kkena ra weri.

³⁸ Ra iura pwe, “Deus epwe aewenepwuwa *king* na eitto faaen itaen Soamwoon! Oapoas me woowaiaaeng me nning ngaeni Deus na oarosaen taegias!”

³⁹ Aaemweoi Pharisees reno noa pwuwa we ra aengaeni Jesus pwe, “Sinsei, mwaenieniy ngaenir rhooan kkayeо kkomwu noawumw pwe resoapw oacchorong!”

⁴⁰ Jesus a paniuwaenir, “Ipwe aengaenigaemi pwe, aere igine repwe anniug, ina nge fai kaan minne repwe aekkepwas.”

Jesus a Saengiti Jerusalem

⁴¹ Igiwe Jesus a aerepato aepinoamw we, nge oatowe eweri nge a saengiti,
⁴² nge a iura pwe, “Aetaemwo wogaen giuneei raaeneei meeta minne epwe pwigito oapoas! Nge igina een wosoapw mmwenen weri!

⁴³ Eew oat epwe noa itto rhooan kkoapwutomw repwene roangeog noa, nge re aetippoag, nge ra pineyi saengiug oanongaen pwiuneoi.

⁴⁴ Repwene oatoaropoag noa een me aeremas kkomwu noan minimwu neniemw; esooar efai faai kaan ne epwe notiw nenien, pwe iga een ese pwae ngaeniug oatowe Deus e itto pwe epwe aemenewoag!”

*Jesus a Noa Noan Temple we
(Mat 21.12-17; Mark 11.15-19; John 2.13-22)*

⁴⁵ Jesus a noa noan *Temple* we nge a rhaepetae aan asiur wow rhooan ameomeo kkewe reno noan,

⁴⁶ a aengaenir pwe, “Efoatofoat noan Pwapwior we e Santus pwe Deus e aepesa pwe, ‘*Temple* e aaei nge imwaen maeipin.’ Nge aaemi oawwa ssiuweniy pwe nenien wopoor rhooa mwoarho!”

⁴⁷ Oanongaen raaen nge Jesus efenai noan *Temple* we. Soamwoonin patere me sinsein anniug me soamwooniir aeremas kkewe ra mwerhaen niyy noa,

⁴⁸ nge ina rhag esooar eew meeta ne regiuneei pwe repwe feeori ngaeni, pwe igiwe oanongeer aeremas kkewe nge retipaeni repwe aiussaening ngaeni minikkewe petenaen mwaenian.

20

*Kkepas Aeiineon Nemaeniaen Jesus
(Mat 21.23-27; Mark 11.27-33)*

¹ Eraan igiwe Jesus efenai ngaeniir aeremas me noan *Temple* we, efenaiuw Kkepas Mwamwaai we, nge soamwooniir patere, me sinsein anniug me fengaen me rhooa kkewe ra tugufaeyi ra noa itto

² nge ra aengaeni pwe, “Meeta nemaenioamw pwe wopwe feeori minikkeei? Iyo a ngaenneog oamw nemenem?”

³ Jesus a paniuwaenir pwe, “Ipwe aeiineogaemi eew kkepas aeiineo. Oaw aengaeniaei,

⁴ iya e itto aien John nemenem pwe epwe baptismus fetaen: saengi Deus aere saengi aeremas?”

⁵ Ra rhaepetae aar aengimaw fengaen wooar, “Meeta sipwe iura? Aere sipwe iura pwe, ‘Saengi Deus,’ nge iiy epwe aeiineogirh pwe, ‘Nge meeta rhag oawse niugiuniug ngaeni John reen?’

⁶ Nge aere sipwe iura pwe, ‘Saengi aeremas,’ ina nge pwuwaen aeremas eei nge repwene teragirh, pwe iga re niugiuniug pwe John nge erhai profeta.”

⁷ Ra paniuwaeni pwe, “Aeise giuneei iga e itto me ee.”

⁸ Iwe nge Jesus a aengaenir pwe, “Ina nge ngaang isoapw pwan aengaeniaemi iya iga ipwigi me ee nemaeniaei pwe ipwe feeori minikkeei.”

*Fioangon Awewen Rhooan Aemmwenen Maat we
(Mat 21.33-46; Mark 12.1-12)*

⁹ Iwe Jesus a aeni eew fioang awewe ngaeniir aeremas kkewe. “Eno erhai mwaaen a foatogi eew maetaen *grape*, nge a ngaenneer aaemweoi rhooan maat pwe repwe aefaaenniy. Iwe rhag nge a saei taaw noa.

¹⁰ Enoa itto oatowe repwe giniiy uwaen waniwan kkewe, a fangenoa erhai rhooan akkiuneo pwe epwe noa pwigi wiwiin me reen uwaen maat kkewe.

Nge rhoaan maat kkewe ra wirhiy nge ra aeseefaaeni noa nge esooar meeta e pwigi.

¹¹ Iwe a pwan fangenoa erhai rhoaan akkiuneo; rhoaan maat kkewe ra pwan noa wirhiy nge ra feeori ngaeni aekkaew wegitaeg aessaew nge re aeseefaaeni noa nge esooar meeta e pwigi.

¹² A pwan fangenoa aeiniurhaiun rhoaan akkiuneo kkewe; rhoaan maat kkewe ra pwan oawoasu nge re aerheiwow niugiu maat we.

¹³ Manewe aan maat we a iura pwe, ‘Meeta minne ipwene feeori? Maeni ipwene fangenoa aeterhaeng e naeyi; e tiwegian nge repwe aesirowu!’

¹⁴ Nge igiwe rhoaan maat we ra weri, ra pwiungiuw fengaenniy wooar pwe, ‘Ieei mwaaen we naiun mwaaen we aan maat eei iwe epwe pwugusaeni minnei. Oawitto sipwe niiy noa, pwe sipwe pwigi minne pwugusaen pwe pwugusarh!’

¹⁵ Iwe ra oatorawow niugiu maat we nge ra niiy noa.’

Jesus a aeiineor pwe, “Meeta manewe aan maat we epwe feeori ngaenir rhoaan maeñemaen kkewe?

¹⁶ Epwe itto a itto niir noa mwaaen kkewe, nge a ngaenner aaemweoi maat we.”

Igiwe aeremas ra rongorong minnei nge ra iura pwe, “Aapw saapw ina!”

¹⁷ Jesus a wegitaeg ngaenir nge a aeiineor pwe, “Iwe ina nge meeta awewen miniwe noan Pwapwior we e Santus?

‘Fai we rhoaan kaiu iimw re aerheei noa,
nge faer ina fai we egin yor ipitan me mmwaen oanongan.’

¹⁸ Oanongeir rhoakka repwe ppiungiutiwoon faai een nge repwe mwetoarotoar noa; nge aere faai een epwe ppiungiutiwoon erhai, epwe aepettatiwoon.”

Kkepas Aeiineon Tax

(Mat 22.15-22; Mark 12.13-17)

¹⁹ Sinsein anniug me soamwoonin patere kkewe ra mwerhaen repwe torofi Jesus, pwe igiwe regiuneei pwe fioangoor miniwe a aengaenir; nge igiwe re mesagiiur aeremas kkewe.

²⁰ Iwe ra weti ngaeni eew oat ne repwe mmwenen torofi. Ra fang ngaenir aaemweoi mwaaen senaapiy pwe repwe noa feeoriir noa pwe iir aaemweoi mwaaen wenewen, iwe ra fangenoa iir pwe repwe noa oatupwu Jesus pwe repwe torofi reen aan kkepas pwe epwe mmwen pwe repwe fangenoa iiy reen Governor reen Rome ina eyor maemaewan.

²¹ Iwe aeremas kkewe ra aengaeni Jesus pwe, “Sinsei, aei giuneei pwe minikkomwu wo aepesa nge e wenewen. Aei giuneei pwe een wose aefan- niy wunuunun erhai me erhai, nge wa fenaiuw wenewenen nee tipaen Deus ngaenir aeremas.

²² Aengaenigemaem, e mwamwaai aarh sipwe fang tax ngaeni Soamwoonin Rome, aere aapw?”

²³ Jesus e metefaaegini oatupwutupw we aar nge a aengaenir pwe,

²⁴ “Pwaerito efai senaapiy *silver*. Mesaen iyo me itaen iyo imwu eno wooan?”

Ra paniuwaeni pwe, “Soamwoonin Rome.”

²⁵ Jesus a iura pwe, “Iwe ina nge oawngaeneei Soamwoonin Rome meeta aaen Soamwoonin Rome, nge oawngaeneei Deus meeta aaen Deus.”

²⁶ Iwe esooar meeta ne emmwen pwe repwe torofi Jesus reen petenaen kkepas kkewe e paniuwaeni ngaenir me weni mmweer rhooa towunap we, iwe ra anniug noa rhag pwe ra mwaar reen sefaaenin kkepas kkewe aan.

*Kkepas Aeiineon Menaw Sefaaen
(Mat 22.23-33; Mark 12.18-27)*

²⁷ Aaemweoi Sadducees, iwe re iura pwe esooar menaw sefaaen me reen mae, ra itto aengaeni Jesus pwe,

²⁸ “Sinsei, Moses minne efoatogi anniug eei pwe aemaem: ‘Aere erhai mwaaen a mae nge esooar naiun wooan rhooapwut we pwiuniuwan, ina nge mwaaen we pwiin epwe pwiuniuwaeni rhooapwut we pwe epwe yor naiun pwe epwe ffai pwe naiun mwaaen we a mae.’

²⁹ Reno fiusuman pwipwi; mwaaen we e tugufaeyi a pwiuniuwaeni nge emae noa nge esooar naiun.

³⁰ Iwe ariurhaiun a pwan pwiuniuwaeni rhooapwut we,

³¹ pwan ina rhag iwe aeiniurhaiun. Oanongeer me fiusuman nge ina rhag miniwe ewen ngaenir. Remae noa nge esooar naiur.

³² Mwirin noan, nge rhooapwut we a maenoa.

³³ Iwe igina, wooan raaenin na manimae repwene menaw sefaaen, iyo me neeiir epwe pwiuniuwaeni rhooapwut we? Pwe igiwe rhooawe fiusuman nge re pwiuniuwaeni niewe.”

³⁴ Jesus a paniuwaenir pwe, “Mwaaen me rhooapwuton faaen mweoiuw nge re rhooan ngaenne,

³⁵ iwe nge mwaaen me rhooapwut kena ra ffin tae pwe repwe menaw sefaaen iwe nge ra no noan mweoi na epwe noa itto nge ina resoapw rhiuwen pwiuppiuniuw.

³⁶ Iir repwene weei rhag angkenus pwe resoapw mmwenen mae. Ra no pwe naiun Deus pwe ra menaw sefaaen me reen maenoa.

³⁷ Moses a aeffeta noa pwe manimae nge re menaw sefaaen tae. Me reen petenaen fioangon waniwan we eppwunuwow aengaet me reen iwe e aepesa kkepesaen Soamwoon pwe, ‘aaen Abraham Deus, aaen Isaac Deus, me aaen Jacob Deus.’

³⁸ Pwe iiy minne aar Deus rhooakka re menaw nge soapw rhooakka ra mae, pwe me reen nge oanongeer aeremas nge re menaw me reen.”

³⁹ Aekkaaemweoi me neeiir sinsein anniug we ra mwaenieniy tae, “Sinsei, eigin gacch aessefaaenin kkepas we oamw!”

⁴⁰ Pwe iir ra mesag pwe repwe aeiineo mwo nge eew kkepas aeiineo.

*Kkepas Aeiineon Iyo na Kristus
(Mat 22.41-46; Mark 12.35-37)*

⁴¹ Jesus a aeiineor pwe, “Meeta emmwen pwe re iura pwe Kristus nge teoteeon David reen?

⁴² Pwe David wooan oanongan nge e iura me noan pwapwior we Psalms, ‘Soamwoon a aengaeniai Soamwoon:

Mooat tiw peig mwaaenee!

⁴³ toori aaei ipwe isenir tiw rhooan oapwutoag faaen pirhemw pwe repwe no pwe nenien pirhemw.”

⁴⁴ David e faangi pwe iiy ‘Soamwoon’; iwe nge e ifa wusun nge Kristus epwe no pwe teoteeon David?”

*Jesus a Atapeonneoggiur Reen Sinsein Anniug Kkewe
(Mat 23.1-36; Mark 12.38-40)*

⁴⁵ Igiwe aeremas re aiussaening ngaeni nge Jesus a aengaenir rhooan kkayeo kkewe naiun pwe,

⁴⁶ “Oaw aefaaennigaemi reen sinsein anniug kkewe, re aerhaengi aar faaeraeg fetaen faaen mengaagiur min enaenaei, nge re aerhaengi aar aeremas repwe aewenimmwaar me aesiowuur me noan imwaen chuwaai, nge

refini rhag neniy kkena nenieer rhooa taegias me noan wutteer Jews me pwiunoei mwamwaai me noan gupwun.

⁴⁷ Re oapwurhaar rhooapwut kkewe ra mae pwiuniuweer, nge ra pirifa saengiir pwuguseer, nge ra oangona ngaenir aeremas aar maeipin enaei! Iwe nge aegaeregaeriir ina epwene igin waeiraes!"

21

Maenigaech we Aaen Rhooapwut we a Mae Pwiuniuwan (Mark 12.41-44)

¹ Jesus a fan fetaen nge a weriir rhooa naiwiis pwe ra iseis nong aar maenigaech noan nenien maenigaech me noan *Temple* we,

² iwe nge a pwan weri erhai rhooapwut mwaenene a maenoa pwiuniuwan a iseis nong riufai manfaifai pwe aan maenigaech.

³ Nge a iura pwe, "Ennetaen, ipwe aengaenigaemi pwe maenigaech na rhooapwut mwaenene we efang ina e temoag saengi aar oanongeer aeremas towunap kkewe.

⁴ Pwe oanongeer nge re iseni nong nusegin wiineer; nge rhooapwut een inamwo iga e igin affayeo nge efang oanongaen minikkena eno reen."

Jesus e Aepesa Toaroponoan Temple we (Mat 24.1-2; Mark 13.1-2)

⁵ Aaemweoi me neeiir rhooan kkayeо re fiffioangei *Temple* we reen nningen faai kkewe eno wooan me niffang kkewe aar aeremas ngaeni Deus. Nge Jesus a iura pwe,

⁶ "Oanongaen minikka oawwa weri, ina eyor eew oat ina epwe noa itto nge esooar efai faai kaan ne epwe notiw nenien; oanongan noa nge repwene toaropotiw."

Affayeо me Aewwaeiraes (Mat 24.3-14; Mark 13.3-13)

⁷ Ra aeiineow pwe, "Sinsei, ineeta epwe wen minnei? Meeta na epwe wen nge epwe pwaeri ngaenigemaem pwe minikkei nge epwene wen?"

⁸ Jesus a iura pwe, "Oaw aefaaennigaemi; oawteorh tupw. Towunepeer aeremas repwene itto faaen itaei nge repwene aepesa pwe, 'Ngaang minne iiy! A ieei oatowe!' Nge oawsoapw tapweer.

⁹ Oawsoapw mesag igine oawpwe rongorong kkepesaen moawun me fitigogon weni faniuw; ikkeei minikka epwe mmwaen wen, iwe nge saapw reen a arapeto ne soapwonoan."

¹⁰ A pwan soapwei noa a pwan iura pwe, "Faniuw me faniuw nge repwene fiow fengaen, eew mweoi me eew mweoi repwene moawun fengaen.

¹¹ Epwene yor fanemwar tettemoag, me naengeta, me semwaai temoag me oanongaen pwiunoei; epwene yor mini ariuriu me aemmesag ittiw me weeinaaeng.

¹² Ina rhag nge weni mmwaen minikkei epwene wen, ina repwene torofigaemi nge ra aewwaeiraesigaemi; ra pwigigaemi noa noan wutteer Jews pwe oawpwene noa apwiung iwe nge oawnoa kanepwus; repwene pwigigaemi weni mmweer *king* me soamwoon pwe faaen itaei.

¹³ Nge a ieei oaton aaemi oawpwe aepesa Kkepas Mwamwaai we.

¹⁴ Oawpwe fasiun oamoannatae nee tipaemi pwe oawsoapw aiunaengiy aaemi noa saenetigaemi,

¹⁵ pwe ngaang ipwe ngaennegaemi mwaeniaemi me repiaemi nge esooar erhai rhooan kkoapwutomi epwe mmwen epwe appaniuwaeni aere paniuwaeni mwaeniaemi.

16 Aaemi ina inaemi me semaemi, pwiimi, perhaengiyaemi, me maereyaeremi, minne repwe fangenoa aaemi. Nge aaemweoi aaemi ina repwene nigaeemi noa.

17 Oanongeir aeremas nge repwene oapwutaegaemi noa pwe faaen itaei.

18 Ina rhag ina eyaen mwo aennirhimwemi nge esoapw ppiung noa.

19 Oawoarhorho, nge ina nge oawpwe menaw.

Jesus a Aepesa Wunuunun Ffeir Noan Jerusalem

(Mat 24.15-21; Mark 13.14-19)

20 “Igine oawpwe weriir sonotaw aar pwaeniaen noa Jerusalem, ina nge oawwa giuneei pwe a arap oaton aan epwene ffeir noa.

21 Iwe rhoowe reno Judea repwe fattapwetae weelrhug; rhoowe reno nee aepinoamw repwe siusaengi, rhoowe reno neman nge resoapw ittiw no nee aepinoamw.

22 Pwe ikkinaan raaenin kena raaenin aegaeregaer, nge minikkei epwe pwaeritae minikkiwe mwaeniaen Pwapwior we e Santus e aepesa.

23 Epwe ifa mwo aar affayeo rhoowput pwoopwo me ikka re nayigit noan oaton naan! Temoagon aewwaeiraes epwene itto wenifaniuw, nge aaen Deus aegaeregaer epwene itto wooar aeremas kaan.

24 Aaemweoi repwene mae wooan saeitan nge aaemweoi repwene pwiguir noa wooan aekkaemweoi faniuw; nge re Gentiles ina repwene itto pwurae-graeg wooan Jerusalem toori aan moanno noa minra oatoor.

Itton Mwaaen we Naiun Aeremas

(Mat 24.29-31; Mark 13.24-27)

25 “Epwene yor eew aeginn epwene wen ngaeni aenet me meram me fiu. Nge wooan soanop nge towunepaen faniuw repwene maegin no noan aewwaeiraes, repwene mesagiu piungpiungin noa me pwuurtaen saaet.

26 Aeremas repwene niyoarorhrorh reen aar mesag noan aar wetiwet ngaeni meeta epwe wen ngaeni faeinaengiy, pwe minikkema maemaewaen noan naaeng repwene mwagiut saengi nenieer.

27 Noan oatonaan nge miniwe Naiun Aeremas epwene pwaeto me noan naengemaan reen maemaewan me nningen.

28 Oatona epwe wen minikkei, nge oawwa iutae nge oawwa saeregi tae rhimwemi, pwe menewaemi ina a arapeto.”

Fenaiun Waniwan e Fig

(Mat 24.32-35; Mark 13.28-31)

29 Jesus a aengaenir fioangon awewe een: “Oawmaengiy efoarh waniwan fig me oanongaen waniwan kkewe aaemweoi.

30 Nge oawpwe weri minikkema rheon pwe a pwiugiuw wow, oawwa giuneei pwe a arapeto neraeg.

31 Epwan iiei rhag taeppen, igine oawweri minikkei pwe a wen, ina nge oawwa giuneei pwe arapeto minna Mweoiun Deus.

32 “Ennetaeen, ipwe aengaenigaemi pwe oanongaen minikkei nge epwe wen weni mmwaen iga aeremesaen igin repwe maenoa.

33 Naaeng me soanop repwe soapwonoa, nge aaei kkepas esoapw soapwonoa.

Oaw Aefaaennigaemi

34 “Oawaefaaennigaemi pwe oawte igin gupwun me oappwunaas me aaemi aiunaengiy menaen menaw eei, nge epwe tooto raaenin naan nge epwe rhiuwen torofigaemi rhag

³⁵ taeppen iga oawyo noan taefirh. Pwe minneei ina epwe wen ngaenir oanongeer aeremesaen noan faeinaengiy.

³⁶ Ina oawpwe aefaaennigaemi nge oaw maeipin noa rhag pwe epwe yor maemaewaemi noan oatonaan epwe wenewen minikkeei iwe me aaemir noa iutae me wenimmwaen mwaaen we Naiun Aeremas."

³⁷ Jesus aeni raaenin kkeei reen aan fenai noan *Temple* we, nge enoa nee oatofoaaef, nge a noa wooan rhugun *Olives*.

³⁸ Nee oatosor moawugowug nge oanongeer aeremas ra maegeto noan *Temple* we pwe repwe aiussaening ngaeni aan fenai.

22

Aar Rhiu Aenneewa Jesus (Mat 26.1-5; Mark 14.1-2; John 11.45-53)

¹ A arapeto oaton gupwunon fenoawa we esooar *yeast* reen, iwe regaen iura pwe *Passover*.

² Soamwoonin patere me sinsein anniug kkewe re mesagiur aeremas iwe ra kiukkiutta eew oat ne repwe niyi noa Jesus noan mwoanomwoan.

Judas a Tipaeni Epwe Fangenoa Tinnimaen Jesus (Mat 26.14-16; Mark 14.10-11)

³ Saetan a itinong nee tipaen Judas, pwan itan Iscariot, iwe erhai me neeiir rhooan kkayeо seig me riiurhai.

⁴ Judas a noa mwaenieniy ngaenir soamwoonin patere kkewe me soamwoonir poosun *Temple* we reen wunuunun aan epwe fang ngaenir Jesus.

⁵ A gacch nee tipeer rhooawe iwe ra iura pwe repwene fang senaapiy reen miniwe epwene feeori.

⁶ Judas a tipieew ngaeni miniwe iwe a rhaepetae aan kiukkiutta eew oaton ne egacch pwe epwe fangenoa menewaen Jesus nge aeremas resoapw giuneei.

Jesus Oamoannatae pwe Epwe Mwongo Mwongoon Passover (Mat 26.17-25; Mark 14.12-21; John 13.21-30)

⁷ A itto raaenin gupwunon fenoawa we esooar *yeast* reen, igiwe regaen ninni *sheep* pwe mwongoon *Passover*.

⁸ Jesus a fangenoa Peter me John a aengaenir pwe, "Oawnoa oamoannatae mwongoon *Passover* we aarh."

⁹ Ra aeiineow pwe, "Iya iga wo mwerhaen pwe aeipwe noa oamoannatae me ee?"

¹⁰ A paniuwaeniir pwe, "Oawitinong nee aepinoamw, nge erhai mwaaen na epwe pweipwog ruumen rhaan ina epwe itto rhuungigaemi. Oawwa tapweei noa noan iimw na epwe noa toonong noan,

¹¹ nge oawwa aengaeni mwaaen na imwan iimw naan pwe: 'Sinsei e aeiineo ngaenius pwe, Ifa sengkin na rhooan kkayeо kena naeyi me ngaang aeipwe mwongoon *Passover* me ee?'

¹² Ina epwene pwaeri ngaenigaemi eew sengkin faeregite ina wooan tae, ina e fasiun moannotae noan, nge ina iginia oawpwene noa oamoannatae me ee."

¹³ Ra noa rhooawe ra noa weri pwe oanongaen minikkewe Jesus e aengaenir nge ewen ngaeni, iwe ra noa oamoannatae mwongoon *Passover* me ee.

Aaen Soamwoon Mwongoon Faaef (Mat 26.26-30; Mark 14.22-26; 1 Cor 11.23-25)

¹⁴ Enoa toori oatowe nge Jesus a mooat tiw reen *table* we reer oapostonus kkewe naiun.

¹⁵ A aengaenir pwe, “A igin noa tipaei pwe sipwe aeni fengaenniy mwongoon *Passover* eei weni mmwaen aaei ipwe toonong noan aaei aewwaeiraes!

¹⁶ Pwe ipwe aengaenigaemi pwe, isoapw rhiuwen mwonganona mwongo eei toori otona epwe pwae noa oanongaen minna faan minna mwongoon *Passover* me noan minna Mweoiun Deus.”

¹⁷ Iwe Jesus a pwigi eew kkap, a fang aan aerhigerhig ngaeni Deus, nge a iura pwe, “Oaw pwigi minneen pwe oawpwe amakkia fengaenniy woami.

¹⁸ Ipwe aengaenigaemi pwe saengi igma a noa nge isoapw iun no *wine* een toori tooton minna Mweoiun Deus.”

¹⁹ Iwe a pwigi fenoawa we a fang aan maeipinen aerhigerhig, iwe a giniyy nge a ngaenner nge a iura pwe, “Ieen minne oanongaei, iye ipwene fangenoa pwe aegin aaemi. Oawpwe feeori minneen pwe ipwe gaen memmaeng ngaenigaemi.”

²⁰ Pwan taeppen rhag miniwe efeeori igma a noa moanno noa mwongo we nge pwigi kkap we nge a iura pwe, “Ieen miniwe kkepaen ppwon ffeo we aaen Deus iye reen minne cchaei, iye epwene nipinoa pwe aegin aaemi.

²¹ “Iwe nge oawpipiyy! Pwe mwaaen we epwe fangenoa tinnimaei iye eno reei oaron *table* eei!

²² Mwaaen we Naiun Aeremas ina epwene mae noa noan aaen affeeor Deus, iwe nge ifa mwo aenneewan ngaeni mwaaen na e fangenoa tinnimaeen!”

²³ Iwe rhag nge ra maegetae aeiineo fengaen wooar iyo erhai neeiir na epwe mmwenen feeori minneei.

Aengiingin Iyo na e Taegias

²⁴ Rhooa kkayeо kkewe ra itto aengiingi fengaen wooar iyo na oarosaen taegias.

²⁵ Jesus a aengaenir pwe, “King kena soamwooniir re Gentiles ina eyor maemaeweer wooar, iwe nge iir soamwoon kaan nge iir minne re iura pwe ‘iir maereyaerer aeremas.’

²⁶ Nge aaemi esoapw iiei wusumi; oawpwe faer feeori pwe iyo na oarosaen taegias epwe faer weer rhag maan wonigaet, nge soamwoon repwe weer rhag rhooan akkiuneo.

²⁷ Iyo na oarosaen taegias, manna emooat tiw pwe epwe mwongo aere manna e inet mwongo? Manewe emooat tiw minna etaegias. Ngaang iye ino neeimi nge ngaang minne i inet mwongo.

²⁸ “Oawwa nonno reei noan oanongaen aaei waeiraes;

²⁹ nge eweei rhag igma we manewe Semaei a ngaenneaei maemaewaei pwe ipwe nemenem, nge ngaang ipwe pwan ngaennegaemi iiy maemaewaei.

³⁰ Aaemi oawpwe mwongo me iun me reen *table* e aeinoa minna Mweoiuy, iwe nge aaemi oawpwe mooat wooan minikkena nenieer soamwoon oawpwe nemaenir aeinang kkewe seig me ruwowu ikkiwe aaen Israel.

Jesus e Aepesa Aaen Peter Iura pwe Ese Giuneei (Mat 26.31-35; Mark 14.27-31; John 13.36-38)

³¹ “Simon, Simon! Aiussaening! A fasiun saenetaeg pwe Saetan epwe soatonigaemi, pwe epwe aeyimweoiuw noa rhooa mwamwaai me rhooa aenneew, taeppen rhag iga rhoaan maat regaen aeyimweoiuw noa *wheat* saengi peeon.

³² Nge ngaang i maeipinoag een Simon, pwe oamw niugiuniug esoapw ppiung noa. Nge oatona wopwe noa toagun ngaeniaei nge wa aemaewaar rhooa kkomwu pwiimw."

³³ Peter a paniuwaeni pwe, "Soamwoon, ngaang iya oamoannatae ipwe tapweog reen kanepwus me oamw mae!"

³⁴ Jesus a iura pwe, "Iaengaeniug Peter, pwe esoapw keokkeok maniug nee pwongiy toori otona wopwe iura faaen enuuw pwe wose giuneaei."

Pwetoaw, Tutu, me Saeitan

³⁵ Jesus a aeiineor rhooan kkayeo kkewe naiun pwe, "Oatowe i aefengaegaemi noa nge esooar aaemi pwetoaw, tutu me nokka, nge eyor minne esooar reemi?"

Ra paniuwaeni pwe, "Esosoar mwo."

³⁶ Jesus a iura pwe, "Nge igina, iyo eyor aan pwetoaw aere tutu nge epwe pwigi; nge iyo esooar naiun saeitan, epwe chuwaiuw noa mengaagiun pwe epwe meoni efoarh saeitan.

³⁷ Pwe ipwe aengaenigaemi pwe Pwapwior we e Santus e iura pwe, 'Iiy ina a pwan aeffitaeg ngaeniir rhag rhooakkena re aenneew,' ina epwe nnetaen wen ngaeniaei, pwe iga minikka kkepesaei ikka e foatofoat nge ikka a pwae noa pwe ennet."

³⁸ Rhooan kkayeo kkewe ra iura pwe, "Emwaeri! Soamwoon, riiufoarh saeitan ikka!"

Nge iya iura pwe, "A toaw!"

Jesus a Maeipin Woon Rhugun Olives (Mat 26.36-46; Mark 14.32-42)

³⁹ Jesus a nigiti aepinoamw we nge a noa ngaeni miniwe rhugun *Olives*, igiwe efasiu gaen noa e, nge rhooan kkayeo kkewe ra pwan tapwee noa.

⁴⁰ Igiwe ra toori pwioneoi we, nge a aengaeniir pwe, "Oaw maeipin pwe oawte ppiungiunong noan sessoat."

⁴¹ A nigitiir iwe a sooir mwet taaw saengiir egius, a noa foatotiw pwe a maeipin.

⁴² A iura pwe, "Semaei, aere womwerhaen nge wa arhiuwa saengiae kkepaen waeiraes ee. Nge soapw minne tipaei, pwe minna tipoamw minna epwe mmwen."

⁴³ Erhai angkenus naaeng a itto reen a itto aemaemaewa tae.

⁴⁴ Noan aan igin waeiraes egius mwo nge e aetemaegin reen aan maeipin, moaniyoanon e ssopwetiw nee ppweon nge a wee rhag sossopwun ccha.

⁴⁵ Enoa iutae me reen maeipin, a sefaaen noa reer rhooan kkayeo kkewe naiun nge a noa weriir pwe ra maiur, ra gin mmaniuniu reen aar neetip cchoaw.

⁴⁶ A aengaeniir pwe, "Meeta oawwa maiur reen? Oaw rhimwitae oawwa maeipin pwe oawte ppiungiunong noan sessoat."

Aar Torofi Jesus (Mat 26.47-56; Mark 14.43-50; John 18.3-11)

⁴⁷ Jesus erhiuwen mwaenieniy nge a noa itto eew pwuwaen aeremas, Judas minne e mmweir, iwe erhai me neeiir rhooawe seig me riiurhai a war. A itto reen Jesus a itto faeisongei.

⁴⁸ Nge Jesus a iura pwe, "Judas, faeisong mwu oamw minimwu wopwene fangenoa tinnimaen Naiun Aeremas reen?"

⁴⁹ Oatowe rhooan kkayeo kkewe reno reen Jesus ra giuneei miniwe epwene wen, nge ra aeiineow pwe, "Soamwoon, aeipwe mmwenen nainai saeitan kka naimaem?"

50 Erhai me neeiir e pwigi fena rhoaan akkiuneo we naiun Soamwoonin Patere iwe gopiy noa peig mwaanen saeningan.

51 Iwe nge Jesus a iura pwe, “Iug noa, a gacch nepaen!” A geotteopa saeningaen mwaanen we iwe a gacch noa.

52 Jesus a aengaenir rhoawee soamwoonin patere me soamwoonir poosun *Temple* we me mwaanen tugufaeyi kkewe reitto pwe repwe itto torofi, “Meeta oawnoa itto faaen saeitan me soapwon irae reen, pwe iga aetae ngaang erhai man mwoarho?

53 Inonno reemi oanongaen raaen noan *Temple* we, nge esooar aaemi torofiae. Iwe nge igma minne a oatomi, pwe iga maemaewaen pwoong roorh a nemem.”

Peter a Iura pwe Ese Giuneei Jesus

(Mat 26.57-58, 69-75; Mark 14.53-54, 66-72; John 18.12-18, 25-27)

54 Ra torofi Jesus ra pwigi noa noan iimw we imwaen Soamwoonin Patere; nge Peter epwan tettapweer to me itaaw.

55 Effooan eew aengaet noan wororaen iimw we, nge Peter a itto mooat tiw oaroor rhoawee re feroangoroangei noa aengaet we.

56 Igiwe erhai rhoapwut rhoaan engaang a weri pwe emooat oaron aengaet we, a fan wenewen ngaeni nge a iura pwe, “Pwan mwaanen een nge rhoaniwaen Jesus!”

57 Nge Peter e iura pwe, “Rhooapwut mwuun, ngaang ise giuneei mwaanen na!”

58 Ese mmwaei mwo nge erhai mwaanen a pwan weri Peter nge a pwan iura pwe, “Pwan een erhai rhoaniwan!”

Nge Peter a iura pwe, “Mwaanen mwuun, soapw ngaang!”

59 Epwe eew awa me mwirin nge erhai mwaanen a pwan kkepas ngaeni pwe, “Ennetaen pwe mwaanen een rhoaniwaen Jesus, pwe iga iiy pwan erhai re Galilee!”

60 Peter a paniuwaeni pwe, “Mwaanen mwuun, ise giuneei meeta mwu wo iyaekkepesa!”

Iwe rhag nge igiwe erhiwen mwaenieniy nge a keokkeok noa maniug we.

61 Soamwoon a wegitaeg a fan wenewenei Peter, iwe nge Peter a maengiy meeta we Soamwoon e aengaeni, “Weni mmwaen epwe keokkeok maniug nee pwongiy, nge een wopwe aepesa faaen enuuw pwe wose giuneeai.”

62 Peter a toowow a igin noa saeng.

Ra Aeni Aegekkaei Jesus Nge re Wirhiy

(Mat 26.67-68; Mark 14.65)

63 Mwaanen kkewe reposuw Jesus ra aeni fetaeneei aegekkaei nge re wirhiy.

64 Ra pwaniuw noa mesan nge ra aeiineow pwe, “Aegin! Iyo we e wirhiug?”

65 Egin towunap kkepas aenneew kka repwan aengaeni.

Jesus a Noa Weni Mmwaen Council

(Mat 26.59-66; Mark 14.55-64; John 18.19-24)

66 Enoa itto raaenin we, nge tugufaeyi me soamwoonin patere me sinsein anniug ra mwiirh fengaen, nge ra pwigito Jesus me weni mmweer.

67 Ra aengaeni pwe, “Aengaenigemaem, een minne Kristus?”

A paniuwaeni, “Aere iaengaenigaemi nge oawsoapw niugiuniug ngaeniae;

68 iwe aere iaeniogaemi eew kkepas aeiweg, oawsoapw paniuwaeni.

⁶⁹ Iwe nge saengi igina a noa, miniwe Naiun Aeremas epwene mooat peig mwaaenen Deus na oarosaen maemaew."

⁷⁰ Ra maegin iura pwe, "Ina nge een minne Naiun Deus?"

Nge a paniuwaeniir, "Aaemi minimwu oawiura pwe ngaang."

⁷¹ Ra iura pwe, "Esooar no ne sirhiuwen weti pwe epwe itto pwaeritae aenneewan! Giirh wooan oanongarh nge sia rongorong miniwe eiura!"

23

Jesus me Weni Mmwaen Pilate

(Mat 27.1-2, 11-14; Mark 15.1-5; John 18.28-38)

¹ Rhooa towunap we ra maegin iutae ra paeninoa Jesus wenimmwaen Pilate,

² iwe a rhaepetae aar oaturu Jesus me ee: "Aemaem aeiweri mwaaen een pwe e oatupwuur aeremas, egaen iura pwe resoapw fang tax ngaeni Soamwoonin Rome, nge epwan iura pwe iiy miniwe Kristus, iwe erhai *king*."

³ Pilate a aeiniow pwe, "Een minne aar *king* re Jews?"

Jesus a paniuwaeni, "Een minimwu wo aepesa."

⁴ Pilate a aengaeniir soamwoonin patere kkewe me aeremas kkewe pwe, "Esooar meeta minne i giuneei pwe teren mwaaen een."

⁵ Nge ra egius mwo nge re aengimaaw tae, "Reen aan fenai minne a rhaepiy tae fiow nepeteer aeremas me wooan oanongaen Judea. Erhaepetae me Galilee iwe nge igina a toorito igeei."

Jesus Weni Mmwaen Erotes

⁶ Igiwe Pilate a rongorong minneei, nge a aeiweg pwe, "re Galilee mwaaen een?"

⁷ Igiwe a pwae ngaeni pwe Jesus eitto me pwiuneoi we Erotes enemaeni, iwe a fangenoa Jesus reen Erotes, iwe iiy epwan no Jerusalem reen oatowe.

⁸ Erotes a igin kker igiwe a weri Jesus, pwe igiwe a fasiun rongorong kkepesaan Jesus nge e tipaeni pwe epwe weri rhag me mweoiuwe. Etipaeni pwe epwe weri aaen Jesus feeori aekkaew kkeman.

⁹ Iwe Erotes a aeiwegiy Jesus aekkaew kkepas aeiweg, nge Jesus ese paniuwaeni.

¹⁰ Soamwoonin patere kkewe me sinsein anniug kkewe ra toonong nge ra aetemaeginiy pwe repwe oamonofitiy Jesus.

¹¹ Erotes me sonotaw kkewe naiun ra aeni aegekkaei Jesus iwe nge refreeori ngaeni aekkaew min aenneew; iwe ra iseni tae eew mengaag nning wooan iwe nge ra fang sefaaen noa reen Pilate.

¹² Noan raaenin we rhag nge Erotes me Pilate ra maereyaer noa; nge igiwe mmwan nge re aenneew fengaen.

Ra Aettiweginiy Aaen Jesus Mae Noa

(Mat 27.15-26; Mark 15.6-15; John 18.39–19.16)

¹³ Pilate a faingi fengaenniir soamwoonin patere, me mwaaen kkewe me rhooa towunap we,

¹⁴ nge a aengaeniir pwe, "Oaw pwigito mwaaen een reei nge oawiura pwe e oatupwuur aeremas. Igina iya pipiij gacchiuw me igeei nge esooar minne iweri pwe oawpwe oamonofitiy wooan.

¹⁵ Erotes mwo nge esooar minne e oamonofitiy ngaeni, iwe a aeseefaaenito reerh. Esooar meeta ne mwaaen een efeeori nge epwe mae reen.

¹⁶ Iwe ipwene aengaeniir pwe repwene wirhiy nge ra saenet noa." [

¹⁷ Noan oanongaen gupwunon *Passover* nge Pilate egaen saeneti noa erhai rhooan kanepwus ngaeniir aeremas.]*

¹⁸ Rhooanap we ra aekkepwas rhag pwe, “Niiy noa! Saeneti ngaenigmaem Barabbas!” (

¹⁹ Barabbas e kanepwus reen aan aeffiowuur aeremas noan aepinoamw we me aan nni menaw aeremas.)

²⁰ Pilate e mwerhaen epwe saeneti noa Jesus iwe a pwan tingoar sefaaen ngaeniir pwuwa we.

²¹ Nge iir ra faer aekkepwas sefaaen pwe, “Kurusuw noa! Kurusuw noa!”

²² Aeinuwaen aaen Pilate kkepas ngaeniir a iura pwe, “Meeta monofit na efeeori? Ngaang esooar minne iweri pwe efeeori ne sipwe niiy noa reen! Ipwene aengaeniir pwe repwe wirhiy nge ra saeneti noa.”

²³ Nge iir egius mwo nge re aekkepwas temoag tae pwe repwe kurusuw noa Jesus, enoa oarosan noa nge ina miniwe ra feeori.

²⁴ Iwe Pilate a feeori ngaeni Jesus meeta we aar aeremas tingoar.

²⁵ Pilate a saeneti noa mwaaen we re tipaeni, iwe rekanepwusa pwe e aeffiow aeremas me nni menaw aeremas, nge Jesus a iseni ngaeniir pwe repwe feeori ngaeni minna re tipaeni.

Ra Kurusuw Noa Jesus

(Mat 27.32-44; Mark 15.21-32; John 19.17-27)

²⁶ Sonotaw kkewe ra paeninoa Jesus, igiwe ra feffaaeraeg noa, ra rhuungi erhai re Cyrene itan Simon iwe eitto saengi eew soapw. Ra torofi iwe ra ngaettae kurus we wooan, nge ra feeori pwe epwe aiufera kurus we me mwirin Jesus.

²⁷ Eew pwuwaen aeremas towunap ra tettapwei noa mwirin; aekkaerhai rhooapwut reno neeiir ra saengiti.

²⁸ Jesus a wegitaeg ngaeniir nge a aengaeniir pwe, “Rhooapwuton Jerusalem! Oawsoapw saengitiai, pwe oawfaer saengiti gaemi me aetekkomwu naimi.

²⁹ A ikkitto raaennekena aeremas repwene iura pwe, ‘Ra wenepwu rhooapwut kkena esooar naiur, esaaen yor mwo aar nainai, nge esaaen yor mwo aar atiut!’

³⁰ Ina oatona aeremas repwene aengaeni rhug pwe, ‘Piungtiw woamaem!’ nge re aengaeni taeiit pwe, ‘Oapaegemaem!’

³¹ Pwe ngaere minikkeei a wenewen iga e rhiuwen arawaraw waniwan, nge epwe ifa wusun igin a ppwass?”

³² Riiurhai mwaaen, rhooan kanepwus, ra pwan paenir wow repwe noa niir noa me reen Jesus.

³³ Renoa itto reen pwiuneoi we regaen iura pwe “Peopeoi Rhimw”, ra itto kurusuw noa Jesus me ee, fengaen me rhooan kanepwus kkewe riiurhai, erhai me peig mwaaenin nge erhai me peig rhooapwuton.

³⁴ Jesus a iura pwe, “Semaei, oamwusaar noa! Rese metaf reen minikka refreeori.”

Re aekkaerh *dice* pwe repwe inetiy minikkewe mengaagiun wooar.

³⁵ Aeremas ra iun oawruru soamwooniir Jews kkewe ra gaen aeni fetaeneei aegekkiae: “A aemenewaar aaemweoi; iwe nigit ngeaeni epwe aemenewa oanongan ngaere ennetaen pwe iiy Kristus we Deus e fini!”

³⁶ Sonotaw kkewe ra pwan aeni fetaeneei aegekkiae: ra itto reen ra ngaennee wine kkewe emwaenn,

* ^{23:17} Petenan eei nge e soano noan aekkaew petenan kka e foatofoat noan kkepesaen Greek.

³⁷ nge ra iura pwe, “Aemenewa oanongoamw ngaere ennetaen pwe een soamwooniir Jews!”

³⁸ Wooan tae rhimwen nge effoat pwe: “Ieen minne Kingaen Jews.”

³⁹ Erhai me neeiir rhoaan kanepwus kkewe e kurus a gaen aessaewa pwe: “Saapw een miniwe Kristus? Aemenewoag nge wa pwan aemenewaege-maem!”

⁴⁰ Nge mwaaen we erhai a soong ngaeni a iura pwe, “Wose mesagiu Deus? Oamw mae epwan aeffitaeg ngaeni rhag aan.

⁴¹ Iwe nge giirh ina efin pwe sipwe kurus pwe paniuwaen aenneew kena giirh sifeeori; nge iiy esooar min aenneew ne efeeori.”

⁴² Iwe nge a aengaeni Jesus pwe, “Maengiae, Jesus, igine wopwene noa itto noan nemenem na oamw!”

⁴³ Jesus a aengaeni pwe, “Iya ppwoneei ngaeniug raaeneei pwe een wopwe no reei noan Paradise.”

Maenoan Jesus

(Mat 27.45-56; Mark 15.33-41; John 19.28-30)

⁴⁴⁻⁴⁵ Saengi nugunupaen oanowas nge aenet esa ttin no nge a rorhappiung noa faniuw we enoa gona enuuw konook; iwe nge mengaag we etteoraeg noan *Temple* we mwo nge a taeringatiw faaen ruwowu. ⁴⁶ Jesus a aekkep-was noa nge a iura pwe, “Semaei! Iya iseni nong minne ngeoniuy noan poawumw!” Eiura rhag minnee nge a nurh noa aan ngasangas.

⁴⁷ Soamwoonin sonotaw we eweri miniwe a wen, iwe a aepingepinga Deus, nge iwe a iura pwe, “Ennet pwe erhai aeremas mwamwaai mwaaen we!”

⁴⁸ Igiwe aeremas kkewe re maegeto pwe rhoaan oawruru miniwe a wen, igiwe ra weri, ra sefaaen noa nee iimw, nge ra tugutuguw aiungeer reen aenneewaaen tipeer.

⁴⁹ Oanongeer rhooa kkewe re giuneei Jesus, fengaen me rhooopwut kkewe re tapweeito me Galilee, renoa iun oawruruto me itaaw.

Paeyinoan Jesus

(Mat 27.57-61; Mark 15.42-47; John 19.38-42)

⁵⁰⁻⁵¹ Eno erhai mwaaen itan Joseph iwe re Arimathea, eew aepinoamw me noan Judea. Iiy erhai mwaaen mwamwaai nge essoar, e wewweti rhag itton minna Mweoiun Deus. Inamwo igiwe iiy erhai rhoaan *Council* we, nge ese tipieew ngaeni niunniwaen we aar me miniwe ra feeori.

⁵² A noa reen Pilate nge a noa tingoar miniwe oanongaen Jesus.

⁵³ A noa pwinititiw miniwe oanongaen nge a tiugumi noa noan mengaag pwerh we, nge a oawnanong noan paeyi we iwe ekken wow neeiin faai, iwe esaaen yor mwo manimae ne etonong noan.

⁵⁴ Wooan Aenimowu miniwe, a gin egius rhag nge epwene itto Sabbath.

⁵⁵ Rhooopwut kkewe re tapwee mwirin Jesus me Galilee ra tapwee noa Joseph ra noa weri paeyi we me wunuunun aaen miniwe oanongaen Jesus won noan.

⁵⁶ Ra sefaaen noa nee iimw ra noa oamoannatae aar waninges me neoninges pwe repwe noa aepiti miniwe oanongaen Jesus.

Wooan Sabbath ra aseoseo, pwe ina miniwe e foatofoat noan Anniug we.

¹ Sunday nee oatosor moawugowug nge rhoapwut kkewe ra mwet noa reen paeyi we, nge repweipwog noa neoninges kkewe re oamoannatae.

² Ra noa weri fai we pwe a mwagiut saengi aesemaen paeyi we,

³ iwe ra toonong noan paeyi we; nge rese rhuungi miniwe oanongaen Soamwoon Jesus.

⁴ Ra riu reen meeta we a wen, iwe rhag nge riiurhai mwaaen igin maretin mengaagiiur ra iu me oaroor.

⁵ Reen aar igin mesag, rhoapwut kkewe ra foatotiw nee ppweon, nge mwaaen kkewe ra aengaenir pwe, "Meeta faan aaemi giutta mwaaen e menaw me neeiir rhooa mae reen?

⁶ Esa nono igeei; a menaw sefaaen tae. Oawmaengiy meeta we eaengaenigaemi igiwe eno noan Galilee:

⁷ 'Mwaaen we Naiun Aeremas ina epwene toonong neepaiiur rhooa monofit, repwe kurusuw noa, nge mwirin enuuw raaen epwe menaw sefaaen tae."

⁸ Iwe nge ra maengiy noa meeta kkewe Jesus e aepesa,

⁹ ra sefaaen saengi paeyi we, ra noa fioangei ngaeniir rhooawe seig me erhai rhoaan kkayeo me pwan oanongeer rhooawe aaemweoi.

¹⁰ Rhoapwut kkewe iwe Maria Magdalene, Joanna, me Maria we inaen James; iir me rhoapwut kkewe aaemweoi ra aengaenir oapostonus kkewe minikkewe a wen.

¹¹ Nge oapstonus kkewe ra maengiy pwe meeta we rhoapwut kkewe re aepesa nge min ffeeoretae rhag, iwe rese niugiuniug ngaeniir.

¹² Nge Peter a iutae rhag nge a fattapw noa reen paeyi we; a pwoaroti wng a weri pwe a mengaag kkewe rhag. Iwe a mwet sefaaen noa nee iimw nge a mwaar reen meeta we a wen.

Faaeraeg Ngaeni Emmaus

¹³ Noan raaenin we rhag nge riiurhai mwaaen kkewe rhoaniuwaen Jesus ra faaeraeg ngaeni eew soapw itan Emmaus, iwe epwe fisuuw miles saengi Jerusalem,

¹⁴ iwe nge regaen mwaenieniy fengaen wooar reen oanongaen meeta kkewe a wen.

¹⁵ Igiwe re kekkespas me fioangei minikkewe, nge Jesus a noa arapeto reer iwe a itto faaeraeg eew noa meyiir;

¹⁶ nge ra weri nge rese giuneei pwe Jesus miniwe.

¹⁷ Jesus a aengaenir pwe, "Meeta mwu oawiyaepesa fengaenniy, wooan aaemi feffaaeraeg noa?"

Iwe ra iunoa, ra mas affayeo noa.

¹⁸ Erhai me neeiir, itan Cleopas, a aeiineow pwe, "Een rhag me neeiir waseona wooan Jerusalem minne wose giuneei meeta kka a wewwen noan raaenin kkewe a noa?"

¹⁹ "Meeta kena?" a aeiyeg.

Ra paniuwaeni pwe, "Minikkewe ewen ngaeni Jesus re Nazareth we. Mwaaeneei nge erhai profeta, iwe Deus me oanongeer aeremas nge regiuneei pwe eyor maemaewan noan oanongaen meeta kka eiura me feori.

²⁰ Soamwoonin patere me mwaaen kkewe aarh ra fangenoa pwe repwe noa niiy noa, iwe me kurusuw noa.

²¹ Nge aeiya iseni aemaem aepiniugiuniug wooan pwe iiy minne epwene saeneti noa Israel me noan aenneew! Nge soapw ina rhag, pwe a enuuw raaen mwirin aan wen minikkewe.

²² Aaemweoi rhooapwut kkewe rhoaniuwarh minne re ariugemaem; renoa reen paeyi we nee oatosor moawugowug,

²³ nge rese weri miniwe oanongan. Ra sefaaeneto nge ra iura pwe aaemweoi angkenus repwae ngaenir nge ra aengaenir pwe iiy a menaw sefaaen tae.

²⁴ Aaemweoi aemaem ra noa reen paeyi we nge ra noa weri pwe oanovaen meeta kkewe rhooapwut kkewe re aepesa nge ennet, pwe rese weri minna oanongan.”

²⁵ Iwe Jesus a aengaenir pwe, “A ifa mwo pwurhom, me mmwaeyin aaemi niugiuniug ngaeni oanovaen meeta profeta kkewe re iura!

²⁶ Pwe esoapw faer ieei wusun aaen Kristus waeiraes reen minikkei weni mmwaen aan noa toonong noan minna nning?”

²⁷ Iwe Jesus a aemmetefa ngaenir meeta kkewe kkepesan me noan oanovaen Pwapwior we e Santus, rhaepetae me noan mini pwapwioron Moses me oanovaen minikkewe foatogieer profeta kkewe.

²⁸ Igiwe ra arapeto reen soapw we re faaeraeg ngaeni, Jesus a feeori pwetae epwe faaeraeg saengiir;

²⁹ nge iir ra ammwarhiu sefaaeniy, ra iura pwe, “Notiw remaem, epwene oaropaen pwoong nge iye a rorhappiung noa.” Iwe a toonong pwe epwene notiw reer.

³⁰ Iwe a mooat tiw pwe epwene mwongo reer, a pwigi fenoawa we, nge a maeipina; a giniiy fenoawa we nge a ngaenneer.

³¹ Iwe egius mwo nge eppwun noa meseer nge ra giuneei pwe iiy, iwe rhag nge e soano saengiir.

³² Ra iura fengaenniy pwe, “Meeta ese wee i rhag ppwunon aengaet me noan tiparh, igiwe emwaenieniy ngaenigirh me wooan ennap reen aan aemmetefa ngaenigirh meeta we e foatofoat noan Pwapwior we e Santus?”

³³ Ra iutae rhag ra noa Jerusalem, ra noa rhuungi rhoaan kkayeo kkewe seig me erhai me rhooawe aaemweoi,

³⁴ ra iura pwe, “A menaw sefaaen Soamwoon! A pwae ngaeni Simon!”

³⁵ Rhooawe riiurhai ra itto fioangei ngaenir miniwe ewen me wooan ennap, me wunuunun aar giuneei pwe iiy Soamwoon igiwe a giniiy fenoawa we.

*Jesus a Pwae Ngaenir Rhooan Kkayeo Kkewe Naiun
(Mat 28.16-20; Mark 16.14-18; John 20.19-23; Feof 1.6-8)*

³⁶ Oatowe rhooa kkewe riiurhai re rhiuwen mwaenieniy, nge Soamwoon e rhiuwen iunoa rhag me neeiir nge a aengaenir pwe, “Oapoas epwe no reemi.”

³⁷ Ra igin mesag pwe ra maengiy pwe ra weri erhai aniu.

³⁸ Nge a aengaenir pwe, “Meeta oawwa aiuraeg reen? Meeta oawtip mwaramwar fetaen reen?

³⁹ Oaw pipii paeyi me pirheei, pwe oawpwe weri pwe ngaang minneen. Oaw geotteopayaei, pwe oawpwe giuneei, pwe esooar aniu ne egaen yor fitigon me rhiun, nge oawpwe weri pwe eyor wooai.”

⁴⁰ Igiwe e aepesa minnee nge a pwaeri ngaenir paiun me pirheen.

⁴¹ Nge iir resaaen niugiuniug rhag, reen aar igin kker me tip mwaramwar; iwe a aeiinee pwe, “Eyor minne sipwe mwongo me igeei?”

⁴² Iwe ra ngaenee egiufet iig appwerh,

⁴³ iwe e pwigi nge a aengi me wenimmweer aeremas kkewe.

⁴⁴ Iwe a aengaenir pwe, “Ikkeei minikkewe ifasiun aengaenigaemi oatowe irhiuwen no reemi: oanovaen minikkewe effoat pwe wunuunuy

noan Oasoapwosoapw we aaen Moses, me minikkewe foatogieer profeta kkewe, iwe me noan pwapwioron Psalms nge epwe nnet.”

⁴⁵ Nge a sugi noa aar niunniuwaen pwe repwe metefaaegini oawton Pwapwior we e Santus,

⁴⁶ nge a aengaenir pwe, “Ieen miniwe effoat: Kristus epwe affayeo nge a menaw sefaaeen mwirin eoniuraen,

⁴⁷ nge noan minna itan nge kkepas we kkepesaen toagun saengi monofit iwe me sessaenin monofit epwe fenaiuw ngaeniir oanongaen faniuw, epwe rhaepetae me Jerusalem.

⁴⁸ Aaemi rhooan pwaeritae oanongaen minikkeei.

⁴⁹ Iwe nge ngaang ipwene aefengatiw woami meeta we mwaaen we Semaei e ppwoneei. Nge aaemi oawpwe no rhag nee aepinoamw toori aan ittiw woami maemaew na wooainaeng.”

Jesus a Noa Naaeng

(Mark 16.19-20; Feof 1.9-11)

⁵⁰ A pwigiir wow me noan aepinoamw we toori noa Bethany, igiwe a aeititiae paiun nge a aepiniir noa.

⁵¹ Nugunupaen aan aepiniir nge a nigitir pwe a noa weeinaaeng.

⁵² Iir ra oassoara iiy nge ra sefaaeen noa Jerusalem, reen aar igin kker,

⁵³ nge ra no rhag noan *Temple* we reen aar fang ngaeni Deus aan aerhiger-hig.

Fangkenio We Foatogiaen John

Kkepas we Efang Menaw

- ¹ Noan oatowe pweoneotaen faeinaengiy nge Kkepas we a fasiun no; Kkepas we eno reen Deus, nge Kkepas we ina iiy Deus.
- ² Saengi rhag ne pweoneotaen nge Kkepas we a no reen Deus.
- ³ Oanongaen meeta Deus a feeori nge e itto me reen; esooar eew aegiaeg ne ese ffeeor me reen.
- ⁴ Iiy Kkepas eei minne efang menaw, nge iiy menaw eei minne e aesseremaar aeremas.
- ⁵ Iiy seram we e aesserema roorh, nge roorh ese oarorha seram.
- ⁶ Deus a fang naiun rhooan pweipwogin kkepas, erhai mwaaen itan John,
- ⁷ iwe a itto pwe epwe aengaenir aeremas wunuunun seram we, pwe oanongeer rhooakka repwe rongorong kkepas we nge repwe niugiuniug.
- ⁸ Iiy wooan oanongan saapw iiy seram we; iiy e itto pwe epwe itto aepesa kkepesaen seram we.
- ⁹ Ieei minne oanongonniawan seram, seram we epwe itto noan faeinaengiy pwe epwe ttin tiw wooar oanongeer aeremas.
- ¹⁰ Kkepas we a no wooan faeinaengiy, iwe inamwo iga Deus efeori faeinaengiy me reen, nge faeinaengiy ese giuneei.
- ¹¹ Iiy e itto wooan sipegin faniawan, nge sipegin aeremesaen faniawan rese aetiwa.
- ¹² Aekkaaemweoi re aetiwa nge re niugiuniug ngaeni; iwe ikkeei a aeitaar pwe iir naiun Deus.
- ¹³ Rese no pwe naiun Deus reen aar wupwutiw, nge saapw tipaen aeremas ngaere tipaen erhai mwaaen, pwe faer saengi tipaen Deus.
- ¹⁴ Iiy Kkepas we a itto no noa pwe aeremas, iwe a itto nonno neeirh, nge a sseog noa reen ffayeo me min nnet. Sa weri nningan, nning we mwaaen we Seman e ngaennee pwe iga iiy rhag Naiun.
- ¹⁵ Iiy John e aepesa wunuunun. Aan aekkepwas aegini pwe, “Ieen iiy mwaaen we i aekkaepesa pwe, ‘Iiy epwe itto mwiriy, nge iiy e taegias me mmwaei, pwe iya fasiun no me weni mmwaen aaei supw.’”
- ¹⁶ Me reen temoagon ffayeo na aan a aewenepwuwigirh faaen fiteig oanongarh, a aewenepwuwigirh noa rhag.
- ¹⁷ Deus a fang oasoapwosoapw kkewe ngaeni Moses, nge faayeow me nnet e itto me reen Jesus Kristus.
- ¹⁸ Esaaen yor mwo faaen eew ne erhai a weri Deus. Pwe mwaaen na rhag Naiun, ina iiy rhag Deus, nge eno rhag wenepeigin minna Seman, nge iiy minne a giuneei noa wunuunun.

Aaen John Baptist Fenai

(Mat 3.1-12; Mark 1.1-8; Luke 3.1-18)

- ¹⁹ Soamwoonin Jews me noan Jerusalem ra aefengaar noa aaemweoi patere me Levites repwe noa aeiineow John pwe, “Een iyo?”
- ²⁰ John ese oapa iiy iyo pwe a faer aeffeta noa nge a iura pwe, “Saapw ngaang Kristus.”
- ²¹ Iwe ra aeiineow pwe, “Iwe nge een iyo? Een Elijah?”
John a iura pwe, “Aapw, saapw ngaang.”
Nge ra pwan aeiineow pwe, “Een Profeta we?”
Nge iiy a pwan paniuwaenir pwe, “Aapw.”

²² Nge ra aengaeni pwe, “Iwe aengaenigemaem ngaere een iyo. Pwe aeipwe noa aengaeniir mwaaen kkewe refangeto aemaem. Meeta wopwe iura reen mmwenemew?”

²³ Aessefaaanin kkepas we aaen John a aepesa miniwe mwaeniaen profeta we Isaiah:

“Ngaang ‘aeremas we iiyaekkepwas me noan *desert* pwe:

Aewenewena ennap na ennepaei Soamwoon!”

²⁴ Rhooan pweipwogin kkepas kkewe Pharisees re aefengaar,

²⁵ ra aeiineow John pwe, “Ngaere saapw een Kristus, ngaere Elijah, ngaere Profeta we, iwe meeta faan wonoa paptismus aeremas reen?”

²⁶ John a paniuwaenir, “Ngaang i paptismus reen rhan, nge e iu erhai me neeimi nge oawse giuneei.”

²⁷ Ina aeremas na epwe itto me mwiriy, nge ngaang ese fin ipwe pwaeisi geeogeeon nokkaan.”

²⁸ Oanongaen minikkeei nge ewen me Bethany ina eno peig na eotiw me reen pwupwu we Jordan, peig we John e paptismus fetaen ee.

Sheep we Naiun Deus

²⁹ Sorotaen raaenin we eraan nge John a weri Jesus pwe a ikkitto, nge a iura pwe, “Inaan iiy *Sheep we Naiun Deus*, iwe e arhiwa noa monofitin faeinaengiy!

³⁰ Een iiy mwaaen we igaen aepesa mmwenen iwe iiura pwe, ‘Erhai mwaaen ina epwe itto mwiriy, nge iiy etaegias me mmwaei, pwe iya fasiun no me weni mmwaaen aaei supw.’

³¹ Ngaang ise giuneei aere epwe iiy iyo, nge ngaang iya itto nge iya itto paptismus reen rhaan pwe epwe pwae ngaeniir re Israel ngaere iiy iyo.”

³² Iwe John a pwaeritae pwe, “Ngaang iweri Espritu Santus e ittiw me noan naaeng nge eweei erhai *dove* iwe a ittiw no noa wooan.

³³ Ngaang ise giuneei aere epwe iiy iyo, nge Deus, iwe efangeto ngaang pwe ipwe ittiw paptismus reen rhaan, nge a aengaeniaei pwe, ‘Wopwe weri Espritu Santus aan ittiw no wooan erhai mwaaen; iiy mwaaen we epwe paptismus reen Espritu Santus.”

³⁴ John a iura pwe, “Iya weri, iya aengaenigaemi pwe iiy minne Naiun Deus.”

Rhooawe Mmwaen Naiun Jesus Rhooan Kkayeo

³⁵ Mmasetae nge John me riiurhai rhooan kkayeo kkewe naiun ra pwan itto iu igiwe,

³⁶ nge a weri aaen Jesus faaeraeg noa. A iura pwe, “Een iiy *Sheep we Naiun Deus*.”

³⁷ Rhooan kkayeo kkewe riiurhai re rongorong miniwe e aepesa nge ra ttapw noa mwirin Jesus.

³⁸ Jesus enoa toagun, a weri aar tapweto me mwirin, iwe a aeiineor pwe, “Meeta oaw kiukkiutta?”

Ra paniuwaeni, “Wo nonno iya Rabbi?” (Wewen nge “Sinsei”.)

³⁹ Nge iya iura pwe, “Oaw itto oawpwe noa weri.” (Epwene aerepaen faawu konook nee oatofaaef.) Ra tapweei noa ra noa weri igiwe eno nonno ee, iwe ra nonoa reen noan raaenin we.

⁴⁰ Erhai mwaaen kkewe nge itan Andrew, iwe pwiiin Simon Peter.

⁴¹ Enoa rhag noa giutta mwaaen pwiiin Simon, nge a aengaeni pwe, “Aeiya rhuungi Messiah.” (Wewen nge “Kristus”).

⁴² Iwe ra pwigi noa Simon reen Jesus.

Jesus a fan ngaeni nge a iura pwe, “Een Simon we naiun John, wopwene itaeni Cephas.” (Iteei nge e aeffitaeg ngaeni rhag Peter, wewen nge “faai.”)

Jesus a Faingiir Philip me Nathanael

⁴³ Mmasetae nge Jesus a maengiy epwene noa Galilee. Enoa nge a rhuungi Philip nge a aengaeni pwe, “Itto tapweaei!” (

⁴⁴ Philip nge re Bethsaida, aepinoamw we Andrew me Peter re nonno ee.)

⁴⁵ Philip a noa weri Nathanael nge a aengaeni pwe, “Aeiya weri mwaaen we Moses e foatogi wunuunun noa pwapwioron anniug we nge iwe profeta kkewe repwan foatogi wunuunun. Iiy Jesus we naiun Joseph, iwe saengi Nazareth.”

⁴⁶ Nathanael a aeiineo pwe, “Yor min mwamwaai ne epwe itto me Nazareth?”

Philip a iura pwe, “Itto pwe wopwe noa weri!”

⁴⁷ Igiwe Jesus a weri aaen Nathanael aan ikkito a fioangei wunuunun pwe, “Ieen iiy erhai oanongonniuwaen re Israel; esooar eew min oatupwtupw ne eno wooan!”

⁴⁸ Nathanael a aeiineow pwe, “Eifa wusun nge wa giuneaei?”

Jesus a paniwaeni pwe, “Ngaang i weriug pwe womooat faaen waniwan we fig, weni mmwaen aaen Philip faingiug.”

⁴⁹ Nathanael a iura pwe, “Sinsei, een minne Naiun Deus! Een minne Kingaen Israel!”

⁵⁰ Jesus a iura pwe, “Oamw rhag niugiuniug iga i aengaeniug pwe i weriug igiwe wono faaan fig we? Eyor aaemweoi minikka wopwe naaen itto weri ikka etaegias saengi minnee!”

⁵¹ Nge a aengaenir pwe, “Ennetaeen, ipwe aengaenigaemi minna wenewenen: oawpwe weri aan susu noa naaeng nge oawwa weriir angkenus kkewe Naiun Deus aar ittae me ittiw wooan mwaaen we Naiun Aeremas.”

2

Eew Appwiuniupai me Cana

¹ Riiuraaen me mwirin nge a yor eew appwiuniupai me noan aepinoam-won Cana me noan Galilee. Rhooapwut we inaen Jesus eno ee,

² nge Jesus me rhoaan kkayeo kkewe naiun repwan feffai repwe noa reen apwiuppwiuniuw we.

³ Igiwe a ros noa *wine*, rhooopwut we inaen Jesus a aengaeni pwe, “A ros noa aar *wine*.”

⁴ Jesus a iura pwe, “Een wosoapw aengaeniaei meeta ipwe feeori, pwe minna oatoi ina esaaen itto.”

⁵ Rhooapwut we inaen Jesus a aengaenir rhoaan akkiuneo kkewe pwe, “Oawfeeori ese tiwegin minikkena e aengaenigaemi.”

⁶ Jews eyor aar oasoapwosoapwon aenimenim, ina faaen miniwe eno wonowu ruumen rhaan, nge eew ruume kkewe nge epwe pwigi oawton riiuveig ngaeni eniig neosaening.

⁷ Jesus a aengaenir rhoaan akkiuneo kkewe pwe, “Oaw oawuta ruume kaan reen rhaan.” Nge ra oawuta minikkewe asseogiu noa, ⁸ nge a aengaenir pwe, “Iwe igina oaw itifi aekkaew reen rhaan oawwa pwigi noa reen manna e soamwooni gupwun eei.” Iwe ra pwigi noa reen rhaan kkewe,

⁹ nge igina nge rhaan kkewe a ffeeor noa pwe *wine*, nge mwaaen we a nnaeri. Ese giuneei igine *wine* kkewe e itto me ee (nge rhoaan akkiuneo kkewe re ifi rhaan kkewe re giuneei); iwe a faingi *bridegroom* we

¹⁰ a aengaeni pwe, “Oanongeer aeremas regaen gommwaen iseis wow *wine* nneo, nge aeremas re pwunaas noa nge renaaen iseis wow *wine* kka ese

nneo. Nge wa gaen noa iseni *wine* na oarosaen mwamwaai pwe epwe noa no pwe oarosan!"

¹¹ Jesus a feeori aeyewaen kkeman me noan Cana me noan Galilee; a pwaeri noa minna nningen, nge rhooan kkayeo kkewe naiun ra niugiuniug ngaeni.

¹² Mwirin minneei nge Jesus me rhoapwut we inan me pwiiin me rhoan kkayeo kkewe ra noa Capernaum ra noa no e noan fitiraen.

Jesus a Noa Noan Temple we

(*Mat 21.12-13; Mark 11.15-17; Luke 19.45-46*)

¹³ Akkarap oaton gupwunon *Passover*, we re Jews regaen oagupwuna, iwe Jesus a noa Jerusalem.

¹⁴ Noan *Temple* we a noa rhuungiir aeremas pwe re chuwaai fetaen wakke, *sheep, pigeons*, iwe me rhoan ssiuwen senaapiy repwan mooat reen aar *table*.

¹⁵ A feeori eew soapwoi saaen pwe naiun wuwoaw, iwe a aenewaar wow maan me noan *Temple* we, *sheep* me wakke; a aerheppa *table* kkewe aar rhoan aetittinen senaapiy me aeperessa noa naiiur manfaifai;

¹⁶ iwe a aengaenir rhoan chuawaiun *pigeons* kkewe, "Oawpwigin wow me igeei! Enemmwaen mwo aaemi pwigi minne imwaen mane Semaei pwe nenien aaemi imwaen chuwaai!"

¹⁷ Rhooan kkayeo kkewe naiun a maeng ngaenir meeta we effoat noan Pwapwior we e Santus e iura pwe, "Deus, rhaengin minna imwoamw ina eweeli pwerhin aengaet me neerhiuy."

¹⁸ Soamwooniir Jews ra itto aeiineow pwe, "Meeta eew kkeman wopwe feeori nge epwe pwaeri ngaenigemaem pwe eyor maemaewoamw pwe wopwe feeori minikkei?"

¹⁹ Jesus a aengaenir pwe, "Oawoatoaropaetiw *Temple* eei, nge noan eoniuraen ipwe feeori sefaaeniy."

²⁰ Nge ra aeiineow pwe, "Wopwe feeori sefaaeniy noan eoniuraen? *Temple* eei effeelor noan faaeig me wonowu raeg!"

²¹ Nge *Temple* we Jesus e fioangei nge iwe ina miniwe oanongan.

²² Iwe igiwe enoa menaw sefaaen tae, rhoan kkayeo kkewe naiun ra maengiy noa pwe e iura minneei, iwe ra niugiuniug ngaeni Pwapwior we e Santus me miniwe mwaeniaen Jesus.

Jesus e Giuneei Wunuunun Aeremas

²³ Igiwe Jesus eno Jerusalem reen gupwunon *Passover*, ra towunap rhooa e ra niugiuniug igiwe ra weri kkeman kkewe efeori.

²⁴ Iwe nge Jesus ese niugiuniug ngaenir, pwe iiy egiuneei neetipeer oanongeer noa.

²⁵ Esooar ipitaen pwe repwe aengaeni wunuunuur aeremas, pwe iiy egiuneei meeta kkewe eno neetipeer.

3

Jesus me Nicodemus

¹ Eno erhai soamwooniir re Jews mwaaen itan Nicodemus, iiy erhai Pharisee.

² Eew pwongin a noa reen Jesus a aengaeni pwe, "Rabbi, aei giuneei pwe een erhai sinsei aefengayaen Deus. Esooar erhai ne epwe mmwenen ffeeor kkeman kkomwu wogaen feeori, ngaere Deus ese no reen."

³ Jesus a iura pwe, "Ennetaan, ipwe aengaenigaemi minna wenewenen: esooar erhai ne epwe weri minna Mweoiun Deus igeine ese supw sefaaen."

⁴ Nicodemus a aeiineo pwe, “Epwe ifa wusun aaen erhai mwaaen tugfaeyi epwe supw sefaaen? Iiy esoapw mmwenen sefaaen nong noan upwaen miniwe inan pwe epwe oaruwowwan aan supw sefaaen!”

⁵ Jesus a iura pwe, “Ennetae, ipwe aengaenigaemi minna wenewenen: esooar erhai ne epwe toonong noan minna Mweoiun Deus aere ese supw me reen rhaan me Espritu Santus.

⁶ Erhai ne esupw saengi aeremas nge naiun aeremas, nge ne esupw saengi Espritu Santus nge ina iiy naiun.

⁷ Oawsoapw riu reen iga iaengaenigaemi pwe oawpwe supw sefaaen.

⁸ Aaeng ina ese tiwegin igine eaengiaeng noa ee; oawrongorong ngiungiun, nge oawse giuneei iga itto me ee aere iya iga epwe noa ee. E ina wusuur reer rhooakka resupw to me reen Espritu Santus.”

⁹ Nicodemus a aeiineo pwe, “Epwe ifa wusun aan mmwen minnee?”

¹⁰ Jesus a paniwaeni, “Een erhai sinsei taegias me wooan Israel nge wose giuneei minnee?

¹¹ Ennetae, ipwe aengaenig minna wenewenen: aeaepesa minikka aeiguneei nge aepwaeritae minikkina aeiweri, nge aaemi oawse rongorong aemaem kkepas.

¹² Oawse niugiuniug ngaeniai iga iaengaenigaemi minikka mmwenei noan faeinaengiy; nge epwe ifa wusun aaemi niugiuniug ngaeniai iga ipwe aengaenigaemi minikkina mmwenei noan naaeng?

¹³ Esaan yor mwo erhai ne enoa naaeng, pwe aeggaen minna rhag Naiun Aeremas, iwe e ittiw me naaeng.”

¹⁴ Wunuunun aaen Moses saeregi tae sowufaeng goanoorh we wooan eew irae me noan *desert* we, epwe pwan ina rhag wusun aaen aetaegiasa tae mwaaen we Naiun Aeremas,

¹⁵ pwe ina nge oanongeer aeremas kka re niugiuniug ngaeni nge repwe toori menaw na esooar iaenin.

¹⁶ Reen aaen Deus igin aerhaengi faeinaengiy, a fanetiw mwaaen erhai we Naiun, pwe oanongeer aeremas kka re niugiuniug ngaeni nge resoapw maenoa nge repwe toori menaw na esooar iaenin.

¹⁷ Deus ese fanetiw mwaaen we Naiun noan faeinaengiy pwe epwe ittiw apwiungiu, pwe epwe faer ittiw aemenewa.

¹⁸ Iyo kka re niugiuniug ngaeni mwaaen we Naiun Deus nge resoapw apwiung; nge iyo kena rese niugiuniug ngaeni nge ra fasiun no noan apwiung, pwe iga rese niugiuniug ngaeni mwaaen erhai we Naiun Deus.

¹⁹ Epwe iiei wunuunun apwiung: seram a itto noan faeinaengiy nge aeremas re aerhaengi roorh me mmwaen seram, pwe iga aar feoffeelor nge e aenneew.

²⁰ Iyo kka re feoffeelor aenneew nge ikkina re oapwuta seram, resoapw itto noan seram, pwonno feoffeelor aenneew kkena refreeori ete pwaetae.

²¹ Nge iyo kkena refreeori minikkina ewenewen nge repwe itto noan seram, pwonno seram epwe pwaeritae pwe minikkina refreeori nge etapwee minikkina tipaen Deus.

Jesus me John

²² Mwirin minnee nge Jesus me rhoaan kkayeo kkewe naiun ra noa Judea, a noa notiw reer pwe a noa baptismus fetaen aeremas.

²³ Iwe nge John Baptist eno pwe epwan baptismus fetaen noan Aenon, ese taaw saengi Salim, pwe iga eigin ssow rhaan me ee. Aeremas ra noa reen pwe a baptismus aeginiir. (

²⁴ Minnee nge weni mmwaen igiwe John enoa kanepwus.)

²⁵ Aaemweoi rhooan kkayeo kkewe naiun John ra aengimaw ngaeni erhai re Jew reen wunuunun aar iir re Jews oasoapwosoapwon aenimenima oanongeer.

²⁶ Ra noa reen John nge ra aengaeni pwe, “Sinsei, wo maengiy rhag mwaaen we eno reemw me peig na epeig me reen pwupwu we Jordan, iwe wo fioangei kkepesan? Igina nge a baptismus fetaen nge oanongeer aeremas nge ra maeg noa reen!”

²⁷ John a paniwaenir pwe, “Esooar erhai ne epwe yor eew meeta reen pwe aeggaen igine rhag Deus epwe fang ngaeni.

²⁸ Aaemi minikkomwu naeyi rhooan pwaeritae, reen iga ngaang iura pwe, ‘Saapw ngaang Kristus, pwe ngaang minne Deus egommwaen aefengaeyaei to me mmwan.’

²⁹ *Bridegroom* ina rhooan ngaenne aaen *bride* na; nge nieuwe maereyaeren mwaaen we e appwiuniupai, e iu oaron nge a kker igiwe a rongorong mwae-niaen mwaaen we. E ieen wunuunun oanongonniuwaen aaei kker.

³⁰ Iiy epwe taegias noa nge ngaang ipwe sessoanotiw.”

Iwe e Ittiw me Weei Naaeng

³¹ Mwaaen we e ittiw me weeinaaeng minne oarosaei taegias saengiir oanongeer aeremas. Iyo na eitto me wooaisoanop nge iiy naiuy soanop ina epwe aepesa mmwenen soanop, nge iyo we e ittiw me naaeng nge iiy minne oarosaen taegias saengiir oanongeer aeremas.

³² E aepesa minne eweri me e rongorong, nge esooar ne e aiussaening ngaeni.

³³ Nge iyo e aetiwa kkepas e aan, iwe nge iiy epwaeritae pwe Deus nge ennet.

³⁴ Iyo we Deus a fang nge e aepesa oanoon Deus, pwe Deus a oawunusa ngaeni oanongonniuwaen minna Ngeoniun.

³⁵ Deus we Seman eigin aerhaengi mwaaen na Naiun iwe a fang ngaeni oanongaen minna mamaawan.

³⁶ Iyo na e niugiuniug ngaeni mwaaen we Naiun nge epwe toori menaw na esooar ssiaaenin; nge iyo ese niugiuniug ngaeni mwaaen we Naiun nge esoapw yo ngaeni menaw na esooar ssiaaenin, nge epwe no rhag noan aaen Deus aegaeregae.

4

Jesus me Rhooapwuton Samaria we

¹ Pharisees kkewe ra rongorong pwe ra towunap rhooan kkayeo kka Jesus a baptismusaar me mmwaen John nge a pwigiir pwe naiun rhooan kkayeo. (

² Nge minna wenewenen, nge saapw Jesus pwe faer rhooan kkayeo kkewe naiun minne re baptismusaar.)

³ Iwe nge igiwe Jesus a rongorong meeta we re aepesa, a siusaengi Judea a sefaaen ngaeni Galilee;

⁴ nge noan faaeraeg noa we aan nge epwan toonong noan Samaria.

⁵ Noan Samaria a noa reen eew aepinoamw itan Sychar, igaan nge ese taaw saengi maat we Jacob e ngaeennee Joseph iwe naiun.

⁶ Rhanniunim we aaen Jacob eno ee, iwe Jesus a itto mooat tiw epwe a mmaniuniu reen aan aeggaesaeisaei. A aerepa nugunupaen oanowas.

⁷ Erhai rhooapwuton Samaria a itto pwe epwe itto ifiif rhan, nge Jesus a aengaeni pwe, “Ngoatto egius rhan pwe iunumaei.” (

⁸ Rhooan kkayeo kkewe naiun resoano pwe renoa nee aepinoamw pwe renoa chuwaai mwongo.)

⁹ Rhooapwut we a aengaeni pwe, “Een erhai Jew, nge ngaang erhai re Samaria—e ifa wusun nge wa tingoareaei iuniumoamw rhaan?” (Re Jews resoapw iun nong noan aar kkap me mwongo nong noan aar saepiy re Samaria.)

¹⁰ Jesus a paniuwaeni pwe, “Aere wo giuneei meeta e Deus efang me iyo e etingoareog iunuman rhaan, nge wo tingoar ngaeni nge iiy epwe ngaenneog minna rhaniun menaw.”

¹¹ Rhooapwut we a iura pwe, “Menap, esooar oamw pwaecchi nge rhanniunim een iye eigin nennoan. Iya iga wopwe pwigi rhaniun menaw me ee?”

¹² Jacob we rhaepetomaem minne efang ngaenigemaem rhanniunim ee; iiy me aetekkewe naiun me naiun maan nge oanongeer nge re iun saengi rhan eei. Meeta, een wo iura pwe wo taegias saengi Jacob?”

¹³ Jesus a paniuwaeni, “Rhooakka re iun me reen rhan eei nge repwe moar sefaaen,

¹⁴ nge rhooa kena re iun me reen rhan na ngaang ipwe ngaenneer nge esooar faaen eew ne repwe moar. Rhan na ipwe ngaenneer ina epwene no pwe rhaepeton eew rhan ina epwene ngaenneer rhaniun menaw na esooar ssiaaenin.”

¹⁵ Rhooapwut we a iura pwe, “Menap, ngaennee aei rhan na! Ina nge isoapw rhiuwen moar no nge isoapw rhiuwen itto no igeei pwe ipwe itto ifif rhan.”

¹⁶ Jesus a aengaeni, “Wonoa faingi mwaaen we rhoaan ngaenne oamw nge wa sefaaeneto.”

¹⁷ Rhooapwut we a iura pwe, “Esooar rhoaan ngaenneaei.”

Jesus a iura pwe, “Ennet minimwu wo iura pwe esooar rhoaan ngaenne oamw.

¹⁸ Een wa moannon appwiuniupai ngaenir nimman mwaaen, iwe nge mwaaen na wono reen igma ina soapw oanonganuiwan rhoaan ngaenne oamw. Wo aengaeniaei minna wenewenen kkepas.”

¹⁹ Rhooapwut we a iura pwe, “Iya weri pwe een erhai profeta, menap.

²⁰ Re Samaria kkewe rhaepetoi re itto maeipin ngaeni Deus me wooan rhug eei, nge aaemi Jews oawiura pwe Jerusalem minne sipwe maegin maeipin ngaeni Deus me ee.”

²¹ Jesus a aengaeni pwe, “Rhooapwut mwuuun, niugiuniug ngaeniaei, eyor eew oat ina epwe noa itto nge aeremas resoapw maeipin ngaeni no minna Semaei me wooan rhug eei aere noan Jerusalem.

²² Aaemi re Samaria oawse giuneei iyo mwu oawgaen maeipin ngaeni; nge aemaem re Jews aeigiuneei mane aeigaen maeipin ngaeni, pwe iga menaw na esooar ssiaaenin ina e itto me reer re Jews.

²³ Nge oatona epwe itto ina a fasiun no igeei, reen minna maemaewaen Espritu Santus nge aeremas repwene maeipin ngaeni Deus, nge repwene feeori maeipin kkena e wenewen ina e tipaeni.

²⁴ Deus ina ngeon, maemaewaen minne epwe mmwen pwe aeremas repwe maeipin ngaeni nge ina epwe noa reen Deus noan minna e wenewen.”

²⁵ Rhooapwut we a iura pwe, “Ngaang igiuneei pwe Kristus epwe itto, oatona epwe itto, epwe aengaenigemaem oanongaen aegiaeg.”

²⁶ Jesus a paniuwaeni, “Ngaang iiy minne i mwaenieniy ngaenius.”

²⁷ Oatonaan nge rhoaan kkayeo kkewe naiun Jesus ra sefaaen, nge iir ra igma riu pwe e mwaenieniy ngaeni erhai rhooapwut. Nge esooar erhai neeir ne e aeiineow rhooapwut we, “Meeta wo tipaeni?” aere aeiyegiy Jesus pwe, “Meeta wo mwaenieniy ngaeni rhooapwut na reen?”

²⁸ Rhooapwut we a nigit i ruumen rhan we aan, nge a sefaaen noa nee aepinoamw, nge a aengaeniir aeremas kkewe ee pwe,

²⁹ “Oawitto pipiiy mwaaen ee e aengaeniaei oanongaen meeta kkewe i feoffeeori. Oaw maengiy nge iiy minne Kristus?”

³⁰ Iwe ra nigit aepinoamw we nge ra noa reen Jesus.

³¹ Noan oatonaan nge rhoaan kkayeо kkewe re iyaeffaenipirhe ngaeni Jesus pwe, “Sinsei, angi egifet meeta!”

³² Jesus a paniwaeni pwe, “Ngaang eyor aenaei mwongo ina aaemi oawse giuneei mmwenen.”

³³ Rhooan kkayeо kkewe ra aeiye fengaen wooar, “Eyor mwo mane e pweipwog to mwongo reen?”

³⁴ Jesus a aengaeniir pwe, “Mwongo na aenaei ina ipwe tapwee tipaen manna efangeto ngaang, pwe ipwe oamoanna noa engaang na e ngaenneaei pwe ipwe feeori.

³⁵ Eyor eew mwaeniaemi iwe oawgaen iura pwe, ‘Faawu rhag meram nge a oaton gin.’ Nge ipwe aengaenigaemi, oaw pipiiy gacchiuw maat kaan; foat kaan ikka a maaw pwe sipwene giniiy!

³⁶ Iyo na a giniiy uwaen foat kaan ina a pwigi paniwaen nge a ion fengaenniy uwaen foat kaan pwe aegin menaw na esooar ssiaaenin; iwe iyo we efoat me iyo we egin nge repwe kker fengaen.

³⁷ Pwe ennetaen kkepas we regaen iura pwe, ‘Erhai epwe foat nge erhai a giniiy uwaan.’

³⁸ Iya fangenoa aaemi pwe oawpwe noa giniiy uwaen foat kena soapw foatogoyaemi; aaemweoi minne re engaang ee, nge aaemi oawwa pwigi wenepwuwaen aar engaang.”

³⁹ Re towunap re Samaria kkewe reno noan aepinoamw we ra niugiuniug ngaeni Jesus pwe igiwe rhooopwut we e aengaeniir pwe, “Eaengaeniaei oanongaen minikkewe iya moannon feoffeeori.”

⁴⁰ Iwe re Samaria kkewe ra itto reen iwe ra aeffaenipirhee pwe epwe notiw reer, iwe Jesus a notiw reer noan riiuraan.

⁴¹ Repwan towunap rhoookka re niugiuniug pwonno reen miniwe mwae-nian,

⁴² ra aengaeni rhooopwut we pwe, “Aeiya niugiuniug igin, nge saapw igiwe wo aengaenigemaem, pwe iga aemaem wooan oanongaemmaem aeiya rongorong mwaenian, iwe aeiya giuneei pwe iiy miniwe rhoaan aemenewa faeinaengiy.”

Jesus a Aecchipwa Erhai Aetemwaaen

⁴³ Mwirin aan no aegini riiuraan igiwe, nge Jesus a nigit iwe a noa Galilee.

⁴⁴ Pwe iiy wooan oanongan miniwe eiura pwe, “Profeta nge esooar ae-sirowuur me noan sipegin faniuweer.”

⁴⁵ Oatowe enoa toori Galilee, aeremas ra itto aewenimmwa, pwe igiwe renoa tapwee gupwunon *Passover* me Jerusalem, nge ra weri oanongaen minikkewe efeori me reen gupwun we.

⁴⁶ Iwe Jesus a sefaaen noa Cana me noan Galilee, pwiuneoi we efeori rhaan pwe *wine*. Erhai aeremesaen aam eno ee nge mwaaen na naiun nge e semwaai me noan Capernaum.

⁴⁷ Igiwe e rongorong pwe Jesus a itto me Judea pwe epwene noa Galilee, a noa reen nge a aengaeni pwe epwe noa mwo Capernaum pwe epwe noa aecchipwa aetena naiun, pwe epwene oaropaen mae.

⁴⁸ Jesus a aengaeni pwe, “Essoar faaen eew ne erhai me neeimi epwe niugiuniug pwe aeggaen igin rhag eweri kkeman me min ariuriu.”

⁴⁹ Aeremesaen aam we a iura pwe, “Menap, itto tapweaei weni mmwaen aetena naeyi epwe mae noa.”

⁵⁰ Jesus a aengaeni pwe, “Wonoa, aetena noawumw epwene menaw!”

Mwaaen we a niugiuniug ngaeni miniwe mwaeniaen Jesus iwe a noa.

⁵¹ A faaeraeg noa nge a noa rhuungiir *slave* kkewe nge ra aengaeni pwe, “Aetewe noawumw epwe menaw!”

⁵² A aeiineor fitowu konook minne aetewe naiun etakketae. Iwe nge iir ra paniuwaeni pwe, “Epwe eew konook nee oanowesaen naeneew pwe iwe esa pwerhikkar no ginin.”

⁵³ Iwe rhag nge miniwe semaen aetewe a maengiy noa pwe ina oatowe Jesus a aengaeni pwe, “Aetewe noawumw epwe menaw.” Iwe iiy me oanongeer rhoaan famini we aan ra niugiuniug ngaeni.

⁵⁴ A iiei minne oaruwowwaen kkeman Jesus a feeori weni mwirin aan itto me Judea ngaeni Galilee.

5

Jesus a Aecchipwatae Erhai Mwaaen me Reen Eew Rhaan

¹ Mwirin minnee nge Jesus a noa Jerusalem pwe epwe noa tapweei gupwunon eew pwoong kkewe aar re Jew.

² Oaron eew rhan kken eaerepa minna aesemaen Jerusalem itan *Sheep Gate* ina nimowu pwerantaan; nge noan kkepesaen Hebrew nge Bethzatha.

³ Etowunap rhooa semwaai rewon faaen pweranta kkewe—rhooa parh, rhooa pirhemae, me rhooa maemerhoar. [Re wewweti rhan we pwe epwe mwagiutiugiut,

⁴ pwe faaen aekkaew nge angkenusun Soamwoon e ittiw noan rhan we iwe a gupeti. Nge iyo na egommwaen toonong noan rhan we weni mwirin aan gupetaeg, nge esaer noa ese tiwegin semwaai ne e aeni.]*

⁵ Erhai mwaaen eno ee a eniig me wanuuw raeg aan semwaai.

⁶ Jesus a weri pwe ewon noa rhag igiwe, nge e giuneei pwe a ssiunaei aan semwaai; iwe a aeiineow pwe, “Wo mwerhaen wopwe takketae?”

⁷ Mwaaen we a iura pwe, “Menap, ngaang esooar mane epwe iseniaei nong noan rhan mwuun igine a mwagiutiugiut; i aetemaegin pwe ipwe toonong nge erhai eitto gommw noa me mmwaei.”

⁸ Jesus a aengaeni pwe, “Rhimwitae wa pwigi minimwu giemw nge wa faaeraeg noa.”

⁹ Oatowe rhag nge etakk noa mwaaen we; nge epwigi rhag miniwe gien nge a faaeraeg noa faan.

Minnee nge ewen wooan Sabbath,

¹⁰ iwe soamwooniir Jews kkewe ra aengaeni mwaaen we a takk noa pwe, “Sabbath minnee, ese gacch ngaeni aarh Oasoapwosoapw pwe wopwe pweipwog fetaen giemw.”

¹¹ Mwaaen we a paniuwaeni pwe, “Mwaaen we e aecchipwaeyaei tae e aengaeniaei pwe ipwe pwigi minne gie iya faaeraeg noa.”

¹² Ra aeiineow pwe, “Iyo mwaaen na e aengaeniug pwe wopwe feeori minna?”

¹³ Nge mwaaen we a takketae ese giuneei aere iyo we e aecchipwatae, pwe igiwe re igin towunap aeremas igiwe, iwe Jesus a yo noa.

* ^{5:4} Petenan eei nge e soano noan aekkaew petenan kka e foatofoat noan kkepesaen Greek.

¹⁴ Enoa mwirin minneei nge Jesus a noa rhuungi mwaaen we me noan *Temple* we nge a aengaeni pwe, “Wa weri pwe wa takk igma; wosoapw oamonofit no, wopwe ina rhag nge eew min aenneew epwe wen ngaeniug.”

¹⁵ Mwaaen we a noa aengaenir rhooawe soamwooniir Jews pwe Jesus miniwe e aecchipwatae.

¹⁶ Iwe a rhaepetae aar aewwaeiraesi Jesus pwe igiwe e aecchipwaar tae rhooa semwaai wooan Sabbath.

¹⁷ Jesus a paniuwaenir pwe, “Mwaaen na Semaei ina e engaang ffoarh noa rhag, iwe nge ngaang ipwan engaang.”

¹⁸ Egius mwo nge rhooawe soamwooniir Jews ra gin mwerhaen pwe repwe niyy reen miniwe mwaenian; a fasiun fereei miniwe oasoapwosoapwon Sabbath, nge a pwan iura pwe Deus nge Seman taeppei nge a aeffitaegiy ngaeni pwe iiy Deus.

Maemaewen Mwaaen we Naiun

¹⁹ Iwe Jesus a paniuwaenir, “Ennetaeen, ipwe aengaenigaemi minna wenewenen: esooar minne mwaaen na Naiun epwe mmwenen feeori rhag wooan oanongan; efeeori rhag minikkena eweri pwe mwaaen na Seman efeeori. Minikkena mwaaen we Seman efeeori nge ina minikkeei na mwaaen we Naiun epwe pwan feeori.

²⁰ Pwe mwaaen we Seman nge e aerhaengi mwaaen we Naiun nge e pwaeri ngaeni oanongaen meeta kkewe iiy efeeori. Epwe pwaeri ngaeni mwo nge minikkena etemoag saengi me mmwaen ieei, iwe aaemi oawpwe mwaar reen.

²¹ Pwan taeppen rhag iga mwaaen we Seman e aemenewaar tae rhooa mae, epwan ina rhag mwaaen na Naiun epwe fang menaw ngaenir rhooakkena etipaenir.

²² Nge mwaaen we Seman nge esoapw pwan apwiungiu mwo nge erhai aeremas. A fang ngaeni mwaaen na Naiun oanongaen maemaewan pwe epwe apwiungiiur aeremas,

²³ iwe ina nge oanongeer aeremas nge repwe aesirowu minna Naiun, taeppen rhag aar aesirowu minna Seman. Iyo na ese aesirowu minna Naiun nge ina ese aesirowu minna Seman ina efangeto iiy.

²⁴ “Ennetaeen, ipwe aengaenigaemi minna wenewenen: iyo kena re rongorong ngaeni minikkena mwaeniaei nge re niugiuniug ngaeni iiy iyo na efangeto ngaang nge repwe menaw foarhofoarh. Iir resoapw apwiung, pwe ra fasiun nigiti mae ra noa ngaeni menaw.

²⁵ Ennetaeen, ipwe aengaenigaemi minna wenewenen: oatowe ina a itto, a fasiun no igeei, nge rhooa mae repwene rongorong minna mwaenian minna Naiun Deus, nge rhooakkena re rongorong repwe menaw sefaaen.

²⁶ Taeppen rhag iga mwaaen na Seman rhaepin menaw, taeppen rhag minneei a pwan feeori minna Naiun pwe rhaepin menaw.

²⁷ Nge a fasiun ngaennee minna Naiun maemaewan pwe epwe apwiung, pwe iga iiy minne Naiun Aeremas.

²⁸ Oawsoapw riu reen minneei, pwe a itto oatowe oanongeer manimae nge repwene rongorong mwaenian,

²⁹ nge ra maegegow me noan paeyieer: rhooa feoffeelor mwamwaaai repwene menaw tae, nge rhooa feoffeelor aenneew ra noa apwiung.

Rhoowan Pwaeritae Jesus

³⁰ “Saapw tipaei rhag iya feeori minikkeei; Ngaang i apwiungiiur rhag kka Deus e aengaeniaei, iwe aaei apwiung ina e wenewen, pwe iga ngaang ise feeori minna i tipaeni pwe ifeeori minna tipaeniaen iyo na efangeto ngaang.

³¹ “Aere igine ngaang ipwaeritae kkepesaei, ina nge repwe iura pwe minikka mwaeniaei nge ese nnet.

³² Iwe nge eyor erhai ina epwe mmwenen aepesa kkepesaei, nge ngaang i giuneei pwe minna e aepesa reen minna mmwenei nge ina ennet.

³³ John miniwe oawfang pwe rhooan pweipwogin kkepas, nge iiy e aepesa minna e wenewen.

³⁴ Saapw menaen epwe yor naeyi aeremas rhooan pwaeritae; iaepesa rhag minneei pwe aaemi oawpwe menaw.

³⁵ John iwe eweei rhag eew oappwun, iwe eppwun nge e seram, nge aaemi nge noan eew oat nge oawkker pwe oawpwe no noan sereman.

³⁶ Iwe nge ngaang eno erhai naeyi rhooan pwaeritae ina etaegias saengi mwo nge John: minikka ifeeori, me minikka mwaaen na Semaei engoatto pwe ipwe feeori, oanongaen minikkeei nge e aepesa mmwenei pwe mwaaen na Semaei minne efangeto ngaang.

³⁷ Mwaaen na Semaei ina efangeto ngaang, iiy epwan pwaeritae kkepe-saei. Esaaen yor mwo aaemi rongorong mwaenian me weri mesan,

³⁸ aaemi oawse iseni minna mwaenian noan tipaemi, pwe aaemi oawse niugiuniug ngaeni iyo na iiy efangeto.

³⁹ Aaemi oawaeraegi Pwapwior we e Santus, pwe oawniuwaenner pwe oawpwe weri menaw na esooar ssiaaenin me ee. Nge iiy Pwapwior kka e santus ina re aepesa kkepesaei!

⁴⁰ Nge inamwo oawse mwerhaen pwe oawpwe itto reei pwe oawpwe menaw foarhofoarh.

⁴¹ “Ngaang ise giutteon aeremas repwe oassoaraeyaei.

⁴² Pwe ngaang i giuneei wunuunumi, pwe esooar ffayeon Deus me noan pwunnomi.

⁴³ Ngaang itto faaen itaen minna Semaei, nge aaemi oawse aetiwaeyaei; iwe ngaere aekkaerhai re itto faaen iteer nge aaemi oawpwe aetiwaar.

⁴⁴ Oawtipaeni pwe oawpwe gaen oassoara fengaennigaemi rhag, oawse giutta minne epwe yor ssoaromi me reen ina iiy noa rhag minne Deus; epwe ifa wusun rhag nge oawwa niugiuniug ngaeniaei?

⁴⁵ Oawsoapw niuwaenner pwe ngaang minne ipwe oamonofitigaemi reen mwaaen na Semaei. Pwe Moses iwe oawgaen aeni aepiniugiuniug iiy minne epwe oamonofitigaemi.

⁴⁶ Pwe ngaere igine oaw niugiuniug ngaeni Moses, nge oawpwe niugiuniug ngaeniaei, pwe igiwe iiy e foatogi minna wunuunuy.

⁴⁷ Pwonno igiwe oawse niugiuniug ngaeni miniwe e foatogi, nge epwe ifa wusun aaemi niugiuniug ngaeni mwaeniaei?”

6

Jesus e Oamwongoor Nimingeras Aeremas (Mat 14.13-21; Mark 6.30-44; Luke 9.10-17)

¹ Weni mwirin minneei nge Jesus a noa noan meoneoiniuniun Galilee (aere meoneoiniuniun Tiberias).

² Eew pwuwaen aeremas e tettapwei, pwe igiwe ra weri kkeman kkewe efeefeeori reen aan aecchipwaar rhooa semwaai.

³ Jesus a ittae wooan eew rhug a ittae mooat tiw reer rhooan kkayeо kkewe naiun.

⁴ Oatowe oaton gupwunon Passover a arapeto.

⁵ Jesus efaaen fetaen nge a weri eew pwuwaen aeremas pwe ra feffaaeraeg to reen, iwe a aeiineow Philip pwe, “Iya iga sipwe mmwenen chuwaai mwongo me ee, pwe aeremas kaan repwe mwongo?” (

⁶ Eaepesa minneei pwe epwe soatoni Philip; iwe nge minna iiy ina a fasiun giuneei minne epwe feeori.)

⁷ Philip a iura pwe, “Inamwo igine epwe paer saengi riiwapwiugiuw faun *silver* eyor nge esoapw pwan toaw paniuwaenin fenoawa pwe erhai nge e angi egius.”

⁸ Andrew pwan erhai rhooan kkayeо kkewe naiun, iwe pwiiin Simon Peter, a iura pwe,

⁹ “Erhai aet iye eno niffai fenoawa *barley* me riiurhai iig reen. Iwe nge esoapw toaw mwo nge wooar rhooanap eei.”

¹⁰ Jesus a aengaenir pwe, “Aengaenir oanongeer aeremas pwe repwe mooat tiw.” (Egin ssow fetin igiwe.) Iwe nge oanongeer aeremas ra mooat tiw; akkarap nimingeras nepeer mwaaen kkewe.

¹¹ Jesus a pwigi fenoawa we, a fang ngaeni Deus aan aerhigerhig, a inetiwooar aeremas kkewe remooat. Pwan ina miniwe efeeori ngaeni iig we, iwe aeremas ra mwongo nepaen minne re tipaeni.

¹² Igiwe ra mat noa, a aengaenir rhooan kkayeо kkewe naiun pwe, “Oawpwigi oanongaen nuseg, sisoapw oasonopa mwo nge egiufet.”

¹³ Iwe ra pwigi nusegin fenoawa *barley* kkewe, ngoannong noan seig me ruwowu rhiug.

¹⁴ Igiwe ra weri kkeman we Jesus efeeori, rhooa kkewe ra iura pwe, “Ennetaan pwe iiei iiy profeta we epwe itto noan faeinaengiy!”

¹⁵ Jesus a giuneei pwe repwene torofi pwe repwe feeori noa pwe *king*, iwe iiy rhag a pwan noa neeiin taeit kkewe.

Jesus e Faaeraeg Noa Weei Saaet (Mat 14.22-33; Mark 6.45-52)

¹⁶ Enoa neeoatofaaef rhooan kkayeо kkewe naiun Jesus ra maegetiw ngaerhen meoneoiniun we,

¹⁷ ra teeotae rhiun efoarh pwoot ra seraeg noa noan meoneoiniun we pwe repwe noa ngaeni Capernaum. Enoa pwoong noa, nge Jesus esaaen tooto mwo reer.

¹⁸ Enoa oatonaan nge a kekkaein noa rhag aaeng nge a iutae mesaei saaet.

¹⁹ Igiwe epwe enuuw aere faawu *miles* aar rhooan kkayeо kkewe fatiun, nge ra weri aaen Jesus faaeraegto weeisaaet, enoa arap ngaeni pwoot we nge ra mesag.

²⁰ Jesus a aengaenir pwe, “Oawsoapw mesag pwe iye ngaang!”

²¹ Nge reateetae rhiun pwoot we, nge ese mmwaei mwo nge ra toori faniuw igiwe re nennoa ngaeni ee.

Aeremas ra Giutta Jesus

²² Mmasetaen iwe eraaen, pwuwaen aeremas we eno peig we epeig ra giuneei pwe efoarh rhag pwoot eno igiwe. Ra giuneei pwe Jesus ese tapweer rhooan kkayeо kkewe naiun, pwe iir rhag miniwe renoa.

²³ Aekkaew pwoot saengi Tiberias re tooto pwiuneoi we pwuwaen aeremas we re mwongo fenoawa me ee, mwirin aaen Soamwoon fang aerhigerhig.

²⁴ Igiwe pwuwaen aeremas we enoa weri pwe Jesus esoanono igiwe, fengaen me rhooa kkayeо kkewe naiun, ra teeotae rhiun pwoot kkewe iwe ra noa Capernaum, ra noa giutta fetaenee.

Jesus Minne Fenoawaen Menaw

²⁵ Igiwe aeremas kkewe ra weri Jesus me reen peigin meoneoiniun we, ra aengaenir pwe, “Sinsei, ineeta minne wo tooto igeei?”

²⁶ Jesus a paniwaeniir pwe, “Ennetaeen, ipwe aengaenigaemi minna wenewenen: oawgiuttayaei pwe iga oawwa mat noa pwe oawwa mwongo fenoawa, nge soapw reen aaemi metaf reen kkeman kkewe ifeeori.

²⁷ Oawsoapw engaang ngaeni mwongo kkena epwe mmwenen aenneew noa; nge oawpwe faer engaang ngaeni mwongo kkena epwe noa ffoarh ngaeni minna menaw na esooar ssiaaenin. Ieen mwongo e mwaaen na Naiun Aeremas epwe ngaennegaemi, pwe iga Deus, ina Seman, a aeffeta noa pwe a fini pwe iga efin tipaen reen.”

²⁸ Iwe ra aeineow pwe, “Iwe meeta minne aeipwe feeori nge a mmwen aeipwe feeori minikkena Deus e tipaeni?”

²⁹ Jesus a paniwaeni pwe, “Minna Deus e tipaeni pwe oawpwe feeori, ina oawpwe niugiuniug ngaeni manna efangeto.”

³⁰ Ra iura pwe, “Meeta kkeman kena wopwe feeori pwe aeipwe weri nge aeipwe niugiuniug ngaeniug? Meeta minne wopwe feeori?

³¹ Rhaepeto kkewe aemaem remwommwongo *manna* me noan *desert*, taeppen rhag miniwe Pwapwior we e Santus eiura pwe, ‘A ngaenner fenoawa ittiw me naaeng pwe repwe mwongo.’”

³² Jesus a iura pwe, “Ennetaeen, ipwe aengaenigaemi minna wenewenen: miniwe we Moses engaennegaemi nge saapw fenoawa ittiw me naaeng; manna Semaei minne efang ngaenigaemi minna oanongonni-uwaen fenoawa ittiw me naaeng.

³³ Pwe fenoawa we Deus efang, ina iiy iyo we e ittiw me naaeng ina a aemenewa faeinaengiy.”

³⁴ Iir ra aengaeni pwe, “Menap, ngaennegemaem fenoawa eei oanongaen oat.”

³⁵ Jesus a aengaeniir pwe, “Ngaang minne fenoawaen menaw. Rhooakka re itto reei resoapw rhiuwen pecchai no; nge rhooakka re niugiuniug ngae-niaezi resoapw moar no.

³⁶ Iwe iaengaenigaemi pwe oawwa weriae nge oawse niugiuniug.

³⁷ Rhooakkena mwaaen na Semaei engaenneaei, repwe itto reei. Esooar faaen eew ipwe toagun saengi manna e itto reei,

³⁸ pwe ise ittiw me naaeng pwe ipwe ittiw feeori minna aaei mwerhaen, pwe ipwe feeori aaen mwerhaen manna efangeto ngaang.

³⁹ Aaen mwerhaen manna efangeto ngaang ina esoapw ppiung saengiae mwo nge erhai me neeiir rhooawe engaenneaei, pwe ipwe faer aeme-newaar tae oanongeer wooan minna oarosaen raaen.

⁴⁰ Pwe mwaaen na Semaei ina emwerhaen pwe oanongeer aeremas kena reweri minna Naiun nge re niugiuniug ngaeni iwe nge repwe menaw foarhofoarh. Nge ipwe aemenewaar tae wooan minna oarosaen raaen.”

⁴¹ A rhaepetae aar aeremas ngiuniungiuniuw pwe igiwe eiura pwe, “Ngaang fenoawa we e ittiw me naaeng.”

⁴² Nge ra iura pwe, “Ieen iiy mwaaen we naiun Joseph, aere? Sigiuneei seman me inan. Nge ifa wusun nge eiura pwe e ittiw me naaeng?”

⁴³ Jesus a paniwaeniir, “Oawsoapw ngiuniungiun rhag woami.

⁴⁴ Esooar ne epwe mmwenen itto reei pwe aeggaen igine rhag mwaaen na Semaei ina efang to ngaang minne epwigiir to reei; iwe nge ipwe aemenewaar tae wooan minna oarosaen raaen.

⁴⁵ Profeta kkewe re foatogi pwe, ‘Oanongeer aeremas nge Deus epwe aerrepiaar.’ Oanongeer rhooai rongorong ngaeni Semaei nge rereepiy me reen, nge re itto reei.

⁴⁶ Ise iura pwe oanongeer aeremas nge reweri minna Semaei; pwe iyo na e itto me reen Deus ina rhag aeremas na a fasiun weri manna Semaei.

⁴⁷ Ennetauen, ipwe aengaenigaemi minna wenewenen: iyo na e niugiuniug, ina epwe menaw foarhofoarh.

⁴⁸ Ngaang minne fenoawaen menaw.

⁴⁹ Rhooa kkewe rhaepetomi re mwongo *manna* me noan *desert*, nge remae noa.

⁵⁰ Iwe nge fenoawa na e ittiw me naaeng ina ese tiwegin ne e mwongo nge esoapw mae.

⁵¹ Ngaang minne fenoawa na e ittiw me naaeng. Aere oawangi fenoawa een, nge oawpwe toori menaw na esooar ssiauenin. Fenoawa e ipwe ngaennegaemi ina fitigoi, ina epwe fang pwe faeinaengiy epwe menaw.”

⁵² Iwe rhag re Jew kkewe erhaepetae aar aengimaaw fengaen. Ra aeiineow pwe, “Epwe ifa wusun aan ngaennegirh fitigon pwe sipwe mwongo?”

⁵³ Jesus a aengaenir pwe, “Ennetauen, ipwe aengaenigaemi minna wenewenen: aere oawse angi minna fitigon mwaaen we Naiun Aeremas nge oaw iun me reen cchaan, nge esoapw yor menewaemi.

⁵⁴ Iyo kena re mwongo fitigoi nge re iun cchaei, nge repwe menaw foarhofoarh, ipwe aemenewaar tae wooan minna oarosaen raaen.

⁵⁵ Pwe minne fitigoi ina oanongonniuwaen mwongo, iwe nge minne cchaei ina oanongonniuwaen menaen iun.

⁵⁶ Iyo kena re mwongo minna fitigoi nge re iun me reen minna cchaei nge iir reno noan ngaang nge ngaang ino noan iir.

⁵⁷ Saam na emenaw efango nge ngaang, iwe ngaang ipwan menaw pwe aegin iiy. Epwe pwan ina rhag pwe iyo kena re angi fitigoi repwe pwan menaw pwe aegin nge ngaang.

⁵⁸ Iwe ieen iiy fenoawa we e ittiw me naaeng; ese weei taeppen iiy fenoawa we rhaepeto kkewe aaemi re mwongo nge faeiyegius noa nge remae noa. Nge iyo kena re mwongo fenoawa een nge repwe menaw noa rhag.”

⁵⁹ Jesus e aepesa minikkeei igiwe e fenai noan wutt we wutteer Jews me Capernaum.

Kkepesaen Menaw na Esooar Ssiauenin

⁶⁰ Towunepeer rhooa kkewe rhoaniuwaar re rongorong minneei nge ra iura pwe, “Eigin waeiraes aerrepiei. Iyo na epwe mmwenen aiussaening ngaeni?”

⁶¹ Rese aengaeni nge Jesus e giuneei miniwe re ngiuniungiuniuw, iwe a aengaenir pwe, “Minne ifeeori a aetippaegaemi ina oawwa nigit noa aaemi niugiuniug?

⁶² Ngaere pwetae oawweri mwaaen we Naiun Aeremas aan sefaaen tae reen pwiuneoi we e fasiun no ee?

⁶³ Espritu na aaen Deus minne efang menaw; esooar ipitaen minne maemaewaen aeremas. Pwe kkepas kka iya ngaennegaemi nge kkepesaen Ngeon me menaw.

⁶⁴ Nge ina rhag aaemweoi aaemi oawse giuneei.” (Saengirhag rhaepetaen nge Jesus e giuneei iyo kena rese niugiuniug, me iyo na epwe fangenoa tinnimaen.)

⁶⁵ Jesus a iura pwe, “Ieei faaen iiy miniwe iaengaenigaemi pwe esooar aeremas kka repwe mmwenen itto reei pwe igine rhag mwaaen na Semaei efeefori pwe epwe mmwen pwe repwe itto.”

⁶⁶ Iwe aegin minneei, retowunap rhooa kkewe rhoaniuwaen Jesus ra sefaaen resa mwerhaen tapwee noano.

⁶⁷ Iwe a aeiineor rhooan kkayeo kkewe seig me riiurhai, “Iwe nge aaemi, oawpwan mwerhaen noa?”

⁶⁸ Simon Peter a paniuwaeni, “Soamwoon, nge iyo aeipwene noa reen? Eno reemw kkepas na efang menaw na esooar ssiaaenin.

⁶⁹ Iwe igina aei niugiuniug nge aeiguneei pwe een miniwe wo santus iwe wo itto me reen Deus.”

⁷⁰ Jesus a iura pwe, “Ngaang miniwe i finigaemi tae seig me riiurhai, aere saapw ngaang? Nge ina rhag ina erhai me neeimi nge mwuniaan!”

⁷¹ A aepesa kkepesaen Judas, iwe naiun Simon Iscariot. Pwe Judas, inamwo igiwe iiy erhai rhooawe seig me riiurhai, nge epwene fangenoa tinnimaen Jesus.

7

Jesus me Mwaaen Kkewe Pwiin

¹ Mwirin minnee nge Jesus a no fetaen rhag noan Galilee; ese tipaeni pwe epwe noa fetaen noan Judea pwe igiwe soamwooniir Jews ra mwerhaen repwe niiy noa.

² Oaton Gupwunon Penaes a arapeto,

³ iwe mwaaen kkewe pwiin Jesus ra aengaeni pwe, “Wone nigit igee pwe wopwene noa Judea, pwe rhoakka rhoaniuwoamw repwe weri minikka wa feeori.

⁴ Aeremas rese oapa minikka repwe feeori igine re tipaeni pwe repwe pwae noa, nge iga wa feoffeori minikkei, pwaeri ngaeni faeinaengiy pwe repwe giuneog!” (

⁵ Mwaaen kkewe mwo pwiin nge rese niugiuniug ngaeni.)

⁶ Jesus a aengaeniir pwe, “Esaaen oato mwamwaaun pwe ipwe noa. Aaemi ese tiwegian eew oat nge efin ngaenigaemi.

⁷ Faeinaengiy ese mmwen epwe oapwutaegaemi, nge ngaang e oapwutaeyaei, pwe iga ngaang iaengaeni rhag pwe minikka feoffeoriir iga e aenneew.

⁸ Oawnoa aaemi oawpwe noa tapwee iupwun na. Ngaang isoapw noa tapwee iupwun na pwe esaaen itto mwo minna oatoi.”

⁹ Eaengaeniir minnee iwe a notiw noan Galilee.

Jesus a Noa Tapwee Gupwunon Penaes we

¹⁰ Mwirin aar mwaaen kkewe pwiin noa tapwee iupwun we iwe nge Jesus a pwan noa; ese pwaeri noa aan noa, pwe eyopo noa rhag.

¹¹ Rhooa kkewe soamwooniir Jews ra giutta fetaenee rhag me faaen iupwun we. Ra aeiineow pwe, “Ifa iiy wonowe?”

¹² Ra igin towunap rhooan mwangiuniungiun me noan pwuwa we. Aaemweoi ra iura pwe, “Erhai aeremas gacch.” Nge aekkaaemweoi re iura pwe, “Aapw, pwe e oatupwutupw aeremas.”

¹³ Aeremas rese fioangei fetaenee pwe re mesagiir soamwooniir Jews.

¹⁴ A nugunupan noa aan epwene moann iupwun we nge Jesus a noa noan Temple we iwe a noa rhaepiy tae aan fenai.

¹⁵ Rhooa kkewe soamwooniir Jews ra igin riutae ra iura pwe, “E ifa wusun nge mwaaenee nge e giuneei minikkei nge esooar aan suguun?”

¹⁶ Jesus a paniuwaeniir pwe, “Minikka ifenaiuw nge saapw aaei fenai pwe e itto me reen Deus, iwe efangeto ngaang.

¹⁷ Iyo na e mwerhaen epwe feeori minna tipaen Deus nge epwe giuneei pwe aere minikka ifenaiuw nge e itto me reen Deus, ngaere ngaang iya aepesa wow mwaeniaei wooan oanongaei.

¹⁸ Iyo kka iir re aepesa wow mwaenieer wooan oanongeer nge iir re giutta rhag ssoaron iteer. Nge iyo na e mwerhaen giutta ssoaron iyo na efangeto iiy ina e wenewen, esooar eew min oatuputupw reen.

¹⁹ Moses e ngaennegaemi anniug we, ngaere? Nge esooar erhai me neeimi ne e tapweei. Nge meeta oawwa mwerhaen pwe oawpwe niae noa reen?"

²⁰ Nge pwuwa we a paniuwaeni pwe, "Eyor mwuniaan woamw. Iyo na e mwerhaen epwe niug noa?"

²¹ Jesus a paniuwaenir pwe, "Ifeeori eew kkeman nge oanongaemi nge oawwa maegin riutae reen."

²² Moses a akkiuneogaemi pwe oawpwe *circumcise* aegini naimi aetemwaaen (nge iwe saapw Moses pwe rhooawe rhaepetomi miniwe rerhaepiy tae), iwe oawwa *circumcise* aegini erhai aetemwaaen wooan Sabbath.

²³ Ngaere re *circumcise* aegini erhai aetemwaaen wooan Sabbath pwe minni ete feree anniug we aaen Moses, nge meeta oawwa soong wooai iga iaecchipwatae erhai aeremas wooan Sabbath reen?

²⁴ Oawsoapw apwiung aeremas reen meeta na oawweri, pwe oawpwe apwiung reen minna e wenewen."

Iiy Minne Kristus?

²⁵ Aaemweoi re Jerusalem ra iura pwe, "Saapw ieen mwaaen we soamwoon kkewe re mwerhaen repwe niiy noa?

²⁶ Pipiiy! A kkepas neeiir rhoanap, nge esooar meeta minne re iura reen! Meeta, re giuneei pwe iiy Kristus?

²⁷ Nge aere Kristus enoa itto, esooar erhai ne epwe giuneei aere iiy aeremesaen iya. Nge oanongarh nge sigiuneei iya iga mwaaen een e itto me ee."

²⁸ Iwe Jesus a feffenai noan *Temple* we, a kkepas temoag tae nge a iura pwe, "Oawoanonganuiwaen giuneei me iga iit me ee? Saapw ngaang minne tipaei pwe ipwe itto. Nge iiy iyo na efangeto ngaang ina e wenewen. Aaemi oawse giuneei,

²⁹ nge ngaang i giuneei, pwe iga itto me reen nge iiy efangeto ngaang."

³⁰ Iwe rhooawe ra menaen repwe torofi, nge esooar mane e anngaeni, pwe igiwe esaaen gona mwo oaton.

³¹ Nge towunepeer rhooawe re niugiuniug ngaeni me noan pwuwa we ra iura pwe, "Oatona epwe itto Kristus, epwe ssow kkeman kka epwe feeori me mmwaen mwaaen een?"

Poos ra Noa Repwe Torofi Jesus

³² Pharisees reno noan pwuwa we ra rongorong aar aeremas ngiuniungiuniw kkepesaen Jesus, iwe iir me soamwooniir patere kkewe ra fangenoa aaemweoi poos repwe noa torofi.

³³ Jesus a iura pwe, "Ipwene no egius rhag reemi, nge iya noa reen iyo we efangeto ngaang.

³⁴ Oawpwe giuttayaei nge oawsoapw rhoungiae, pwe aaemi oawsoapw mmwenen noa iga ipwe noa ee."

³⁵ Rhooa kkewe soamwooniir Jews ra aeiineo fengaen wooar, "Iya iga epwe noa ee nge sisoapw mmwenen weri? Epwene noa wooan eew aepinoamwon Greece igiwe aeremas kkewe naiurh reno ee, iwe a noa fenaiuw ngaenir re Greeks?"

³⁶ Nge eiura pwe sipwe noa giutta nge sisoapw rhoungi, nge sisoapw mmwenen noa iga epwe no ee. Meeta faan minna eiura?"

Rhan we Efang Menaw

³⁷ Oarosan raaenin gupwun we e igin yor ipitan, Jesus a iutae nge a kkepas temoag tae, “Iyo ne a moar epwe itto reei,

³⁸ iwe nge iyo ne e niugiuniug ngaeniaei epwe iun. Pwe iwe Pwapwior we e Santus e iura pwe, ‘Rhan we efang menaw epwe pwuutiw me wenepeigin.’ ”

³⁹ Jesus e kkepesaen mmwenen Espritu, pwe aeremas kka ra niugiuniug ngaeni nge repwene pwigi. Noan oatonaan nge Espritu esaaen fang mwo pwe iga Jesus esaaen toonong mwo noan minna nningin.

Aeiyaegin Nee Finaen Aeremas

⁴⁰ Aaemweoi aeremas kkewe noan pwuwa we re rongorong aan aepesa miniwe nge ra iura pwe, “Mwaaeneei nge oanongaen pwe iiy Profeta we!”

⁴¹ Aaemweoi re iura pwe, “Iiy minne Kristus!”

Nge aaemweoi re iura pwe, “Kristus esoapw itto me Galilee!

⁴² Pwapwior we e Santus nge e iura pwe, ‘Kristus nge teoteeon king David nge epwe supw me Bethlehem, aepinoamw we David eno ee.’ ”

⁴³ Iwe a yor aeiyaegin neefinaen aeremas me reen pwuwa we pwonno faan ngaeni iiy Jesus.

⁴⁴ Aaemweoi ra mwerhaen torofi, nge esooar mane emmwenen angetae paiun wooan.

Soamwoonir Jews Kkewe Rese Niugiuniug

⁴⁵ Igiwe renoa sefaan poos kkewe, soamwoonir patere kkewe me Pharisees ra aeiineor pwe, “Meeta oawse pwigito reen?”

⁴⁶ Poos kkewe ra iura pwe, “Esaaen yor erhai ne eweei aaen kkepas mwaaen een!”

⁴⁷ Pharisees kkewe ra aeiineor pwe, “Aaemi mwo nge epwan oatupwugaemi?

⁴⁸ A yor mwo erhai soamwoon kaan aere Pharisees pwe re niugiuniug ngaeni?

⁴⁹ Pwuwa eei nge ese giuneei anniug kkewe aaen Moses, iwe iir ra no faaen aaen Deus aegaergaer!”

⁵⁰ Erhai Pharissee itan Nicodemus, mwaaen we a fasiun noa mwo reen Jesus. A aengaenir pwe,

⁵¹ “Noan aarh Anniug nge sisoapw mmwenen oamonofiti erhai iga sisaaen apwiungiur mwo pwe sipwe giutta meeta na efeori.”

⁵² Ra iura pwe, “Iwe, nge een erhai rhooan Galilee? Aeraegi Pwapwior we e Santus pwe wopwe giuneei pwe esooar profeta e ikkitto me Galilee.” [

⁵³ Iwe erhai nge enoa reen imwan.

8

Rhoopwut we e Feoffeeor Aenneew

¹ Iwe nge Jesus a noa wooan rhugun *Olives*.

² Nee oatosor moawugowugon raaenin we eraaen nge a noa noan *Temple* we. Ra maegeto aeremas reen, a mooat tiw pwe a fenai ngaeniir.

³ Sinsein anniug me Pharisees kkewe ra pwigito erhai rhoopwut iwe re torofi pwe emaiur ngaeni pwiuniwaen erhai, ra itto aiuw noa me wenimweer oanongeer.

⁴ Ra aengaeni Jesus pwe, “Sinsei, rhoopwut een re torofi pwe emwoarho pwiuniwan.

⁵ Noan aarh oasoapwosoapw nge Moses eiura pwe taeppen rhoopwut een nge sipwe tera pwe epwe mae. Iwe igina nge meeta een wopwe iura?”

6 Re aepesa minneei pwe repwe aegina Jesus pwe repwe oamonofityi wooan. Iwe nge iya pwoarotiwi a ittiw foatofoat fetaen wooan ppweon reen aiuttiun.

7 Reen oatowe ra iu igiwe pwe ra kkepas aeiweg ngaeni, a fattae nge a aengaeniir pwe, “Iyo erhai me neeimi ne esooar monofitin nge iiy minne epwe aerheei minna mesaemmwaen faai.”

8 A pwan pwoar sefaaen tiw a pwan ittiw foatofoat fetaen wooan ppweon.

9 Igiwe ra rongorong minneei nge a erhai me erhai neeir ra siussiu noa, rhaepetae me wooar rhooa kkewe re tugufaeyi. Iwe a noa rhag noatiw Jesus me rhooapwut we e iu.

10 A fattae nge a aengaeni pwe, “Ra maegenoa iya? Essoar erhai ne enotiw pwe epwe oamonofitiug?”

11 Rhooapwut a paniuwaeni nge a iura pwe, “Essoar menap.” Jesus a iura pwe, “Iwe ina pwan ngaang nge isoapw oamonofitiug. Wonoa nge wosoapw rhiuwen feeori no eew monofit.”]*

Jesus Minne Seremaen Faeinaengiy

12 Jesus a pwan mwaenieniy sefaaen ngaeniir Pharisees kkewe, a iura pwe, “Ngaang minne seremaen faeinaengiy. Iyo noa epwe tapweaei nge epwe no reen minna seremaen menaw, iwe nge esooar faaen eew ne epwe faaeraeg noan rorhappiung.”

13 Pharisees kkewe ra aengaeni pwe, “Meeta kkomwu wo iura igma nge kkepesaen oamw pwaeritae wunuunumw; nge minikkomwu wo iura nge ese nnet.”

14 Jesus a iura pwe, “Inamwo iga ngaang iaepesa sipegin kkepesaei, iwe nge minne iaepesa ina ewenewen, pwe iga i giuneei iga itto me ee iwe nge i giuneei iya iga ipwene noa ee. Aaemi oawse giuneei iga itto me ee aere iga ipwe noa ee.

15 Aaemi oawaeni rhag aar aeremas apwiung; nge ngaang esooar mane iapwiungiu.

16 Pwe ngaere igine ipwe apwiungiur aeremas, iwe nge ipwe apwiungiur noan wenewen, pwe iga saapw ngaang rhag minne ifeeori minneei; pwe mwaaen na Semaei ina efangeto ngaang epwan tapweaei.

17 Pwe eno noan Oasoapwosoapw we aaemi pwe ngaere riiurhai rhoaan pwaeritae eaefitaeg mwaenieer iwe ina nge minna reaepesa nge ewenewen.

18 Ngaang iaepesa mmwenei wooan oanongaei, iwe nge mwaaen na Semaei iwe efang to ngaang, epwan aepesa mmwenei.”

19 Ra aeiineow pwe, “Pwe ifa mwaaen na Semoamw?”

Jesus a iura pwe, “Aaemi oawse giuneaei iwe oawse pwan giuneei mwaaen na Semaei. Aere igine oawgiuneaei ina nge oawpwan giuneei mwaaen na Semaei.”

20 Oanongaen minikkeei nge Jesus e aepesa igiwe e fenai noan *Temple* we, noan pwiuneoi we eno kakoonaaen niffang kkewe ee. Nge esooar ne etorofi pwe igiwe esaaen itto mwo minna oaton.

Oawsoapw Mmwenen Noa Iga Ipwe Noa Ee

21 Jesus a pwan aengaeniir pwe, “Ngaang ipwene noa; oawpwe giuttayaei nge oawpwe maenoa noan aaemi monofit. Oawsoapw mmwenen noa iga ipwe noa ee.”

* **8:11** Petenan eei nge e soano noan aekkaew petenan kka e foatofoat noan kkepesaen Greek.

²² Iwe mwaaen kkewe soamwooniir Jews ra iura pwe, “Eiura pwe sisoapw mmwenen noa iga epwe noa ee. Eiura minneen pwe iiy epwe sipegin niyi noa oanongan?”

²³ Jesus a iura pwe, “Aaemi oaw itto me reen faniuw efaan, nge ngaang itto me reen ina weeinaaeng. Aaemi oawno noan faeinaengiy, nge ngaang ise itto me reen faeinaengiy.

²⁴ Ina faaen minne iaengaenigaemi pwe oawpwe maenoa noan aaemi monofit reen. Oawpwe maenoa noan aaemi monofit igine oawse niugiuniug pwe ‘Ngaang ina Ngaang’.”

²⁵ Ra aeiineow pwe, “Een iyo?”

Jesus a iura pwe, “Minewe iaengaenigaemi me rhaepetaen.

²⁶ Ngaang e igin ssow minne ipwe aepesa reen mmwenem, iwe me minne ipwe oamonofitigaemi wooan. Nge iyo na efangoeto ngaang ina e wenecchar, nge ngaang iya aengaeni faeinaengiy minikkena ngaang iya rongorong saengi.”

²⁷ Iir rese metefaaegini pwe Jesus a fioangei ngaeniir mmwenen minna Semaen.

²⁸ Iwe a aengaeniir pwe, “Oatona oawpwe aetaegiasaetae mwaaen na Naiun Aeremas, ina nge oawpwe giuneei pwe, ‘Ngaang ina Ngaang’; nge ina oawpwe giuneei pwe ngaang saapw tipaei rhag iya feeori minikkei, pwe ngaang iaepesa rhag minna mwaaen na Semaei e aengaeniaei pwe ipwe aepesa.

²⁹ Nge iyo na efangoeto ngaang ina eno reei; esaaen nigitiae i mwo; pwe iga ngaang ifeeori rhag meeta kena iiy e tipaeni.”

³⁰ Re towunap rhooa kkewe re rongorong aaeen Jesus aepesa minikkei nge ra niugiuniug ngaeni.

Wenewen Epwe Saenetigaemi

³¹ Iwe Jesus a aengaeniir Jews kkewe re niugiuniug ngaeni pwe, “Ngaere oawtapweei aaei fenai, aaemi minne oanongonniwaen naeyi rhoaan kkayeo;

³² oawpwe giuneei minna e wenewen nge minna e wenewen epwe saenetigaemi.”

³³ Ra iura pwe, “Aemaem minikka teotteeon Abraham, iwe nge esaaen yor mwo ne e pwigigemaem pwe aemaem pwe naiun rhoaan akkiuneo. Iwe meeta faaen miniwe wo iura pwe, ‘Oawpwene saenetaeg reen?’”

³⁴ Jesus a aengaeniir pwe, “Ennetae, ipwe aengaenigaemi minna wenewen: oanongeer rhoakka re monofit nge ina iiy naiun monofit rhoaan akkiuneo.

³⁵ Rhoaan akkiuneo ina esoapw mmwenen no noa pwe naiun eew famini, iwe nge aetemwaaen emmwenen no noa pwe naiun famini ne esooar iaenin.

³⁶ Aere igine mwaaen na Naiun Deus epwe saenetigaemi, iwe nge oawpwe oanongonniwaen saenetaeg.

³⁷ Ngaang i giuneei pwe aaemi nge teotteeon Abraham. Iwe nge aaemi oawwa menaen oawpwe niae noa, pwe oawse mwerhaen aetiwa minikka mwaeniaei.

³⁸ Ngaang iaepesa meeta minne mwaaen na Semaei a pwaeri ngaeniaei, nge aaemi oawfeeori minikkena manna semaemi e aengaenigaemi.”

³⁹ Ra iura pwe, “Mwaaen na semmaem nge Abraham.”

Jesus a iura pwe, “Ngaere igine oanongonniwaen aaemi naiun Abraham, ina nge oawpwe pwan feeori minikkewe iiy epwan feeori.

40 Minna rhag ngaang ifeeori ina iaengaenigaemi minna wenewenen ina irongorong me reen Deus, nge aaemi oawwa menaen oawpwe niae noa. Esooar taeppen minneei ne Abraham efeeori!

41 Aaemi oawfeeori meeta na semaemi efeeori.”

Ra paniuwaeni pwe, “Deus ina iiy rhag minne Semmaem, nge aemaem pwiungiuncheraen naiun.”

42 Jesus a aengaenir pwe, “Ngaere igine Deus minne oanongonniuwaen Semaemi, nge oawpwe aerhaengiae, pwe iga ngaang i itto me reen Deus iwe igina ngaang iya no igeei. Saapw tipaei rhag iya noa ittiw, pwe iiy minne e fangetiw ngaang.

43 Meeta oawse metefaaegini minne i iura reen? Faan ina pwe iga oawse mwerhaen rongorong ngaeni aaei fenai.

44 Aaemi naiun miniwe semaemi, iwe Saetan, oawmwerhaen tapwee minna aaen mwerhaen minna semaemi. Saengi rhag rhaepetaen nge iiy rhooan niyy menaw nge esaaen yor mwo faaen eew eno noan wenewen, pwe iga esooar wenewen neetipan. Igine epwe oatupwutupw, iwe nge efeeori minna fasiun aan feoffeeor, pwe iiy fasiun erhai man oatupwutupw, nge iiy minne semaen oanongaen oatupwutupw.

45 Iwe nge iaengaenigaemi minna e wenewen, iwe ina faan minne oawse niugiuniug ngaeniaei reen.

46 Iyo erhai neeimi ne epwe mmwenen pwaeritae pwe i monofit? Ngaere igine iaengaenigaemi minna e wenewen, iwe nge meeta oawse niugiuniug ngaeniaei reen?

47 Iyo na e itto me reen Deus ina erongorong ngaeni minna mwaeniaen Deus. Iwe nge aaemi oawse itto me reen Deus, iwe ina faan minimwu oawse rongorong reen.”

Jesus me Abraham

48 Ra aeiineow Jesus pwe, “Ese nnet ngaenigemaem igiwe aeiura pwe een erhai re Samaria nge eyor mwuniaan woamw?”

49 Jesus a paniuwaeniir pwe, “Ngaang esooar mwuniaan wooai. Ngaang ioassoara manna Semaei, nge aaemi oawse oassoaraeyaei.

50 Ngaang ise giutteon aaei ssoar wooan oanongaei. Nge a yor erhai ina e kiukkiutta aaei ssoar nge e wenewen aan apwiung.

51 Ennetaen, ipwe aengaenigaemi minna wenewenen: erhai ne epwe tapwee aaei fenai nge esooar faaen eew ne epwe mae.”

52 Ra aengaeni pwe, “Igina aeiya oanongonniuwan giuneei pwe eyor mwuniaan woamw! Abraham emae noa nge profeta kkewe repwan mae noa, iwe nge een wo iura pwe erhai ne etapwee oamw fenai nge esooar faaen eew ne epwe mae.

53 Manewe semmaem Abraham iwe a mae; nge een wo iura pwe wo taegias me mmwaen Abraham? Nge profeta kkewe mwo nge repwan mae noa. Wo niuwaennei pwe een iyo?”

54 Jesus a paniuwaeniir pwe, “Aere igine ngaang rhag ioassoaraeyaei wooan oanongaei, nge ssoar naan esoapw yor ipitan. Manna e oassoaraeyaei ina manna Semaei—ina iiy mwaaen we oawiura pwe aaemi Deus.

55 Aaemi oawse fasiun giuneei, iwe nge ngaang i giuneei. Ngaere igine iaengaenigaemi pwe ise giuneei, ina nge ipwene oatupwugaemi. Iwe nge ngaang i giuneei, iwe nge i tapwee minna mwaenian.

56 Manewe semaemi Abraham a pwapwa reen aan epwe weri oaton aaei itto; a weri iwe nge a kker nee tipan.”

⁵⁷ Ra aengaeni pwe, “Esaaen toori mwo nimeig raeg raegimw nge wa iura pwe woweri Abraham?”

⁵⁸ Jesus a paniwaenii, “Ennetae, ipwe aengaenigaemi minna wenewenen: weni mmwaen aan supw Abraham, ‘Ngaang ina Ngaang’.”

⁵⁹ Iwe ra pweipwog faai pwe repwe tera, iwe nge Jesus a mwoan saengiir nge a siusaengi *Temple* we.

9

Jesus e Aeffeta Noa Erhai Mwaaen Masparh

¹ Igiwe Jesus a feffaaeraeg noa nge a weri erhai mwaaen esupwuto nge eparh mesan.

² Rhooan kkayeo kkewe naiun ra aeiineow pwe, “Sinsei, monofitin iyo minne mwaaen efeeori pwe epwe wupwutiw nge eparh mesaen? Monofitin aere monofitin inan me seman?”

³ Jesus a paniwaenii, “Aan masparh saapw menaan aan monofit aere aar inan me seman. Eparh mesan pwe epwe pwaeri noa minna mamaawan aaen Deus engaang wooan.

⁴ Iga erhiwen raaen sa feeori aaen engaang manna efangeto ngaang; akkarapo pwoong nge esooar ne epwe rhiwen mmwenen engaang.

⁵ Iga erhiwen no noan faeinaengiy nge ngaang minne seremaen faeinaengiy.”

⁶ Mwirin aan aepesa minnee nge Jesus a oattuffa tiw nee ppweon a tonaei fengaenniy me ppweon we iwe a toafi ngaeni mesaen mwaaen we

⁷ iwe nge a aengaeni pwe, “Wonoa wa noa woraes noan rhaan na Siloam.” (Faaen itaen rhaan we nge “Fang”) Iwe mwaaen we a noa, a noa woraes, a sefaaeneto pwe a fflat noa mesan.

⁸ Rhooan no oaron me rhoa kkewe reweri aaen mwaaen we tingoar maaw fetaen rhag ammwenen ra aeiineo pwe, “Saapw ieei mwaaen we emooaton tingoar maaw fetaen rhag?”

⁹ Aaemweoi re iura pwe, “Ooa, ina iiy,” Nge aaemweoi ra iura pwe, “Aapw, saapw iiy; eweei rhag pwe iiy mwaaen we.”

Nge iiy mwaaen we a iura pwe, “Ngaang iiy mwaaen we.”

¹⁰ Ra aeiineow pwe, “Ifa wusun rhag nge a fflatenoa mesoamw?”

¹¹ Iiy mwaaen we a iura pwe, “Mwaaen we itan Jesus e pwigi aekkaew ppweon a toafitae wooan mesaei, iwe a aengaeniaei pwe ipwe noa noan rhaan we Siloam pwe ipwe noa woraes. Iwe iya noa, nge igiwe rhag i woraes, nge a fflat noa mesaei.”

¹² Ra aeiineow pwe, “Ifa iiy?”

Nge a paniwaenii pwe, “Ngaang ise giuneei.”

Pharisees Kkewe ra Kiukkiutta Mwirin Aecchipwa we

¹³ Iwe ra pwigi noa mwaaen we eparh mwo mesan reer Pharisees kkewe.

¹⁴ Raaenin we Jesus efeeori ppweon kkewe pwe epwe aecchipwa ngaeni mwaaen masparh we nge eew Sabbath.

¹⁵ Iwe Pharisees kkewe ra pwan aeiineow mwaaen we wunuunun aan fflat noa mesan. Nge a aengaenii pwe, “E toafitae ppweon wooan mesaei; iya noa woraes iwe igina a fflat noa mesaei.”

¹⁶ Aaemweoi Pharisees kkewe ra iura pwe, “Mwaaen we efeeori minnee nge ese itto me reen Deus, pwe iiy ese tapwee oasoapwosoapwon Sabbath.”

Nge aaemweoi re iura pwe, “Nge epwe ifa wusun aaen erhai mwaaen monofit epwe mmwenen aan feeori minikkeei?” Iwe a yor giniginin neefineer.

¹⁷ Nge Pharisees kkewe ra pwan aeiineow sefaaeniy mwaaen we pwe, “Wo iura pwe iiy minne e aecchipwa oamw masparh –iwe meeta wopwe iura reen mmwenen?”

Mwaaen we a paniuwaeniir pwe, “Iiy erhai profeta.”

¹⁸ Mwaaen kkewe soamwooniir Jews rese mwerhaen repwe niugiuniug pwe mwaaen we emasparh mwo nge igina a pwan ffat noa mesan, toori igiwe ra faingiir rhooawe inan me seman,

¹⁹ nge ra aeiineor pwe, “Naimi mwaaen een? Oawiura pwe esupwutiw nge eparh mesan; nge e ifa wusun rhag nge a ffat noa mesan?”

²⁰ Rhooawe inan me seman ra iura pwe, “Aeigiuneei pwe iiy naimaem, iwe nge aeigiuneei pwe esupw nge eparh mesan.

²¹ Iwe nge aeise giuneei e ifa rhag wusun nge a ffat noa mesan, iwe nge aeise giuneei iyo e aeffeta noa mesan. Oaw aeiineow, pwe imwu a reepiy, iwe imwu epwene mmwenen aeseefaaeni aeiineo mwu aaemi!”

²² Rhooa kkewe inan me seman re aepesa minneei pwe igiwe re mesagiur rhooawe soamwoonin Jews, ikkiwe iir ra fasian tipieew pwe erhai ne e iura pwe Jesus minne Kristus iwe nge repwe aerheei wow me noan wutteer Jews.

²³ Ina faaen miniwe inan me seman re iura pwe, “A reepiy, oaw aeiineow!”

²⁴ Pharisees kkewe a oaruwowwaen aar faangi mwaaen we eparh mesan nge ra aengaeni pwe, “Wopwe aekkepan faaen mesaen Deus pwe wopwe aepesa minna ewenewen! Aeigiuneei pwe mwaaen e aecchipwoag nge erhai mwaaen monofit.”

²⁵ Mwaaen we a iura pwe, “Ngaang ise giuneei aere erhai mwaaen monofit aere saapw. Nge eew minne i giuneei: eparh mwo mesaei nge igina nge a ffat noa.”

²⁶ Ra aeiineow pwe, “Meeta minne efeeori ngaeniug? Eifa wusun aan aeffeta noa mesoamw?”

²⁷ A paniuwaeniir pwe, “Iya moannon aengaenigaemi, nge aaemi oawse aiussaening. Meeta faaen oawpwe pwan rongorong sefaaen ngaeni reen? Meeta, maeni faer aaemi mwo nge oawmwerhaen pwe oawpwe no pwe naiun rhooan kkayeo?”

²⁸ Ra kkepas aenneew ngaeni nge ra aengaeni pwe, “Een mini naiun aeremas we rhooan kkayeo; pwe aemaem nge naiun Moses rhooan kkayeo.

²⁹ Aemaem aeigiuneei pwe Deus emwaenieniy ngaeni Moses; nge mwaaen na, aeise giuneei mwo nge igine e itto me ee!”

³⁰ Mwaaen we a paniuwaeniir pwe, “Aeina mwo amwaraeran minna! Oawse giuneei iya iga e itto me ee, nge iiy e aeffeta noa mesaei!

³¹ Sigiuneei pwe Deus ese aiussaening ngaeniir rhooa monofit; nge e aiussaening ngaeniir rhooakka re aesirowu iwe me refeori minikkena aan mwerhaen.

³² Saengi rhag rhaepetaen faeinaengiy nge esaaen yor mwo erhai ne si rongorong pwe e aeffeta noa perhaen mesaen erhai e esupwuto nge e fasian parh.

³³ Aere igine mwaaeneei ese itto me reen Deus, nge esoapw mmwen ngaeni mwo nge eew minikka efeeori.”

³⁴ Ra paniuwaeni pwe, “Wosupw nge woffooan tae noan monofit –iwe nge wa menaen pwe wopwe itto fenaiugimaem?” Iwe rhag nge re aerheei wow me noan wutteer Jews we.

Perhaen Mesaen Ngeoniiur

³⁵ Igiwe Jesus a rongorong pwe ra aerheei wow mwaaen we me noan wutteer Jews we, enoa rhuungi mwaaen we nge a aeiineow pwe, “Wo niugiuniug ngaeni mwaaen na Naiun Aeremas?”

³⁶ Mwaaen we a paniuwaeni pwe, “Menap, aengaeniaei mwaaen e iiy, ina nge ipwe niugiuniug ngaeni!”

³⁷ Jesus a aengaeni pwe, “Wa fasiun weri, pwe iiy minne emwaenieniy ngaeniug igina.”

³⁸ Iwe mwaaen we a foatotiw me mmwaen Jesus nge a aengaeni pwe, “Ngaang iniugiuniug, Soamwoon!” iwe a foatotiw weni mmwaen Jesus.

³⁹ Jesus a iura pwe, “Ngaang iittiw noan faeinaengiy pwe ipwe ittiw aettiweginiy wunuunuur aeremas, pwe rhooakka reparh repwe ffat noa, iwe nge rhooakka reffat repwe parh noa.”

⁴⁰ Aaemweoi Pharisees kkewe reno reen nge rerongorong aan aepesa minneei, nge ra aeiineow pwe, “Woiura pwe aemaem mwo nge aeipwan masparh?”

⁴¹ Jesus a paniuwaenii pwe, “Ngaere igine oawparh, ina nge oawse no noan monofit, nge igomwu oawiura pwe oawffat ina nge aaemi oawno noan monofit.”

10

Fioang Awewen Rhooan Neginegin Maan

¹ Jesus a iura pwe, “Ennetaeen, ipwe aengaenigaemi minna wenewenen: mwaaen na ese toonong me noan aesemaen gurun *sheep* we pwe etonong me eew pwiuneoi, nge iiy erhai maan mwoarho me esooaw piraf.

² Aeremas na etonong me noan aesemaen gurun *sheep* we nge ina rhooan neginegin *sheep* kkewe. ³ Rhooan poosun guruwe epwe sugi ngaeni asam, nge iir *sheep* kkewe repwe rongorong mwaeniaen igine epwe faingi iteer nge a wummwuur wow niugiu.

⁴ Igiwe a paenii wow, nge ina epwe gommw memmweer, nge *sheep* kkewe ra tapweei mwirin pwe iga ra aeginna mwaenian.

⁵ Esooar erhai ne repwe tapweei; pwe repwe faer fattapw saengi aeremas we, pwe iga rese aeginna ttigin mwaenian.”

⁶ Jesus a fioangei ngaenii fioangon awewe eei, nge iir rese metefaaegini faan.

Jesus Minne Erhai Rhooan Negineg Kkewe e Mwamwaai

⁷ Jesus a pwan aengaenii pwe, “Ennetaeen, ipwe aengaenigaemi minna wenewenen, pwe ngaang minne aesemeer *sheep* kkewe.

⁸ Oanongeer rhooa kkewe regommwoto me mmwaei nge iir maan mwoarho me soaw piraf, pwe *sheep* kkewe rese rongorong mwaenieer.

⁹ Ngaang minne asam. Iyo kka reitto toonong me reei nge repwe menaw; repwe itto toonong nge retowow nge repwe rhurhu mwongo.

¹⁰ Maan mwoarho we ina eitto rhag pwe epwe mwoarho me nni me oatoaropa. Ngaang itto pwe aegin oawpwe menaw—ina menaw na oarosaen mwamwaai.

¹¹ “Ngaang rhooan neginegin *sheep* kkewe emwamwaai, iwe imwerhaen mae noa faaen iteer *sheep* kkewe.

¹² Mwaaen we refang paniuwan pwe rhooai neginegiir *sheep* kkewe, nge iir *sheep* kkewe nge saapw pwan naiun. Epwe weri rhag itton erhai *wolf* nge epwe fattapw saengiir *sheep* kkewe; iwe *wolf* we a itto niir nge reperaseras noa.

¹³ Mwaaen we refang rhag paniuwaen pwe rhooan neginegin *sheep* kkewe, ina e fattapw noa pwe iga ese teapaar *sheep* kkewe pwe saapw naiun.

¹⁴⁻¹⁵ Ngaang rhooan neginegin *sheep* kkewe emwamwaai. Mwaaen na Semaei egiunaei nge ngaang igiuneei mwaaen na Semaei, ina epwan

ina wusun pwe ngaang i giuneer naeyi *sheep* nge *sheep* kka naeyi repwan giuneaei. Ngaang ipwe fangenoa menewaei faaen iteer.

¹⁶ Epwan no aekkaerhai *sheep* ikka naeyi iga re soano noan guru eei. Ipwan pwigiir to, nge iir repwe rongorong mwaeniaei nge ra itto no pwe eew cchon *sheep*, nge erhai rhag rhooai neginegiir.

¹⁷ “Mwaaen na Semaei e aerhaengiae pwe iga imwerhaen fangenoa menewaei, pwe ipwe mmwenen pwan pwigi sefaeniy.

¹⁸ Esooar ne epwe pwigi saengiae menewaei. Ngaang minne ipwe sipegin fangenoa. Eyor maemaewaei aaei ipwe sipegin fangenoa, nge eyor mae-maewaei aaei ipwe pwan pwigi sefaeniy. Ieei minne mwaaen na Semaei e ammwir ngaeniaei pwe ipwe feeori.”

¹⁹ Iwe a pwan yor ginigin nepeteer aeremas pwe reen kkepas kkeei.

²⁰ Etowunap rhooakka re iura pwe, “Eyor mwuniaan wooan! A mmang noa! Meeta oawrhiuwen aiussaening ngaeni reen?”

²¹ Nge aekkaaemweoi re iura pwe, “Mwaaen eyor mwuniaan wooan nge ese mmwen epwe ieen wusun mwaenian! Epwe ifa wusun aaen mwuniaan aeffeta noa meseer rhooa parh?”

Aar Oapwuta Jesus

²² A oaton nefael, nge a toori oaton gupwunon oatonongan *Temple* we me Jerusalem.

²³ Jesus e faaeraeg fetaen faaen pweranta we regaen iura pwe Pwerantaen Solomon me reen *Temple* we,

²⁴ iwe aeremas ra maegeto reen ra aeiineow pwe, “Epwe ifa ssiunaein oamw aeppaeti fetaenegemaem? Aengaenigemaem minna wenewenen: aere een minne Kristus?”

²⁵ Jesus a paniuwaenir pwe, “Ngaang iya fasiun aengaenigaemi, nge aaemi oawse niugiuniug ngaeniaei. Minikka igaen feeori reen maemae-waen minna Semaei ina egaen pwaeritae mmwenei;

²⁶ nge aaemi oawse niugiuniug, pwe iga aaemi saapw aaemi naeyi *sheep*.

²⁷ *Sheep* kka naeyi re aiussaening ngaeni minikka mwaeniaei; ngaang giuneer nge iir re tapweaei.

²⁸ Ingaenneer menaw na esooar ssiaenin nge esooar faaen eew ne repwe mae. Esooar erhai ne epwe mmwenen torofir saengiae.

²⁹ Meeta na manna Semaei e ngaenneaei, ina etaegias saengi oanongaen aegiae, nge esooar erhai ne emmwenen epwe torofir noa me noan paiun manna Semaei.

³⁰ Manna Semaei me ngaang nge aei eew rhag.”

³¹ Iwe rhag nge aeremas ra pwan pweipwog faai pwe repwe tera.

³² Jesus a aengaenir pwe, “Egin ssow min mwamwaai kka i itto feeori me weni mmwaemi iga manna Semaei efang ngaeniaei pwe ipwe feeori; ifa me neeiin minikkaan minne oawtipaeni pwe oawpwe terayaei reen?”

³³ Ra iura pwe, “Aeise mwerhaen aeipwe teroag reen mini mwamwaai kka wofeeori, pwe faer reen oamw fioang aenneewa Deus! Een rhag erhai aeremas nge wa itto feeoriug noa pwe een Deus!”

³⁴ Jesus a paniuwaenir pwe, “Effoat noan oasoapwosoapw we aaemi pwe Deus eiura pwe, ‘Aaemi minikka deus.’

³⁵ Si giuneei pwe minna Pwapwior we e Santus e iura nge ennet nge esooar iaenin; iwe Deus e faingiir aeremas kenaan pwe iir deus, aeremas kenaan nge ikkina aeremas kkewe efang mwaenian ngaenir.

³⁶ Iwe nge ngaang, manna Semaei minne e finiae iwe a fangeto ngaang noan faeinaengiy. Iwe epwe ifa wusun rhag oawwa mmwenen iura pwe ifioang aenneewa Deus iga iura pwe ngaang Naiun Deus?

³⁷ Aere ise feeorin minikkena minna Semaei e mwerhaen ipwe feeori, iwe ina nge oawsoapw niugiuniug ngaeniaei.

³⁸ Nge aere ifeeorin, nge inamwo oawse niugiuniug ngaeniaei, ina nge engaang kka aaei mwo nge oawpwe niugiuniug ngaeni, pwe aegin oawpwe giuneei gacchiuw pwe minna Semaei eno reei nge ino reen minna Semaei."

³⁹ Ra pwan aegina aar repwe torofi Jesus, nge ennus noa me noan paaiur.

⁴⁰ Jesus a pwan sefaaen noa noan pwupwu we Jordan, pwiuneoi we e baptismus John me ee, iwe a noa no ee.

⁴¹ Re towunap aeremas ra itto reen, ra iura pwe, "John esooar aeginn ne egaen feeori, iwe oanongaen minikka e aepesa pwe kkepesaen mwaaen een nge ennet."

⁴² Iwe re towunap aeremas kkewe reno igiwe ra niugiuniug ngaeni.

11

Maenoan Lazarus

¹ Erhai mwaaen itan Lazarus iwe eno Bethany a semwaai noa. Bethany itaen eew aepinoamw iwe Maria we pwiin Martha re nonno ee. (

² Ieen iiy Maria we e aekkitiw neoninges wooan pirheen Soamwoon nge a toafi noa chogin reen aennirhimwen; nge man semwaai we Lazarus nge mwengeyan.)

³ Rhooapwut pwipwi kkewe ra fangenoa eew kkepas reen Jesus nge re iura pwe, "Soamwoon, maereyaer aecchaeng we oamw iye a semwaai."

⁴ Igiwe Jesus a rongorong miniwe nge a iura pwe, "Amwiucchiunoan semwaai een nge saapw reen maenoan Lazarus; minnee nge a wen pwe epwe pwaeri noa minna nning Deus, pwe ina nge mwaaen na Naiun Deus epwe yo ngaeni minna nning."

⁵ Jesus e aerhaengi Martha me miniwe pwiin me Lazarus.

⁶ Igiwe e itto kkepas we reen Jesus pwe Lazarus a semwaai, iwe a pwan no aegini mwo riiuraan.

⁷ Iwe a aengaen rhooan kkayeо kkewe naiun pwe, "Sa pwan sefaaen noa Judea."

⁸ Rhooan kkayeо kkewe ra paniwaen pwe, "Sinsei, esaaen ssiunaei mwo aar aeremesaen iginaan menaan repwe teroag, nge wa pwan mwerhaen sefaaen noa?"

⁹ Jesus a iura pwe, "Eraaen nge seig me ruwowu awa noan, aere? Iwe rhooakkena re faaeraeg noan seremaen raaen ina resoapw toroppiung, pwe ra weri minna seremaen faeinaengiy.

¹⁰ Iwe nge aere re faaeraeg nee pwoong nge repwe toroppiung, pwe esooar seram."

¹¹ Jesus e aepesa miniwe nge a pwan iura pwe, "Lazarus we maereyaererh nge a maiur noa, ipwene noa pwe ipwe noa faingitae."

¹² Rhooan kkayeо kkewe ra iura pwe, "Soamwoon, ngaere igine e maiur, nge iiy ina epwe cchipw sefaaen noa."

¹³ Jesus e aengaenir pwe Lazarus a maenoa, nge iir remaengiy pwe e kkepesaen aan maiur.

¹⁴ Iwe Jesus a aeffeta ngaenir pwe, "Lazarus a mae,

¹⁵ nge aegin aaemi minne egacch tipaei iga ise no reen Lazarus, pwe aaemi oawpwe niugiuniug. Sa noa reen."

¹⁶ Thomas (iwe repwan gaen iura pwe Nippwei) a aengaenir rhooa kkayeo kkewe aaemweoi pwe, “Oawsa tapweei noa Sinsei pwe sipwe noa rhag mae nong wooan!”

Jesus Iiy Minne Menaw Sefaaen me Menaw

¹⁷ Igiwe enoa tooto Jesus a itto weri pwe a fapwoong mwirin aan nipwaenipw noa Lazarus.

¹⁸ Bethany nge ese yo mwo nge ruwowu *miles* saengi Jerusalem,

¹⁹ iwe nge reign towunap re Judea rhooan itto emwaeriir Maria me Martha reen maen mwaaen we mwengeyeer.

²⁰ Igiwe Martha a rongorong pwe Jesus a itto, a itiwow pwe a itiwow rhuungi, nge Maria eno rhag nee iimw.

²¹ Martha a aengaeni Jesus pwe, “Soamwoon, aere igine wono igeei nge mwaaen e mwengaei esoapw mae!

²² Nge igiuneei pwe igma mwo nge Deus epwe ngaenneog ese tiwegin minne wo tingoareei.”

²³ Jesus a aengaeni pwe, “Mwaaen mwu mwengeyoamw epwe menaw sefaaen tae.”

²⁴ Rhooapwut we a iura pwe, “Ngaang igiuneei pwe wooan minna oarosaen raaen nge epwe menaw sefaaen tae.”

²⁵ Jesus a aengaeni pwe, “Ngaang minne menaw sefaaen me menaw. Iyo kka re niugiuniug ngaeniaei nge repwe menaw, inamwo igine ra mae noa;

²⁶ iwe iyo kka re menaw nge re niugiuniug ngaeniaei nge esooar faaen eew ne repwe mae. Wo niugiuniug ngaeni minnee?”

²⁷ Rhooapwut we a iura pwe, “Ooa, Soamwoon! Ngaang iniugiuniug pwe een Kristus iwe Naiun Deus iwe epwe itto noan faeinaengiy.”

Jesus a Saeng

²⁸ Mwirin aaen Martha aepesa minnee, a sefaaen a noa faingi mwoanomwoanei Maria we pwiiin. A aengaeni pwe, “Sinsei a no igeei, iwe nge e aekkaeyiyeg een.”

²⁹ Igiwe Maria erongorong miniwe, a iutae rhag nge a guccuwow reen Jesus. (

³⁰ Jesus esaen toori mwo aepinoamw we, pwe erhiuwen no igiwe Martha e rhuungi me ee.)

³¹ Rhooawe reno reen Maria noan iimw we ra pwan tapweei wow igiwe e iutae pwe epwene noa. Re niuwaenaei pwe epwene noa reen paeyi we pwe epwe noa saeng me ee.

³² Maria enoa tooto igiwe Jesus eno ee, igiwe rhag eweri, nge e foatotiw me weni mmwan a aengaeni pwe, “Soamwoon, aere igine wo fasiun no igeei nge mwaaen we mwengaei esoapw mae!”

³³ Jesus eweri aan saeng, me pwan aeremas kkewe repwan tapweeito aar pwan saeng; iwe a gin tiwto waeiraesiy nee tipan me aenneewaan nee rhiun.

³⁴ A aeiineeor pwe, “Iya iga oaw paeia me iya?”

Ra panuwaei pwe, “Soamwoon, itto wopwe noa weri.”

³⁵ Jesus a saeng.

³⁶ Aeremas kkewe ra iura pwe, “Oawweri nepaen aan aerhaengi!”

³⁷ Aaemweoi ra iura pwe, “Iiy miniwe e aeffeta noa mesaen erhai masparh, aere? Esoapw mmwen aan epwe feeori pwe esoapw mae Lazarus?”

Jesus a Aemenewaetae Lazarus

³⁸ A pwan gin tiwto aenneewaan nee tipaen Jesus, igiwe a noa reen paeyi we, iwe eew ngat me peigin eew rhug, iwe eno eew fai temoag reen asaeman.

³⁹ Jesus a akkiuneeor pwe, “Peniy noa fai mwu!”

Martha iwe mwengeyaen mwaaen we a mae a iura pwe, “Soamwoon, epwene aenneew pwoon, pwe a fapwoong pwongin aan nipwaenipw noa!”

⁴⁰ Jesus aengaeni pwe, “Isaaen aengaeniug pwe wopwe weri minna nningen Deus igine wo niugiuniug?”

⁴¹ Ra peniy noa fai we. Jesus a fattae naaeng nge a iura pwe, “Wa aerhigerhig Semaei, reen oamw aiussaening mwaeniaei.

⁴² Igiuneei pwe wogaen aiussaening ngaeniaei rhag, nge iaepesa minneei pwe aegiir aeremas kka igeei, pwe repwe niugiuniug pwe een minne wofangeto ngaang.”

⁴³ Mwirin aan aepesa minneei nge a kkepas temoag noa, “Lazarus, toowow!”

⁴⁴ A toowow, nge erhiuwen tiugiutiug noa rhag paiun me pirheen reen mengaag iwe epwan yor mengaag tiugiutiug ngaeni mesan. Jesus a aengaeniir pwe, “Oaw pwaeisi noa nge oawwa nigit noa.”

Aar Rhiu Aenneewa Jesus

(Mat 26.1-5; Mark 14.1-2; Luke 22.1-2)

⁴⁵ Towunepeer rhoowe re itto reen Maria ra weri meeta we Jesus efeeori, iwe ra niugiuniug ngaeni.

⁴⁶ Iwe nge aekkaerhai iir ra noa ngaeniir Pharisees kkewe iwe ra aengaeniir meeta kkewe Jesus efeeori.

⁴⁷ Iwe Pharisees me soamwooniir patere kkewe ra rhungaeni *council* we iwe ra iura pwe, “Meeta sipwene feeori? Oaw pipiiy oanongaen kkeman kka mwaaeneei a feeorin!

⁴⁸ Ngaere igine sipwe nigit noa rhag pwe epwe iiei wusun, oanongeer aeremas nge repwene niugiuniug ngaeni, nge manekka soamwoonin Rome repwe itto fereeit noa *Temple* e aarh me minne faniuwarh!”

⁴⁹ Erhai me neeiir itan Caiaphas, iiy miniwe Soamwoonin Patere noan raeg we, a iura pwe, “A inamwo pwurhom!”

⁵⁰ Oawse giuneei pwe egacch ngaenigaemi igine erhai emae noa faaen iteer rhooa towunap, mmwaen igine oanongeer aeremas repwe toaroporop noa?”

⁵¹ Ese tipan rhag wooan oanongan pwe epwe aepesa minneei; pwe iga iiy miniwe Soamwoonin Patere noan raeg naan, iwe e aepesa pwe Jesus epwe mae noa faaen iteer re Jews,

⁵² nge saapw faaen iteer rhag, pwe pwan minni epwe oarhuur nong rhag noan eew tipieew oanongeer aeremas kka naiun Deus ikka remeganagan fetaen.

⁵³ Saengi raaenin we a noa, soamwooniir Jews kkewe ra feeori noa aar niunniwaen pwe repwe niyi noa Jesus.

⁵⁴ Iwe Jesus esa pwaeri noano aan faaeraeg fetaen me wooan Judea, iwe a noa reen eew pwiuneoi iwe eno oaron *desert* we, reen eew aepinoamw itan Ephraim, a noa no ee iiy me rhoaan kkayeo kkewe naiun.

⁵⁵ Oaton gupwunon *Passover* we a arapeto, re towunap aeremesaen aepinoamw kkewe ra maegeto Jerusalem pwe repwe itto feeori engaengaen aenimenimen weni mmwaen gupwun we.

⁵⁶ Ra kiukkiutta Jesus, nge igiwe ra rhu me noan *Temple* we ra aeiineo fengaen wooar pwe, “Meeta oawmaengiy? Ennetaen esoapw itto tapwee gupwun eei, aere?”

⁵⁷ Soamwoonin patere me Pharisees kkewe ra fasiun aetiwenig ngaeniir aeremas pwe aere yor e eweri Jesus, nge a iura, pwe repwe noa torofi.

12

*Ra Aepiti Jesus me Bethany
(Mat 26.6-13; Mark 14.3-9)*

¹ Wonowu raaen me weni mmwaen *Passover*, nge Jesus a noa Bethany, iwe pwugusaen Lazarus, mwaaen we e aemenewaetae me reen mae noa.

² Ra oamoannatae eew mwongoon faaef pwe aan, iwe Martha a tipaenguir reen feeoriun; Lazarus iwe erhai mwaaen kkewe emooat reen Jesus reen *table* we.

³ Maria a pwigi eew neoninges e igin cchoaw paniuwaen a aekkitae wooan pirheen Jesus, iwe ooa toafi noa chogin pirheen reen aennirhimwen. Miniwe pwongesaen neowe a rheeoil noa noan iimw we.

⁴ Erhai rhooan kkayeо kkewe naiun itan Judas Iscariot—mwaaen we epwe fangenoa tinnimaen—a iura pwe,

⁵ “Meeta rese chuwaiuw noa neoninges een reen eniupwiugiuw *silver* iwe nge ra ngaenneer man affayeo minna senaapian?”

⁶ Eiura miniwe nge saapw iga e faayeeor man affayeo pwe iga iiy erhai man mwoarho. Iiy minne pweipwog tutuun senaapiy nge egaen piraf naiun senaapiy me reen.

⁷ Jesus a iura pwe, “Oawsoapw amwagiutiu, nigit pwe epwe iseni meeta kkomwu aan pwe ammwenen raaenin na ipwe nipwaenipw noa reen.

⁸ Pwe rhoa affayeo repwe fasiun yor reemi oanongaen oat, nge ngaang isoapw no rhag reemi oanongaen oat.”

Ra Rhiu Aenneewa Lazarus

⁹ Retowunap aeremas ra rongorong pwe Jesus eno Bethany iwe ra noa igiwe, soapw pwonno rhag reen Jesus nge pwonno repwe pwan weri Lazarus, iwe Jesus e aemenewaetae me reen mae noa.

¹⁰ Iwe soamwoonin patere kkewe ra feeori noa aar niunniuwaen pwe repwe pwan niiy noa Lazarus,

¹¹ pwonno reen Lazarus minne ra igin towunap Jews kka ra toagun saenguir ra noa niugiuniug ngaeni Jesus.

Toonongan Jesus Noan Jerusalem

(Mat 21.1-11; Mark 11.1-11; Luke 19.28-40)

¹² Mmasetaen iwe eraen, eew pwuwa temoag a itto tapweei miniwe gupwunon *Passover* pwe ra rongorong pwe Jesus a itto noan Jerusalem.

¹³ Iwe ra pweipwog to paeneaei niu pwe repwene itiwow aewenimmwei Jesus, nge ra gaen aekkepwas pwe, “Aepingepinga Deus! Deus epwe aewenepwuwa aeremas na epwe itto faaen itaen Soamwoon! Deus epwe aewenepwuwa *king* na aar re Israel!”

¹⁴ Jesus enoa rhuungi erhai *donkey* a teeotae wooan, taeppen rhag miniwe Pwapwior we e Santus iwe e iura pwe,

¹⁵ “Wosoapw mesag, een aepinoamwon Zion!

Emwaeri, a itto *king* we noawumw,

iye e waawa erhai *donkey* mwittig.”

¹⁶ Noan oatowe nge rhooan kkayeо kkewe naiun rese metefaaegini miniwe; nge oatowe enoa menaw sefaaen Jesus a ittiw noan nningen nge ra naaen maengiy pwe ina miniwe Pwapwior we e Santus e iura reen, nge e ina wusun miniwe refereeori ngaeni.

¹⁷ Rhooa kkewe reno reen Jesus oatowe e faingiwow Lazarus me noan miniwe paeian nge a aemenewa sefaaeniy tae iwe ra aepesa fetaeneei miniwe a wen.

¹⁸ Ina faaen miniwe pwuwa we a itiwow rhungaeni pwe iga ra rongorong wunuunun kkeman we efeeori.

¹⁹ Iwe Pharisees kkewe ra iura fengaenniy wooar pwe, “Oawwa weri pwe esooar mwo nge eew meeta ne emmwen ngaenigirh! Oaw pipiiy, oanongaen faeinaengiy nge a tapweel!”

Aaemweoi Rhooan Greeks re Kiukkiutta Jesus

²⁰ Aaemweoi re Greeks reno neeiir rhoowe renoa Jerusalem repwe noa maeipin oaton gupwunon *Passover*.

²¹ Ra noa reen Philip (erhai re Bethsaida enonno Galilee), iwe ra aengaeni pwe, “Menap, aei mwerhaen rhuungi Jesus.”

²² Philip a noa a aengaeni Andrew, iwe iir ra noa aengaeni Jesus.

²³ Jesus a paniuwaeniir pwe, “Awa we iye a itto igina pwe miniwe Naiun Aeremas epwene pwae noa minna nning.

²⁴ Ennetaaen, ipwe aengaenigaemi minna wenewenen: ngaere efai faiun *wheat* ese ppiungtiw nee ppweon nge a mae noa, nge epwe no rhag pwe efai faiun. Iwe ngaere epwe mae noa ina nge epwe towunap uwaan.

²⁵ Rhooakka re aerhaengi meneweer nge epwe ppiung saengiir, nge rhooakka rese aerhaengi meneweer me noan faeinaengiy ina epwe yo ngaeniir menaw na esooar iaenin.

²⁶ Iyo na emwerhaen epwe engaang ngaeniaei epwe tapweaei, pwene naeyi rhooan engaang epwe no reei iga ino ee. Iwe nge minna Semaei epwe fang ssoar ngaeniir ikkina re engaang ngaeniaei.

Jesus a Fioangei Aan Mae Noa

²⁷ “Igina a waeiraes nee tipaei—meeta ipwe iura? Ipwe iura pwe, ‘Semaei, wosoapw aefengato oaton eei wooai?’ Nge ina rhag ina faaen aaei itto, pwe ipwe toonong noan oaton affayeo eei.

²⁸ Semaei, pwaeri noa nning minna itoamw!”

Nge eew mangiungiu a ittiw naaeng, “Iya fasiun pwaeri noa nning, nge ipwe rhiuwen feeori sefaaeniy.”

²⁹ Pwuwa we reiu igiwe rerongorong mangiungiu we, nge aaemweoi ra iura pwe pacch, aaemweoi reiura pwe, “Erhai angkenus minne emwaenieniy ngaeni!”

³⁰ Iwe nge Jesus a aengaeniir pwe, “Saapw aegin ngaang minne mangiungiu naan ittiw me noan naaeng reen, pwe aegin aaemi.

³¹ Igina a itto oatowe faeinaengiy epwene apwiung; nge igina mwaaen e soamwoonin faeinaengiy epwene asiuw me wooan nenien.

³² Aere iya aetaegiasaetae saengi faeinaengiy, nge ipwene pwigiir to oanongeer aeremas reei.” (

³³ Noan aan aepesa minneei, nge a aepesa wunuunun mae na epwe aeni.)

³⁴ Pwuwa we a iura pwe, “Aemaem anniug e aengaenigemaem pwe Kristus epwe menaw foarhofoarh. Epwe ifa wusun oamw iura pwe mwaaen na Naiun Aeremas epwe aetaegiasaetae? Iyo iiy minne Naiun Aeremas?”

³⁵ Jesus a iura pwe, “Iiy seram we epwe no faeiyegius fetaen mwo neeimi. Oaw soapwei noa aaemi faaeraeg iga seram e rhiuwen no reemi, pwe roorh ete gonaegaemi; pwe erhai ne e faaeraeg nee roorh nge esoapw giuneei igine e faaeraeg noa ee.

³⁶ Iwe oawpwe niugiuniug ngaeni seram naan, noan faei oaton aan no reemi, pwe aaemi oawpwe no pwe aeremesaen ne seram.”

Aar Aeremas Se Niugiuniug

Mwirin aaen Jesus aepesa minneei, a nigitir pwe a noa wop saengiir.

³⁷ Inamwo igiwe a feeori oanongaen kkeman kkeei me weni mmweer, nge rese niugiuniug ngaeni,

³⁸ pwe aegin miniwe mwaeniaen profeta Isaiah epwe pwae noa iwe e iura pwe,

“Soamwoon, iyo e niugiuniug ngaeni kkepas we aeiya aepesa?

Nge iyo na Soamwoon e pwaeri ngaeni minna maemaewan?”

³⁹ Iwe rese mmwenen niugiuniug, pwe igiwe Isaiah epwan iura pwe,

⁴⁰ “Deus a aeperha noa meseer nge a oarorha noa noan tipeer,

pwonno meseer ete weriwer nge neetipeer ese metaf,

nge resoapw toagun ngaeniaei, aaen kkepas Deus,

nge ngaang ipwe aemaemaewaar tae.”

⁴¹ Isaiah e aepesa minnee pwe igiwe a weri minna nningen Jesus iwe a fioangei kkepesan.

⁴² Oateen mwo nge re towunap soamwooniir Jews ra niugiuniug ngaeni Jesus; nge pwonno reer Pharisees kkewe minne esooar minne re aepesa, pwe rete aerheer wow me noan wutteer Jews.

⁴³ Re aerhaengi pwe aeremas repwe aepingepingaar mmwaen aaen Deus epwe aepingepingaar.

Petenaeen Mwaeniaen Jesus Minne Epwe Kapwiungiu Aeremas

⁴⁴ Jesus a kkepas temoag tae nge a iura pwe, “Iyo na e niugiuniug ngaeniaei nge ese niugiuniug ngaeniaei rhag, pwe pwan iyo na efangeto ngaang.

⁴⁵ Nge iyo na eweriaei nge epwan weri iyo na efangeto ngaang.

⁴⁶ Ngaang itto noan faeinaengiy pwe eew seram, pwe iyo na e niugiuniug ngaeniaei esoapw no noan rorhappiung.

⁴⁷ Rhooakka re rongorong mwaeniaei nge rese tapweei, isoapw apwiungiur. Ngaang ise itto ipwe itto apwiungiu faeinaengiy, pwe itto pwe ipwe aemenewa.

⁴⁸ Iyo kena rese aetiwaeyaei nge rese aetiwa mwaeniaei nge eno erhai ina epwe itto apwiungiur. Iir ina repwe apwiung reen minikka petenaen mwaeniaei wooan minna oarosaen raaen!

⁴⁹ Wenewenen minikkeei, pwe saapw tipaei rhag wooan oanongaei, pwe mwaeniaen minna Semaei ina efangeto ngaang, nge eammwir ngaeniaei meeta ipwe iura me aepesa.

⁵⁰ Nge ngaang igiuneei, pwe oasoapwosoapw e aan epwe pwigito menaw na esooar iaenin. Iwe meeta iiura nge ina minna manna Semaei eaengaeniaei pwe ipwe iura.”

13

Jesus e Toafi Pirheer Rhooan Kkayeo

¹ Igina nge a eraen me weni mmwaen miniwe gupwunon *Passover*. Jesus a giuneei pwe a itto oaton aan epwene nigit faeinaengiy pwe epwene noa reen miniwe Seman. Iiy e fasiun gin aerhaengiir rhooakka noan faeinaengiy ikka naiun, nge e aerhaengiir toori noa amwiucchiun aan menaw.

² Jesus me rhooan kkayeo kkewe naiun ra mwongoon faaef. Nge Saetan a fasiun iseni nong neetipaen Judas, mwaaen we naiun Simon Iscariot, pwe epwe fangenoa tinnimaen Jesus.

³ Jesus e giuneei pwe mwaaen we Seman nge efang ngaeni oanongaen mamaaw; e giuneei pwe iiy e itto me reen Deus nge epwene sefaaen ngaeni Deus.

⁴ Iwe a iutae me reen *table* we, a iseni tiw mengaagiun niugiu, nge a geonitae eew toawun nugunupan.

⁵ Iwe a aekkinong rhaan noan eew saepiy nge a rhaepetae aan toafi pirheer rhooan kkayeo kkewe naiun, nge e aepaena ngaeni toawun we e geeogeeo nuginupan.

⁶ A itto reen Simon Peter, nge Peter a aengaeni pwe, “Soamwoon, wopwe toafi pirhee?”

⁷ Jesus a paniuwaeni pwe, “Igina wose metefaaegini minne ifeeori, nge faeiyegius noa nge wopwe naaen metaf.”

⁸ Peter a iura pwe, “Esooar faaen eew ne wopwe toafi pirhee!”

Jesus a aengaeni pwe, “Aere igine ise toafi pirhemw nge wosoapw nono pwe een naeyi rhooan kkayeo.”

⁹ Simon Peter a aengaeni pwe, “Soamwoon, ina nge saapw pirheei rhag minne wopwe toafi! Wopwe pwan toafi paeyi me rhimwei!”

¹⁰ Jesus a iura pwe, “Rhooakka ra tiutiu nge a nimegacch noa wooar, nge resoapw tiutiu no pwe pirheer rhag epwe tiutiu. Oanongaemi nge oawwa aenimenim—nge erhai rhag ese aenimenim.” (

¹¹ Jesus a fasiun giuneei iyo epwene fangenoa tinnimaen; ina faaen miniwe eiura pwe, “Oanongaemi nge oawwa aenimenim—nge erhai rhag ese aenimenim.”)

¹² Weni mwirin aaen Jesus toafi pirheer, a iseni sefaaen tae minikkewe mengaagiun nge a noa mooat sefaaen tiw reen *table* we. A iura pwe, “Oaw metaf reen miniwe ifeeori ngaenigaemi?

¹³ Oawfaingi ngaeniaei pwe Sinsei me Soamwoon, nge efin pwe oawpwe ina wusun ngaeniaei, pwe iga ina minna ngaang.

¹⁴ Ngaang, aaemi Soamwoon me Sinsei, nge iya toafi pirhemi. Iwe nge aaemi oawpwan toafi pirheen erhai me erhai me neeimi.

¹⁵ Iaweri ngaenigaemi minneen pwe oawpwe giuneei, pwe oawpwe feeori wunuunun meeta we ifeeori ngaenigaemi.

¹⁶ Ennetaan, ipwe aengaenigaemi minna wenewenen: esooar *slave* ne etaegias saengi aan maasta, nge esooar rhooan pweipwogin kkepas ne etaegias saengi iyo na e akkiuneo.

¹⁷ Iga oawwa giuneei minneei, ifa mwo aaemi kker igine oawpwene noa pomwon!

¹⁸ “Ngaang ise kkepas reemi oanongaemi; i giuneer iyo kka i finiir. Iwe nge miniwe mwaeniaen Pwapwior we e Santus epwe pwae noa iwe eiura pwe, ‘Mwaaen we e mwongo reei a appaniuwaeniaei.’

¹⁹ Igina iaengaenigaemi minneei weni mmwaen epwe wen, pwe epwe noa wen nge oaw niugiuniug pwe, ‘Ngaang ina ngaang.’

²⁰ Ennetaan, ipwe aengaenigaemi minna wenewenen: iyo e aetiwa iiy iwe iaefenga e aetiwaeyaei; nge iyo e aetiwaeyaei epwan aetiwa iyo na efangeto ngaang.”

Jesus a Aepesa Wunuunun Aar Aefenganoa Tinnimaen (Mat 26.20-25; Mark 14.17-21; Luke 22.21-23)

²¹ Weni mwirin aaen Jesus aepesa minneei a igin cchoaw nee tipan iwe a iura pwe, “Ennetaan, ipwe aengaenigaemi minna wenewenen, pwe erhai me neeimi epwene fangenoa tinnimaei.”

²² Rhooan kkayeo kkewe ra wegitaeg fengaen wooar pwe resa metaf reen miniwe eiura.

²³ Erhai me neeir rhooan kkayeo kkewe, mwaaen we Jesus eigin aerhaengi, iwe emooat oaron Jesus.

²⁴ Simon Peter a cchimw ngaeni nge a iura pwe, “Aeiineow ngaere iyo mwu e iyaekkepesa?”

²⁵ Iwe rhooan kkayeo we e aepwaenaeg ngaeni Jesus nge a aeiineow pwe, “Soamwoon, iyo na?”

²⁶ Jesus a paniuwaeni pwe, “Ieei ipwene rhrinong fenoawa een nge iya ngaennee; nge ina manna iiy.” Iwe a rhrinong fenoawa we nge ngaennee Judas we naiun Simon Iscariot.

²⁷ Igiwe rhag Judas epwigi fenoawa we nge Saetan a toonong noan pwunnon. Jesus a aengaeni pwe, “Mwetekkai, wonoa feeori minna wopwe feeori!”

²⁸ Esooar erhai neeiir rhoowe oaron *table* we ne emetefaaegini faaen miniwe Jesus e aengaeni.

²⁹ Iwe nge pwonno igiwe Judas miniwe rhoowe pweipwogin tutuun senaapiy, aaemweoi rhoowe kkayeo kkewe reniuwaenuei pwe Jesus e aengaeni pwe epwe noa a noa chuwaiuw aemwetaen gupwun we, aere ngaenner rhooa affaye eew aegiaeg.

³⁰ Judas epwigi rhag fenoawa we nge a noa. A nee pwoong miniwe.

Anniug Ffeo we

³¹ Mwirin aaen Judas noa nge Jesus a iura pwe, “Igina epwene pwae noa nninge mwaen we Naiun Aeremas; nge minna nninge Deus ina epwene pwae noa pwe aegin iiy.

³² Iwe ngaere minna nninge Deus epwaetae me reen, iwe Deus wooan oanongan epwe pwan pwaeritae nninge mwaen we Naiun Aeremas, nge epwe feeori igina rhag.

³³ Aaemi naeyi, a egis mmwaai rhag nge ipwene nigitigaemi. Oawpwene giuttayaei; iwe nge igina ipwene aengaenigaemi miniwe iaengaenir soamwoonin Jews, ‘Oawsoapw mmwenen noa iga ipwene noa ee.’

³⁴ Iwe igina ipwene ngaennigaemi eew anniug ffeo: oaw aerhaengi fengaennigaemi. Taeppen rhag aaei aerhaengigaemi, iwe aaemi oawpwe aerhaengi fengaennigaemi.

³⁵ Aere igine oaw aerhaengi fengaennigaemi, ina nge oanongeer aeremas repwe giuneei pwe aaemi minikkewe naeyi rhoowe kkayeo.”

Jesus e Aepesa Aaen Peter Iura pwe Ese Giuneei

(Mat 26.31-35; Mark 14.27-31; Luke 22.31-34)

³⁶ Simon Peter a aeiineow pwe, “Soamwoon, wopwene noa iya?” Jesus a aengaeni pwe, “Wosoapw mmwenen tapweaei noa igina ngaang ipwe noa ee, epwe mwirin noa nge oawpwapw tapweto mwiriy.”

³⁷ Peter a aeiineow pwe, “Soamwoon, meeta isoapw mmwenen tapweog noa iginaan reen? Ngaang iya moannotae pwe ipwe mae noa faaen itoamw!”

³⁸ Jesus a paniuwaeni pwe, “Wa moannotae pwe wopwene mae noa faaen itaei? Ennetaen, ipwe aengaenig minna wenewenen, pwe weni mmwaen aan epwe keokkeok maniug nge epwe faaen enuuw oamw iura pwe wose giuneei.”

14

Jesus Minne Ennap Ngaeni Minna Seman

¹ Jesus a aengaenir pwe, “Oawsoapw aiuraeg. Oaw niugiuniug ngaeni Deus nge oawpwan niugiuniug ngaeniaei.

² Egin towunap neniy me noan iimw na imwaen manna Semaei, nge ipwene noa oamoannatae neniemie me ee. Aere ese nnet minneei nge isoapw aengaenigaemi.

³ Epwe wenimwirin aaei noa oamoannatae minna neniemi, nge iya sefaaen pwe ipwe itto pwigigaemi, pwe oawpwe noano pwiuneoi na ngaang ino ee.

⁴ Oaw giuneei ennap na epwe noa reen pwiuneoi na ipwe noa ee.”

⁵ Thomas a aengaeni pwe, “Aemaem aeise giuneei igomwu wopwe noa ee; iwe epwe ifa wusun nge aeipwe giuneei minna ennepan?”

⁶ Jesus a paniuwaeni pwe, “Ngaang minne ennap me ennet me menaw; esooar ne enoa reen minna Semaei igine ese sefaaen me reei.

⁷ Igina iga oawwa giuneeai, oawpwene pwan giuneei manna Semaei, iwe saengi igina a noa, oawwa giuneei iwe me oawwa weri iiy iyo.”

⁸ Philip a aengaeni pwe, “Pwaeri ngaenigemaem manna Semoamw, ina rhag aemaem mwerhaen.”

⁹ Jesus a iura pwe, “A igin ssiunaei aaei no reemi oanongaemi; iwe nge een Philip wosaen pwan giuneeai mwo? Mane a weriae i nge ina nge a pwan weri manna Semaei, nge meeta wo iura pwe, ‘Pwaerito remaem manna Semoamw’?

¹⁰ Wosaen niugiuniug mwo pwe ngaang ino reen manna Semaei nge manna Semaei eno reei? Petenaen kkepas kkewe iaengaenigaemi nge ese itto me reei. Pwe manna Semaei ina eno reei, ina efteeori aan engaang.

¹¹ Oawniugiuniug ngaeniaei reen ikka iaepesa pwe ngaang ino reen manna Semaei nge manna Semaei eno reei. Ngaere oawse niugiuniug ngaeni ina, ina nge oawniugiuniug ngaeni minikkewe ifeeori.

¹² Ennetaeen, ipwe aengaenigaemi minna wenewenen: iyo kena re niugiuniug ngaeniaei ina repwe feeori minikkena ifeeori – ooa, epwe faer tettemoag minikka iir repwe feeori pwe, iga ngaang ipwene noa reen manna Semaei.

¹³ Nge ese tiwegin meeta kka oawpwe tingoar faaen itaei nge ipwe feeori, pwonno nningen Semaei epwe pwae noa me reen minna Naiun.

¹⁴ Ina ngaere oawtingoar pwe ipwe feeori eew meeta, nge ipwe feeori.

Ppwon Reen Espritu Santus

¹⁵ “Aere oawaerhaengiae, oawpwe tapwee oasoapwosoapw kka aaei.

¹⁶ Ipwe tingoareei manna Semaei, nge ina epwe ngaennegaemi erhai pwe Rhooan Tipaengigaemi, nge epwe no reemi e esooar iaenin.

¹⁷ Ina manna Espritu, ina epwe pwaeri minikkena e wenewen pwe wunuun Deus. Aeremesaen faeinaengiy ese mmwen epwe aetiwa, pwe iga ese weri me iga ese giuneei. Iwe nge aaemi oawgiuneei, pwe iga eno reemi nge eno neeimi.

¹⁸ “Aere ipwene noa, nge esoapw aaemi noa rhag; pwe ipwe sefaaen to reemi.

¹⁹ A egius rhag nge faeinaengiy esoapw rhiuwen weriae no, nge aaemi oawpwe weriae; pwe iga ngaang i menaw iwe aaemi oawpwan menaw.

²⁰ Epwe noa itto raaenin naan, oawpwene giuneei pwe ngaang ino reen manna Semaei nge aaemi oawno reei, taeppen rhag iga ngaang ino reemi.

²¹ “Rhooakka eno oasoapwosoapw e aaei reer nge retapwee, ikkina rhooakkena re aerhaengiae. Semaei e aerhaengiir rhooakkena re aerhaengiae; ngaang ipwan aerhaengiir nge ipwe pwan pwae ngaenii.”

²² Judas (saapw Judas we Iscariot) a iura pwe, “Soamwoon, epwe ifa wusun oamw wopwe pwae ngaenigemaem nge wosoapw pwae ngaeni faeinaengiy?”

²³ Jesus a aengaeni pwe, “Rhooakka re aerhaengiae nge repwe tapwee aaei fenai. Semaei epwe aerhaengiir, nge Semaei me ngaang aeipwe itto aeiya itto no reer.

²⁴ Rhooakkena rese aerhaengiae ina resoapw tapwee aaei fenai. Iwe fenai kkewe oawwa rongorong ikkina saapw aaei, pwe e itto me reen manna Semaei iwe efangeto ngaang.

²⁵ “Iaengaenigaemi minikkeei iga irhiuwen no reemi.

²⁶ Manna Rhooan Tipaengigaemi, ina Espritu Santus ina manna Semaei efangeto faaen itaei, pwe epwe itto kapwiung ngaenigaemi oanongaen meeta, pwe oawpwe maengiy oanongaen meeta kkewe iya aengaenigaemi.

²⁷ “Oapoas minne iya nigititiw reemi; ina oapoas na aaei ina iya ngaen-negaemi. Niffang na aaei ina esoapw weei niffang na aaen faeinaengiy. Oawsoapw aiuraeg nge oawsoapw mesag.

²⁸ Oawwa rongorong aaei aengaenigaemi pwe, ‘Ipwene noa, nge ipwe sefaaeneto reemi.’ Aere oaw aerhaengiae ina oawpwe kker iga ipwene noa reen manna Semaei; pwe iiy etaegias saengiae.

²⁹ Igina iya aengaenigaemi minikkeei weni mmwaen epwe wen, pwe igine epwene wen, iwe nge oawpwe niugiuniug.

³⁰ Esoapw ssiunaei aaei kkepas ngaenigaemi, pwe manewe soamwoonin faeinaengiy epwene itto. Esooar maemaewan wooai,

³¹ pwe faeinaengiy epwe giuneei pwe ngaang iaerhaengi manna Semaei; ina faaen minne ifeeori oanongan meeta kka e iura pwe ipwe feeori.

“Oawitto, oawsa siusaengi pwiluneoi eei.

15

Jesus Minne Aeggaen Waniwan we

¹ “Ngaang minne oanongonniuwaen aeggaen *grape* we, nge manna Semaei minne rhooan foat. ² E gopyi noa oanongaen rae kka eno wooai ikka esooar uwaan, nge a maeneti ikkina e uwua pwe epwe towunap wow uwaan.

³ Iwe aaemi oawwa fasiun fin reen fenai kkewe iya aengaenigaemi.

⁴ Oawpwe no rhag reei nge ngaang ipwe pwan no rhag reemi. Ese mmwen eew rae epwe uwa aere epwe iiy noa rhag; nge epwe uwa aere epparh ngaeni miniwe rhaepin. Epwan ina rhag wusumi pwe oawsoapw uwa igine oawsoano reei.

⁵ “Ngaang minne *grapevine* we, iwe nge aaemi raaen. Iyo kka reno reei nge ngaang ino reer, epwe igin towunap uwaar; pwe esooar meeta oawpwe feeori igine isoano reemi.

⁶ Rhooakka resoanotiw reei nge repwe taeppen raaen irae kka e aekkaerh wow a noa ppwass noa; rae kena ina regaen ioni fengaenniy ra aerheei tae wooan aengaet pwe repwe ppwun noa.

⁷ Aere oawno reei nge minikka petenaen mwaeniaei eno reemi, ina nge ese tiwegin minne oawtingoar nge epwe yo ngaenigaemi.

⁸ Nningen manna Semaei ina epwe pwae noa igine a igin ssow uwaemi; iwe epwe iiei wusun aaemi oawpwene no pwe naeyi rhooan kkayeo.

⁹ Ngaang iaerhaengigaemi eweei rhag aaen minna Semaei aerhaengiae; oawno rhag noan aerhaengerhaeng e aaei.

¹⁰ Aere oawtapweei oasoapwosoapw kka aaei oawpwe no rhag noan aaei aerhaengerhaeng, taeppei rhag aaei tapweei rhag aaen manna Semaei oasoapwosoapw iwe iye ino rhag noan aan aerhaengerhaeng.

¹¹ “Iya aengaenigaemi minikkeei pwe epwe kker nee tipaemi, iwe nge kker na aaemi epwe wunus.

¹² Ieen minne aaei oasoapwosoapw ngaenigaemi: oaw aerhaengi fengaen-nigaemi, taeppen rhag aaei aerhaengigaemi.

¹³ Aerhaengerhaeng na e oarosaen taegias ina oawpwe fang ngaenir maereyaeremi ina oawpwe fang noa menewaemi pwe faan ngaenir.

¹⁴ Aaemi maereyaerei igine oawfeeori meeta kka i akkiuneogaemi.

¹⁵ Isa faingigaemi no pwe *slave*, pwe *slave* rese giuneei meeta aar maasta efeeori; iya faingigaemi pwe aaemi maereyaerei, pwe iga iya aengaenigaemi oanongaen minikka i rongorong me reen manna Semaei.

¹⁶ Oawse finiae; ngaang i finigaemi nge iya akkiuneogaemi pwe oawpwe noa pwe epwe gin noa ssow noa uwaemi, taeppen uwa kena esoapw meoyiur noa. Iwe manna Semaei epwe ngaennegaemi ese tiwegin meeta oawtingoar faaen itaei.

¹⁷ Iwe ieen oasoapwosoapw we iaengaenigaemi: oawaerhaengi fengaen-nigaemi.

Kkoapwut we Aaen Faeinaengiy

¹⁸ “Aere igine faeinaengiy e oapwutaegaemi, nge oawpwe maengiy rhag pwe ngaang minne epwe mwaan oapwutaeyaei.

¹⁹ Aere aaemi naiun faeinaengiy, ina nge faeinaengiy epwe aerhaengigaemi pwe iga aaemi naiun. Nge ngaang i finigaemi me noan faeinaengiy, iwe aaemi soapw naiun faeinaengiy; ina faaen minne faeinaengiy e oapwutaegaemi reen.

²⁰ Oawmaengiy rhag miniwe iaengaenigaemi: ‘Esooar *slave* ne e taegias saengi aan maasta.’ Aere aeremas re aewwaeiraesiae iwe ina nge repwe pwan aewwaeiraesigaemi; aere re tapweei fenai kka aaei iwe ina nge repwe pwan tapweei fenai kka aaemi.

²¹ Repwe feeori ngaenigaemi oanongaen minikkei pwe iga aaemi naeyi; pwe iga rese giuneei iyo na efangeto ngaang.

²² Aere ise itto mwaenieniy ngaenir nge ina resoapw monofit; iwe igina esooar no minne repwe rhiuwen tipi ngaeni reen aar monofit.

²³ Iyo na e oapwutaeyaei epwan oapwuta manna Semaei.

²⁴ Resoapw monofit aere ise feeori me neeiir meeta kkewe aeremas resaaen feeori mwo; nge igina iga iya feeori nge ra weri meeta kkewe ifeeori, iwe ra oapwutaeyaei noa me manna Semaei.

²⁵ Minneen e fasiun ffeeor to pwe minni epwe pwae noa meeta we e foatofloat noan aar anniug pwe ennet: ‘Ra oapwutaeyaei ne esooar faan.’

²⁶ “Manewe Rhooan Tipaengiaemi ina epwe itto—Espritu ina epwe pwaeritae minikkena e wenewen pwe wunuunun Deus nge iiy e itto me reen manna Semaei. Ipwene fangeto iiy reemi saengi manna Semaei, iwe nge iiy epwe aepesa wunuunuy.

²⁷ Iwe aaemi mwo nge oawpwe aepesa wunuunuy, pwe igiwe oawno reei saengi rhag rhaepetaen.

16

¹ “Iya aengaenigaemi minneei pwe ete ppiung noa aaemi niugiuniug.

² Repwe asiugaemi wow me noan wutteer Jews, nge epwe noa gona oatona nge rhoakkrena re ninnigaemi ina iir repwene niuwaennei pwe ra feeori eew engaang kkena aaen Deus.

³ Aeremas repwe feeori minikkei pwe iga rese weri manna Semaei aere ngaang.

⁴ Iwe nge iya fasiun aengaenigaemi minneei, pwe epwe noa itto oatona repwe noa feeori ngaenigaemi iwe nge emaeng ngaenigaemi minikka iya aengaenigaemi.

“Ise aengaenigaemi minikkeei rhaepetaen pwe igiwe i rhiuwen no reemi.

⁵ Iwe nge igina ipwene noa reen iyo na efangeto ngaang, iwe nge erhai mwo me neeimi nge ese aeiineo iya ipwe noa ee.

⁶ Nge igina iga iya aengaenigaemi, iwe ina oawpwene nee tip cchoaw noa.

⁷ Nge iaengaenigaemi minna wenewenen: pwe efafir mwamwaai igine ipwe nigitigaemi, pwe ngaere ise noa nge manewe Rhooan Tipaengigaemi esoapw itto reemi. Iwe nge ngaere igine inoa, ina nge ipwe noa fango reemi.

⁸ Nge oatona epwe noa itto, ina epwe pwaeri ngaenir aeremesaen faeinaengiy pwe rerug reen wunuunun monofit iwe me wunuunun minikka epwiung iwe me wunuunun aaen apwiung Deus.

⁹ Rerug reen monofit, pwe iga rese niugiuniug ngaeniaei;

¹⁰ rerug reen wunuunun minikka epwiung, pwe iga ngaang ipwene noa reen manna Semaei iwe nge oawsoapw rhiuwen weriae no;

¹¹ iwe nge rerug reen wunuunun apwiung, pwe iga manna soamwoonin faeinaengiy nge a fasiun no noan aegaeregaer.

¹² “Erhiuwen gin towunap minikka ipwe aengaenigaemi, iwe nge ina rhag maeni epwene igin cchoaw pwut ngaenigaemi.

¹³ Iwe ngaere epwe noa itto Espritu ina nge epwaeritae minikka ewenewen pwe wunuunun Deus, iwe nge epwe aeti ngaenigaemi oanongaen minikkena ennet. Soapw mwaenian wooan oanongan minikka epwe aepesa, pwe epwe aepesa meeta kena e rongorong, nge epwan aepesa meeta kka epwan itto.

¹⁴ Epwene ngaenneaei nning, pwe epwene pwigi minikka i aepesa iwe nge a itiwow aengaenigaemi.

¹⁵ Oanongaen minikka aaen manna Semaei nge aaei; iwe ina faaen minne iura pwe Espritu epwe pwigi meeta i aepesa nge a aengaenigaemi.

Nee Tip Cchoaw me Kker

¹⁶ “A faeiyegius rhag nge oawsoapw weriae no, nge epwe pwan faeiyegius noa nge oawpwene weriae.”

¹⁷ Aekkaerhai me neeiir rhoaan kkayeо kkewe ra aeiineo fengaen woar, “Iwe meeta faaen minnee? E iura pwe a faeiyegius rhag nge sisoapw weri no, nge epwe pwan faeiyegius noa nge sa pwene weri; iwe nge epwan iura pwe, ‘Pwe iga ipwene noa reen manna Semaei.’”

¹⁸ Iwe nge meeta faaen minne, ‘a faeiyegius rhag?’ Sise giuneei faaen meeta kka e iukkiura!”

¹⁹ Jesus egiuneei meeta kkewe remwerhaen aeiineow, iwe a aengaenir pwe, “Iaengaenigaemi pwe, ‘A faeiyegius rhag nge oawsoapw weriae no, nge epwe pwan faeiyegius noa nge oawa weriae.’ Ieen miniwe oawaekkaeyiineo fengaen woami?”

²⁰ Ennetaaen, ipwe aengaenigaemi minna wenewenen: oawpwe saeng nge aenneew noa nee tipaemi, iwe nge faeinaengiy epwene gacch tipan; aaemi oawpwene cchoaw nee tipaemi, iwe nge aaemi nee tip cchoaw epwe ssiuwen ngaeni kker.

²¹ Igine epwe timenaw erhai rhooopwut, a igin nee tip cchoaw reen aan affayeo; iwe nge oatona enoa supw aetewe a maniuwegi noa aan affayeo pwe a igin kker, pwe a supwuto erhai wonigaet noan faeinaengiy.

²² E ieei pwan wunuunumi: igina oawa nee tip cchoaw, iwe nge ipwan weri sefaaenigaemi rhag, nge minikkena nee tipaemi epwene pwan igin kker, esooar erhai ne epwe mmwenen pwigi saengigaemi.

²³ “Epwe noa itto raaennenaan, esooar minne oawpwe aeiineowaei. Enetaen, ipwe aengaenigaemi minna wenewenen: manna Semaei epwe ngaennegaemi ese tiwegin meeta oaw aeiineo faaen itaei.

²⁴ Toorito igina, esaaen yor meeta ne oawtingoar faaen itaei; oawtingoar nge epwe yo ngaenigaemi, pwe epwe wunus noa aaemi kker.

Jesus a Apwiungiu Faeinaengiy

²⁵ Iya gaen aengaenigaemi minikkaan noan fioangon awewe. Iwe nge epwe noa itto eew oat ina isoapw rhiuwen fioang awewe ngaenigaemi no, ipwene aeffeta noa aaei kkepas ngaenigaemi reen mmwenen minna Semaei.

²⁶ Epwe noa itto raaennenaan, nge oawpwe tingoar ngaeni faaen itaei; nge ngaang ise iura pwe ipwe tingoar ngaeni reen mmwenemni,

²⁷ pwe iiy mwo manna Semaei nge e aerhaengigaemi. Eaerhaengigaemi pwe iga oaw aerhaengiae, iwe nge oaw niugiuniug pwe ngaang itto me reen Deus.

²⁸ Ngaang itto me reen Deus, iwe iya itto noan faeinaengiy; iwe igina ipwene nigit faeinaengiy iwe nge iya sefaaen noa reen manna Semaei.”

²⁹ Rhooan kkayeo kkewe naiun ra aengaeni pwe, “Igina nge a ffat mwae-nioamw, inamwo ikka wose aeyae fioangon awewe.

³⁰ Igina aeiguneei pwe wo giuneei oanongaen aegiaeg; esooar ipitaen aar aeremas kkepas aekkaeyiyeg ngaeniug. Reen minnee minne aeiya niugiuniug pwe een wo itto me reen Deus.”

³¹ Jesus a paniuwaeniir pwe, “Oawwa niugiuniug igina?

³² A itto oatowe iye a no igeei, oatowe erhai me erhai aaemi epwene mwetoar, erhai nge enoa neepwugusan, nge ngaang oawpwene nigitiae tiw. Nge esoapw ngaang noa rhag, pwe manna Semaei iye eno reei.

³³ Iya aengaenigaemi minnee pwe oawpwe nonoan oapoas reen aaemi rhu ngaeniaei. Faeinaengiy epwe affayeogaemi. Oawaemenetaegaemi! Pwe ngaang iya appiungiu faeinaengiy!”

17

Jesus a Maeipinaar Rhooan Kkayeo Kkewe Naiun

¹ Wenimwirin aaen Jesus oamoanna noa minnee nge a fannoaa naaeng nge a iura pwe, “Semaei, a tooto oatowe. Fang ngaeni mwaaen we Noawumw nning, pwe aegin mwaaen na Noawumw epwe fang ngaeniug nning.

² Pwe een wa ngaennee mamaaw pwe epwe aeni noa wooar oanongeer aeremas, pwe aegin epwe fang ngaenii aeremas kena wo ngaennee menaw na esooar iaenin.

³ Nge wewen menaw na esooar iaenin ina repwe giuneog, pwe een rhag minne oanongonniwaen Deus, nge repwe pwan giuneei Jesus Kristus iwe wo fangetiw.

⁴ Iya pwaeri noa nningomw me wooan feoniufan; nge iya oamoanna noa engaang we wo ngaenneaiei.

⁵ Semaei, igina fang ngaeniaei nningei me faaen mesoamw, taeppen rhag nning we i aeni me reemw wenimwaaen aan ffeeor faeinaengiy.

⁶ “Iya pwaeri itoamw ngaenii iyo kkewe wa ngaenneaiei me noan faeinaengiy. Iir noawumw, nge wa fangeto reei pwe naeyi. Retapwee mwaenioamw,

⁷ iwe igina ra giuneei pwe oanongaen minikkewe wofang ngaeniaei nge e itto me reemw.

⁸ Iya fang ngaenir kkepas we wongaenneaei, iwe nge iir ra pwigi; ra giuneei pwe ennet pwe ngaang itto me reemw, iwe nge re niugiuniug pwe een minne wo aefengaeyaei to.

⁹ “Ngaang imaeipinaar. Ngaang ise maeipina faeinaengiy pwe imaeipinaar rhoowe wofang ngaeniaei, pwe iir noawumw.

¹⁰ Oanongaen minikka aaei nge oamw, nge oanongaen minikka oamw nge aaei; nge a pwae noa nningei me reer.

¹¹ Iwe igina iya itto reemw; ngaang isoapw nono noan faeinaengiy, iwe nge iir repwe no noan faeinaengiy. Semaei ina e santus, aefaenniir reen kkemenaen minna itoamw, itiwe wongaenneaei, pwe aegin pwe repwe eew rhag, taeppen iga een me ngaang si eew rhag.

¹² Igiwe ino reer, nge iaemmwenaar faaan kkemenaen minna itoamw, itiwe wongaenneaei. Iaefaenniir nge erhai mwo me neeiir nge ese mwaenirh noa, pwe aeggaen mwaaen we rhag e fasiun itto pwe epwe mwaenirh noa—pwe epwe nnet noa miniwe noan Pwapwior we e Santus.

¹³ Iwe igina iya itto reemw, iwe nge iaepesa minikkei me noan faeinaengiy pwe repwe iseni kker na aaei reer.

¹⁴ Iya fang ngaenir kkepas we oamw, iwe nge faeinaengiy a oapwutaar, pwe iga iir saapw naiun faeinaengiy, taeppen rhag iye saapw ngaang naiun faeinaengiy.

¹⁵ Ngaang ise tingoareog pwe wopwe pwigiir wow me noan faeinaengiy, pwe ifaer tingoareog pwe wopwe aefaenniir me reen Man Aenneew we.

¹⁶ Taeppen rhag iga ngaang saapw naiun faeinaengiy, iwe iir saapw naiun faeinaengiy.

¹⁷ Aeyimweoiiur wow reemw noan wenewen; mwaenioamw nge e wenewen.

¹⁸ Iya fang wow iir noan faeinaengiy, taeppen een igiwe wofang to ngaang noan faeinaengiy.

¹⁹ Pwondo reer minne iya aeyimweoi wow oanongaei reemw, pwe pwondo iir repwe pwan fang wow oanongeer reemw noan wenewen.

²⁰ “Ngaang ise maeipinaar rhag, pwe ipwan maeipinaar iyo kena re niugiuniug ngaeniaei pwe reen petenaen minikkena mwaenieer.

²¹ Semaei, imaeipin pwe iir repwe eew rhag, nge iir repwe no reerh, taeppen rhag iga wono reei nge ngaang ino reemw, pwe iir repwe eew rhag, pwe ina nge faeinaengiy epwe niugiuniug pwe een wofang to ngaang.

²² Ngaang iya fang ngaenir nning we wongaenneaei, pwe aegin iir repwe eew, taeppen rhag iga een me ngaang si eew rhag:

²³ ngaang ino reer, iwe nge een wono reei, pwe aegin iir repwe oanon-gonniwaen eew rhag, pwe aegin faeinaengiy epwe giuneei pwe een minne wofangeto ngaang, iwe een wo aerhaengiir taeppen rhag oamw aerhaengiae.

²⁴ “Semaei, wa ngaenneaei to iir reei, nge ngaang imwerhaen repwe no reei iga ino ee, pwe repwe weri minna nningei, nning we wofang ngaeniaei; pwe een wo fasiun aerhaengiae to rhag me weni mmwan aan epwe feor noa faeinaengiy.

²⁵ Semaei we wo oanongonniwaen ennet, faeinaengiy ese giuneog, iwe nge ngaang i giuneog, nge rhooa eei regiuneei pwe een minne wofangeto ngaang.

²⁶ Ngaang iya pwaeri itoamw ngaenir, nge ipwan sessoapwei noa rhag, pwe aegin aerhaengerhaeng na oamw ngaeniaei epwe no reer, ina nge ngaang ipwan no reer.”

18

Ra Torofi Jesus

(Mat 26.47-56; Mark 14.43-50; Luke 22.47-53)

¹ Weni mwirin aaen Jesus aeni maeipin eei, iwe iiy me rhooan kkayeo kkewe naiun ra noa reen rhan pwupwu we Kidron. Eno eew maat pwiuneoi we, iwe Jesus me rhooan kkayeo kkewe naiun ra noa ee.

² Rhooan a fang tinnimae we Judas e giuneei pwiuneoi we, pwe a gin towunap aaen Jesus me rhooan kkayeo kkewe naiun renoa rhu me ee.

³ Iwe Judas a noa noan maat we, iiy me cchon sonotaweer Rome kkewe, iwe me aaemweoi poosun *Temple* we, aefengayeer soamwoonin patere me Pharisees kkewe; re itto fengaen me nimeer me oappwun me tiun.

⁴ Jesus e fasiun giuneei oanongaen meeta epwene wen ngaeni, iwe a faaeraeg ngaenir nge a aeiineor pwe, “Iyo mwu oawkiukkiutta?”

⁵ Ra iura pwe, “Jesus re Nazareth.”

Nge a iura pwe, “Ngaang ieei.”

Rhooan a fang tinnimae we Judas e iugiu reer.

⁶ Oatowe Jesus e aengaenir pwe, “Ngaang ieei,” nge ra mer sefaaen iwe ra ppiungtiw wooan ppweon.

⁷ Jesus a pwan aeiineor pwe, “Iyo mwu oawkiukkiutta?”

Ra iura pwe, “Jesus re Nazareth.”

⁸ Jesus a iura pwe, “Iya moannon aengaenigaemi pwe ngaang iiy. Iwe ngaere ngaang minne oawkiukkiuttayaei, ina nge oawpwe nigliir noa ikka aaemweoi.” (

⁹ Jesus e aepesa minnee pwe menaen kkepas we e aengaenir epwe pwae noa: “Semaei, esooar mwo erhai me neeir rhooawe wo ngaenneaei ne emwaenirh saengiae.”)

¹⁰ Simon Peter, iwe e pwigi epeo saeitan, e waeitiae rhag a gopiy noa peig mwaaenen saeningaen erhai rhooan akkiuneo kkewe naiun Soamwoonin Patere we. Itaen rhooan akkiuneo we nge Malchus.

¹¹ Jesus a aengaeni Peter pwe, “Iseni noa saeitan mwu noawumw! Wo niuwaenuei pwe isoapw iuniumi kkepaen affayeo mwu manna Semaei efang ngaeniaei?”

Jesus me Weni Mmwaen Annas

¹² Iwe sonotawaen Rome kkewe me soamwoon kkewe aar fengaen me poos kkewe aar Jews ra torofi Jesus iwe ra geoni noa,

¹³ iwe ra pwigi noa reen Annas. Iiy minne semaen rhooan ngaenne aaen Caiaphas, iwe iiy minne Soamwoonin Patere noan raegin we.

¹⁴ Caiaphas minne e aengaenir soamwoonin Jews kkewe pwe egacch igine erhai aeremas epwe mae noa faaen iteer rhooa towunap.

Peter e Iura pwe Ese Giuneei Jesus

(Mat 26.69-70; Mark 14.66-68; Luke 22.55-57)

¹⁵ Simon Peter me erhai rhooan kkayeo kkewe re tettapw noa weni mwirin Jesus. Iiy rhooan kkayeo we erhai iwe e fasiun gin me reen Soamwoonin Patere we, iwe a tapwee noa Jesus niugiu wororaen iimw we imwaen Soamwoonin Patere we,

¹⁶ iwe nge Peter iwe e iu rhag reen aesemaen iimw we. Iwe rhooan kkayeo we erhai a sefaaen wow niugiu a noa itiwow kkepas ngaeni rhooapwut we reen wororaen iimw we, iwe a noa paeni nong Peter.

¹⁷ Rhooapwut we reen aesemaen iimw we a aengaeni pwe, “Saapw pwan een erhai rhooan kkayeo kkewe rhoaniwaen mwaaen naan?”

Peter a iura pwe, “Aapw, saapw ngaang.”

¹⁸ Epatapat noan oatowe, iwe rhooan akkiuneo kkewe me poos kkewe ra sonitae eew aengaet iwe ra iu roangoroangei noa pwe re aepwerhikkeraar. Iwe Peter a faaeraeg noa reer iwe a noa aepwerhikkera oanongan.

Manewe Soamwoonin Patere a Kkepas Aeiyeg Ngaeni Jesus

(Mat 26.59-66; Mark 14.55-64; Luke 22.66-71)

¹⁹ Soamwoonin Patere we a aeiyegiy Jesus wunuunun rhooan kkayeо kkewe naiun me fenai kkewe aan.

²⁰ Jesus a iura pwe, “Oanongaen aaei mwaenieniy ngaenir rhooa towunap; me aaei fenai nge isooaw no rhag noan wutteer Jews kkewe me *Temple* we, pwioneoi we oanongeer aeremas regaen itto aemmweoiu ee. Esooar faaen eew ne imwaenieniy nge imwaenieniy noan mwoanomwoan.

²¹ Iwe ina nge meeta faan oawwa aeiineowaei reen? Aeiineor rhooawe re aiussaening ngaeniaei. Aeiineor meeta we iaengaeniir—iir regiuneei meeta kkewe iaepesa.”

²² Oatowe Jesus e aepesa minneei, nge erhai me neeiir poos kkewe a pigiri nge a aengaeni pwe, “Meeta e ina wusun oamw kkepas ngaeni man mwu Soamwoonin Patere reen!?”

²³ Jesus a aengaeni pwe, “Aere eyor eew min mwaerhei ne iaepesa nge wa aengaeniir rhooa eei minne iiy. Iwe ngaere epwiung minne iaepesa, iwe nge meeta faaen oamw peosepaeyaei?”

²⁴ Iwe Annas a fangenoa iiy reen Caiaphas Soamwoonin Patere we, nge erhiuwen geeogeo noa rhag.

Peter a Pwan Iura Sefaaeniy pwe Ese Giuneei Jesus

(Mat 26.71-75; Mark 14.69-72; Luke 22.58-62)

²⁵ Peter iwe erhiuwen iu igiwe pwe e aepwerhikkera oanongan. Iwe ra aengaeni pwe, “Saapw pwan een erhai rhooan kkayeо kkewe naiun mwaaen naan?”

Iwe Peter a iura pwe, “Saapw ngaang.”

²⁶ Erhai me neeiir *slave* kkewe naiun Soamwoonin Patere we, iwe re pwugusaen mwaaen we Peter e gopyi noa saeningan, a iura pwe, “Pwe ise weriug me reen noan maat we?”

²⁷ Iwe Peter a pwan iura pwe, “Saapw ngaang.” Iwe rhag nge e keokkeok noa maniug we.

Jesus me Weni Mmwaen Pilate

(Mat 27.1-2, 11-14; Mark 15.1-5; Luke 23.1-5)

²⁸ Neeatosor moawugowug rhag nge ra pwigi Jesus me reen imwaen Caiaphas iwe ra pwigi noa reen imwaen *governor*. Soamwoonir re Jew kkewe rese toonong noan imwaen *governor*, pwe rete nimaenneew noa nge epwe yo aar repwe mwongo mwongoon *Passover* we.

²⁹ Iwe Pilate a toowow niugiun a itiwow aeiineor pwe, “Meeta minne oaw oamonofitiy aeremas een wooan?”

³⁰ Ra paniuwaeni pwe, “Aeisoapw pwigito reemw igine esooar eew min aenneew ne efteeori.”

³¹ Pilate a aengaeniir pwe, “Iwe ina nge aaemi oaw pwigi iwe oawwa noa apwiungiu reen aaemi anniug.”

Ra paniuwaeni pwe, “Esooar aemaem mamaaw pwe aeipwe niyy noa erhai.” (

³² A wen minneei pwe epwe pwaetae miniwe mwaeniaen Jesus igiwe e aemmetefa wunuunun mae na epwe aeni.)

³³ Pilate a sefaaen nong noan iimw we imwan nge a faingi Jesus. A aeiineow pwe, “Een minne aar *king* re Jews?”

³⁴ Jesus a iura pwe, “Kkepas aeiyyeg na eitto me reemw, aere aaemweoi minne re aengaeniug mmwenei?”

³⁵ Pilate a iura pwe, “Wo niuwaennei pwe ngaang erhai re Jew? Sipecin noawumw aeremas me soamwoonin patere kkomwun minikkomwu repwigiug to reei. Meeta wa feeori?”

³⁶ Jesus a iura pwe, “Minna Mweoiuy ina ese itto me reen faeinaengiy; pwe ngaere minna Mweoiuy eitto me reen faeinaengiy, nge rhooakkena rhoaniuwaei repwe moawun faaen itaei pwe ete mmwenen aar iseniaei nong noan paiur soamwoonin Jews. Aapw, minna Mweoiuy ese no igeei!”

³⁷ Iwe Pilate a aeiineow pwe, “Iwe een erhai *king*? ”

Jesus a paniuwaeni pwe, “Een minne wo iura pwe ngaang erhai *king*. Faaen aaei supw me aaei noa itto noan faeinaengiy ina faaen ngaeni rhag eew aegiaeg, ipwe itto aepesa minna wenewen. Ese tiwegin iyo na etipaeni wenewen, nge epwe rongorong ngaeniaei.”

³⁸ Pilate a aeiineow pwe, “Iwe meeta minna wenewen?”

*Ra Aettiweginiy Aaen Jesus Mae Noa
(Mat 27.15-31; Mark 15.6-20; Luke 23.13-25)*

Pilate a sefaaen wow reer rhooawe niugun nge a aengaenir pwe, “Esooar meeta iweri pwe teren mwaaen een.”

³⁹ Nge eew kkomi, iwe ngaang igaen fasiun aessaenetaegiy erhai rhooan kanepwus noan gupwunon *Passover*. Oaw mwerhaen ipwe saeneti ngaenigaemi mane aar *king* Jews?”

⁴⁰ Ra paniuwaeni reen aar aekkepwas tae, “Aapw, saapw iiy! Aetipaeni Barabbas!” (Barabbas iwe erhai rhoca mwoarho.)

19

¹ Iwe Pilate a pwigi noa Jesus ra noa woawuti.

² Sonotaw ra fiti eew mwaer saengi irae towfanfan nge ra ngaettai wooan rhimwen; iwe ra pwigi eew mengaag siungiurhoan enaenaei pwe mengaagiun ³ nge ra itto reen nge ra iura pwe, “Sirow woamw, Kingaen Jews!” Nge regaen faaeraeg ngaeni nge re pigiri sepan.

⁴ Pilate a pwan sefaaen nge a pwan aengaeni pwuwa we pwe, “Oaw pipiiy, ipwene paeni wow reemi pwe oawpwe weri pwe ngaang esooar meeta ne iweri pwe teren mwaaen een.”

⁵ Iwe Jesus a toowow nasam nge emwaermwaer irae towfanfan we nge ememmengaag mengaag siungiurhoan enaenaei we. Pilate a aengaenir pwe, “Ieen iiy mwaaen we!”

⁶ Oatowe soamwooniir patere kkewe me soamwoonin *Temple* we reweri nge ra aepwesaegini pwe, “Kurusuw noa! Kurusuw noa!”

Pilate a aengaenir pwe, “Oaw pwigi aaemi pwe oawpwe noa kurusuw noa. Ngaang esooar minne iweri pwe teren mwaaen een.”

⁷ Pwuwa we a pwan paniuwaeni pwe, “Eyor aemaem oasoapwosoapw nge eiura pwe epwe mae, pwe iga eiura pwe iiy Naiun Deus.”

⁸ Oatowe Pilate a rongorong miniwe, a kkaein noa aan mesag.

⁹ A pwan sefaaen nong noan iimw we imwan a pwan aeiineow Jesus pwe, “Wo itto me iya?”

Jesus ese paniuwaeni.

¹⁰ Pilate a aengaeni pwe, “Wose mwerhaen mwaenieniy ngaeniaei? Maengiy pwe ngaang minne eyor maemaewaei pwe ipwe saenetiug noa aere ipwe kurusug noa.”

¹¹ Jesus a paniuwaeni pwe, “Eyor rhag maemaewoamw wooai pwe iga Deus engaenneog. Ina minne aeremas we efang noa menewaei ngaeniug ina epwe igin temoag monofit na aan.”

¹² Igiwe Pilate a rongorong miniwe, a giutta epwe ifa wusun aan saeneti noa Jesus. Iwe nge pwuwa we a pwan aekkepwas aegini pwe, “Aere igine wo saeneti noa nge saapw een maereyaeren Soamwoonin Rome we! Erhai ne eiura pwe iiy *king* nge ina nge a appaniuwaeni minna soamwoonin Rome!”

¹³ Igiwe Pilate a rongorong petenaen kkepas kkewe iwe a paeni wow Jesus nasam iwe a mooat tiw wooan miniwe nenien soaw apwiung iwe regaen iura pwe “Taeyif”. (Iwe nge noan kkepesaen Hebrew nge “Gabbatha”.)

¹⁴ A aerepa nugunupaen oanowas noan raaenin we wenimmwaen Passover. Pilate a aengaeniir aeremas kkewe pwe, “Ieen iiy *king* we naimi!”

¹⁵ Nge iir ra aekkepwas pwe, “Niiy noa! Niiy noa! Kurusuw noa!”

Pilate a aeiineeor pwe, “Oaw mwerhaen ipwe kurusuw noa *king* e aaemi?”

Soamwooniar patere kkewe ra iura pwe, “Esooar aemaem *king* pwe Soamwoonin Rome rhag!”

¹⁶ Iwe Pilate a ateeow nong Jesus noan paijur pwe repwene noa kurus noa.

A Kurus Noa Jesus

(Mat 27.32-44; Mark 15.21-32; Luke 23.26-43)

Iwe rhooawe ra pwigi noa Jesus.

¹⁷ Eitiwow a aiufera kurus we aan a itto reen eew pwiuneoi itan “Nenien Peopeoi rhimw”. (Noan Hebrew nge “Golgotha”.)

¹⁸ Pwiuneoi we ra kurus noa me ee; nge repwan kurusuur noa riiurhai mwaaen, erhai iir nge eno me epeig, iwe nge Jesus eno nepeteer.

¹⁹ Pilate a foatogi eew pwapwior nge a iseni tae wooan kurus we. Eiura pwe, “Jesus aaen Nazareth, iiy minne *Kingaen* Jews.”

²⁰ Re igin towunap rhooan aeraegi pwapwior we, pwe iga pwiuneoi we Jesus e kurus noa me ee nge ese taaw saengi aepinoamw. Pwapwior we nge e foatofoat noa Hebrew, Latin me Greek.

²¹ Man kkewe soamwooniar patere ra aengaeni Pilate pwe, “Wosoapw foatogi pwe ‘*king* reer Jews’, pwe wopwe faer foatogi pwe ‘Mwaaen een e iura pwe, Ngaang minne *king* reer Jews.’”

²² Pilate a aengaeniir pwe, “Minne iya foatogi nge ina minna epwe foat.”

²³ Weni mwirin aar sonotaw kkewe kurusuw noa Jesus, ra pwigi minikkewe mengaagiun iwe ra itto giniiy wooar faaen faawu, erhai sonotaw nge epeo. Ra pwan pwigi mengaag enaenaei we, iwe effeelor saengi epeo mengaag nge esooar oarhurhun teteen.

²⁴ Sonotaw kkewe ra iura fengaenniy pwe, “Sisoapw fereei; sipwe aekkaerh *dice* iyo ne epwe pwigi.” A wen minnee pwe epwe nnet miniwe Pwapwior we e Santus, iwe e iura pwe:

“Re inetiy minikka mengaagiuy wooar

nge re aekkaerh *dice* reen mengaag enaenaei we mengaagiuy.”

Iwe nge ina miniwe sonotaw kkewe refreeori.

²⁵ Rhooakka re igin iu arap ngaeni miniwe kurusun Jesus, nge manewe inan, manewe pwiin inan, Maria we pwiuniwaen Clopas, me Maria Magdalene.

²⁶ Jesus a weri miniwe inan me rhooan kkayeo we naiun iwe eigin aerhaengi pwe reiu; a aengaeni miniwe inan pwe, “Ina iiy mwaaen we noawumw.”

²⁷ Iwe nge a aengaeni rhooan kkayeo we pwe, “Ina iiy minimwu inoamw.” Iwe saengi oatowe a noa, rhooan kkayeo we a pwigi niewe pwe epwe noa no reen noan iimw we imwan.

Maenoan Jesus

(*Mat 27.45-56; Mark 15.33-41; Luke 23.44-49*)

²⁸ Jesus a giuneei pwe oanongaen meeta nge a moann; pwe epwe nnet miniwe eno noan Pwapwior we e Santus, nge a iura pwe, “Ngaang iya moar.”

²⁹ Eew saepiy eno pwiuneoi we ne esseogiu *wine* kkewe emwaenn; ra rhirinong eew faerewa noan, ra ngaettae wooan efoarh raaen *hyssop*, ra seigi tae reen ewan.

³⁰ Jesus a iuniumi *wine* we nge a iura pwe, “A moann!”

Jesus a aiuneorhimw tiw rhag nge a fangetae ngeoniu.

Ra Towuuw Wenepeigin Jesus

³¹ Iwe man kkewe soamwooniir Jews ra tingoareei Pilate pwe epwe fang ngaeniar pwe repwe gopyi pirheer mwaaen kkewe re kurusuur noa, iwe me repwe aetiweer tiw me wooan kurus kkewe. Re tingoar miniwe pwe igiwe a aenimowu, nge rese mwerhaen pwe rhooa kkewe repwe no rhag wooan kurus wooan Sabbath, pwe igiwe Sabbath we epwe itto nge e igin ssoar.

³² Iwe sonotaw kkewe ra noa gopyi pirheen mwaaen we erhai, iwe me pwan iwe erhai, iwe re kurusuur noa reen Jesus.

³³ Nge igiwe re itto reen Jesus, ra weri pwe a fasiun mae, iwe resa gopyi no pirheen.

³⁴ Iwe nge erhai me neeiir sonotaw kkewe a pwigi wopwaei we a towuuw ngaeni wenepeigin Jesus, iwe a pwupwu noa ccha me rhaan. (

³⁵ Aeremas na eweri minneei a fioangei fetaeneei pwe oawpwe niugiuug. Miniwe e aepesa nge ewenewen, nge iiy e giuneei pwe e aepesa minna e wenewen.)

³⁶ A wen minneei pwe epwe nnet miniwe noan Pwapwior we e Santus, iwe e iura pwe, “Eew mwo rhiun nge resoapw gopyi.”

³⁷ Nge epwan yor eew miniwe noan Pwapwior we e Santus iwe e iura pwe, “Aeremas ra oawruru mwaaen we re towuuw.”

Paeyinoan Jesus

(*Mat 27.57-61; Mark 15.42-47; Luke 23.50-56*)

³⁸ Mwirin minneei nge Joseph, erhai re Arimathea, a aeiineow Pilate aere epwe mmwenen pwigi miniwe oanongaen Jesus. (Joseph iwe erhai naiun Jesus rhooan kkayeo, nge ese aekkefaet fetaen, pwe e mesagiiur soamwoon kkewe aar Jews.) Pilate a aengaeni pwe epwe mmwenen pwigi oanong we. Iwe Joseph a noa pwigi oanong we.

³⁹ Nicodemus, iwe egommwaei noa sengaeri Jesus nee pwoong, a tapweei noa Joseph iwe nge e pwigi epwiugiu poawunon waninges tonaaen *myrrh* me *aloes* pwe angesan.

⁴⁰ Iwe mwaaen kkewe riiurhai ra pwigi oanong we, iwe ra tiugumi noa noan mengaag pwerhepwerh fengaen me waninges kkewe, e tapweei wunuunun kkoor Jews reen aar nipwaenipw.

⁴¹ Yor eew maat pwiuneoi we re kurusuw Jesus me ee, iwe nge eno paeyi ffeo esaaen yor mwo mane e nipwaeni nong noan.

⁴² Ra iseni nong rhag miniwe oanongaen Jesus igiwe pwonno igiwe a eraaen rhag me weni mmwaen Sabbath, iwe me igiwe paeyi we e arap.

20

Paeyi we Epeo

(Mat 28.1-8; Mark 16.1-8; Luke 24.1-12)

¹ Nee oatosoraei Sunday, igiwe e rhiuwen pwoong, nge Maria Magdalene a noa reen paeyi we, iwe nge a noa weri pwe fai we tittin aesemaen paeyi we a mwagiut saengi miniwe nenien.

² A fattapw noa reen Simon Peter me rhooan kkayeo we erhai, mwaaen we Jesus e igin aerhaengi, nge a aengaeniir pwe, “Ra pwigi noa Soamwoon me noan paeyi we, nge aeise giuneei igine ra pwigi noa ee!”

³ Iwe Peter me rhooan kkayeo we erhai ra noa reen paeyi we.

⁴ Iir me riiurhai nge re fattapw ppag noa, nge rhooan kkayeo we erhai enang me mmwaen Peter, iwe a gommwonoa gona paeyi we.

⁵ A pwoar tiw iwe a weri mengaag pwerhepwerh kkewe, iwe nge ese teogach nong noan paeyi we.

⁶ Simon Peter epwan mwiriy to, e itto rhag itto teeo foar nong noan paeyi we. A weri mengaag pwerhepwerh kkewe pwe ewon

⁷ fengaen me mengaag we geeogeeon rhimwen Jesus. Ese rhunong neeiin mengaag kkewe aaemweoi pwe iiy e oawunnu noa rhag.

⁸ Nge iwe rhooan kkayeo we erhai, iwe egommwaen gonoa paeyi we, iiy a pwan toonong; a weri iwe a niugiuniug. (

⁹ Resaaen metefaaegini mwo reen miniwe eno noan Pwapwior we e Santus iwe e iura pwe iiy epwe menaw saengi mae noa.)

¹⁰ Iwe rhag nge rhooan kkayeo kkewe ra pwan sefaen noa nee pwuguseer.

Jesus a Pwae Ngaeni Maria Magdalene

(Mat 28.9-10; Mark 16.9-11)

¹¹ Maria e rhiuwen iu saeng niugiun paeyi we. Igiwe e rhiuwen sessaeng, a pwoar tiw pwe a fan nong noan paeyi we

¹² iwe a weriir riiurhai angkenus re mengaag pwerh ffat noa rhag, remooat igiwe eno miniwe oanongaen Jesus ee, erhai emooat reen rhimwen nge erhai reen pirheen.

¹³ Ra aeiineow pwe, “Rhooapwut mwuun, meeta wosaeng reen?”

A paniuwaeniir pwe, “Ra pwigi noa aaei Soamwoon nge ise giuneei igine ra pwigi noa ee!”

¹⁴ Enoa toagun sefaen nge a weri Jesus pwe e iu igiwe; nge ese giuneei pwe Jesus.

¹⁵ Jesus a aeiineow pwe, “Rhooapwut mwuun, meeta wosaeng reen? Iyo mwu wo kiukkiutta?”

Nieuwe e niuwaenai pwe rhooan maat we, iwe a aengaeni pwe, “Menap, ngaere wa pwigi noa iwe nge wopwe aengaeniai igine wonoa iseni noa ee, pwe ipwe noa iya noa pwigi.”

¹⁶ Jesus a aengaeni pwe, “Maria!”

Nieuwe a toagun ngaeni nge a iura noan kkepesaen Hebrew pwe “Rabboni!” (Faan nge “Sinsei”.)

¹⁷ Jesus a aengaeni pwe, “Wosoapw kkemwarh tae wooai, pwe ngaang isaaen ittae mwo reen miniwe Semaei. Iwe nge wopwe sefaen noa reer rhooawe pwiiy nge wa aengaeniir pwe ngaang ipwene sefaen noa reen miniwe Semaei me Semeer, aaei Deus me aar Deus.”

¹⁸ Maria Magdalene a noa aengaeniir rhooan kkayeo kkewe pwe a weri Soamwoon, nge a pwan aengaeniir meeta we Soamwoon e aengaeni.

Jesus a Pwae Ngaeniir Rhooan Kkayeo Kkewe Naiun

(Mat 28.16-20; Mark 16.14-18; Luke 24.36-49)

¹⁹ A nee oatofaaef noan iiy Sunday we, nge rhoaan kkayeo kkewe ra mweoiu fengaen, iwe ra noakkei noa asam pwe igiwe remesagiiur Soamwoonin Jews kkewe. Jesus a itto iunoa neeiir, nge a iura pwe, "Oapoas epwe no reemi."

²⁰ Mwirin aan aepesa minneei nge a pwaeri ngaeniir noan paiun me miniwe wenepeigin. Rhooan kkayeo kkewe ra igin kker tae igiwe ra weri Soamwoon.

²¹ Jesus a pwan aengaeniir pwe, "Oapoas epwe no reemi. Taeppen Semaei a fangeto ngaang, iwe ngaang iya fangenoa aaemi."

²² Iwe Jesus a nngastiwooar iwe nge a aengaeniir pwe, "Epwe no Espritu Santus woami."

²³ Aere oawsaeneti monofitiir aeremas nge epwe saenetaeg; nge aere oawse saeneti nge esoapw saenetaeg."

Jesus me Thomas

²⁴ Erhai me neeiir rhooa kkayeo kkewe seig me riiurhai itan Thomas (iwe regaen iura Nippwei), e soano reer reen oatowe Jesus eitto.

²⁵ Rhooan kkayeo kkewe aaemweoi ra aengaeni pwe, "Aeiya weri Soamwoon!"

Thomas aengaeniir pwe, "Aekkaen igine iweri nepeyin kinesaen chiufan kkewe noan paiun nge iya aeitinong aiuttiuy noan ginesaen paiun me tugunong noan ginas we wenepeigin, iwe nge ipwe naaen niugiuniug."

²⁶ Enoa eew week me mwirin, rhoaan kkayeo kkewe ra pwan rhu fengaen me nee iimw, iwe nge Thomas a no reer. Asam kkewe nge e noak, iwe nge Jesus eitto a itto iunoa neeiir nge a aengaeniir pwe, "Oapoas epwe no reemi."

²⁷ Nge a aengaeni Thomas pwe, "Aeiti nong aiuttiumw iga, iwe wa pipiiy minikka paeyi; iwe nge wa aeitito poawumw pwe wopwe tugunong noan minne wenepeigi. Wone iugiu noa mwo me oamw se niugiuniug, iwe wone niugiuniug!"

²⁸ Thomas a paniuwaeni pwe, "Aaei Soamwoon nge aaei Deus!"

²⁹ Jesus a aengaeni pwe, "Wo niugiuniug rhag iga woweriae? Ifa mwo aar kker rhoakka re niugiuniug nge rese weriae!"

Ipitan Pwapwior Ieen

³⁰ Egin towunap kkeman kka Jesus a feeori weni mmweer rhoaan kkayeo kkewe naiun ikka ese foat noan pwapwior eei.

³¹ Iwe nge ikkei a foatotiw pwe aegin pwe oawpwe niugiuniug pwe Jesus minne Kristus, Naiun Deus, iwe nge noan aaemi niugiuniug ngaeni oawpwe weri menaw.

21

Jesus a Pwae Ngaeniir Rhooan Kkayeo Kkewe Fiusuman

¹ Wenimwirin minneei nge Jesus a pwan pwae ngaeniir rhoaan kkayeo kkewe naiun reen meoneoiniun we Tiberias. E ieen wusun aan pwae ngaeniir.

² Simon Peter, Thomas (iwe regaen iura pwe Nippwei), Nathanael (erhai re Cana me noan Galilee), mwaaen kkewe naiun Zébedee, iwe me riiurhai rhoaan kkayeo kkewe naiun Jesus resseou fengaen.

³ Simon Peter a aengaeniir ikkiwe aaemweoi pwe, "Ipwene noa fita."

Rhooa kkewe ra aengaeni pwe, "Aemaem aeipwe tapweog." Iwe ra noa wooan eew pwoot, nono e neeatosor noa nge erhai mwo iig nge rese nipaeni.

⁴ Enoa taetae aenet, nge Jesus a iu ngaerhen nooamw we, nge rhooan kkayeo kkewe rese aeginna pwe Jesus.

⁵ Iwe a aeiineor pwe, "Mwaaen kkomwun, eyor minne oaw nipaeni?"

Ra iura pwe, "Ese erhai mwo."

⁶ Jesus a aengaenir pwe, "Aerheitiw wuug mwu naimi me peig mwaaenen pwoot na, nge ina nge oawpwe nipaeni aekkaerhai." Iwe ra aerheitiw wuug we wenepeigin pwoot we, nge resa mmwenen taiuw no, pwe a sseog noa reen iig.

⁷ Iwe nge rhooan kkayeo we Jesus egin aerhaengi a aengaeni Peter pwe, "Soamwoon minna!" Igiwe Peter e rongorong pwe Soamwoon miniwe nge e geonitae rhag minikkewe mengaagiun wooan (pwe iwe e aetiwa noa mwo) iwe nge ennus noa nee set.

⁸ Rhooan kkayeo kkewe aaemweoi ra itto mwoarhoisaet rhiun pwoot we, ra pwan tettaiuw nong wuug we pwe iwe a sseog noa reen iig. Rhooawe rese pwan taaw saengi faniuw, maeni epwe epwiugiuw iyaach taaw noar.

⁹ Renoa tiw tae mwoarhoisaet, ra weri aengaet we eyor iig me fenoawa wooan.

¹⁰ Jesus a aengaenir pwe, "Oaw pwigito fitiman iig kkomwu oawnaen nipaeni."

¹¹ Simon Peter a itiwow wooan pwoot we, a noa taiuw nong wuug we a sseogiun iig tettemoag, ina epwiugiuw nimeig me eonurhai nepan; inamwo igiwe a igin sseog nge ese ffeir wuug we.

¹² Jesus a aengaenir pwe, "Oaw itto mwongo." Erhai mwo me neeir rhooan kkayeo kkewe nge ese mmwen pwe repwe aeiineow pwe, "Een iyo?" pwe igiwe re giuneei pwe Soamwoon miniwe.

¹³ Jesus a faaeraeg noa, a noa pwigi fenoawa we nge a ngaenner; a pwan ngaenner iig kkewe.

¹⁴ Iwe a iiei aeinuwaen aaen Jesus pwae ngaenir rhooan kkayeo kkewe weni mwirin aan menaw tae.

Jesus me Peter

¹⁵ Weni mwirin aar moanon mwongo, Jesus a aengaeni Simon Peter pwe, "Simon mwu naiun John, aerhaengerhaeng mwu oamw ngaeniaei, e temoag saengi aar rhooa kkomwu aaemweoi aerhaengiae?"

A paniuwaeni pwe, "Ooa Soamwoon, een wo giuneei pwe ngaang i aerhaengiug."

Jesus a aengaeni pwe, "Aemmwenaar naeyi *sheep*."

¹⁶ Oaruwowwan Jesus a pwan aengaeni pwe, "Simon mwu naiun John, wo aerhaengiae?"

A paniuwaeni pwe, "Ooa Soamwoon, wo giuneei pwe i aerhaengiug."

Jesus a aengaeni pwe, "Aefaennir *sheep* kka naeyi."

¹⁷ Aeinuwan Jesus a pwan aeiineow, "Simon naiun John, wo aerhaengiae?"

A aenneew nee tipaen Peter pwe igiwe a faaen enuuw aaen Jesus aeiineow pwe, "Wo aerhaengiae?" Iwe a aengaeni pwe, "Soamwoon, wo giuneei oanongaen meeta, wo giuneei pwe i aerhaengiug!"

Jesus a aengaeni pwe, "Aemmwenaar *sheep* kka naeyi."

¹⁸ Ennetaan, ipwe aengaenig minna wenewenen: oatowe worhiuwen anian, wopwe memmengaag tae rhag nge wonoa ese tiwegian igine wopwe noa ee; nge iga wa tugufaeyi, ina wopwe aeti wow poawumw nge erhai a geoniug noa a wummwug noa igma wose mwerhaen wopwe noa ee."

¹⁹ (Jesus e aepesa minneei, pwe e aeffeta noa epwe ifa wusun aaen Peter epwe mae nge epwe fang ngaeni Deus minna nningan.) Iwe nge Jesus a aengaeni pwe, “Tapweto mwiriy!”

Jesus me Rhooan Kkayeo we Egin Aerhaengi

²⁰ Peter e toagun sefaaen mwirin nge a weri rhooan kkayeo we erhai iwe Jesus e igin aerhaengi—iwe e aepwaenaeg ngaeni Jesus nupwaen aar mwongoon faaef nge a aeiineow pwe, “Soamwoon, iyo epwene fangoa tinnimaem?”

²¹ Igiwe Peter eweri, iwe a aeiineow Jesus pwe, “Soamwoon, nge eifa wusun mwaaen een?”

²² Jesus a paniuwaeni pwe, “Ngaere imwerhaen pwe epwe no toori aaei noa sefaaeneto, nge pwan meeta faan ngaeniug? Een tapweto mwiriy!”

²³ Iwe a teeo fetaen kkepas neei rhooawe rhoaniwaen Jesus pwe rhooan kkayeo we nge esoapw mae noa. Nge Jesus ese iura pwe esoapw mae; pwe e iura pwe, “Ngaere imwerhaen pwe epwe no toori aaei noa sefaaeneto, nge pwan meeta faan ngaeniug?”

²⁴ Iiy rhooan kkayeo we minne e aepesa minikkei, iiy minne e foatogin tiw; iwe nge si giuneei pwe minikka e aepesa nge ikka e wenewen.

Amwiucchiun

²⁵ Iwe nge epwan igin ssow aekkaew minikka Jesus epwan feeori. Iwe ngaere igine oanongan nge foatofoatotiw, iwe nge maeni faeinaengiy mwo nge esoapw faer iiy pwapwior kenaan noan.